陳寅恪集

獨立之精神自由之思想

店

将代政治建

唐代政治史 陳寅恪集

稿論稿

述源

·讀書·新知 三聯

書店

Copyright © 2015 by SDX Joint Publishing Company All Rights Reserved. 本作品版權由生活·讀書·新知三聯書店所有未經許可,不得翻印。

圖書在版編目 (CIP) 數據

陳寅恪集. 隋唐制度淵源略論稿·唐代政治史述論稿/ 陳寅恪著. 一3 版. 一北京: 生活·讀書·新知三聯書店, 2015.7

ISBN 978-7-108-05403-6

I. ①陳··· Ⅱ. ①陳··· Ⅲ. ①陳寅恪 (1890 ~ 1969) - 文集 ②政治制度 - 研究 - 中國 - 隋唐時代 Ⅳ. ① C52 ② D691.2

中國版本圖書館 CIP 數據核字 (2015) 第 131962 號

封面所用拓片文字節自一九二九年立於清華大學內 王國維紀念碑碑銘(陳寅恪撰文,林志鈞書丹)

定字印 開 版 印 出版發行 陳寅恪集編者 責任印制 版式設計 封扉設計 責任編輯 次 刷 生 北京市東城區美術館東街二十一 寧成春 陸智昌 六三五毫米×九六五毫米 新華書店 孫曉林 鸿博昊天科技有限公司 一四六千字 ō 一○九年九月北京第二 五、〇〇 O 活 000 一五年七月北京第三版 岳 陳美征 一五年七月北京第七次印刷 讀 一年四月北京第 書 潘振平 = -, 印張 二十二 七五 新 知 000# 一聯書 版 一號 店



心原

陳寅恪(一八九〇——一九六九),江西修水人。早年留學日本及歐美,先後就讀於德國柏林大學、瑞士 先後任教於西南聯合大學、香港大學、廣西大學和燕京大學。一 及故宮博物院理事等, 九四二年後為教育部聘任教授。一九四六年回清華大學任教。一九四八年南遷廣州, ,一九五二 後任清華大學中文、歷史系合聘教授,兼任中央研究院理事 一年後為中山大學教授。一九五五年後并為中國科學院哲學社會 法國巴黎高等政治學校和美國哈佛大學。一九二五年受聘清華學校研究院導 其後當選為中央研究院院士。一九三七年 九四四年被選為英國科學院通 蘆溝橋事變」後挈全家離 歷史語言研究所研究員 科學學部委員 任嶺南大學教 第一 師, 北 訊院 平 組主 回國 南 任 任

館叢稿二 陳寅恪集十三 據三聯書店 詩集(原名陳寅恪詩集附唐賞詩存)和讀書札記一集(原名陳寅恪讀書札記舊唐書新唐書之部)八九十年代 編 種十四 版社 隋唐 一九五七年版重印),内容基本不變。 出 制度淵源略論稿、 版。 m 收入了現在 此次出版以上海古籍版為底本 唐代政治史述論稿 所能找到的作者全部著述。 惟寒柳堂集增補了 元白詩箋證稿 隋唐制 其中 度淵源略論稿 寒柳 寒柳 柳如是 堂 集、 堂記夢 人別傳七 唐代 金明館叢 政治史述 未定稿 種 稿 初編 十年 論 補 稿二 書 曾

分別由清華大學出版社和上海古籍出版社出版,此次出版均有增補。 講義及雜稿四種均為新輯。 全書編輯體例如下: 書信集、 讀書札記二集、 讀書札記

一、所收内容, 已發表的均保持發表時的原貌。經作者修改過的論著, 則採用最後的修改本。 未刊稿主

要依據作者手跡錄出。

校核, 述係針對原版本而來, 二、本集所收已刊、 如二十四史、 資治通 未刊著述均予校訂, 則引文原貌酌情予以保留。 鑑等。 尚無點校本行世的史籍史料, 凡體例不一或訛脫倒衍文字皆作改正。 以上改動均不出校記 大多依通行本校核。 引文一般依現行點校本 少量作者批語

三、凡已刊論文、 序跋、 書信等均附初次發表之刊物及時 間 未刊文稿盡量注明寫作時間。

保留少數異體字。引文中凡為閱讀之便而補入被略去的内容時,補入文字加〔〕,凡屬作者說明性文 四、根據作者生前願望, 全書採用繁體字豎排。 人名、 地名、 書名均不加符號注明。 一般採用通 行字,

助。 陳寅恪集的出 在此 謹向所有關心、 版曾得到季羨林、 支持和參與了此項工作的朋友表示衷心的感謝, 周一良、李慎之先生的指點, 並獲得海內外學術文化界人士的熱情相 並誠懇地希望廣大讀者批評

指正

字則加()。

原稿不易辨識的文字以□示之。

生活・讀書・新知三聯書店二〇〇〇年十二月

講養及雜稿 讀書札記二集 讀書札記三集

詩集附唐質詩存

寒柳堂集 金明館叢稿初編 金明館叢稿二編 唐代政治史述論稿 元白詩箋證稿



影- 後排左起: 陳新午、喻婉芬(隆恪夫人)、陳小前排左起: 陳三立、俞方濟(新午子)、陳小前排左起: 陳三立、俞方濟(新午子)、陳小東寅恪與,諸兄妹陪同父親游北平

陳寅恪

陳小從(隆恪女)、黄國巽(衡恪夫人)、陳隆恪、



一九三九年暑假

合影 與幼女美延(左)、次女小彭(右)



一九四○年一九四○年



左起::小彭、美延、唐篔、流求、寅恪一九四一年夏

陳寅恪全家攝於香港九龍太子道三

不品回之前

卷第十二

凡一十

四 條 定以應改張之議奏聞若不申尚書省議輒即

被

唐

律

磁

磁

月婚

事附之名為婚戶律隋開皇以戶在婚前改為戶 戶婚上

在任者雖脫戶及計口多者各從漏口法 すむを下十し攻在最先三茂一事が為一三不者減二等徒二年若戶內並無男夫直以女人為 疏議曰率土黔庶皆有籍書若一戶之內盡脫漏 脱戶者家長徒三年無課役者減二等女戶又減

教力北京和 も物情事

財

然上 卷

凡

-十八條 第

监符可無別出如頗姦盜一準凡入得罪弟子

弟子私取用者即同同居卑幼私輒用財

議員人太廟門及山陵北域門者徒二年間謂不 議員人太廟門及山陵北域門者徒二年間謂不 之法禁者目關禁為名但敬上防非於事尤重自宋泊于後周此名並無所改至於北齊將關

守應入出者悉有名籍不應入而入為關入各

見於 唐律 疏議 唐制度 書陳寅恪批語: 淵 源略論稿 四刑 亦

唐代改次史非日福

陳重林授

九四一年

稿」(後易名為「唐代政治史述論陳寅恪手寫清稿「唐代政治史略

東京書園部三本東田 自 1 年 八月 東京 即長 有時所後 解言 年常在 京清情礼,京京荒野以游之,假于以下亭 远望,行言济州和京京建居,百度,在京、野道,前时所之一日 連中室 校,更要信言,即到五年 古,年村进祖人担事,而 京用以倒,谓山云、里, 中室、村,更通过实祥,即到五年 古,年村进祖人担事,而 京用以侧,谓山云、

申楊安奉文助→ 前通信在采用之小说言衛公事多少申楊安奉文明題前語也又想前題以敬重他務與入相宣及心方進退之明題前語也又想前題以敬重他務與入相宣及心方進退之明題前語之及問法不同立其所所文軍武官內周可支以前述的 看到多人就是除此意使我一直被我们是我们的现在,是有相称的是我们的现在。是有相称,是却用答领别的致也。

土城官,夜日後千世子前以蘇名指之人安草例等以称之主日,即通禮食群改有目日三年五月五家以勒廷等里人相之主日,即通禮食群改有目日三年五月五家以勒廷等

不敢讀事是居者无之以此由別楊楊枝在敢舊相極管皆不之知時極密使創行深獨使引持官屋然

是我们看以原感要關不敢干我命招之事,則之健之入此,是我们為以原感要相不敢干我命招之事,則之就自以班去中意一面是女郎,則得除之國子仙年民血弘志一流自以班去中意一面是女郎,則是玄國传,万以推知,考其時間弘之一是我们為以原感要看相不敢干我命招之事,則之健之入是我们為以原感要看相不敢干我命招之事,則之健之入是我们為以原或也。

唐代政治史略稿」手寫清稿正文

隋唐 制度淵源器論 稿

唐質題寫

隋唐制度淵源略論稿 唐代政治史述論稿 | 七七

下篇	中篇	上篇
外族盛衰之連環性及外患與内政之關係 三	政治革命及黨派分野	統治階級之氏族及其升降
=	=	八

1	七	六	五	四	三		\equiv	_	
附論	財政	兵制	音樂	刑律	職官	附:	禮儀	叙論	
一七五			一二八		九	都城建築	······································		

體, 確創 學之參考, 合舊籍所載 南暨交趾 傳世將三百年,而楊隋享國為日至短,兩朝之典章制度傳授因襲幾無 並 獲之研究甚 而 舉合論 其文頗多重 匪敢言 東至 及新出遺文之有 ,此不待煩言而解者。 日 非 易事 能補 本, 複, 近歲雖 西極中 夫隋 關 隋 有新出遺文, 亞 唐 唐 兩 而迄鮮 兩 朝為 獨其典章制度之資料今日得以依據以 朝制度者, 吾國 通論其 足資補證, 然其關係, 中 古 淵源 分析其因子, 極盛 流變之專書, 之世,其文物制度流傳廣播 推論 其 則吾 重要者實亦至少, 故欲 八源流, 國史學之缺 討 不同, 成此一 論 故可視 書, 憾也。 僅傳世 北逾大漠 聊 供 為

也。 隋唐之制 自東晉至 [(西)魏 其在舊史往往以「漢魏」制度目之, 南 度雖極廣博紛複, 齊其 周。所謂(北)魏、(北)齊之源者,凡江左承 間 所發展變遷 然究析其因素, 而為北 實則其流變所及, 魏孝文帝及其子 不出三源:一曰(北)魏、(北)齊,二曰梁 孫摹仿採用,傳至北齊 襲漢 不止限於漢魏, 魏、 西晉之禮樂政刑典章文物 而東晉南 成一大結集者是 朝前半期俱 陳,

IE

前賢之關失

也

物 源者 實 不及, 收 朝前半 包 隋唐繼 制度者, 不可不詳論者也。 隅 採 括 口)晉之遺 在 兼 其影響, 而産 用 如 内。 府 N 該 故魏孝文及其子孫未能採用, 至 期之文物 承(西)魏 西 北 兵 實較微末。 生之混合品。 陳 而傳之於李唐者, 舊 風 魏 制 制 魏 故此 史又 取 即 制 若 北周 其 蓋 凉 所謂梁陳之源者, 就地 度皆 陳之 州, 或以 周之遺業, 北 故在 例 之創作有異於山東及江左之舊制 魏 /繼梁, 也 所有舊史中關隴之新創設及依託周官諸制度皆屬此 而河 屬 域言之, Ш 於此 三源之中, 易言之, 東」目之者, (北)齊之源其中亦有 西文化遂輸 其典 範圍 遂不能辨析名實真偽, 乃 章 也。 關隴 而北 即南朝後半期内其文物制度之變遷發展乃王肅等輸入之所 凡梁代繼承創作陳氏因襲無改之制度, 此(西)魏、周之源遠不如其他二源之重要。 制度多因仍不改 又西 則以 入於魏, 區內保存之舊時漢族文化, 齊之一大結集中 晉永嘉之 Ш 東之地指 其後北 河西之一支派 往往於李唐之法制誤認為(西)魏 亂 其事 魏孝文、 北 或陰 -遂無此 齊言, 中 舊 原 為六鎮鮮卑 史言之詳矣。 魏 斯則 宣 晉以 凡 因 武 北 素者也。 所適 前 降之文化 兩代所製定之典 齊 人所 承 應鮮 類, 襲 之野 迄 楊 所謂 舊史所稱之 未深措意 元 卑六 其影響及於隋 轉 魏 俗 然後世 隋 移 所 西 統 鎮勢力之環 保 採 或 ()魏、 章 用 存 遠 史家以 周之遺 中 而 制 於 東 梁制 承 今日 度遂 或 涼 晉南 唐 吸

此

書本為供初學讀史者參考而作,

其體裁若與舊史附麗,

則於事尤便,

故分別事

類

序次

可表 後, 見新 約 略 知之創獲 酌 隋 唐 更志 博識 及通 通人幸勿以童牛 典、 唐會 要諸 角馬 書, 見責 而 稍 也。 為增 省分合, 庶幾不致盡 之規模,

亦

又此 天竺著述體例固如 大智度論序及大智度論記。 麗證者, 謹附識 (書微倣天竺佛教釋經論之例,首章備致詳悉,後章則多所闕略(見僧祐書三藏 如三源中諸人之家世地域等,則於後諸章不復詳及,實則後章所討 於叙論之末,以見此書之體制 是也,後人於此殊多誤解,以其事非本書範圍,故不詳論)。故於前禮 寅恪案 鳩摩羅什譯經雖 焉。 有刪煩,然於大智度論實未十分略 論仍與之有關 集記 記 拾 僧 叡 九 儀

一禮 儀附:都城建築

舊籍於禮儀特重, 記述甚繁, 由今日觀之, 其制度大抵僅為紙上之空文, 或其影響所屆, 於少數特殊階級, 似可不必討論,此意昔賢亦有論及者矣。如新唐書壹壹禮樂志云:

拜俛伏興之節,皆有司之事爾,所謂禮之末節也。然用之郊廟朝廷,自搢紳大夫從事其間 以教民。」此所謂治出於二,而禮樂爲虚名。故自漢以來史官所記事物名數、降登揖讓、 代已亡,遭秦變古,後之有天下者,自天子百官、名號位序、國家制度、宫車服器,一切 用秦。至於三代禮樂具其名物,而藏於有司,時出而用之郊廟朝廷,曰:「此爲禮也,所 由三代而上,治出於一,而禮樂達於天下,由三代而下,治出於二,而禮樂爲虚名。

又歐陽文忠公集附歐陽發等所述事蹟

者皆莫能曉習,而天下之人至於老死未嘗見也。

悉壞漢儒災異附會之說,皆出前人之所未至。 其於唐書禮樂志發明禮樂之本,言前世治出於一,而後世禮樂爲空名;五行志不書事應

寅恪案:自漢以來史官所記禮制止用於郊廟朝廷,皆有司之事,歐陽永叔謂之為空名,

誠是

]。沈垚落颿樓文集捌與張淵甫書云:

禮家精粹之言。至明士大夫皆出草野,與古絶不相似矣。古人於親親中厲貴貴之意,宗法 六朝人禮學極精, 唐以前士大夫重門閥, 雖異於古之宗法, 然與古不相遠, 史傳中所載多

切,而士大夫階級又居當日極重要地位,故治史者自不應以其僅為空名,影響不及於平民, 寅恪案:禮制本與封建階級相維繫,子敦之説是也。唐以前士大夫與禮制之關係既如是之密 建相維。諸侯世國,則有封建,大夫世家,則有宗法。

通鑑壹柒陸陳紀至德三年條云: 忽視之而不加以論究也。

隋主命禮部尚書牛弘修五禮, 勒成百卷, [正月]戊辰韶行新禮。

隋書壹高祖紀上(北史壹壹隋本紀上同)云: 開皇五年春正月戊辰韶行新禮。

書貳高祖紀下(北史壹壹隋本紀上略同)云:

百

書奇章公牛弘、内史侍郎薛道衡、祕書丞許善心、内史舍人虞世基、著作郎王劭或任居端 仁壽二年閏[十]月己丑韶曰:「尚書左僕射越國公楊素、尚書右僕射邳國公蘇威、吏部尚

二禮

儀

博達古今,或器推令望,學綜經史,委以裁緝,實允僉議,可並修定五禮。」

同書陸禮志總序略云:

梁武始命羣儒裁成大典,陳武克平建業, 高堂生所傳士禮亦謂之儀, 泊西京以降, 多準梁舊。 用相裁準。 黄初之詳定朝儀, [隋]高祖命牛弘、 辛彦之等採梁及北 則宋書言之備矣。

通典肆壹禮典序(參南齊書玖禮志序及魏書壹佰捌禮志序)略云:

齊儀注,以爲五禮云。

魏以王粲、衛覬集創朝儀,而魚豢、王沈、陳壽、孫盛雖綴時禮,不足相變。晉初以荀 顗、鄭沖典禮,參考今古, 更其節文。羊祜、任愷、庾峻、應貞並加刪集, 成百六十五

緝舊文,蔡謨又踵修綴。宋初因循,前史並不重述。齊武帝永明二年韶尚書令王儉製定五 後擊虞、傅咸纘續未成,屬中原覆没,今虞之決疑注是其遺文也。 江左刁協、荀崧補

遺:孝文帝率由舊章,擇其令典,朝儀國範焕乎復振。隋文帝[命]牛弘、辛彦之等採梁及 禮。至梁武帝命羣儒又裁成焉。陳武帝受禪,多準梁舊。後魏道武帝舉其大體, 事 多闕

隋書叁叁經籍志史部儀注類梁賓禮儀注九卷賀瑒撰注

北齊儀注,以爲五禮。

案梁明山賓撰吉儀禮注二百六卷,録六卷,嚴植之撰凶儀注四百七十九卷,録四十五卷;

Z :

陸璉撰軍儀注一百九十卷,録二卷;司馬褧撰嘉儀注一百一十二卷,録三卷;並亡。存者

唯士吉及賓合十九卷。

後齊儀注二百九十卷。 がは 100mm 100mm

隋朝儀禮一百卷,牛弘撰。

魏書伍玖劉昶傳(北史貳玖劉昶傳同)略云: 劉昶,義隆第九子也,義隆時封義陽王,和平六年間行來降。於時(太和初)改革朝儀, 昶與蔣少游專主其事。昶條上舊式,略不遺亡。

口

故。景明二年卒。少游又爲太極立規模,與董爾、王遇參建之,皆未成而卒。 書玖壹術藝傳蔣少游傳(北史玖拾藝術傳蔣少游傳同)略云: 將營太廟太極殿,遣少游乘傳詣洛,量準魏晉基址。後爲散騎侍郎,副李彪使江南。 昶,二意相乖,時致諍競,積六年乃成,始班賜百官。冠服之成,少游有效焉。後於平城 蔣少游,樂安博昌人也。慕容白曜之平東陽,見俘入於平城,充平齊户,後配雲中爲兵。 具。及華林殿沼修舊增新,改作金墉門樓,皆所措意,號爲妍美。又兼太常少卿,都水如 及韶尚書李沖與馮誕、游明根、高間等議定衣冠於禁中,少游巧思,令主其事,亦訪於劉 以其多有思力,除都水使者,遷前將軍,兼將作大匠,仍領水池湖泛戲舟檝之

同書柒高祖紀下(北史叁魏本紀同)云:

[太和]十年八月乙亥給尚書五等品爵已上朱衣玉珮大小組綬。

以前, 寅恪案:劉昶、蔣少游俱非深習當日南朝典制最近發展之人,故致互相乖諍。其事在太和十年 即北史肆貳王肅傳所謂「其間朴略, ,未能淳」者。至太和十七年王肅北奔,孝文帝虚襟相

魏書肆叁房法壽傳附族子景伯景先傳(北史叁玖房法壽傳附景伯景先傳同)略云:

待,蓋肅之入北實應當日魏朝之需要故也。

法壽族子景伯, 高祖諶避地渡河,居於齊州之東清河繹幕焉。顯祖時三齊平, 随例内徙爲

平齊民。景伯性淳和,涉獵經史。

贍。 常劉芳、侍中崔光當世儒宗,歎其精博,光遂奏兼著作佐郎,修國史,尋除司徒祭酒員外 景先幼孤貧 郎。侍中穆紹又啓景先撰世宗起居注,累遷步兵校尉,領尚書郎齊州中正,所歷皆有當官 太和中例得還鄉,郡辟功曹, 無資從師,其母自授毛詩曲禮。畫則樵蘇, ,州舉秀才,值州將卒,不得對策, 夜誦經史, 自是精勤, 解褐太學博士。 遂大通 時太

北史貳肆崔逞傳附休傳(魏書陸玖崔休傳同)略云

之稱。景先作五經疑問百餘篇,其言該典,今行於時。

休曾祖諲仕宋,位青冀二州刺史,祖靈和宋員外散騎侍郎,父宗伯始還魏。孝文納休妹爲

魏書伍伍劉芳傳(北史肆貳劉芳傳同)略云:嬪,兼給事黄門侍郎,參定禮儀。

「推禮經正文,古者男子婦人俱有笄。」高祖稱善者久之,肅亦以芳言爲然。酒闌, 重,朝野屬目,高祖宴羣臣於華林,肅語次云:「古者唯婦人有笄,男子則無。 青齊,梁鄒降,芳北徙爲平齊民,時年十六。南部尚書李敷妻司徒崔浩之弟女,芳祖母浩 舅元慶爲劉子業青州刺史沈文秀建威府司馬,爲文秀所殺,母子入梁鄒城。慕容白曜南討 州長史。芳出後伯父遜之。邕同劉義宣之事,身死彭城,芳隨伯母房逃竄青州, 博聞强記,兼覽蒼雅,尤長音訓,辨析無疑,於是禮遇日隆。王肅之來奔也, 芳修正,於是朝廷吉凶大事皆就諮訪焉。 高祖自襲斂暨於啓祖、山陵、練除始末喪事皆芳撰定。出除安東將軍青州刺史,還朝議定 俱出, 肅執芳手曰:「吾少來留意三禮, 在南諸儒咸共討論, 皆謂此義如吾向言, 之姑也。芳至京師, 詣敷門, 崔恥芳流播, 拒不見之。(中略)。芳才思深敏, '頓祛平生之惑。」芳義理精通,類皆如是。高祖崩於行宫,及世宗即位,芳手加衮冕, 芳斟酌古今,爲大議之主,其中損益多芳意也。世宗以朝儀多闕,其一切諸議悉委 彭城人也。六世祖訥晉司隸校尉,祖該劉義隆征虜將軍青徐二州刺史,父邕劉駿兖 高祖雅相器 特精經義 一芳日 會赦免。

百 書陸柒崔光傳(北史肆肆 崔光傳同)略云

齊,光年十七,隨父徙代。 東清河郁人也。 父靈延劉駿龍驤將軍長廣太守, 祖曠從慕容德南渡河, 與劉彧冀州刺史崔道固 居青州之時水, 共拒 慕容氏滅, 國軍。 仕劉 慕容白曜之平三 義隆爲

曰:「以崔光之高才大量,若無意外咎譴,二十年後當作司空。」其見重若是。

[後] 遷中書侍郎、

給事黄門侍郎,

甚爲高祖所知待。

高祖每對

典章文物,而二人適值其會,故能拔起俘囚,致身通顯也。 寅恪案:劉芳、崔光皆南朝俘虜,其所以見知於魏孝文及其嗣主者,乃以北朝正欲摹倣南朝之

北齊書貳玖李渾傳附繪傳(北史叁叁李靈傳附繪傳同)略云:

司徒 高邕辟爲從事中郎, 徵至洛時勅侍中西河王祕書監常景選儒學十人緝撰 五禮, 惟繪與

太原王 **火掌軍**

寅恪案:隋志不載常景撰修之五禮,

惟舊唐書肆陸經籍志史部儀注類有後魏儀注三(疑五之誤

洛之末年,可謂王肅之所遺傳,魏收之所祖述,在二者之間承上啟下之産物也。 十二卷,常景撰;新唐書伍捌藝文志史部儀注類有常景後魏儀注五十卷。常景之書撰於元魏都

明隋志之淵源也。 又史志所謂後齊儀注者 即南朝前期文物變相之結集,故不可不先略述北齊修五禮之始末,以

北齊書叁柒魏收傳(北史伍陸魏收傳同)略云:

隋 書伍柒薛道 除尚 書右僕射 衡傳 (北史叁陸薛辯傳附道衡傳同 總議監五禮事, 多引文士令執筆,)略云: 儒者 馬 敬德、 熊安生、 權會實主之。

武平初,韶與諸儒修定五禮。

所修亦 制 兩朝禮制因襲之證此其一也。 :: 不過太和遺 齊 後主時所修之五禮當即隋志之後齊儀注二百九十卷, 緒 而已, 所可注意者, 則薛道衡先預修齊禮, 後又參定以齊禮為根據之隋 鄴都典章悉出洛陽, 故 武

其 儀 所引舊籍綜合論之, 隋文帝繼承宇文氏之遺業, 其制定禮儀則不依北周之制 所繼 所謂 注。 以闡 於此 承漢 後齊儀注即 所謂梁禮並 明 先不涉及。惟北齊儀 隋制 魏、 西晉之遺産, 淵源之所從出。前已略述北齊制禮始末, 北 可概括陳代, 魏孝文帝摹擬採用南朝前期之文物 以陳禮幾全襲梁舊之故, 注即南朝前期文物之蜕嬗, 而在江左發展演變者也。 陳因 制度, 亦即 其關 故茲專論王肅北 梁舊, 梁陳以降 易言之,則為自 鍵 實在王 史志 南朝 所載 肅之北 後 奔與北朝 別採梁 以期之典 甚 東晉 明, 當於 迄南 禮及 其 章文

北史肆貳王肅傳略云

制

度之關

係

焉

王肅, 琅邪臨沂人也。父奂及兄弟並爲(南)齊武帝所殺, 太和十七年肅自建業來奔。 禮樂崩亡,孝文雖釐革制度, 變更風俗,其間朴略, 未能淳也。肅明練故事, 自晉 虚

魏書陸叁王肅傳略云:

心受委,朝儀國典咸自肅出。

南齊書伍柒魏虜傳略云: 肅自謂禮易爲長, 亦未能通其大義也。

陳 書貳陸徐陵傳(南史陸貳徐摛傳附陵傳同)略云: 佛狸已來,稍僭華典, 胡風國俗雜相揉亂, 王肅爲虜製官品百司,皆如中國。

由徐常侍來。」陵即答曰:「昔王肅至此,爲魏始製禮儀;今我來聘,使卿復知寒暑。」收 太清二年兼通直常侍使魏。魏人授館宴賓,是日甚熱,其主客魏收嘲陵曰:「今日之熱當

通鑑壹叁玖齊紀武帝永明十一年冬十月王肅見魏主於鄴條云:

議興禮樂,變華風 魏主或屏左右, 與肅語至夜分不罷,自謂君臣相得之晚。尋除輔國大將軍長史。時魏主方 威儀文物多肅所定。

隋書捌禮儀志述隋喪禮節

存魏晉殘餘之文物外, 寅恪案: 能供給孝文帝當日所渴盼之需 變更風俗 如劉昶之倫 史肆 直接中心及知南朝最近發展之人物與資料可以依據, 不獨與江 儀禮百卷, 未詳定。今休明啓運,憲章伊始, 隔,殊不尋究,遥相師祖,故山東之人,浸以成俗。 未足經國 開皇初高祖思定典禮, 貢 魏孝文帝之欲用夏變夷久矣, 唐制度不祧之遠祖者,蓋別有其故也。 劉芳 其間 就廬非東階之位, 庇 左 朴略, 傳), 可以略窺自典午南遷以後江左文物制度。 悉用東齊儀注以爲準, 口 時 弘風施化。 倫輩相較, 而卒能將 尚有文成帝略取青齊時所俘南朝人士如崔光、 未能淳」者是也。魏孝文帝所以優禮王肅固別有政治上之策略, 太常 求, 要為其最大原 南朝前期發展之文物制度轉輸 斷非江左第一流, 且制禮作樂, 凶門豈重設之禮, 卿牛弘奏曰 在王肅未北奔之前亦已有所興革。 亦微採王儉禮,修畢上之, 請據前經,革茲俗弊。」詔曰:「可!」弘因奏徵學者撰 事歸 考南齊書貳叁王儉傳云 聖教陵替, 因。 且亦出北朝當日青齊俘虜之下(見魏 元首, 兩蕭累代 夫肅在當日南朝雖為膏腴士 此北史王肅傳所謂 然究屬依稀恍忽, 西魏已降, 江南王儉, 國章殘缺, 於北 舉國遵行。 韶遂班天下, 朝以開太和時代之新文化 劉芳、 偏隅 師旅弗遑, 嘉賓之禮, 漢晉爲法, 然當日北朝 後魏 臣, 皆從間接得來, 蔣少游等及宋氏 「孝文雖釐革制度, 咸使遵用焉。 及齊, 私 族,論 撰 隨 除其所 儀 俗 但肅之 風牛 注 因 其 逋

少撰古今喪服記并文集,並行於世。

又南史貳貳王曇首傳附儉傳(參通鑑壹叁陸齊紀永明三年條)云:

先是宋孝武好文章, 天下悉以文采相尚, 莫以專經爲業。 儉弱年便留意三禮,

造次必於儒教,

以當朝理事斷決如流,每博議引證,先儒罕有其例, 儉抄爲八帙, 又别抄條目爲十三卷, 由是衣冠翕然, 朝儀舊典晉末來施行故事撰次諳憶無遺 並尚經學, 八坐丞郎無能異者。 儒教於此大興。 何承天禮論三百 漏

文選肆陸任昉王文憲集序云:

自宋末艱虞, 素意所不蓄,前古所未行,皆取定俄頃, 百王澆季, 禮紊舊宗, 樂傾恆軌, 神無滯用。 自朝章國記 典彝備物, 奏議符策,文辭

歲為北魏太和十七年,即南齊永明十一年,在儉卒以後,是肅必經受其宗賢之流 據此 盛 仍不能不採儉書,蓋儉之所撰集乃南朝前期制度之總和, 遂能抱持南朝之利器,遇北主之新知,殆由於此歟?牛弘詆斥王儉,而其所修隋朝儀禮, 故掌故學乃南朝 所以弘雖由政治及地域觀點立論,謂「後魏及齊,風牛本隔」,然終於「遙相師祖,故山東 王儉以熟練自晉以來江東之朝章國故, 一時風尚也。 仲寶卒年為永明七年(見南齊書、 著名當時。 其喪服記本為少時所撰, 既經王肅輸入北朝,蔚成太和文治之 南史儉本傳), 風遺著所薰 王肅 久已流 北 行於 奔之

江左, 浸以成俗」也。又史言弘「撰儀禮百卷,悉用東齊儀注以為準」,而奇章 可謂數典忘祖,無乃南北之見有所蔽耶?或攘其實而諱其名耶?茲舉一例以證之: 反譏前人之取法

隋書肆玖牛弘傳(北史柒貳牛弘傳同)云:

仁壽二年獻皇后崩,王公以下不能定其儀注。楊素謂弘曰:「公舊學,時賢所仰,今日之

事決在於公。」弘了不辭讓,斯須之間儀注悉備,皆有故實。素歎曰:「衣冠禮樂盡在此

矣,非吾所及也。」

若僅據此傳,似獻后喪禮悉定自弘,而「斯須之間儀注悉備」,所以楊素有「禮樂盡在此矣」之

及檢北史叁捌裴佗傳附矩傳(隋書陸柒裴矩傳略同)云:

其年(仁壽二年)文獻皇后崩,太常舊無儀注,矩與牛弘、李百藥等據齊禮參定。

也(見北史隋書裴矩傳及舊唐書柒貳、新唐書壹佰貳李百藥傳)。楊素之讚歎,始由弘諱言其 始知弘之能於斯須之間决定大禮者,乃以東齊儀注為依據,且所與共參定之人亦皆出自東齊者

實,而素又不識其底蘊耶?

又通鑑壹柒玖隋紀文帝仁壽二年條云:

閏[十]月甲申韶楊素、 蘇威與吏部尚書牛弘修五禮。

寅恪案:隋書、北史載文帝韶修五禮,在是年閏十月己丑,連接此前之一條即「甲申韶尚書左

二禮

儀 涌 僕射楊 盤補 注為準 家與諸術者刊定陰陽舛謬」條,今通鑑以修五禮之詔移置甲申, 正及章鈺通鑑正文校宋記俱未之及)。更可注意者, 則隋志明言弘等之修五禮悉以 乃最 抗要之語,而溫公不採及之,似尚未能通解有隋一代禮制之大源, 頗疑有所脱誤也(嚴衍 殊可惜也。

隋書裴矩傳中之裴矩, 壹隋本紀仁壽二年閏十月韶書中所命修定五禮諸臣及其他與制禮有關之人, 又隋代制禮諸臣其家世所出籍貫所繫亦可加以推究, 一)(北)魏、(北)齊, 隋書柒伍北史捌貳儒林傳之劉焯、劉炫及兩唐書李百藥傳中之李百藥, (二)梁陳, (三)(西)魏 北)周之三源者。 藉以闡明鄙意, 請據隋書貳 即前章所言隋唐制度出 如前引北史裴佗傳 高 祖紀及北 史壹

以恆例言之, 乃虛名, 隋書貳高祖紀下仁壽二 一年閏十月己丑詔書所命修撰五禮之楊素、 非實務也。 然素與威二人間仍有區別, 亦未可以一概論。 蘇威俱以宰輔 資位攝領修禮 隋書肆捌楊素

逐

討論於下

(北史肆壹楊敷傳附素傳同)雖云:

然隋書肆壹蘇威傳(北史陸叁蘇綽傳附威傳同)則云:後與安定牛弘同志好學,研精不倦,多所通涉。

夫修撰五禮即斟酌古今之事, [祖)因謂朝臣曰:「楊素才辯無雙,至若斟酌古今,助我宣化,非威之匹也。」 文帝既不以此許素,則素之得與此役,不過以尚書左僕射首輔之

資位監領此大典而已。故關於楊素可置不論。

斟酌古今特獎威 至於蘇威 雖與楊素同以宰輔之職監領修撰,但事有殊異,可略言之。 則威之與聞修撰 匪僅虛名監領, 可以推知。又隋書蘇威傳(北史略同)云: 據前引史文, 隋文帝既以

典,律令格式多威所定,世以爲能。所修格令章程並行於當世,然頗傷苛碎,論者以爲非 减賦稅,務從輕典,上悉從之。隋承戰争之後,憲章踳駮,上令朝臣釐改舊法,爲一代通 俄兼納言民部尚書。初威父[綽]在西魏以國用不足,爲征稅之法,頗稱爲重, 今所爲者正如張弓, 非平世法也。後之君子誰能弛乎?」威聞其言, 每以爲己任, 至是奏 既而歎曰:

凡此 不得同論 (史文其意固多指威之修定律令, 但禮律關係至密。威本西魏蘇綽之子, 綽為宇文泰創制 實一代典章所從出。威既志在繼述父業,文帝稱其斟酌古今,必非泛美之詞, 而威之預知修禮, 亦非止尸空名絕無建樹者之比無疑也。考周書貳叁蘇綽傳(北史 故威之與素 立

陸叁蘇綽傳同)云:

蘇綽,武功人,魏侍中則之九世孫也,累世二千石。父協武功郡守。綽少好學,博覽羣 有知者,或曰:「蘇綽博物多通,請問之。」太祖乃召綽,具以狀對,太祖大悦。 屬太祖(宇文泰)與公卿往昆明池觀魚,行至城西漢故倉地, 顧問左右,莫

弛 此 節 决非 為史記蘇綽之所以遇合宇文泰之一 博士傳 宗教皆與家族 偶然。 授之 適值泰以少數鮮卑化之六鎮民族竄割關隴 風氣止息以後, 學術中心移於家族 地域兩點不可分離。 綽本關中世家, 段因緣, 實可藉以覘古今之變遷。 而家族復限於地域, 隅之地, 必習於本土掌故, 而欲與雄據 故魏、 蓋自漢代學校 其能對宇文泰之 晉、 Ш 東之高歡 南 北 制 朝之 度廢 及

承江

左之蕭氏爭霸

非別樹

幟

以關中

地域為本位

融冶胡漢為

一體

以自

別於洛陽

建

霸業, 氏父子之事業於三源内之第 地 東或江 域觀念及魏晉家世學術附合鮮卑六鎮之武力而得成就者也。故考隋唐制度淵 號召 陵文化勢力之外, 其創制終為後王所捐棄, 竊取六國陰謀之舊文緣飾 則無以堅其羣衆自信之心理。 三源 即(西)魏、 或僅名存而實亡, 寒表鮮卑之胡制 周源中, 豈無故哉! 質言之,蘇氏之志業乃以關 非驢非馬 此綽所以 其事顯明, 自不待論。 依託 取給 關 一時 中之地 雖 能輔 源者應置 域 成字 以繼 文氏之 武 述成 功 中

隋書肆玖牛弘傳(北史柒貳牛弘傳略同)略云:

牛弘, 氏。 開皇初 安定鶉觚 弘 人也。 遷授散騎常侍祕書監。 寇竊競興, 本姓奈氏 因河據洛, 祖熾 弘以典籍 郡 跨秦帶趙。 中正, 遺 父允 逸 論其建國立家 魏侍中 上表請開獻書之路, 工部尚書臨 雖傳名號 涇 公, [其論書之厄] 賜姓爲牛

劉裕平姚,

收其圖籍,

五經子史纔四千卷,

皆赤軸青紙

詞, 堂,上以時事草創,未遑制作,竟寢不行。六年除太常卿。九年韶改定雅樂,又作樂府歌 間篇籍稍備。三年拜禮部尚書,奉勅修撰五禮,勒成百卷,行於當世。弘請依古制修立明 際學藝爲多,齊梁之間經史彌盛。」上納之,於是下韶:「獻書一卷,賚縑一匹。」一二年 莫過三秦。以此而論,足可明矣。故知衣冠軌物,圖畫記注,播遷之餘皆歸江左,晉宋之 練之禮,自弘始也。〔大業〕三年改爲右光禄大夫,從拜恆岳,壇場、珪幣、墠時、牲牢, 諸儒論新禮降殺輕重,弘所立議,衆咸推服之。仁壽二年獻皇后崩,王公以下不能定其儀 之,拜吏部尚書。時高祖又令弘與楊素、蘇威、薛道衡、許善心、虞世基、崔子發等並召 正定新樂,事在音律志。 三年之喪祥禫具有降殺,朞服十一月而練者無所象法,以聞於高祖,高祖納焉,下韶除朞 楊素謂弘曰:「公舊學,時賢所仰,今日之事決在於公。」弘了不辭讓,斯須之間儀注 撰定圓丘五帝凱樂,並議樂事,上甚善其議,詔弘與姚察、許善心、何妥、虞世基等 皆有故實。素歎曰:「衣冠禮樂盡在此矣,非吾所及也。」(此節之解釋見上文)弘以 是後議置明堂,韶弘條上故事,議其得失,事在禮志。上甚敬重

史臣曰:「牛弘篤好墳籍,學優而仕,採百王之損益,成一代之典章,漢之叔孫不能尚

隋書柒伍儒林傳辛彦之傳(北史捌貳儒林傳下辛彦之傳同)略云:

辛彦之, 無可攻之勢。」高祖大悦。彦之撰墳典一部、六官一部、祝文一部、禮要一部、 爲碩學,高祖嘗令彦之與重論議,重不能抗,於是避席而謝曰:「辛君所謂, 百度伊始, 水牛弘同志好學。 五經異義 除太常少卿,尋轉國子祭酒,歲餘拜禮部尚書,與祕書監牛弘撰新禮。 明武時歷職典祀太祝樂部御正四曹大夫開府儀同三司。 魔西狄道人也。祖世叙魏凉州刺史,父靈輔周渭州刺史。[彦之]博涉經史,與天 一部,並行於世。 朝貴多出武人,修定儀注唯彦之而已。 後入關, 遂家京兆。 周太祖見而器之, 及周閔帝受禪, 引爲中外府禮曹。 宣帝即位,拜少宗伯。 彦之與少宗伯盧辯專掌 時國家草創 吴興沈重名 金城湯池 新禮一部 高祖

北朝擾攘之長期,能不失墜,卒得輾轉灌輸,加入隋唐統一混合之文化,蔚然為獨立之一源, 此可不論。 兹擇録牛弘、辛彦之兩傳事蹟較詳者, 繼前啓後, 史上所具之特殊性質, 實吾國文化史之一大業。 昔人未曾涉及,故不揣愚陋,試為考釋之於下: 茲所論者, 惟此偏隅之地, 保存漢代中原之文化學術, 其關於西域文明、 蓋欲以闡明魏晉以降中國西北隅即河隴區域 中外交通等, 為世人所習知, 經歷東漢末、 且非本書討論範 西晉之大亂及 在文化學術 韋 於

河隴一隅所以經歷東漢末、西晉、北朝長久之亂世而能保存漢代中原之學術者,不外前文所言

具地域性質,此河隴邊隅之地所以與北朝及隋唐文化學術之全體有如是之密切關係也。 家人父子之世業,所謂南北朝之家學者是也。又學術之傳授既移於家族,則京邑與學術之關 家世與地域之二點,易言之,即公立學校之淪廢,學術之中心移於家族,太學博士之傳授變為 故其本土世家之學術既可以保存,外來避亂之儒英亦得就之傳授,歷時既久,其文化學術遂漸 得藉以遺傳不墜。劉石紛亂之時,中原之地悉為戰 不似前此之重要。 當中原擾亂京洛丘墟之時,苟邊隅之地尚能維持和平秩序,則家族之學術亦 區, 獨河西一隅自前凉張氏以後尚稱治安,

三國志魏志壹叁王朗傳附子肅傳末云:

自魏初徵士敦煌周生烈、明帝時大司農弘農董遇等亦歷注經傳,頗傳於世。

一節下裴注云:

從初平之元至建安之末, 天下分崩, 人懷苟且, 本亦避役,竟無能習學,冬來春去,歲歲如是。又雖有精者,而臺閣舉格太高,加不念統 新主乃復始掃除太學之灰炭, 略以遇及賈洪、 有欲學者皆遣詣太學,太學始開有弟子數百人。至太和青龍中, 雖性非解學,多求詣太學。太學諸生有千數,而諸博士率皆麤疎, 邯鄲淳、薛夏、 補舊石碑之缺壞, 備博士之員録, 隗禧、蘇林、 樂詳等七人爲儒宗, 紀綱既衰, 儒道尤甚。 依漢甲乙以考課 其序 中外多事,人懷 無以教弟子, 至黄初元年之後, 日 申告州

其大義, 而問字指墨法點注之間, 百人同試, 度者未十,是以志學之士遂復陵遲,而

布,見在京師者尚且萬人,而應書與議者略無幾人。又是時朝堂公卿以下四百餘人, 浮虚者各競逐也。 正始中有韶議圜丘,普延學士,是時郎官及司徒領吏二萬餘人, 雖復分 其能

操筆者未有十人,多皆相從飽食而退。嗟夫!學業沈隕乃至於此。是以私心常區區貴乎數

各處荒亂之際而能守志彌敦者也。

薛夏, 天水人也。

隗禧,京兆人也。

又魏志貳伍高堂隆傳, 略云:

四經 訓之道孰爲其繼?其科郎吏高才解經義者三十人,從光禄勳隆、散騎常侍林、博士静分受 始景初中帝以蘇林、秦静等並老,恐無能傳業者,乃詔曰:「方今宿生巨儒並各年高,教 三禮,主者具爲設課試之法。」數年隆等皆卒, 學者遂廢。

生烈、賈洪、薛夏、隗禧之流,俱關隴區域之人,則中原章句之儒業,自此之後已逐漸向西北 心已不在京邑公立之學校矣。二為當東漢末中原紛亂, 據上引史文可證明二事:一為自漢末亂後,魏世京邑太學博士傳授學業之制徒為具文,學術中 而能保持章句之儒業, 講學著書 如周

晉書捌陸張軌傳略云: 移轉,其事深可注意也。

徒壞女工,不任衣用,弊之甚也。今中州雖亂,此方安全,宜復五銖,以濟通變之會。 卑反叛,寇盗縱横,軌到官即討破之,遂威著西州,化行河右。 涼州德量不恆,殆其人乎?」[軌]遣治中張閬送義兵五千及郡國秀孝貢計器甲方物歸於京 澹爲股肱謀主, 徵九郡胄子五百人, 立學校, 始置崇文祭酒, 位視别駕, 春秋行鄉射之 事損益,甚器之。謂安定中正爲蔽善抑才,乃美爲之談以爲二品之精。 五銖錢,通易不滯,泰治中河西荒廢,遂不用錢,裂匹以爲段數,縑布既壞, 父老莫不相慶。太府參軍索輔言於軌曰:「古以金貝皮幣爲貨,息穀帛量度之耗, 圖據河西,於是求爲涼州,公卿亦舉軌才堪御遠,永寧初出爲護羌校尉涼州刺史。 祕書監繆世徵、少府擊虞夜觀星象,相與言曰:「天下方亂,避難之國唯涼土耳。張 令有司可推詳立州已來清貞德素、 安定烏氏人。家世孝廉, 立制準布用錢,錢遂大行,人賴其利。(中略)。天錫窘逼,降於[姚]萇等, 至天錫,凡九世七十六年矣。[苻]堅大敗於淮肥,時天錫爲苻融征南司馬, 以儒學顯,與同郡皇甫謐善。中書監張華與軌論經義及政 嘉遯遺榮、高才碩學、著述經史等具狀以聞 以宋配、陰充、 軌以時 方多難 市易又難 氾瑗、 二漢制 於時鮮 州中

歸國。天錫少有文才,流譽遠近,及歸朝甚被恩遇。

同書壹貳貳呂光載記略云:

麗,命參軍京兆段業著龜茲宫賦以譏之。既平龜茲,有留焉之志,大饗文武,博議進止, 討諸軍事,以討西域。龜茲王帛純拒光,光入其城,大饗將士,賦詩言志。見其宫室壯 以光未能揚清激濁,使賢愚殊貫,因療疾於天梯山,作表志詩、 池令尹興殺之,投諸空井。曜見夢於光,光寤遣使覆之,如夢。 衆咸請還, 吕光,略陽氐人也。[苻]堅既平山東,士馬强盛,遂有圖西域之志,乃授光使持節都督西 光從之。光入姑臧,自領涼州刺史、護羌校尉。張掖督郵傅曜考覈屬縣, 光怒,殺興。 九歎、 七調 十六篇以諷 著作郎 而丘 段

同書捌柴涼武昭王傳略云:

焉。光覽而悦之。

郡守,祖弇仕張軌爲武衛將軍安世亭侯,父昶早卒,遺腹生玄盛。少而好學,通涉經史, 武 昭王諱暠,字玄盛,隴西成紀人,姓李氏,世爲西州右姓。高祖雍、曾祖柔仕晋並歷位 吕光末京兆段業自稱涼州牧, 以敦煌太守趙郡孟敏爲沙州刺史,署玄盛效穀

持節都督凉興已西諸軍事,鎮西將軍領護西夷校尉。隆安四年晋昌太守唐瑶移檄六郡,

敏尋卒,

敦煌護軍馮翊郭謙等以玄盛有惠政,

推爲敦煌太守。

及業僭稱凉王,

進玄盛

推

敬,古今成敗不可不知,退朝之暇念觀典籍,面墻而立,不成人也。此郡世篤忠厚, 者數千户。 泉,乃敦勸稼穑。羣僚以年穀頻登,百姓樂業, 中州之人有田疇不闢者亦徙七千餘户。郭麐之寇武威,武威、張掖已東人西奔敦煌、 穴,諸君以爲何如?」張邈贊成其議,遂遷居於酒泉。手令誠其諸子曰:「寮佐邑宿盡禮 莫不賓下。 玄盛爲大都督大將軍凉公領秦涼二州牧護羌校尉。[玄盛]於南門外臨水起堂,名曰靖恭之 河 劉彦明爲文,刻石頌德。玄盛上巳日讌於曲水,命羣僚賦詩, 西十郡歲月而一。既而禿髮傉檀入據姑臧, 沮渠蒙遜基宇稍廣, ,當吕氏之末,爲羣雄所奉,遂啓霸圖,兵無血刃,坐定千里,謂張氏之業指期而成, 餘萬三千户分置武威、武興、張掖三郡,築城於敦煌南子亭,以威南虜。 ,天下全盛時海内猶稱之, 況復今日?」初苻堅建元之末, 徙江漢之人萬餘户於敦煌. :「昔河右分崩, 圖讚自古聖帝明王、忠臣孝子、烈士貞女,玄盛親爲序頌,以明鑒戒之義;當時文武 惟蒙遜鴟跱一城,自張掖已東晉之遺黎爲戎虜所制,吾將遷都酒泉, 及玄盛東遷, 又立泮官,增高門學生五百人,起嘉納堂於後園,以圖讚所志。 羣豪競起,吾以寡德,爲衆賢所推,前遣雲騎東殄不庭, 皆徙之於酒泉, 分南人五千户置會稽郡, 請勒銘酒泉,玄盛許之。於是使儒林祭酒 而親爲之序。玄盛以緯世之 於是慨然著述志賦焉。 中州人五千户置廣夏 玄盛既遷 軍之所至, 漸 逼寇 洒 承

誄。自餘詩賦數十篇。(中略)。玄盛以安帝隆安四年立,至宋少帝景平元年滅,據河右凡 景等歸晉,遇害江南,玄盛聞而弔之。玄盛前妻辛納女,貞順有婦儀,先卒,玄盛親爲之 作文, 感兵難繁興, 時俗諠競, 玄盛又著槐樹賦以寄情,蓋歎僻陋遐方立功非所也。亦命主簿梁中庸及劉彦明等並 右不生楸槐柏漆,張駿之世取於秦隴而植之,終於皆死,而酒泉宫之西北隅有槐樹 乃著大酒容賦以表恬豁之懷。與辛景、辛恭靖同志友善,

百 書壹貳陸禿髮烏孤載記云:

二十四年。

又同書同卷禿髮利鹿孤載記略云:

秃髮烏孤

河西鮮卑人也。

之,於是以田玄沖、趙誕爲博士祭酒,以教胄子。 垂不朽也。孔子曰:『不學禮,無以立。』宜建學校,選者德碩儒,以訓胄子。」利鹿孤善 利鹿孤謂其羣下曰:「自負乘在位,三載於茲,務進賢彦而下猶蓄滯,二三君子其極言無 。」祠部郎中史嵩對曰:「今取士拔才必先弓馬,文章學藝爲無用之條,非所以來遠人,

又同書同卷禿髮傉檀載記略云:

姚興遣其尚書韋宗來觀釁,宗還長安,言於興曰:「涼州雖殘弊之後,風化未頹,未可圖

也。」〔秃髮〕烏孤以安帝隆安元年僭立,至傉檀三世,凡十九年,以安帝義熙十年滅。

同書壹貳玖沮渠蒙遜載記略云:

虔立六年爲魏氏所擒,合三十九載而滅。 年自稱州牧,義熙八年僭立,後八年而宋氏受禪,以元嘉十年死,在僞位三十三年。子茂 中有玄石神圖,命其中書侍郎張穆賦焉,銘之於寺前,遂如金山而歸。蒙遜以安帝隆安五 委以機密之任。蒙遜西祀金山, 卑和虜率衆迎降, 遂循海而西, 至鹽池, 蒙遜爲使持節大都督、涼州牧張掖公。以敦煌張穆博通經史,才藻清贍, 沮渠蒙遜, 臨松盧水胡人也。博涉羣史, 頗曉天文。隆安五年, 梁中庸、 房晷、 祀西王母寺。寺 擢拜 中書侍郎, 田昂等推

同書壹壹柒姚興載記上略云:

乎?」文祖曰:「與臣州里,西方之英嶲。」與曰:「有表理王尚,文義甚佳,當王尚研思 辱臣憂,故重繭披款,惟陛下亮之。」興覽之大悦,謂其黄門侍郎姚文祖曰:「卿知宗敞 桓爲措思乎?」文祖曰:「西方評敞甚重,優於楊桓,敞昔與吕超周旋,陛下試可問之。」 耳。」文祖曰:「尚在南臺禁止,不與賓客交通,敞寓於楊桓,非尚明矣。」興曰:「若爾, 興徵涼州刺史王尚還長安,尚既至長安,坐匿吕氏官人,擅殺逃人薄禾等, 州别駕宗敞, 治中張穆, 主簿邊憲、胡威等上疏理尚曰:「臣等生自西州, 位忝吏端 禁止南臺。 主

興因 晉之潘陸。」即以表示超曰:「涼州小地, 謂 但當問其文彩何如, 超日 :「宗敞文才何如, 不可以區宇格物。 可是誰輩?」超曰:「敞在西土時論甚美, 寧有此才乎?」超曰:「臣以敞餘文比之, 」與悦, 赦尚之罪, 以爲尚書。 方敞魏 之陳徐

同書壹肆地理志上涼州條,略云:

帝徙居江左, 軌乃控據河西, 稱晉正朔, 是爲前涼。[張]天錫降於苻氏, 軌爲涼州刺史,鎮武威,上表請合秦雍流移人於姑臧西北,置武興郡。 漢置張掖 吕光都於姑臧,及吕隆降於姚興,其地三分。[涼]武昭王爲西涼, 酒泉、 敦煌、 武威郡, 其後又置金城郡,謂之河西五郡。[晉惠帝]永寧中, 建號於敦煌 是時中原淪没, ,其地旋爲吕光所

鳥狐

爲南涼

建號於樂都;沮渠蒙遜爲北涼,

建號於張掖;而分據河西

五郡

志者, 暠皆漢族世家, 故託命河西之士庶猶可以蘇喘息長子孫,而世族學者自得保身傳代以延其家業也。 復是流民移徙之區,百餘年間紛爭擾攘固所不免,但較之河北、山東屢經大亂者, 化者亦可窺見一一。 綜合上引史文, 魏晉間才性同異之學説尚得保存於此一隅,遂以流傳至今,斯其一例也(見北平圖書館 其本身即以經學文藝著稱,故能設學校獎儒業, 凡河西區域自西晉永寧至東晉末世,或劉宋初期, 蓋張軌領涼州之後,河西秩序安定, 經濟豐饒,既為中州人士避難之地, 如敦煌之劉昞即注魏劉劭人物 百有餘年間, 其 又張 略勝一籌。 有關學 、軌、李

季刊 之文化, 宗敞之見賞於姚興,斯又其一例也。至於隴右即晉秦州之地, 義探 第貳 7讀書, 亦得接河西之安全, 源 卷第 壹期湯用彤先生讀劉劭人物志論文, 若其他割據之雄, 然仍能欣賞漢化, 其能保存學術於荒亂之世,固無足異。故茲以隴右 段業則事功不成 擢用士人,故河 及一九三七年清華 而文采特著, 西 區域受制於胡 吕氏、 戎, 介於雍凉 學 而文化學術 禿髮 報 拙 小間者, 作 沮 消 渠 遥 河西 亦不 之徒 既 遊 可受 向 百 因 俱 郭 類 長 以 義 並 安 淪 漢

期即 既明乎此 元嘉十六年十二月魏主 孝文 然後 宣武時 可 代中 以 解 釋隴 原漢 猶以妹壻待沮渠牧犍條 右、 族文化遞 河西之文化與北 一遍同 異之關 魏初期即太武 係 請 略引舊史以 時代中 證之(參考通鑑壹貳 原漢族之文 化 及北 **叁宋紀** 魏

後

自無不可

玖壹 但 魏書伍貳以趙逸等十二人為一卷,北史叁肆於趙逸等十二人外復加以游雅、高閭, 源懷等事 北 河 北史程 西 · 術藝傳之江式合為一卷,寅恪以為游雅、高閭二人非秦凉學者,可不列入;至江式 魏之「外國遠方名士」與崔浩有關, 蹟 與趙 器 駿 傳 逸等併 涉 河 宋書 西 為 人士文化學 卷, 南 史杜 體例甚合。 術者 驥 傳, 於下, 故亦節取傳文, 並取 故茲節録魏書、北史趙逸等十二人傳及江式傳, 以資 魏 書、 論證 北史所載 又 附於後焉)。 魏書、北史之袁式傳雖 崔浩、 李沖、 李韶 常爽、 與河西 又別 則 取 常景 無 又魏 魏 亦

魏書伍 貳趙逸傳(北史叁肆趙逸傳同)略云:

趙 天水人也。 好學夙成,仕姚興歷中書侍郎, 爲興將齊難軍司, 征赫連屈丐, 難敗,

誰也,其速推之。」司徒崔浩進曰:「彼之謬述,亦猶子雲之美新, 爲屈丐所虜,拜著作郎。世祖平統萬,見逸所著,曰:「此豎無道, ,皇王之道固宜容之。 安得爲此言乎? 作者

善久之。性好墳典,白首彌勤,年踰七十,手不釋卷。凡所著述,詩賦銘頌五十餘篇。

世祖乃止,拜中書侍郎。神靡三年三月上巳帝幸白虎殿,命百寮賦詩,逸製詩序,時爲稱

書同卷胡方回傳(北史叁肆胡方回傳同)略云:

馬,爲鎮修表,有所稱慶,世祖覽之嗟美, 她祠碑諸文頗行於世。世祖破赫連昌,方回入國,雅有才尚,未爲時所知也。 胡方回,安定臨涇人。 方回赫連屈丐中書侍郎, 問誰所作。既知方回,召爲中書博士, 涉獵史籍,辭彩可觀, 爲屈丐統萬城銘、 後爲北鎮司 遷侍

書同卷胡叟傳(北史叁肆胡叟傳同)略云:

郎。與游雅等改定律制,司徒崔浩及當時朝賢並愛重之。

同

然自張氏以來,號有華風,今則憲章無虧,曷祝鮀之有也?」叟曰:「吾之擇木,夙在大 知廣平程伯達,其略曰:「望衛惋祝鮀,眄楚悼靈均。」伯達見詩曰:「凉州雖地居戎域, 胡叟,安定臨涇人也。世有冠冕,爲西夏著姓。西入沮渠牧犍,遇之不重,叟乃爲詩示所

爵復始男。 與子暫違,非久闊也。」歲餘牧犍破降, 高宗時召叟及[金城宗]舒並使作檄劉駿蠕蠕文, 叟既先歸國, 朝廷以其識機拜虎威將軍 舒文劣於叟。[廣寧常]順陽數 十,賜

同書同卷宋繇傳(北史叁肆宋繇傳同)略云:

頗涉文流。

[高]間作宣命賦,

叟爲之序。

時舉秀才,除郎中,後奔段業,業拜繇中散常侍。西奔李暠,歷位通顯。雅好儒學,雖在 宋繇,敦煌人也。曾祖配、祖悌世仕張軌子孫,父僚張玄靚龍驤將軍武興太守。 泉,於繇室得書數千卷,歎曰:「孤不喜剋李歆,欣得宋繇耳。 兵難之間講誦不廢。 [張] 彦至酒泉,追師求學,閉室誦書,晝夜不倦,博通經史,諸子羣言,靡不覽綜。 每聞儒士在門,常倒屣出迎,停寢政事, 」拜尚書吏部郎中, 引談經籍。 沮渠蒙遜平酒 [繇] 隨

同書同卷張湛傳(北史叁肆張湛傳同)略云:

衡之任。蒙遜之將死也, 以子委託之。

世祖并涼州,從牧犍至京師,卒。

平,入國,年五十餘矣。司徒崔浩識而禮之,浩注易,叙曰:「國家西平河右,敦煌張湛 張湛,敦煌人,魏執金吾恭九世孫也。湛弱冠知名涼土,好學能屬文。仕沮渠蒙遜,涼州 解之,遂相勸爲注,故因退朝之餘暇而爲之解焉。」其見稱如此。湛至京師,家貧不粒 金城宗欽、武威段承根三人皆儒者, 並有傷才, 見稱於西州, 每與余論易, 余以左氏傳卦

浩常給其衣食, 每常報答, 薦爲中書侍郎。湛知浩必敗, 極推崇之美(此三十八字北史文)。及浩被誅,湛懼,悉燒之。 固解, 每贈浩詩頌,多箴規之言。 浩亦欽敬 兄懷義

同書同卷宗欽傳(北史叁肆宗欽傳同)略云:

崔浩禮之與湛等(此七字北史文)。

仕沮渠蒙遜,爲中書侍郎、世子洗馬。欽上東宫侍臣箴。世祖入涼州,入國,拜著作郎。 宗欽,金城人也。父燮,吕光太常卿。欽少而好學,有儒者之風,博綜羣言, 河 與高允書贈詩,允答書並詩,甚相褒美(此十五字北史文)。崔浩之誅也,欽亦賜死。欽在 西撰蒙遜記十卷, 無足可稱。

同書同卷段承根傳(北史叁肆段承根傳同)略云:

世祖 客。後暉從世祖至長安,有人告暉欲南奔,世祖密遣視之,果如告者之言,斬之於市。承 位,暉父子奔吐谷渾暮璝。暮璝内附,暉與承根歸國,世祖素聞其名,頗重之,以爲上 段承根,武威姑臧人。父暉,乞伏熾磐以暉爲輔國大將軍涼州刺史御史大夫。磐子暮末襲 請爲著作郎, 機辯有文思,而性行疏薄,有始無終。司徒崔浩見而奇之,以爲才堪著述,言之 引與同事。世咸重其文而薄其行,甚爲敦煌公李寶所敬待。浩誅,承

根與宗欽俱死。

同書同卷闡駰傳(北史叁肆闡駰傳同)略云:

中,給文吏三十人,典校經籍,刊定諸子三千餘卷。姑臧平,樂平王丕鎮凉州,引爲從事 誦。 中郎。王薨之後還京師,卒,無後。 駰, 注王朗易傳,學者藉以通經,撰十三州志行於世。[沮渠]蒙遜甚重之,拜祕書考課郎 敦煌人也。 祖倞有名於西土,父玖爲一時秀士。 駰博通經傳, 三史羣言, 經目則

同書同卷劉昞傳(北史叁肆劉延明傳同)略云:

典,書史穿落者親自補治,昞時侍側,前請代暠,暠曰:「躬自執者,欲人重此 易、韓子、人物志、黄石公三略,並行於世。[沮渠]蒙遜平酒泉,拜祕書郎,專管注記。築 略記百三十篇八十四卷。凉書十卷,敦煌實録二十卷,方言三卷,靖恭堂銘一卷,注周 居酒泉,不應州郡之命,弟子受業者五百餘人。李暠徵爲儒林祭酒從事中郎。暠好尚文 劉昞,字延明,敦煌人也。父寶以儒學稱。昞年十四就博士郭瑀學,瑀遂以女妻之。後隱 世祖平凉州,士民東遷,夙聞其名,拜樂平王從事中郎。世祖韶諸年七十以上聽留本鄉, 拜,命官屬以下皆北面受業焉。時同郡索敞、陰興爲助教,並以文學見舉,每巾衣而入。 陸沈觀於西苑,躬往禮焉,號玄處先生,學徒數百,月致羊酒。牧犍尊爲國師,親自致 與卿相值,何異孔明之會玄德!」遷撫夷護軍,雖有政務,手不釋卷。昞以三史文繁, 典籍

德冠前世, 蔚爲儒宗, 太保啓陳, 深合勸善, 其孫等三家特可聽免!」河西人以爲榮。 中郎敦煌劉昞著業涼城,遺文在茲,篇籍之美頗足可觀。維祖逮孫相去未遠,而令久淪阜 者子孫宜蒙顯異。」於是除其一子爲郢州雲陽令。正光三年太保崔光奏曰:「故樂平王 子扶養, ,不獲收異,儒學之士所爲竊歎,乞敕尚書推檢所屬,甄免碎役。」四年六月詔曰:「昞 次仲禮留鄉里。 晒時老矣,在姑臧歲餘, 太和十四年尚書李沖奏:「昞河右碩儒, 思鄉而返,至涼州西四百里韭谷窟, 今子孫沈屈, 遇 未有禄 疾而卒。 一從事 晒六 賢

前来, 金成人也。 以患了十多口名可同書同卷趙柔傳(北史叁肆趙柔傳同)略云:

金城 人也。少以德行才學知名河右,沮渠牧犍時爲金部郎。世祖平涼州, 内徙京

同書同卷索敞傳(北史叁肆索敞傳同)略云:

師。高宗踐作,

拜著作郎

記 索敞,敦煌人。爲劉昞助教,專心經籍,盡能傳昞之業。涼州平,入國,以儒學見拔爲中 尚書牧守者數十人,皆授業於敞。敞遂講授十餘年。敞以喪服散在衆篇,遂撰比爲喪服要 篤勤訓授, 肅而有禮。京師大族貴遊子弟皆敬憚威嚴, 多所成益, 前後顯達位至

同書同卷陰仲達傳(北史叁肆段承根傳附陰仲達事蹟)略云:

陰仲達,武威姑臧人,少以文學知名。世祖平涼州,内徙代都。司徒崔浩啓仲達與段承根 云,二人俱涼土才華。同修國史,除祕書著作郎,卒。

同書術藝傳江式傳(北史叁肆江式傳同)略云:

録,叙列於儒林,官班文省,家號世業。暨臣闇短,漸漬家風,參預史官, 傳家學,除符節令,以書文昭太后尊號謚册特除奉朝請,仍符節令,篆體尤工,洛京宫殿 Fi 以敢藉六世之資,奉遵祖考之訓,輒求撰集古來文字,以許慎説文爲主,爰採孔氏尚書 皇威西被,牧犍内附,臣亡祖文威杖策歸國,奉獻五世傳掌之書,古篆八體之法,時蒙褒 父兄應元,俱受學於衛覬,古篆之法,倉雅方言説文之誼,當時並收善譽。而祖官至太子 諸門板題皆式書也。延昌三年三月式上表曰:「臣六世祖瓊,家世陳留,往晉之初,與從 孫因居涼土,世傳家業。祖强字文威,太延五年涼州平,内徙代京,上書三十餘法, 石經、字林、韻集、諸賦文字有六書之誼者,皆以次編聯,文無復重,糾爲一部。其古籀奇 經史諸子千餘卷,由是擢拜中書博士。父紹興,高允奏爲祕書郎,掌國史二十餘年。 江式,陳留濟陽人也。六世祖瓊晉馮翊太守,善蟲篆詁訓。永嘉大亂,棄官西投張軌,子 一經音注、籀篇、爾雅、三倉、凡將、方言、通俗文、祖文宗、埤倉、廣雅、古今字詁、三字 出爲馮翊郡,值洛陽之亂,避地河西,數世傳習,斯業所以不墜也。世祖太延中, 題篆宫禁

逐字而注。其所不知者,則闕如也。」詔曰:「可如所請。」於是撰集字書,號曰古今文字 惑俗隷諸體,咸使班於篆下,各有區别。詁訓假借之誼,僉隨文而解。音讀楚夏之聲,並

日 書陸拾程駿傳(北史肆拾程駿傳略同)略云:

凡四十卷,大體依許氏説文爲本,上篆下隷,其書竟未能成。

崔浩所知。文成踐阼,拜著作佐郎,未幾遷著作郎。顯祖屢引駿與論易老之義,顧謂羣臣 矣。」由是聲譽益播,沮渠牧犍擢爲東宫侍講。太延五年,世祖平涼,遷於京師,爲司徒 若斯者可謂至順矣。人若乖一,則煩僞生,爽性則沖真喪。」昞曰:「卿年尚稚,言若老成 其言虚誕,不切實要,弗可以經世,駿意以爲不然,老子著抱一之言, 巡狩甘雨之德焉。 :「朕與此人言,意甚開暢。」拜祕書令,沙門法秀謀反伏誅,駿上慶國頌十六章, 駿少孤貧,師事劉昞,性機敏好學,晝夜無倦。 本廣平曲安人也。 又奏得一頌,始於固業,終於無爲十篇。太和九年卒,所製文筆自有集 六世祖良, 晉都水使者, 坐事流於涼州;祖父肇, 吕光民部尚 駿謂昞曰:「今世名教之儒咸謂老莊 莊生申性本之旨, 並序

北史貳壹崔宏傳附崔浩傳云:

録,弟子靈虬。

浩有鑒識,以人倫爲已任。明元太武之世,徵海内賢才,起自仄陋及所得外國遠方名士,

魏書伍叁李沖傳(北史壹佰序傳同)略云: 拔而用之,皆浩之力也(寅恪案:魏書叁伍崔浩傳無此節)。至於禮樂憲章皆宗於浩。

始爲富室,而謙以自牧,積而能散,近自姻族,逮於鄉間,莫不分及,虚己接物,垂念羈 多隱冒,五十三十家方爲一户,沖以三正治民,所由來遠,於是創三長之制而上之。 敬彌甚,君臣之間,情義莫二。及改置百司,開建五等,以沖參定典式, 名之。文明太后崩後,高祖居喪,引見接待有加。及議禮儀律令, 寒,衰舊淪屈由之躋叙者亦以多矣。是時循舊王公重臣皆呼其名,高祖常謂沖爲中書而不 寵日盛,賞賜月至數十萬,密致珍寶異物以充其第,外人莫得而知焉。 太后覽而稱善,遂立三長,公私便之。遷中書令,尋轉南部尚書。沖爲文明太后所幸,恩 委以營構之任,遷爲尚書僕射。沖機敏有巧思,北京明堂圜丘太廟及洛都初基,安處郊 尚書沖可領將作大匠,司空長樂公[穆]亮可與大匠共監興繕。」定都洛陽以沖爲鎮南將軍, ,以修整敏惠,漸見寵待, 拜廷尉卿, 尋遷侍中吏部尚書。韶曰:「明堂太廟已成於昔年, 將以今春營改正殿, 隴西人,敦煌公寶少子也。顯祖末爲中書學生,高祖初以例遷祕書中散,典禁中文 無不訪決焉。於是天下翕然,及殊方聽望咸宗奇之。高祖亦深相仗信, 遷内祕書令南部給事中。舊無三長,惟立宗主督護, 潤飾辭旨, 沖家素清貧, 封榮陽郡開國 刊定輕重, 所以民 於是 文明

留京百官相見,皆叙沖亡没之故,言及流淚。高祖得留臺啓知沖患狀,謂宋弁曰:「 自鄴還洛,路經沖墓,高祖卧疾,望墳掩泣久之,詔曰:「可遣太牢之祭,以申吾懷。」與 朝之望也。 兆,新起堂寢,皆資於沖。旦理文簿,兼營匠制,几案盈積,剞劂在手,終不勞厭也。然 」贈司空公,有司奏謚曰文穆,葬於覆舟山,近杜預冢,高祖之意也。後車駕 總釐朝務,朕委以台司之寄,使我出境無後顧之憂, 不能自勝。韶曰:「太和之始早委機密,鴻漸瀍洛,升冠端右, 務益六姻;是其親者,雖復癡聾,無不超越官次。 沖卒, 高祖爲舉哀於懸觚 一朝忽有此患, 朕甚馆 可謂國之賢也 僕射

同書叁玖李寶傳(北史壹佰李寶傳同)略云: 寶有六子:承、茂、輔、佐、公業、沖。

慨。」其相痛惜如此

韶典焉。高祖將創建都之計,韶引侍臣訪以古事。韶對洛陽九鼎舊所,七百攸基,地則土 [承]長子韶,延興中補中書學生,襲爵姑臧侯,除儀曹令。時修改車服及羽儀制度,皆令 高祖稱善。起兼將作大匠,敕參定朝儀。

同書捌肆儒林傳常爽傳(北史肆貳常爽傳同)略云:

中

實均朝貢,惟王建國莫尚於此,

常爽,河内温人,魏太常林六世孫也。祖珍,苻堅南安太守,因世亂遂居涼州;父坦,乞

獨守閑静,講肄經典二十餘年,時人號爲儒林先生,年六十三卒於家。子文通歷官至鎮西 温水之右,教授門徒七百餘人,京師學業翕然復興。爽立訓甚有勸罰之科,弟子事之若嚴 歎服如此。因教授之暇,述六經略注以廣制作,甚有條貫,其略注行於世。爽不事王侯, 稱爽之嚴教,獎勵有方。允曰:「文翁柔勝,先生剛克,立教雖殊,成人一也。」其爲通識 君焉。尚書左僕射元贊、平原太守司馬真安、著作郎程靈虬皆是爽教所就, 伏世鎮遠將軍大夏鎮將顯美侯。[爽]篤志好學,博聞强識,明習緯候,五經百家多所研 司馬南天水太守西翼校尉。文通子景别有傳。 , 州郡禮命皆不就。世祖西征涼土, 爽與兄仕國歸款軍門, 世祖嘉之, 賜仕國爵五品顯 爽爲六品,拜宣威將軍。 是時戎車屢駕,征伐爲事,貴游子弟,未遑學術,爽置館 崔浩、 高允並

同書捌貳常景傳(北史肆貳常景傳同)略云:

事。及世宗崩,韶景[自長安]赴京,還修儀注,又勑撰太和之後朝儀已施行者,凡五十餘 先是太常劉芳與景等撰朝令,未及班行,别典儀注,多所草創,未成,芳卒,景纂成其 之。後爲門下録事太常博士。正始初,韶尚書門下於金墉中書外省考論律令,勑景參議 卷。永熙二年監議事(寅恪案:徐崇補南北史藝文志魏五禮條云疑監議下脱去「五禮」二 景少聰敏,及長有才思,雅好文章,廷尉公孫良舉爲律學博士,高祖親得其名,

字)。

隋書叁叁經籍志史部儀注類載:

後魏儀注五十卷。

舊唐書肆陸經籍志史部儀注類載:

新唐書伍捌藝文志儀注類載:

後魏儀注三(寅恪案:三疑五之誤)十二卷,常景撰。

常景後魏儀注五十卷。

魏書肆壹源賀傳(北史貳捌源賀傳同)略云:

名,謂賀曰:「卿與朕源同,因事分姓,今可爲源氏。」長子延,延弟思禮後賜名懷,遷尚 源賀,自署河西王秃髮傉檀之子也。傉檀爲乞伏熾盤所滅,賀自樂都來奔,世祖素聞其

書令,參議律令。

北史貳捌源賀傳附玄孫師傳(參考北齊書伍拾恩倖傳高阿那肱傳, 又隋書陸陸源師傳刪略「漢 兒」語殊失其真)略云:

尚書事,謂爲真龍出見,大驚喜,問龍所在,云作何顏色。師整容云:「此是龍星初見, 師少知名,仕齊爲尚書左外兵郎中, 又攝祠部。 後屬孟夏,以龍見請雩。 時高阿那肱爲録

不行。」師出歎曰:「國家大事,在祀與戎,禮既廢也,其能久乎?齊亡無日矣。」尋周武 依禮當雩祭郊壇,非謂真龍别有所降。」阿那肱忿然作色曰:「漢兒多事,强知星宿,

通鑑壹柒壹陳紀太建五年夏四月載此事, 胡注云:

平齊。

以取 謂 諸源本出於鮮卑秃髮, 華人爲漢兒,率侮詬之。諸源世仕魏朝貴顯,習知典禮, 詬。通鑑詳書之,又一嘅也。 高氏生長於鮮卑,自命爲鮮卑,未嘗以爲諱, 遂有雩祭之請, 鮮卑遂自謂 冀以取重 73

同書壹貳叁宋紀元嘉十六年十二月,涼州自張氏以來號為多士條, 胡注云:

永嘉之亂,中州之人士避地河西,張氏禮而用之。子孫相承,衣冠不墜,故涼州號爲多

宋書陸伍 林驥傳(南史染拾循吏傳杜驥傳同 略

朝廷常以傖荒遇之,雖復人才可施,每爲清途所隔,坦以此慨然,嘗與太祖言曰:「臣本 祖 中華高族,亡曾祖晉氏喪亂播遷涼土,世業相承,不殞其舊,直以南度不早,便以荒槍賜 此始還關中。兄坦頗涉史傳,高祖征長安席卷隨從南還,太祖元嘉中任遇甚厚。 職, 京兆杜陵人也。高祖預晉征南將軍,曾祖耽避地河西, 因仕張氏, 苻堅平涼 晚度北 州,父

隔。」(寅恪案:杜坦所言,亦可與晉書捌肆楊佺期傳參證。)

魏書叁捌袁式傳(北史貳柒袁式傳同)略云:

泰常二年歸國,爲上客, 陳郡陽夏人。父淵司馬昌明侍中。 賜爵陽夏子。與司徒崔浩一面便盡國士之交。 式在南歷武陵王遵諮議參軍, 與司馬文思等歸姚 是時 朝儀 典章

悉出於浩,

"作字釋未就。"

每所草創,

恆顧訪之。

式沈靖樂道,

周覽書傳,

至於詰訓倉

偏所留懷

宗欽、段承根俱主其説,實為漢儒舊誼,今日得尚秉和先生易林解詁 之問答(世説新語文學篇阮宣子有令問條,以為阮脩答王衍之言, 當日中原古誼,久已失傳, 對王戎之語, 其他史料關於此者亦有歧異, 寅恪案:崔浩傳所謂外國遠方名士, 斑矣。 乃承曹魏才性之説者, 其個性之真實雖難確定,然不足致疑也。又此問題當時有實際政治及社會之關係, 程駿與劉昞之言, 此浩所以喜其與家學冥會,而於河西學者所以特多薦拔之故歟? 此亦當日中州絕響之談也。若非河 崔浩之解, 乃周孔名教與老莊自然合一之論, 當即指河西諸學者或袁式而言。 或出其家學之僅存者, 初視之似難定其是非。其實此問若乃代表當時通 西保存其説, 然在河西則遺説 此説為晉代清談之焦點 晉書肆玖阮瞻傳 其以左傳卦解易, 一書,愈可證明者也。 則今日亦無以 猶在 劉昞之注 則以 其地 為阮 王阮 窺 性

改宗 部落為編户 説 所論 其 高 河 然哉 西涼 乃其 西家世遺傳之舊學無 其付沖 而中 於玄談理論, 傳等 督護制 李 最 原 而袁宏後漢紀之議論 以端 高之 舊壤 顯著者, 一事有 無不使沖參决監令者, 又史言沖以過於篤厚親舊見譏 為三長制 茲不 揆重任 曾 久已不 詳論 關 寅恪別有文考之, 孫 其餘散見諸卷, 實本胡部之遺跡(參考魏書壹壹叁官氏志,及北史捌拾外戚傳賀訥傳 雖以 聞 亦用夏變夷之政策, 魏書賀訥傳 疑也。魏初宗主督護之制(參考魏書壹壹拾食貨志), 凡製定禮儀律令, 此 得 論 幸文明 ,多為此問題之詳釋也(後漢紀貳 斯又河 蓋幾以待王肅者待沖, 茲不詳論), 不可悉舉)。 太后 高車傳皆取之北史),不僅普通豪族之兼 西 遂致貴 及營建都 如北 隅之地尚 為北 史壹 顯 自晉室南渡之後 所謂 魏漢化歷 邑宫廟諸 陸 然孝文既非 能保存 「將無同」三語 廣陽 則沖之為人必非 王 程之一重要階段。 典午中朝遺説之一證 役 建附深(淵 貳延嘉九 庸 以及其他有 過江名士尚能 闇之主, 即實 年及貳)傳所言 庸 同之意, 碌 且 蓋與道 凡 弱 併已也。 其 為 流 變 叁建 事 酷 革 也。至 沿 乃此 武 實 慕 述 寧二 夷 李沖請 時 能 風 漢 西 朝舊 年之 保 化 問 摹 玖

(消)上書曰: 及太和在歷 僕射李沖當官任事, 凉州土人悉免厮役, 舊門仍防

指上引劉昞傳中李沖請褒顯劉昞子孫之類而言,但太和以後正光之時,崔光復請免昞孫碎

乎? 中 梅 種 漢化 典章 反 則 原 族 文 韶 夫光 之學, 所言 化 亦能 愛慕河 為安全 又李 代京 韶既 傳 而在 有 源懷之參議律令尤可注意 傳其河 為 關 一部者, 西晉之學風, 文化 一西漢 載 歷 尚 學 顯 由 亦無 贊 故 # 不 河西文化 業之興 南 足以盡 其 其 相 其 西家世之學 族文化所致 寶之嫡孫, 入北之漢族 所保 其事 謀 家世之學 傳 不 不 可 於北 墜諸 實由 存者 此 彰彰甚 也 沖又卒成其 下開(北)魏、 問 世家, 亦較中 無疑。 亦無不與 事 題 朝影響之深 其 其詳當 沖之猶子也。孝文帝用夏變夷改革車 也。 明, 力, 實 而 元淵之所謂豐沛 與涼州 原 足 事, 又遷都洛陽乃北魏漢化政策中一大關 實為論史之關要,故略附著鄙意於此 觀高阿那肱之斥源 其 至 於後論都城 為多。 知當 江式請撰古今文字表中 見 江 北 氏 遷洛之役 鉅 重 一於崔 相同 日)齊、隋、唐之制度, 人士絕無關 此 學術 此 建築師 不 亦 浩 由 獨 中 舊門即 高允 例證 此言之, 江 心在家族 李氏父子始終參預 涉, 氏 師為漢兒一事, 中 諸 也。 述之。 指六鎮鮮卑及胡化漢 人, 太和 族 秦凉 而 源氏 文字之學 -所述, 固其 常爽 承 不在 之後李沖 諸州 雖 前啓後 服羽儀諸制度, 學校 宜矣。 出 出 其家 自涼州 西 如 可證北 河 然則 北 是 西 鍵,當日鮮卑舊人均 久死, 自西晉以來 當詳 常景 涼 繼絶扶 戎 竟謂 隅 即前 州 朝胡 類 # 人, 為太 族 之 光之請 悉別論之。 衰 地 引 隅 漢 然其 北 豈可與之並 和 Iffi 魏遷洛與 避亂 涼 其 家世 以 為 免役 \mathcal{F}_{1} 其 百 文 學 秩 後 北 涼州 年間 者及 序較 化 深 禮 魏 自 初 泂

延 西 脈, 遺 然後 但 其 始 知北 本身性質及後來影響, 朝文化系統之中, 昔賢多未措念, 其由 江 左發展變遷輸 寅恪不自揣謭陋, 入者之外, 尚別 草此 有 短篇 漢 魏 藉 以 西 唤

起今世學者之注意

世

歇。 朝舊 以其 術 族 但其鄰 魏之取涼州,士人年老者如劉昞之流,始聽其一子留鄉里侍養,似河西文化當亦隨之而 俱以其鄉 必未盡淪 舊 近地域若關隴之區 出佐興王 土家世之學術助長北 廢 故西北 卒能再傳 隅 , 既承繼姚秦之文化, 偏塞之區 魏之文化, 而成楊隋 值周 代之制,以傳之有唐, 凝鑄混 隋 兩朝開創之際,終有蘇氏父子及牛辛 復享受北魏長期之治安, 其士族 和, 而成高齊一代之制度, 頗 與北 魏 加 為北 西 學者 家世 朝 及南 旧相傳 最 諸 美

上文已將隋唐制度三源中之(西)魏、)齊一源之中 洛陽鄴 都文化之影響於隋唐 除去關 涉南 朝 及河西文化者不重複論述外,專就元魏孝文以後,迄於高齊之 制度者考證之。 周一源及南朝河西文化之影響約略述之矣。茲於(北

備之結果以傳於隋唐者,

甚相類也。

至其例證,

非本章所能盡具,

當於論職官、

刑律諸章

更詳

然孝文之所施為, 跋部 族自道 武 帝入居中 實亦不過代表此 原 逐 漸 歷代進行之途徑, 漢 化 至孝文帝遷都洛陽後, ,益加速加甚而已。 其漢化之程度雖 在孝文同時 較前 其鮮卑舊

傳), 化政策有意無意中之一大表示,非僅爾朱榮、費穆等一時之權略所致也(見魏書柒肆 饉 守胡化亦愈固, 表面觀察, 爾朱樂傳及洛陽伽藍記壹永寧寺像)。其後高歡得六鎮流民之大部,賀拔岳、宇文泰得其 族如穆泰等(見魏書貳柒、 虐政及府户待遇不平之類, 大變也 誠為不得已也。 齊書壹神武 書熕熕 略可窺見, 可 謂魏孝文遷都洛陽以後之漢化政策遭 北史壹玖廢太子恂傳)亦「謀召牧馬, 即反抗洛陽之漢化腐化力因隨之而益 心紀、 因以愈知孝文之假辭南侵, 北史陸齊本紀、 故自宣武以後, 北史貳拾穆崇傳)其對於漢化政策固不同意, 然間接促成武泰元年四月十三日 隋書貳肆食貨志等),東西兩國俱以六鎮流 洛陽之漢化愈深, 遂成遷都之計者(見魏書伍叁李沖傳 一大打擊, 輕騎奔代」,則鮮卑族對漢化政策 強, 而腐化乃愈甚, 故魏末六鎮之亂 爾朱榮河陰之大屠殺實 而逆轉為胡化 即孝文親子如廢太子恂 其同 雖有 誠北 時之代北六鎮 民創 諸 北 朝 原 政治 業 北 胡 史壹 大 反抗力之 史肆 族 少數 社 初自 如 佰序 漢

史叁貳崔挺傳;北齊書叁玖崔季舒傳,北史叁貳崔挺傳;北齊書叁拾高德政傳, 史叁壹高允傳、貳肆封懿傳;北齊書貳叁崔俊傳,北史貳肆崔逞傳; 一族如渤海之高氏、封氏及清河博陵之崔氏等不得不發生關 高歡 本身, 生於六鎮, 極度胡化 其渤海世系即使依託, 係(見北齊書貳壹高乾、 亦因 以 北齊書叁拾崔 與當日代表 北史叁壹高允 漢化之山 封隆之傳 運傳, 北 東

其子澄尤為漢化,據北齊書叁文襄紀(北史陸齊本紀同)云:

門下,以爲賓客,每山園游燕,必見招携,執射賦詩,各盡其所長,以爲娱適。 元象元年攝吏部尚書。 人,又沙汰尚書郎,妙選人地以充之。至於才名之士咸被薦擢,假有未居顯位者, 魏自崔亮以後選人常以年勞爲制, 文襄乃釐改前式, 銓擢唯在得

以推 宇文泰所不得不深相畏忌,而與蘇綽之徒別以關隴為文化本位,虛飾周官舊文以適鮮卑野俗, 恢復熾盛於鄴都。魏孝文以來,文化之正統仍在山東,遥與江左南朝並為衣冠禮樂之所萃,故 傳,北史伍陸魏收傳)。洛陽文物人才雖經契胡之殘毀,其遺燼再由高氏父子之收掇, 齊書叁壹王昕傳, 非驢非馬 既因才幹柄用,而邢(邵)、魏(收)亦以文采收録(見北齊書叁肆楊愔傳, 夫當時所謂「妙選人地」,即「選用漢化士族」之意義,故高氏父子既執魏政, 茲節引史傳證之如下: 之人如裴矩 為仇讎敵國之所染化(見下章論職官、 知也。 藉用欺籠一時之人心,所以至其子(武帝)併齊之後,成陵之鬼餒,而開國制度已漸 隋書貳高祖紀下仁壽二年十月己丑詔書所命修撰五禮之薛道衡、 劉焯、 北史貳肆王憲傳;北齊書叁陸邢邵傳,北史肆叁邢巒傳;北齊書叁柒魏收 劉炫、 李百藥等, 刑律、兵制諸書)。然則當日山東鄴都文化勢力之廣大可 其本身或家世皆出自北齊, 以廣義言, 北史肆壹楊播傳; 楊(愔)、王(昕及晞) 王砌及與製禮有關 俱可謂之齊人也。 更得以

隋書伍柒薛道衡傳(北史叁陸薛辯傳同)略云:

館,與范陽盧思道、安平李德林齊名友善。復以本官直中書省,尋拜中書侍郎。後主之時 薛道衡,河東汾陰人也。[齊後主]武平初韶與諸儒修定五禮,除尚書左外兵郎。待韶文林 漸見親用,頗有附會之譏,後與斛律孝卿參預政事。及齊亡,周武引爲御史二命士,後歸 召典軍書, 高祖作相, 從元帥梁睿擊王謙, 攝陵州刺史。高祖受禪, 還除内史舍人。 除吏部侍郎, ,坐黨蘇威除名, 坐事除名。 配防嶺表。 尋有韶徵還, 河間王弘北征

直内史省,後數歲授內史侍郎。

樞要,隋文命其修定隋禮,自為適宜,而道衡依其舊習,効力新朝,史言隋禮之修「悉用東齊 寅恪案:道衡家世本出北齊,其本身於北齊又修定五禮,參預政事,及齊亡歷周入隋,復久當 儀注以為準」, 自所當然也。)略云:

隋書陸玖王劭傳(北史叁伍王慧龍傳同

王砌, 太子舍人,待韶文林館,後遷中書舍人。齊滅入周,不得調,高祖受禪, 太原晉陽人也。 父松年齊通直散騎侍郎。 齊尚書僕射魏收辟[劭]參開府軍事, 授著作佐郎。

北史叁捌裴佗附矩傳(隋書陸柒裴矩傳略同)略云: 裴佗字元化, 河東聞喜人也。六世祖詵仕晉, 位太常卿, 因晉亂, 避地凉州, 苻堅平河

論證,見上文)。 注,矩與牛弘、李百藥(隋書裴矩傳不載李百藥名)等據齊禮參定(此條大部前已徵引, 啓入可汗初附,令矩撫慰之,還爲尚書左丞。其年(仁壽二年)文獻皇后崩,太常舊無儀 使馳召之,參相府記室事。受禪,遷給事郎,奏舍人事,除户部侍郎,遷內史侍郎。上以 文學,齊亡不得調。隋文帝爲定州總管,補記室,甚親近之,以母憂去職。及帝作相,遣 西,東歸,因居解縣,世以文學顯(寅恪案:此亦河西文化世家也)。[孫]矩仕齊爲高平王 並附

隋書柒伍儒林傳劉焯傳(北史捌貳儒林傳下劉焯傳同)略云:

博學通儒無能出其右者,焯又與諸儒修定禮律。 人稱二劉焉。天下名儒後進質疑受業,不遠千里而至者,不可勝數。論者以爲數百年已來 射策甲科,與著作郎王劭同修國史,兼參議律曆。劉炫聰明博學,名亞於焯,故時 信都昌亭人也。父治郡功曹。少與河間劉炫結盟爲友,以儒學知名,爲州博士,舉

同 ·書同卷劉炫傳(北史捌貳儒林傳劉炫傳同)略云:

州刺史宇文亢引爲户曹從事,後奉勅與著作郎王劭同修國史,又與諸術者修天文律曆,又 劉炫,河間景城人也。少以聰敏見稱,與信都劉焯閉户讀書,十年不出。周武帝平齊,瀛 與諸儒修定五禮,授旅騎尉。吏部尚書牛弘建議,以爲禮諸侯絶旁朞,大夫降一等,今之

勢使然也,又以風俗陵遲,婦人無節,於是立格,州縣佐吏三年而代之,九品妻無得再 之有?」遂寢其事。煬帝即位,牛弘引炫修律令。高祖之世以刀筆吏類多小人,年久長姦, 子雖疏遠,猶服縗三月,良由受其恩也。今之仕者位以才升,不限適庶,與古既異, 醮。炫著論以爲不可,弘竟從之。諸郡置學官及流外給廩皆發於炫。 上柱國雖不同古諸侯,比大夫可也,官在第二品宜降旁親一等,議者多以爲然。炫較之 1:「古之仕者宗一人而已,庶子不得進,由是先王重適,其宗子有分禄之義,族人與宗 何降

同 [書肆貳李德林傳(北史柴貳李德林傳同)略云:

事。及周武帝克齊,入鄴之日勅小司馬唐道和就宅宣旨慰喻云:「平齊之利,唯在於爾 自此以後韶皓格式及用山東人物一以委之。開皇元年勅令與太尉任國公于翼、高頌等同修 昂訪問齊朝風俗政教人物善惡,即留内省,三宿乃歸,仍遣從駕,至長安,授內史上士, 朕本畏爾逐齊主東走,今聞猶在,大以慰懷,宜即入相見。」道和引之入內, 李德林,博陵安平人也。齊主留情文雅,召入文林館,又令與黄門侍郎顏之推同判文林館 事訖奏聞,别賜九環金帶一腰、駿馬一匹,賞損益之多也。 遣内史宇文

舊唐書柴貳李百藥傳(新唐書壹佰貳李百藥傳同)略云:

李百藥,定州安平人。隋内史令安平公德林子也。開皇初授東官通事舍人,遷太子舍人,

五三

定律令,撰陰陽書。[唐太宗]貞觀元年召拜中書舍人,賜爵安平縣男,受韶修定五禮及律 兼東宫學士。或嫉其才而毀之者,乃謝病免去,十九年追赴仁壽宫令襲父爵。 吏部尚書牛弘雅愛其才,奏授禮部員外郎。皇太子勇又召爲東宫學士。 韶令修五禮

克讓、裴政、袁朗等,俱屬於梁陳系統者也。以後略依時代先後,節録史傳之文,證之如下: 所命修定五禮諸臣中如許善心、虞世基,以及其名不見於此詔書中而亦預聞修定禮儀制度之明 論隋唐制度(北)魏、(北)齊之源既竟,茲略考其梁陳之源,凡隋高祖仁壽二年閏十月己丑詔書 皇后喪議,復於唐貞觀世修定五禮,則隋唐禮制與北齊人士有密切關係,於此可見也。 禮, 已於前文論之。 品官降旁親服一等之議,則知山東禮學遠勝於關隴也。裴矩用東齊儀注以佐牛弘定獨孤 寅恪案:王劭、劉焯、劉炫皆北齊儒學之士,而二劉尤為北朝數百年間之大儒。觀炫駮牛弘二 李德林為齊代文宗, 周武得之, 特加獎擢。百藥承其家學, 既參定隋文獻 后喪

隋書伍捌明克讓傳(北史捌叁文苑傳明克讓傳同))略云:

滅,歸於長安,周明帝引爲麟趾殿學士。[隋]高祖受禪,拜太子内舍人。轉率更令, 釋褐湘東王法曹參軍, 平原鬲人也, 父山賓梁侍中。 仕歷司徒祭酒, 尚書都官郎中、散騎侍郎、國子博士、中書侍郎。梁 克讓博涉書史,所覽將萬卷,三禮禮論尤所研精。

常牛弘等修禮議樂,當朝典故多所裁正。開皇十四年以疾去官,卒年七十。 以師道處之,恩禮甚厚。於時東官盛徵天下才學之士,至於博物洽聞,皆出其下。韶與太

寅恪案:梁書貳柒明山賓傳(南史伍拾明僧紹附山賓傳同)略云:

山賓年十三博通經傳。梁臺建,爲尚書駕部郎,遷治書侍御史右軍記室參軍,

時初置五經博士,山賓首膺其選,所著吉禮儀注二百二十四卷、禮儀二十卷、 儀十五卷。(參上文所引隋書叁叁經籍志史部儀注類梁吉禮儀注條。

孝經喪禮服

掌治吉禮。

修隋室

據此 山賓為梁代修定儀注之人,以禮學名世;克讓承其父學,據梁朝之故事,

儀,牛弘製定五禮,欲取資於蕭梁,而求共事之人,則克讓實其上選無疑也。

隋書捌禮儀志略云:

梁書貳捌裴邃傳附之禮傳(南史伍捌裴邃傳同)云:

開皇中,韶太常牛弘、太子庶子裴政,撰宣露布禮。

隋書陸陸裴政傳(北史柒柒裴政傳同 子政承聖中官至給事黄門侍郎,)略云: 江陵陷, 隨例入西魏。

之禮廷尉卿。政博聞强記,達於時政,爲當時所稱。江陵陷,與城中朝士俱送於京師,授 河東聞喜人也。高祖壽孫從宋武帝家於壽陽,祖邃梁侍中左衛將軍豫州大都督,

員外散騎侍郎,引事相府,命與盧辯依周禮建六卿設公卿大夫士,並撰次朝儀車服器用, 多遵古禮,革漢魏之法,事並施行。尋授刑部下大夫。政明習故事,參定周律, 無有冤濫。 韶與蘇威等修定律令。 政採魏晉刑典, 下至齊梁, 又善鐘律。 宣帝時以忤旨免職, 高祖攝政,召復本官。開皇元年轉率更 沿革輕重取其折衷, 同撰著者十有 用法寬

創制律令,上採魏晉,下迄齊梁,是乃真能用南朝之文化及己身之學業,以佐成北朝完善之制 胎譏通識,始由亡國俘囚受命為此,諒非其所長及本心也。故一入隋代,乃能與蘇威等為新朝 寅恪案:裴政為南朝將門及刑律世家,其與盧辯之摹倣周禮,為宇文泰文飾胡制, 與其在西魏北周時迥不相同,今以其屬於刑律範圍,俟於後刑律章論之。 童牛角馬,

餘人,凡疑滯不通,

皆取決於政。

隋書伍捌許善心傳(北史捌叁文苑傳許善心傳同)略云:

官直門下省。〔開皇〕十七年除祕書丞。〔仁壽〕二年加攝太常少卿,與牛弘等議定禮樂。 隋, 遇高祖伐陳, 許善心, 高陽北新城人也。 禮成而不獲反命,累表請辭,上不許,留繁賓館。 祖茂, 父亨。善心家有舊書萬餘卷, 皆徧通涉。 及陳亡, 貞明二年聘於 高祖勅以本

寅恪案:梁書肆拾許懋傳(南史陸拾許懋傳同)略云:

尤曉故事,稱爲儀注之學。天監初,吏部尚書范雲舉懋參詳五禮。時有請封會稽禪國山

之,因推演懋議,稱制旨以答請者,由是遂停。宋齊舊儀郊天祀帝皆用衮冕, 高祖雅好禮,因集儒學之士草封禪儀,將欲行焉,懋以爲不可,因建議, 至天監七 高祖 嘉納

年,懋始請造大裘,至是有事於明堂,儀注猶云服衮冕。懋駮云:「禮云:大裘而冕,祀

昊天上帝亦如之,良由天神尊遠,須貴誠質,今泛祭五帝,理不容文。」改服大裘,自此 零祭燔柴經無其文,良由先儒不思故也,請停用柴,其牲牢等物悉從坎瘞,以符周宣雲 又降勅問:「凡求陰陽,應各從其類,今雩祭燔柴以火祈水,意以爲疑。」懋答曰

據此,許懋尤曉故事,以儀注之學著名梁時,又參詳五禮,凡諸禮儀多刊正,則善心之預修隋 漢之説。」韶並從之。凡諸禮儀多所刊正。

禮, 其梁陳故事, 足供採擇者, 乃其家世顓門之業也。

隋書陸柒虞世基傳(北史捌叁文苑傳虞世基傳同)略云:

與見而歎曰:「南金之貴屬在斯人。」少傅徐陵一見而奇之,顧謂朝士曰:「當今潘陸也。」 虞世基,會稽餘姚人也。父荔,陳太子中庶子。世基博學有高才,兼善草隷。陳中書令孔

因以弟女妻焉。仕陳釋褐建安王法曹參軍,遷中庶子散騎常侍尚書左丞。及陳滅歸國,爲 通直郎直内史省 未幾拜内史舍人。

舊唐書壹玖拾上文苑傳袁朗傳(新唐書貳佰壹文藝傳上袁朗傳同)略云:

文,在陳釋褐祕書郎,甚爲尚書令江總所重。嘗製千字詩,當時以爲盛作。 陳尚書左僕射樞之子。其先自陳郡仕江左,世爲冠族,陳亡,徙關中。朗勤學好屬 使爲月賦, 朗染翰立成。後主曰:「觀此賦, 謝希逸不能獨美於前矣。」又使爲芝 陳後主聞而召

芳,然則史所謂隋「採梁儀注以為五禮」者,必經由此諸人所輸入,無疑也。(袁朗參預制定衣 時者也。隋修五禮,欲採梁陳以後江東發展之新跡,則茲數子者,亦猶北魏孝文帝之王 寅恪案:明克讓、裴政俱以江陵俘虜入西魏,許善心以陳末聘使值國滅而不歸,其身世與庾信 冠事見隋書壹貳禮儀志大業元年韶,兩唐書朗本傳未載。) 相似,虞世基、袁朗在陳時即有才名,因見收擢,皆為南朝之名士,而家世以學業顯於梁陳之 嘉蓮二頌,深見優賞,遷祕書丞。陳亡,仕隋爲尚書儀曹郎。

者,仍頗有誤會,故不憚繁瑣,重為申證,惟前文已徵引者,則從略焉。 雖受周 今已略據史傳, 禪 迥然別為一事, 而與後來李唐之繼楊隋者不同。此本極顯著之常識, 其禮制多不上襲北周,而轉倣北齊或更採江左蕭梁之舊典,與其政權之授受 以考隋制五禮之三源,請更舉隋書禮儀志之文,以為例 證。 主旨在闡 但近世之論史 明隋文帝 王業

隋書陸禮儀志略云

後周憲章姬周,祭祀之式多依儀禮。[隋]高祖受命,欲新制度,乃命國子祭酒辛彦之議定

祀典。

寅恪案:此隋祀典不襲北周之例證也。

又同書同卷略云:

明堂在國之陽,梁初依宋齊,其祀之法,猶依齊制,禮有不通者,武帝更與學者議之。 (北)齊制,又不得不採代表南朝後期之梁制,以臻完備也。 此梁更易齊制,乃南朝後期與其前期演變不同之例證。隋制五禮既用代表南朝前期之

又同書柒禮儀志略云:

可也。後周用夏后之時,行姬氏之蜡,考諸先代,其義有違,其十月行蜡者停,可以十二 開皇四年十一月韶曰:「古稱臘者接也,取新故交接。前周歲首今之仲冬,建冬之月稱蜡 隋初因周制,定令亦以孟冬下亥蜡百神,臘宗廟,祭社稷,其方不熟,則闕其方之蜡焉。

月爲臘。」於是始革前制。

寅恪案:此隋祀典不襲北周制之例證也。

又同書捌禮儀志略云:

太常卿牛弘、太子庶子裴政撰宣露布禮。及九年平陳,元帥晉王以驛上露布, 後魏每攻戰剋捷, 欲天下知聞,迺書帛建於竿上,名爲露布,其後相因施行。 兵部奏請依 開皇中迺部

被俘之一人,而以律學顯名者也。詳上文所引史傳, 寅恪案:此為隋代修禮,承襲北魏遺産,而更與南朝專家考定之一 茲不備述。 例證。裴政本江陵陷後朝士

又同書拾禮儀志略云。 輿輦之别, 蓋先王之所以列等威也。然隨時而變,代有不同。 梁初尚遵齊制, 其後武帝既

議定禮儀 乃漸有變革。

象、革、木等五輅及五色副車。此後漸修,具依梁制。

陳承梁末,王琳縱火,延燒車府。至天嘉元年,勅守都官尚書寶安侯到仲舉議造玉、金、

寅恪案:此南朝後期文物發展變遷,梁創其制而陳因之之例證也。

又同書同卷略云

帝又韶侍中崔光與安豐王延明、博士崔瓚採其議,大造車服。 李韶更奏詳定,討論經籍,議改正之,唯備五輅,各依方色,猶未能具。至熙平九年,明 自斯以後,條章粗備, 北齊

後魏天興初詔儀曹郎董謐撰朝饗儀,始制軒冕,未知古式,多違舊章。孝文帝時,

儀曹令

咸取用焉。其後因而著令, 並無增損。

寅恪案:李韶、崔光傳文前已徵引,韶之家世代表河西文化,光之家世代表南朝前期文化,

法。 此 為證,其事益明顯矣。 可知魏 故北齊。 初之制 咸取 用焉, 多違舊章, 其後因而著令, 得河 西南朝前期之文化代表人物, 並無增損, 是北齊文物即河西及南 始能制定一代新 朝前 期之遺産 禮 足資 後來師 得此

又同書同卷略云

之。開皇元年, 取尤異者,並加雕飾,分給六宫,合十餘乘,皆魏天興中之所制也。周宣帝至是咸復御 及[周]平齊,得其輿輅,藏於中府,盡不施用,至大象初,遣鄭譯閱視武庫,得魏舊物, 韶所制五輅, 齊天保所遵用者, 内史令李德林奏:「周魏輿輦乖制, 請皆廢毀。 高祖從之, 唯留魏太和李

又留魏[肅宗]熙平中太常卿穆紹議皇后之輅。

之例證也 文及其後嗣所採用南朝前期之文物, 禮制典章 寅恪案 周襲魏天興舊制 , 尤所諳練(見前文所引), 故請毀廢而用魏太和熙平齊天保之制度, 而此 雖加雕飾,仍不合華夏文化正式系統也。李德林本北齊舊臣, 經北齊遂成為一系統結集者。此隋在文物上不繼周 制 度即 而 當時 因齊 魏

又同 書同 卷略 云

用舊物。至九年平陳, 象輅已下旒及就數各依爵品, 又得輿輦, 雖依禮製名 舊著令者, 未及創造 以付有司,所不載者, 開皇三年閏 十二月並 並皆毀棄, 雖從儉 韶 停造 而

而於禮多闕。十四年,韶又以見所乘車輅因循近代,事非經典,於是命有司詳考故

改造五輅及副

尚書安平公宇文愷、内史侍郎虞世基、禮部侍郎許善心、太府少卿何稠、 大業元年, 更製車輦, 五輅之外設副車, 韶尚書令楚公楊素、 吏部尚書奇章公牛弘、工部 朝請郎閻毗等詳議

奏決,於是審擇前朝故事,定其取捨云。

築節中考證之,茲姑不涉及,以免枝蔓淆混焉。 至宇文愷、何稠、閻毗三人, 俱特以工巧知名, 寅恪案:輿輦之制,隋文帝受禪不襲周而因齊,即因襲南朝前期之文物,經過魏太和、齊天保 大部分前已論及, 之發展者增 保守主義, '補之不可, 此開皇十四年所以有更議之詔也。又大業元年所命議製車輦諸臣, 其乘用以限於舊令所著,是以於禮多闕, 而制度尚有所未備者,則南朝後期梁陳之文物未能採用故也。開皇九年平陳,初持 而虞世基、許善心則南朝後期文物即梁陳文化之代表者,可為鄙説之例證也。 , 其參與此役, 蓋欲求備禮,非更以南朝後期即梁陳二 蓋由於此, 將於下文附論都城建 其中

又同書同卷略云:

屬車秦爲八十一乘,漢遵不改, 大業初屬車備八十一乘,三年二月帝嫌其多,問起部郎閻毗。毗曰:「臣共宇文愷參 法駕三十六乘, 小駕十二乘。開皇中大駕十二乘, 法駕減

二,小駕除之可也。」 法令,憲章往古,大駕依秦,法駕依漢,小駕依宋。」帝曰:「大駕宜用三十六, 平王宏曰: 『八十一乘無所準憑, 江左五乘儉不中禮, 詳故實,此起於秦,遂爲後式,又據宋孝建時有司奏議,晉遷江左,唯設 宜設十二乘。』開皇平陳, 五乘。 尚書令建 法駕十 因以爲

時議定輿輦, 皇后屬車三十六乘。初宇文愷、閻毗奏定請減乘輿之半。禮部侍郎許善心奏駮曰:「宋孝建 正其數, 博士王燮之議謂十二乘通關爲允,宋帝從之,遂爲後式,今請依乘輿,不須差 天子屬車十有二乘,至大明元年九月有司奏皇后副車未有定式,詔下禮官議

為隋代制度之準憑,於此可見。此隋文制禮兼採南朝文物之例證也。 平陳之故得以效法。至許善心駮皇后屬車之數不應差降,請從宋制為準,則南朝舊臣以其所習 寅恪案:屬車之數,晉遷江左為五乘,宋改十二乘,開皇平陳,因以為法令,雖曰依宋, 實因

又同書壹壹禮儀志略云

傅清河王懌、黄門侍郎韋廷祥等奏定五時朝服, 未能皆得舊制。至太和中方考故實,正定前謬, 自晉遷江左, 中原禮儀多缺。後魏天興六年, 韶有司始制冠冕, 準漢故事, 更造衣冠, 尚不能周治。 五郊衣幘, 各依品秩, 以示等差, 然 各如方色焉。及後 及至熙平二年太

齊因之,河清中改易舊物,著令定制云。

後周設司服之官, 掌皇帝十二服。[又]諸公侯伯子男三公三孤公卿上中下大夫士之服。

[又]皇后衣十二等。

寅恪案:

周]宣帝即位,受朝於路門,初服通天冠絳紗袍,羣臣皆服漢魏衣冠。

隋 輸入之晉南遷以後江左之文物也。周滅齊不久,即已採用齊之制度, 順當日之趨勢, 更加以普遍化而已。 此點當於後論府兵制時詳之, 然則 茲即就禮制言 隋之採用齊 亦最 制 顯之 不過

周宣帝即位當時已服漢魏衣冠。所謂漢魏衣冠,即自北魏太和迄北齊河清時期北朝所

又通鑑壹柒叁陳紀,太建十一年春正月癸巳周主受朝於露門,始與羣臣服漢魏衣冠條, 胡注

例

證也

以此知後周之君臣,前此蓋胡服也。

之衣冠 典禮如 壹壹禮儀 元旦朝賀時服 志文, 前此後周之君臣平時常服或雜胡 而改用東齊所承襲南朝北魏制度之意。舊史論官制時往往以周官與漢魏對文亦此意 後周設司服之官下所列君臣衣冠諸制 用之。 史載宣帝君臣服用漢魏衣冠者 制 而 元旦 是也。 朝賀, 乃不依後周 此種摹倣古制之衣冠 即服用摹擬禮經古制之衣冠 先例服 用 摹 當然於正 倣 過禮經 隋書 古 制

禮

磵本通人,於此 也。若依胡氏之説, 尚偶有未照,然則此書之分析系統, ,豈後周既倣古制定衣冠,而不於正式典禮時用之,更將於何時用之乎?梅 追溯淵源, 其語似甚繁, 其事似甚瑣,

又隋書壹貳禮儀志略云:

終不能不為之者,蓋有所不得已也。

行,乃有立夏衮衣以赤爲質,迎秋平冕用白成形,既越典章,須革其謬。 五行, 論之,稱爲違古是也。周氏因襲, 未載其攝太常少卿,俟考)奏曰:「竊見後周制冕,加爲十二,既與前禮數乃不同,而色應 志云,立春之日京都皆著青衣,秋夏悉如其色。逮於魏晉迎氣五郊,行禮之人皆同此制, 今皇隋革命,憲章前代,其魏周輦輅不合制者,已勅有司盡令除廢。 是定令採用東齊之法。 考尋故事, 唯幘從衣色。今請冠及冕色並用玄, 唯應著幘者任依漢晉。」制曰:「可!」於 子庶子攝太常少卿裴正(寅恪案:正疑當作政,但隋書、北史裴政傳俱言政,轉左庶子,而 [隋]高祖初即位,將改周制,乃下詔曰:「祭祀之服須合禮經,宜集通儒,更可詳議!」太 又非典故,且後魏以來制度咸闕,天興之歲草創繕修,所造車服多參胡制, 將爲故事, 大象承統, 咸取用之。輿輦衣冠甚多迂怪。 然衣冠禮器尚且兼 謹案續漢書禮儀 故魏收

寅恪案:此隋制禮服不襲周而因齊之例證也。齊又襲魏太和以來所採用南朝前期之制,而江左

後之論史者往往稱羨宇文氏之制度,若聞裴氏之言,當知其誤矣。 車服為迂怪, 乃以古禮文飾胡俗所必致, 大抵宇文泰之制作皆可以迂怪目之, 豈僅車服而已, 源出自晉,上溯於漢,故曰漢晉,其引續漢書禮儀志以為依據,尤其明徵也。至其目北周

又同書同卷略云:

冠,自天子逮於胥阜,服章皆有等差,若先所有者,則因循取用。弘等議定乘輿服合八等 [隋]高祖元正朝會方御通天服,郊丘宗廟盡用龍衮衣,大裘毳襦皆未能備。 工部尚書宇文愷、兼内史侍郎虞世基、給事郎許善心、儀曹郎袁朗等憲章古制,創 衣冠法服始依禮具, 然皆藏御府, 弗服用焉。 及大業元年, 煬帝始韶 至平陳, 吏部尚

制度之關 制禮兼資梁陳之例證也 寅恪案:史言隋高祖平陳, 係密切如此 故梁陳舊人若虞世基、許善心、袁朗等尤為制定衣冠不可少之人, 得其器物,衣冠法物,始依禮具,然則南朝後期文物之發展與隋代 此隋

又同書同卷略云

通天冠之制,晉起居注成帝咸和五年制韶殿内曰,平天通天冠並不能佳,可更修理之。 在禮無文,故知天子所冠其來久矣。

同。 此隋 雖在禮無文,而為東晉南朝所習用者,即為典據,蓋與北周制法服之泥執周官者不 制禮逕據江東習俗為典據,而不泥經典舊文以承北周制度之例證也。

又同書同卷略云

云:「皇太子冬正大朝請服衮冕。」帝問給事郎許善心曰:「太子朝謁著遠遊冠 始後周採用周禮,皇太子朝賀皆衮冕九章服。開皇初自非助祭皆冠遠遊冠。至此, 牛弘奏 有何典

丞陸澄議: 『服冕以朝,實著經典,自秦除六冕之制,後漢始備,魏晉以來非祀宗廟 故?」對曰:「晉令皇太子給五時朝服遠遊冠。至宋泰始六年更議儀注,儀曹郎丘仲起 案周禮公自衮冕已下至卿大夫之玄冕皆其朝聘之服也。 謂宜式遵盛典, 服衮朝賀。』兼左 不欲

法,後周之時亦言服衮入朝,至於開皇,復遵魏晉故事。臣謂皇太子著遠遊謙不逼尊, 冕。』自宋以下始定此儀,至梁簡文之爲太子,嫌於上逼,還冠遠遊,下及於陳,皆依此 令臣下服於衮冕,故太子入朝因亦不著。宜遵前王之令典,革近代之陋制,皇太子朝請 於於

禮爲允。」帝曰:「善」」竟用開皇舊式。

亦所 後期較近之故事為典據,可知北齊間接承襲南朝前期之文物尚有所不足,不得不用梁陳舊人以 寅恪案:此節可取作例以為證明者, 同意 然煬帝從許善心之言,依魏晉故事,不改開皇舊式, 即隋代制禮實兼採梁陳之制, 蓋 雖北 不欲泥經典 周之制合於經 舊文 而以 江

又同書同卷略云:

梁武受禪於齊,侍衛多循其制,陳氏承梁,亦無改革。

後周警衛之制置左右官伯,掌侍衛之禁,各更直於內。 齊文宣受禪之後,警衛多循後魏之儀,及河清定令,官衛之制云云。(從略)

[隋]高祖受命,因周齊官衛微有變革。

隋修五禮,其所據之三源已略考證之矣。李唐承隋禮制,亦因其舊,此學者所共知, 寅恪案:宫衛之制關涉兵制,當於後兵制章詳之,茲姑置不論。但史述隋宫衛之制謂因於周齊 而微有變革, 絕與南朝梁陳無涉,此為論隋唐兵制之要見,亦隋兼襲齊制之例證也。

今惟略引一二舊文,以備佐證云爾。唐會要叁柒五禮篇目門(舊唐書貳壹禮儀志略同)云: 無待詳

祕書監魏徵、禮官學士備考舊禮,著吉禮六十一篇、賓禮四篇、軍禮二十篇、嘉禮四十二 武德初,朝廷草創,未遑制作,郊祀享宴,悉用隋代舊制。至貞觀初, 令蜡法唯祭天宗, 神州者國之所託,餘八州則義不相及,近代通祭九州,今唯祭皇地祇及神州, 凶禮六篇、國恤禮五篇,總一百三十八篇,分爲一百卷。初玄齡與禮官建議,以爲月 謂日月以下,近代蜡,五天帝、五人帝、五地祇皆非古典, 部中書令房玄齡 今並除之。 以正祀典。

禮

儀

四孟月讀時令、天子上陵朝廟、 又皇太子入學及太常行山陵、天子大射合朔、陳五兵於太社、 七年正月二十四日獻之, 韶行用焉。 養老於辟雍之禮,皆周隋所闕,凡增二十九條, 農隙講武、 納皇后行六禮 餘並依古

新唐書壹壹禮樂志云:

上疏請删去禮記舊文,而益以今事,韶付集賢院議。學士張説以爲唐貞觀、 宗又韶太尉長孫無忌等增之爲一百三十卷,是爲顯慶禮。玄宗開元十四年, 後不同,宜加折衷,以爲唐禮。乃詔集賢院學士右散騎常侍徐堅、左拾遺李鋭及太常博士 爲吉禮六十一篇, 唐初即用隋禮,至太宗時中書令房玄齡、祕書監魏徵與禮官學士等,因隋之禮,增以天子 施敬本撰述,歷年未就,而銳卒,蕭嵩代銳爲學士,奏起居舍人王仲丘撰定一百五十卷 是爲大唐開元禮。由是五禮之文始備, 陵朝廟 養老、 大射講武、 賓禮四篇, 軍禮二十篇, 讀時令、納皇后、太子入學、 而後世用之, 嘉禮四十二篇、 雖時小有損益, 太常行陵、 凶禮十一篇, 不能過也。 合朔、陳兵太社等 是爲 顯慶禮儀 通事舍人王嵒 貞觀 注前

圍,玄宗時制定之開元禮,乃折中貞觀、顯慶二禮者,故亦仍間接襲用隋禮也。既「後世用之 太宗時制定之貞觀禮, : 唐會要及舊唐書之所謂古禮, 參以新唐書之文, 即據隋禮略有增省,其後高宗時制定之顯 足知即 為隋禮。 慶禮, 然則 唐高 亦不能 祖 時 脱 固 此 全

不能 代之文物制 大過 是唐禮 度者 不亡即隋 於上所列舉之三源, 禮猶存, 其所從 究其 八所出, 出之三 一源者, 窮其 、 所變, 亦俱 託 而後其 唐 禮 一遍蜕演 而 長 存 也。 化之 跡 然則治 李唐 始有

附:都城建築

系統可尋矣。

捌地 唐之宫城承 理志 關 内道 隋之舊, 所 Z 猶清之宫城承明之舊, 但其事至明顯, 無取多述, 但舉一 證,如舊唐書叁

京師, 秦之咸陽,漢之長安也。隋開皇二年, 自漢長安故城東南移二十里, 置新都,

解 影響, 因, 即 朝之位置所以與前 紀念東洋史論叢那波利貞氏從支那首都計 已足矣,然隋創建新都大興城,其宮市之位置與前此之長安不同,世有追究其 而推及隋代營造新都者家世之所出,遂以為由於北魏胡族系之實行性者(見桑 無寧 此乃隋代大部分典章制度承襲北魏太和文化之一端, 子就楊隋一 此之長安殊異者, 代全部典章制度立論較易可通, 實受北魏孝文營建之洛陽都 畫史上考察唐之長安城)。寅恪則謂 或竟以太和洛都新制歸 與其 以 城及東魏、北齊之鄴都南 北魏胡族 功於河 系之實 隋 創 所以殊異 原 新 行 西系漢族之 性 都 隲 藏 城之 之原 點為 其 還

實行性 漢族 述隋代技術 系之實行 之家學 似尚 性 人才之家世 一點相類, 然隋代之技術 可備一説,以資參考也。又隋代新都其市朝位置之異於前者,雖非由於北 亦不可置而 所以補上 人才則頗與 一文論隋大業元年制定車輦條之所未備言者也。 不論, 一西胡 故茲先論隋唐 種族 有關 兩 此固別為 朝制 度 與北 事, 魏太和文化之關 以其 八與前 所論中古時 魏胡 後附 族

直朝背市

周官考工記匠人云:

南北 然則西漢首都宮市之位置與考工記匠人之文可謂符合,豈與是書作成之時代有關耶?至唐代則 宫則六街三市」,是與隋唐首都之大興長安城其宫位於首都之北部, 其解釋雖謂宫在 市位於宫之北也。 軍制之言(詳見前中央研究院社會科學研究所兵制研究專號上賀昌羣先 則無可疑, 推知西漢首都之長安「司馬門在未央宮之南, 故其所依據匠人營國之材料其中必有為當時真正之背景者。 IF. 考工記之作成時代頗晚, 中,朝在其南, 而市在其北。然僅從宫與市位置言, 即是宫位於市之南, 要乃為儒家依據其所得之材料,而 直抵長安城垣, 市則位於南部者適為相反。 並無坊市 生南 據古今學人論漢 北 加 而未央宫長樂 以理想化之 軍 論 文 中 或 初

央政治革命之成敗所以往往繫於玄武門衛軍之手者也。(此點本甚明顯,一檢史文便可證知,

在政變之際, 其向背最足為

重輕, 此李唐一代中

守衛宫城北門之禁軍,以其駐屯地關係之故,

軍 唐 武 而 一. 德九年六月四日玄武門之變, 舊史記 載 殊多隱諱,今得巴黎圖書館藏敦煌寫本伯希和號貳陸肆拾李義府撰常何墓誌銘 太宗所以能制勝建成元吉者, 其關鍵實在守玄武門之禁

以供 多證 於當日成敗所以然之故益瞭然可知矣。

無

又若依寅恪前所持文化淵源之説, 則太和洛陽新都之制度必與江左、河西及平城故都皆有關

南齊書伍柒魏虜傳略云

六月雨雪。 平城南有干水,出定襄堺,流入海,去城五十里,世號爲索干都,土氣寒凝,風砂恆起, 今爲副使 清河崔元祖啓世祖曰:「少游臣之外甥, 議遷都洛京, [永明] 九年遣使李道固、蔣少游報使。少游有機巧,密令觀京師 必欲模範宫闕, 豈可令氈鄉之鄙 取象天宫, 特有公輸之思, 宋世陷虜, 臣謂且 留少游, 處以大匠 令使主反

命。

」世祖以非和通意,不許。少游,

樂安人,虜宫室制度皆從此

出

極殿 畫, 使江左, 寅恪案:建康 是否真與建康有關,殊難論斷。但魏書北史蔣少游傳(見前引)言:「後於平城將營太廟太 遣少游乘傳詣洛, 自有摹擬建康宫闕之意。 如其量準洛陽魏晉廟殿之例, 臺城雖頗近城北,然其宫城對於其地山川形勢與北魏洛都有異, 量準魏晉基址 崔元祖之言不為虚發, 而非都城全部之計畫。 。後為散騎侍郎,副李彪使江南」,故魏孝文之遣少游 但恐少游所摹擬或比較者 史言:「虜宫室制度皆從此出 故洛都全體計 僅限於宫

則言過其實 然則 不得依 蓋北魏洛陽新都之全體計畫中尚有平城 南齊書魏虜傳之文, 河 西二因子, 且 其 規畫 大計 亦 非 少 游 主

至平城舊都規制 必有影響於洛陽新都,自無疑義, 遽推斷北魏洛都新制悉做江左之建康 但當日平城宫城規制頗不易考知, 明矣。

南齊

書伍

柒魏虜傳略 云

什翼 珪始都 (指北燕馮氏 平 城)徙其居民, 猶逐 水草, 大築郭邑, 無城郭, 木末始土著。佛狸破梁(凉?)州(指北 截平城西爲宫城, 其郭城繞宫城南,悉築爲坊, 涼沮渠氏),

坊開 坊大者容四五 百家 小者容六七十家。

寅恪案:魏徙凉州之人民於平城,

建築彫刻藝術受其影響,

如雲

出

石窟即其

故魏平

何 後, 平城之新建築如郭城繞宮城南, 洛陽新 蓋皆就已成之現實增修,以摹擬他處名都之制者(平城新制擬涼州都會, 則 都 不宜輒加論斷 如是 遷就, 也 其詳容後證述,總之史料既太略,魏平城新制所受河西文化之程 悉築為坊 點, 與後之東魏鄴都南 而鄴 城之制頗 例證, 都 南城不得不擬 有近似之處 度 涼 如 小

料推測涼州都會姑臧宮城之規制。若所推測者不誤, 都之人即 依較 詳之史料 李沖之家世 考察, 端。 關於北魏洛都 其 人與 河西關 新 制所受河西文化之影響, 係密切, 不待詳 則是平城規制之直接影響於洛陽新都者亦 述, 故引史文以資論 可得而 言者, 則有 證 並 主 據 建洛陽 簡 略 史

即 河西文化之間接作用也。魏書柒下高祖紀(北史叁魏本紀同)云:

太和十七年冬十月,徵司空穆亮與尚書李沖、將作大匠董爵經始洛京。

掌,故以之領護此役;董爵則官將作大匠, 寅恪案:北魏孝文帝遷都洛陽,其營建之任委之穆亮、李沖及董爵(通鑑壹叁玖齊紀永明十 年作董爾 新都之規制悉出自李沖一人。魏書李沖傳所謂:)三人。此三人中穆亮仍代北舊人具有勛貴之資望, , 建築是其職務, 故不得不使之參預其事 且職為司空,營國之事本冬官所 其實洛陽

是其明證也。北魏太和洛陽營建規制今日尚可於楊衒之洛陽伽藍記一書約略得知,而其 沖機敏有巧思,洛陽初基,安處郊兆,新起堂寢,皆資於沖。(前文已引。)

顯

所附圖見之,不待詳證也。然則北魏洛都新制所以異於經典傳統 異於前北國都皇居在南市場在北之特點,亦可於吳若準洛陽伽藍 於河西系漢族李沖本身求之, 而凉州都會之規模, 及其家世舊聞之薰習, 面朝背市之成規者 記集證 疑與此洛都新制 唐晏洛陽伽藍 ,似不 記鈎沉 不無 得

魏書李沖傳云:

關

涉。

茲設

此假想,

分別證述之如下:

葬於覆舟山 近杜預冢, 高祖意也。(前文已引。)

蓋晉之杜預以儒者而有巧思, 其所創制頗多,見晉書叁肆杜預傳,茲不具述,惟其中請建河橋

二禮

儀

冢非僅有取於預遺令儉約之旨, 亦實以沖之巧思有類乎預, 於富平津 事尤與西晉首都洛陽之交通繁盛有關,甚為晉武帝贊賞。 故以此 二人相比方也。 魏孝文之令李沖葬 洛陽伽 沂 杜 預

一其叙城南略

云

宣陽門外四里至洛水,上作浮橋,所謂永橋也。永橋以南圜丘以北伊洛之間夾御道有四夷 販客日奔塞下, 西夷來附者處崦嵫館,賜宅慕義里。自葱嶺以西至於大秦,百國千城莫不款附 門巷修整, 號曰四通市, 所謂盡天地之區矣。 閶闔填列, 民間謂永橋市, 青槐蔭陌, 樂中國土風因而宅者,不可勝數, 伊洛之魚多於此賣, 士庶須膾皆詣取之, 魚味甚 緑柳垂庭, 天下難得之貨, 咸悉在焉。 是以附化之民 别立 一市於 商胡

美,京師語曰:「伊洛鯉魴,貴於牛羊。」

同), 之經濟政策及營造便利有關,此非全出假想也,請更證之以魏書柒玖成淹傳(北史肆陸成淹傳 其傳文略云: 北魏洛陽城伊洛水旁乃市場繁盛之區,其所以置市於城南者,殆由伊洛水道運輸於當日

慕容白曜,赴闕授著作郎。太和中文明太后崩, 義隆爲撫軍府中兵參軍。 上谷居庸人也, 自言晉侍中粲之六世孫。 劉彧以爲員外郎, 假龍 蕭賾遣裴昭明、 祖昇家於北海, 驤將軍領軍主, 謝竣等來弔, 父洪名犯顯 令援東陽歷城 祖 欲以朝服行 廟 皇 興 中降 仕劉

駒等主舟構 明所言,淹以狀對, 高祖勅淹曰:「朕以恆代無運漕之路,故京邑民貧,今移都伊洛,欲通運四方, 執志不移,高祖敕尚書李沖令選一學識者更與論執, 敕賜驊騮馬 苦於厲涉, 人皆難涉, 將汎泗入河, 诉流還洛, 軍次稿磝, 淹遂啓求勅都水造浮航, 匹、衣冠一襲。於時宫殿初構, 我因有此行, 必須乘流, 高祖韶沖曰:「我所用得人。 高祖賞納之。 意欲榮淹於衆, 所以開百姓之心, 知卿至誠, 而今者不得相 」賜淹果食。 淹以黄河峻急, 經始務廣, 沖奏遣淹。既而高 兵民運材日有 高祖幸徐州 慮有傾危 朔旦受朝 祖遣 萬計 敕 乃上 李沖 淹 與間 伊洛 疏 百官 而 問 黄

降 加以擴充 原 孝文帝本身,然洛都營建,李沖實司其事,故一反傳統面朝背市之制,而置市場於城南者, 孝文令其主舟檝 因 此 人而受孝文帝之知賞, 任之為都水使者 則建置新都之宫闕市場,更不能不就經濟觀點加以考慮。洛陽之地, 得知魏孝文遷洛原因,除漢化及南侵二大計畫外,經濟政策亦為其一。夫遷都既有 則城南伊洛二川之傍水道運輸頗為便利,設置市場,乃最適宜之地。又成淹以南朝 並知 左右都水事等, 其事相類也 固由李沖之薦引, 可以推知。 (見前引魏書蔣少游傳)。 亦因淹本籍青州, 蓋與蔣少游之隸籍青州 但此經濟政策其最高 習於水道 運輸, (樂安博昌) 本西晉首都舊址 觀其請建浮航 主 故孝文修 一動者雖 經濟 為

乃賜帛百疋, 知左右二都水事

就北 出於李沖之規畫。 魏胡族 系之實行性以為解釋,無寧歸功於河西系漢族李沖之實行性,較易可通也。 蓋李沖乃就地施工主持建設之人,此事非與之有關不可。此寅恪所以言與其

以論河西文化節中已言之,茲不復詳。故由史文推證,可知沖乃一保存鄉里土風國 也)之人物無疑也。今據一二簡略史文推測,似涼州都邑頗有宫在城北而市在城南之狀況,如 晉書壹貳貳吕纂載記所載 李沖為西涼李暠之曾孫, 至於關 係李沖河西家世一點,姑就假想試為略論, 其對於涼州之親故鄉里,尤所篤愛,至以此獲譏於世。前引李沖傳文 聊備一説而已, 殊不可視作定論也。 粹(西涼 國

禁城,將爲亂耶?」因抽劍直前,斫纂中額,纂左右擒之。纂曰:「義士也,勿殺!」紹遣 之曰:「誰也?」衆曰:「太原公。」從曰:「國有大故,主上新立,太原公行不由道, 於是夜率壯士數百, 纂,光之庶長子也。苻堅時入太學,及堅亂, 武賁中郎將吕 光死,紹嗣僞位。[日]弘密告纂曰:「欲遠追廢昌邑之義, 開率其禁兵距戰於端門。衆素憚纂,悉皆潰散。纂入自青角門,升於謙光 踰北城攻廣夏門, 弘率東苑之衆斫洪範門。 西奔上邽, 轉至姑臧, 左衛齊從守融 以兄爲中宗, 拜武賁中郎將, 封太 明觀 何如?」纂 夜 逆問

水經注肆拾都野澤條引王隱晉書(參藝文類聚陸叁及太平御覽壹玖柒所引)云:

殿,

紹登紫閣

自殺

駿增築四城箱各千步。東城殖園果,命曰講武場,北城殖園果,命曰玄武圃, 涼州城有龍形,故曰卧龍城。南北七里,東西三里,本匈奴所築,乃張氏之世居也。 皆有宫 又張

中城作四時官,隨節遊幸。并舊城爲五,街衢相通二十二門。大繕宫殿觀閣,采妝飾擬中

夏也

通 選壹壹晉紀隆安三年涼王光疾甚條, 胡注云:

廣夏門、洪範門皆中城門也。

青角門,

蓋涼州中城之東門也。

太平御覽壹陸伍州郡部涼州條引晉書云:

後涼

張軌求爲涼州,於是大城此城(姑臧)爲一府會以據之,號前涼, 吕光復據之,

若詳繹上引簡略殘缺之史料,則知姑臧之中城即張氏、吕氏有國之宫城,齊從所謂禁城者是 張氏築宮摹擬中夏,則前後二涼,其城門之名,必多因襲晉代洛陽之舊,考洛陽伽藍 記序

西頭 高祖因而不改。自廣莫門以西至於大夏門宫觀相連,被諸城上也。 十七年, 日大夏門, 後魏高祖遷都洛陽, 漢曰夏門, 魏晉曰大夏門,東頭曰廣莫門, 韶司空穆亮管造宫室, 洛城門依魏 漢 日 |穀門, 晉舊名。 魏晉 北 日 面 有

七七

據 此 城直 或禁城之北 則吕 抵 E 宫 踰 姑 臧 其間自不能容市場之存在, 又依王 北 城所攻之廣夏門, 隱所記張氏增築北城,命之曰 必略與晉代洛陽之大夏門、 蓋與 經典傳統背市之説不合。 圃, 既殖園 果, 廣莫門 復 夫姑 相當 有宫殿 臧 之宫既 乃 是 其 由 中 在 增 城 即

涼州都 晉故都 宫市位置為遷就舊址之故, 之洛陽就 築之南 遂成 故增 遺 城 會姑臧 言在 址 築之東 築之北城 河西模範標準之城邑,亦如中夏之有洛陽 加以 即當 北 名城之影 改善, 争 市 西 及東 在 城 城前門之正面 南 地 響, 域 殆有似張氏之增築姑 城皆 一點言之, 甚 不能與 小, 遂致北魏洛都 殖果木, 而增築之南 實最 中國經典舊說符合。 殊有相似之處。 俱無 為可能。 容納 反漢制之因襲 城則 臧 城者, 市場之餘 若所 面 也。 又姑 積 推測者 豈其為河 頗 但其 李沖受命 臧 廣 地, 本 不誤, 而開隋代之規模數? 城本為匈 為涼州政治文化 然則以 自不待言。 西家世 規畫洛陽新 是前 通常情 遺 奴舊建 傳所 後涼 H. 勢論 其 之姑 薰習 制 中 當張 城 心 亦不 南 此 臧 姑 與 前 無意之中受 氏 復 臧 北 能 增築 所謂 經 後 市 長 不就 張 來 場 時 姑 氏 北 在 東 西 其 增 魏

故修建鄴都南城之高隆之為漢種,計劃大興新都之宇文愷為胡族, 邑建置 新 制 全部 其所以殊異於前代舊規之故, 首 受北 魏洛 都之影響,此 雖不易確知, 乃文化染習及師 然東魏鄴 承問 題, 都 南 種族縱殊, 與 城 個 及隋 家 代 大興 性 即 (或別 質 唐

想

姑備

説

自不

得目

為定論者也

之問題,實一胡化漢化之問題,而非胡種漢種之問題,當時之所謂胡人漢人,大抵以胡化漢化 此 但 一同為北魏洛都文化系統之繼承人及摹擬者,則無少異。總而言之,全部北朝史中凡關於胡漢 書所能詳盡,要為論北朝史事不可不知者,遂亦略著其意於此。 不以胡種漢種為分別,即文化之關係較重而種族之關係較輕,所謂有教無類者是也。此意

北史伍肆高隆之傳(北齊書壹捌高隆之傳略同)略云:

尚書右僕射,又領營構大匠,以十萬夫撤洛陽宫殿運於鄴。構營之制皆委隆之,增築南城 姓。隆之後有參定功,神武命爲弟,仍云勃海蓨人。後起兵於山東,累遷并州刺史, 周二十五里,以漳水近帝城, 高隆之,洛陽人也,爲閹人徐成養子, 利於時。太僕卿任集(北齊書作太府卿任集, 起長隄以防汎溢,又鑿渠引漳水周流城郭,造水碾磑,並有 少時賃升爲事,或曰父幹爲姑壻高氏所養, 通鑑壹伍柒梁紀大同元年十一月甲午(寅)東 因 入爲 從其

齊書叁別辛朽專(比夬五合辛崔專付朽專司)各云::魏閶闔門災條作太府卿任忻集)同知營構。

北齊書叁捌辛術傳(北史伍拾辛雄傳附術傳同

辛術,少明敏有識度,釋褐司空胄曹參軍,與僕射高隆之共典營構鄴都官室。術有思理,

魏書壹貳孝靜紀(北史伍魏本紀同)略云:

天平元年十月丙子車駕北遷於鄴。庚寅車駕至鄴, 居北城相州之解。

二年八月甲午發衆七萬六千人營新宫,冬十有一月甲寅閶闔門災。

訟,壬午閶闔門災。 四年夏四月辛未遷七帝神主入新廟,大赦天下,内外百官普進一階。六月已已幸華林園理

元象元年六月壬辰帝幸華林都堂聽訟。

興和元年冬十有一月癸亥以新宫成, 大赦天下。

發夫五萬人築漳濱堰, 三十五日罷。 二年正月丁丑徙御新宫, 大赦, 内外百官普進 一階,營構主匠别優一階。三年冬十月已已

悉, 即知東魏及高齊之鄴都之新構,乃全襲北魏太和洛陽之舊規,無復種族性質之問題,直是文化 於鄴是也。其司營構之任而可考知者, 見梗概,茲不備引。其宫市位置及門闕名稱無一不沿襲洛都之舊,質言之,即將洛陽全部移徙 寅恪案:東魏鄴都之制,可略於葛邏禄迺賢河朔訪古記中及顧炎武歷代帝王宅京記壹貳所考窺 但可一言以蔽之,北魏洛陽都邑環境中所產生之人物而已。觀於主持營構者高隆之一傳, 如高隆之、任集、辛術諸人,其男女系之血統雖不盡

茲請考隋造新都大興城之經過。隋書壹高祖紀上(北史壹壹隋本紀上同)略云:

系統之關

係,

事實顯著,

不待詳論也。

創造新都,十月辛卯以營新都副監賀婁子幹爲工部尚書,十二月景子名新都曰大興城。 開皇二年六月景申韶左僕射高頻、將作大匠劉龍、鉅鹿郡公賀婁子幹、太府少卿高龍叉等

三年正月庚子將入新都,大赦天下。三月景辰雨,常服入新都。

唐六典(近衛本)柒工部郎中員外郎條略云:

十二坊,兩市居四坊之地,凡一百一十坊。開元十四年又取東面兩坊作興慶宮。 北十五里一百七十五步。墙高一丈八尺,皇城之南東西十坊,南北九坊,皇城之東西各一 卿高龍叉並充檢校。至三年三月移入新都焉,名曰大興城。東西十八里一百一十五步,南 川,西次灃水。太子左庶子宇文愷創制規模,將作大匠劉龍、工部尚書賀婁子幹、 今京城隋文帝開皇二年六月韶左僕射高類所置, 南直終南山子午谷, 北據渭水, 太府少 東臨 渡

北史柒貳高頌傳(隋書肆壹高頌傳略同)略云:

僚佐,賜姓獨孤氏。及[隋文]帝受禪,拜尚書左僕射納言,領新都大監,制度多出於頌。 衛尉卿。祖孝安,位兖州刺史。父賓,仕東魏。大統六年避讒棄官奔西魏, 自言勃海蓨人也。其先因官北邊,没於遼左。曾祖暠,以太和中自遼東歸魏, 獨孤信引賓爲

隋書伍叁賀婁子幹傳(北史柒叁賀婁子幹傳同)略云:

賀婁子幹,本代人也。隨魏氏南遷,世居關右。祖道成,魏侍中太子太傅,父景賢,右衛

授誉新都副監,尋拜工部尚書。其年突厥復犯塞,以行軍總管從竇榮定擊之。 軍總管從上柱國元諧擊之,功最,優韶褒美。高祖慮邊塞未安,即令子幹鎮凉州。 思安縣子。 軍。子幹少以驍武知名,周武帝時釋褐司水上士,稱爲强濟,累遷小司水, 大象初,領軍器監。開皇元年,進爵鉅鹿郡公。其年吐谷渾寇凉州, 子幹以行 以勤勞封 明年徵

周書壹玖宇文貴傳(北史陸拾宇文貴傳同)略云:

隋書陸捌宇文愷傳(北史陸拾宇文貴傳附愷傳及周書壹玖宇文貴傳略 宇文貴,其先昌黎大棘人,徙居夏州,父莫豆干,[子]愷。 同)略云:

被誅,除名於家,久不得調,會朝廷以魯班故道久絕不行,令愷修復之。既而上建仁壽 監。高頻雖總其大綱,凡所規畫皆出於愷。後決渭水達河以通運漕,韶愷總督其事。兄忻 馳赦之,僅而得免。後拜營宗廟副監太子左庶子。及遷都,上以愷有巧思,韶領營新都副 父公子。及[隋高祖]踐阼,誅宇文氏,愷亦在殺中,以其與周本别,兄忻有功於國,使人 愷少有器局,家世武將,並以弓馬自達。愷獨好學,博覽書記,解屬文, 訪可任者,楊素言愷有巧思,上然之,於是檢校將作大匠,歲餘拜仁壽宫監,尋爲將 文獻皇后崩, 愷與楊素營山陵事。 煬帝即位, 遷都洛陽, 以愷爲營東都 多技藝,號爲名 副 愷

揣帝心在宏侈,於是東京制度窮極壯麗,帝大悦之,拜工部尚書。

及長城之役,韶愷規度

「宋起居注曰:『孝武帝大明五年立明堂。』梁武即位之後,移宋時太極殿以爲明堂。平陳 隘卑陋, 堂廢絕,隋有天下,將復古制,議者紛然,皆不能決。愷博考羣籍,奏明堂儀,表曰: 人,離合爲之,下施輪軸,推移倏忽,有若神功,戎狄見之,莫不驚駭。自永嘉之亂 之後,臣得目觀,遂量步數,紀其丈尺。猶見基内有焚燒殘柱,毁斫之餘入地一丈,儼然 時帝北巡,欲誇戎狄,令愷爲大帳,其下坐數千人;又造觀風行殿,上容侍衛者數百 總撰今圖,其樣以木爲之。」帝可其奏。會遼東之役事不果行。卒官。撰東都圖記 柱下以樟木爲跗長丈餘闊四尺許,兩兩相並,瓦安數重,宫城處所乃在郭內。 未合規摹,祖宗之靈得崇嚴祀。周齊二代闕而不修,大饗之典於焉靡託。臣研究

同書同卷何稠傳附劉龍傳(北史玖拾藝術傳下何稠傳附劉龍傳同)云: 二十卷、明堂圖議二卷、釋疑一卷,見行於世。

開皇時有劉龍者,河間人也。性强明有巧思,齊後主知之,令修三爵臺,甚稱旨,因而歷 職通顯。及高祖踐阼,大見親委,拜右衛將軍,兼將作大匠。遷都之始,與高頌參掌制

北齊書壹肆長樂太守靈山傳(北史伍壹齊宗室諸王傳上長樂太守靈山傳同)云: 义少謹, 武平末給事黄門侍郎, 隋開皇中爲太府少卿, 坐事卒。

已於前 無關 護制 高 南城之制 為太府少卿,則開皇二年六月丙申命營新都詔書中之太府少卿高 致 任營新 六典以為「宇文愷創制規模」, 類 傳 雖 言 寅恪案: 位通 龍叉即 定 論 而 顯 都 Fi. 隋代營建大興新都城即後來唐代長安城諸人,除賀婁子幹及宇文愷外, 大興 禮之比 大業 副 高义,或家世久居山東,或本為北齊宗室及遺臣, 即太和洛陽之遺 新都「制度多出於類」,然宇文愷傳又謂「高熲雖總其大綱, 隋書無高 監 新 元 年議 但是年即率兵出擊突厥 制彼獨主 吾人可不必於頌本身性質及其家世多所推究也。 制車 龍叉傳, 辇 其 ,必至少由劉龍 事, 時 而北 故知高頌之於營建新都, 涉及, 似 齊書、 難 前已節録宇文愷傳文較詳, 解 釋, 北史齊宗室高靈山傳附有高乂事蹟, 居職甚 高义二人輸入於隋也。 鄙意宇文愷、 暫, 實無 殆不過以宰相資望領護其事 閻 足 俱可謂洛陽鄴都系文化之産物。 述。 毗 龍叉當即其 茲並取舊史中閻毗 劉龍 何稠三人皆隋代之技術專家 至宇文愷一人蓋與 賀婁子幹雖於開 凡所規畫皆出於愷」,又唐 在北齊 人無疑。然則 本以 謂 高類、 其於隋開皇中 修宫室稱旨 皇三年 何稠及其 山東地域 如楊素 劉龍 料 六月 領 及

(書貳拾閻慶傳(北史陸壹閻慶傳同)略云:

家屬

傳文

有

關者遂寫於下,

綜

合試釋之。

厝

使持節車騎大將軍、 階 慶 河 南河陰人也。 燉煌鎮都大將。 曾祖善 仕魏歷龍驤將軍雲州鎮將, 父進,正光中拜龍驤將軍,屬衛可孤作亂, 因家於雲州之盛樂郡。 攻圍盛 祖提,

隋書陸捌閻毗傳(北史陸壹閻慶傳附毗傳同)略云: 進率衆拒守,城竟獲全,以功拜盛樂郡守。晉公[宇文]護母,慶之姑也。次子毗。

,毗)能篆書,工草隷, 尤善畫,爲當時之妙,

損。長城之役,毗總其事。及帝有事恆岳,詔毗營立壇場。將興遼東之役,自洛口開渠, 嗣位,盛修軍器,以毗性巧,諳練舊事,詔典其職,尋授朝請郎,毗立議輦輅車輿多所增 受禪,以技藝侍東宫,數以琱麗之物取悦於皇太子[勇]。太子服玩之物,多毗所爲。 達於涿郡,以通運漕, 毗督其役。營建臨朔宫,又領將作少監。 周武帝見而悦之,命尚清都公主。[隋]高祖 煬帝

新唐書柒叁下宰相世系表閻氏條略云:

將提,提生盛樂郡守進,進少子慶生毗。 北平太守安成侯鼎,字玉鉉,死劉聰之難。子昌奔於代王猗盧,遂居馬邑。孫滿後魏諸 大夫,自馬邑又徙河南。孫善龍驤將軍雲中鎮將, 因居雲中盛樂。生車騎將軍燉煌鎮都大

舊唐書柒柒閻立德傳(新唐書壹佰閻讓傳同)略云:

閻立德,雍州萬年人,隋殿内少監毗之子也。其先自馬邑徙關中。毗初以工藝知名,立德 典式,時人稱之。貞觀初歷遷將作少匠,封大安縣男。高祖崩,立德以營山陵功擢爲將作 與弟立本早傳家業,武德中累除尚衣奉御。立德所造衮冕、大裘等六服並腰輿、傘扇咸依

大匠。貞觀十年文德皇后崩,又令攝司空,營昭陵, 十八年從征高麗,及師旅至遼澤,東西二百餘里泥淖,人馬不通,立德填道造橋, 太宗甚悦。尋受韶造翠微官及玉華宫,咸稱旨, 賞賜甚厚。俄遷工部尚書。二十三年 坐怠慢解職。十三年復爲將作大匠。

攝司空

營護太宗山陵, 事畢進封爲公, 顯慶元年卒。

主爵郎中, 與,太宗擊賞數四,韶坐者爲詠,召立本令寫焉,時閣外傳呼云畫師閻立本。立本時已爲 遷右相。立本雖有應務之才,而尤善圖畫,工於寫真,秦府十八學士圖及貞觀中凌煙閣功 立本顯慶中累遷將作大匠。後代立德爲工部尚書,兄弟相代爲八座,時論榮之。總章元年 深誠,勿習此末伎!」立本爲性所好,欲罷不能也。及爲右相,與左相姜恪對掌樞密。恪 既歷任將軍,立功塞外,立本唯善於圖畫,非宰輔之器,故時人以千字文爲語曰: 圖並立本之跡也,時人咸稱其妙。太宗嘗與侍臣學士泛舟於春苑池中,有異鳥隨波容 幸免面墙,緣情染翰,頗及儕流,唯以丹青見知,躬厮役之務,辱莫大焉, 奔走流汗, 俛伏池側, 手揮丹粉, 瞻望坐賓,不勝塊赧, 退誠其子曰:「吾少

隋書柒伍儒林傳何妥傳(北史捌貳儒林傳下何妥傳同)略云:

左相宣威沙漠,右相馳譽丹青。(參考張彦遠歷代名畫記玖駮此説。)

西域人也。父細胡(北史作細脚胡)通商入蜀,遂家郫縣,事梁武陵王紀,

帛,遂致巨富, 江陵陷, 周武帝尤重之,授太學博士。高祖受禪,除國子博士,爲國子祭酒. 號爲西州大賈。妥少機警,十七以技巧事湘東王,後知其聰明,召爲誦書

日 .書陸捌何稠傳(北史玖拾藝術傳下何稠傳 同)略云:

而就, 今天下大定, 朕承洪業, 服章文物闕略猶多, 卿可討閱圖籍, 監,歷太府丞。稠博覽古圖,多識舊物,波斯嘗獻金縣錦袍,組織殊麗,上命稠爲之。稠 連,帝善之,以稠守太府卿。後三歲兼領少府監。遼東之役攝右屯衛將軍,領御營弓弩手 等勾覈之,數年方竟,毫釐無舛。稠參會今古,多所改創。帝復令稠造戎車萬乘鈎陣八百 不異。仁壽初,文獻皇后崩,與宇文愷參典山陵制。大業初, 錦既成,逾所獻者,上甚悦。時中國久絶琉璃之作,匠人無敢厝意,稠以緑瓷爲之,與真 陵陷,隨妥入長安,仕周御飾下士。及高祖爲丞相,召補參軍,兼掌細作署, 三萬人。時工部尚書宇文愷造遼水橋不成,師不得濟,右屯衛大將軍麥鐵杖因而遇害, 稠造橋,二日而就。初稠制行殿及六合城,至是帝於遼左與賊相對,夜中施之,其城周 」其日拜少府卿。稠於是營黃麾三萬六千人仗及車與輦輅、 送於江都。所役二十萬餘人,用金銀錢物鉅億計,帝使兵部侍郎明雅、選部 國子祭酒妥之兄子也。父通善斲玉。稠性絶巧, 有智思, 用意精微。年十餘歲遇江 煬帝將幸揚州,謂稠 皇后 營造與服羽儀, 鹵簿、 百官儀服依期 送至 累遷御府 江 帝 都

迴 八里, 而 城及女垣合高十仞, 高麗望見 謂若神功。 上布甲士, 從幸江 都, 立仗 遇宇文化及作亂 建旗 四 童 置 闕 以 爲工部 面别一 觀, 尚 觀 化及敗 下三門, 遲 陷

載。 功。 疑 通 法中國之經 久為華夏文化所染習,故其事業皆藉西域家世之奇技,以飾中國經典之古制。 為燉煌人之傳説,亦與西 不具通識之言者也。 興長安城之規模及隋 問 商及居留之區域一事, 合隋代三大技術家宇文愷、 夫大興、)何稠家世出於西域, 雖皆為華夏之古制 典也。 長安都城宫市之規模取法太和洛陽及東魏高齊鄴都南 復以爲工部尚書。 但其實行營建製造而使成宏麗精巧, 前賢有中學作體, 唐大輅、 寅恪曾別有所論, [域及河西建築工藝有關,見段成式酉陽雜俎續集肆 史已明言, 閻毗 衮冕之制度出於胡制者固 然能 建德敗, 依託經典舊文,而實施精作之,則不藉西域之工藝亦不為 何稠之家世事蹟推論, 無待 西學為用之説, 推證, 歸於大唐, 茲不復贅(見一九三五年清華學報拙著李白氏族之 所可注意者 非, 授將作小匠 則有資於西域藝術之流傳者矣, 若取以喻此, 然謂 蓋其人俱含有西域 則蜀漢之地當梁時 其絶 (北史作少府監), 城, 猶明堂 無繫於西域之工 其最適合之義歟? 貶誤門引 胡族 ,車服之制度 如明 為西 血統 堂、 藝者 域 朝 故謂 魯般 胡 野 而又 僉 亦 取

習 毗家世 一如新唐書宰相世系表所記者, 其源當出於閻氏所自述, 但與晉書肆捌閻纘傳及陸拾閻

族家譜冒充漢人,其關節所聯繫之通例,其為依託亦不待辨,質言之,閻氏家世所出必非華夏 鼎傳不符,沈炳震新唐書宰相世系表訂訛亦已言及,故其所謂閻鼎子昌避難奔於馬邑者, 類無疑也。 至其是何胡族, 則有略可推測者,宇文護之母乃閻慶之姑, 周書壹壹晉蕩公護傳 乃胡

(北史伍柒周宗室傳邵惠公顥傳附護傳同)略云:

猶 雖身居重任, 年已十餘歲, 不自勝,報書曰:「受形禀氣, 祖常云:「我得胡力」,當時莫曉其旨。至是人以護字當之。護性至孝,得[母閻姬]書,悲 喪。時嗣子沖弱,强寇在近,人情不安,護綱紀内外, 護曰:「天下之事屬之於汝。」護涕泣奉命,行至雲陽, 字薩保, 職當憂責。不期今日得通家問,蒙寄薩保别時所留錦袍表, 隣曲舊事猶自記憶。 太祖之兄邵惠公顥之少子也。護至涇州見太祖,而太祖疾已綿篤, 皆知母子,誰同薩保, 太祖升遐, 天保未定, 薩保屬當猶子之長, 如此不孝。當鄉里破敗之日, 薩保 撫循文武,於是衆心乃定。先是太 而太祖崩,護祕之,至長安,乃發 年歲雖久, 宛然 親受顧命, 謂

寅恪案:薩保即宇文護本來之胡名,其後別命漢名,乃以其原有胡名為字,此北朝胡人之通 薩甫二人,諸州薩甫一人。又同書貳捌百官志載隋雍州薩保為視從七品,諸州胡二百户已上薩 故護報其母閻氏書即自稱薩保, 其明證也。考隋書貳柒百官志載北齊鴻臚寺典客署有京邑

保 為 視 正 九 品。 通 典肆 拾 職 官 山典演 須薩 寶符 祆 IE 條 注 Z.

論, 揚 代 境, 或 夫宇文護字之薩 隋 與與 唐都 火祆教入中 國 則 其 火祆教 但此 不 地 T 藝之發 難 較 敦煌為交通 品 新 解 沂 有 西域 點史料缺乏, 釋。 制 西 關 歸 北 國之始末亦非此文所論也。 保 展實有資於西域之文明,而 國 即功於胡 而 與 總 天 與西 神, 西 閻 隋之薩 而言之, 域 氏 本極難斷定, 要道 族 域 家 武 世 德四年 交通 保同 若技術 一 始出於西域, 即東方胡族實行性之表現者, 或亦因是與 亦易發 置袄祠及官, 亦即 人才出 固不敢固執鄙見, 特陳其所疑, 以求 生關 北 齊之薩甫、 又觀閣 茲所欲論者, 即宇文護既以薩保為名, 西域 於胡 東方胡族之藝術 係, 常有羣胡奉事, 族 有 故其技術之養成, 關 慶之祖 則必於 耶? 唐之薩 至宇文愷 [提即宇文護母之父, 其人曾 似僅 殊 西 寶 I胡而 不 此 足 就 取火咒詛 有所貢 雖氏 不於東胡 表 推 名與火祆之關 面 原於家 籠統 族出 獻 求之, 推 於 自 世所 測 中 東北 國 出 係 而 蓋 則 無深 為敦 故 當 及 其 而 中 地 自 世 世 13:

煌

鎮

夏

閣

不

通人之教

如此

刻之 之稱

古

時

理

非依 所以 系統 隋 詳 隋 遍 能 無 悉考 唐 於 唐 關 其 全 證 制 職 悉唐 所 體 實本書之主 度 論 官之名號 而宇文氏之官制除 本 淵 且 託 代制 之周 其涉 更 為粉飾太平制 而 源 僅 印 系 證 官體 限 及 統之所繫, 任 度之系統淵 職官 於中 旨 明 務 也。 適 裁 得 央文官制 者尤 其淵 以 其 其 極少數外, 禮作樂之一 設官 源變革 第 甚 為 源 反者 易知 所 為重 一事即宇文泰所以令蘇 分職 致 度 也。 然則 要, 記 部分。 故此 端 實 原非 載 論者 而 茲依時代先後 本 施 故其 政 往 章 較 所 第 據 事 因 往 僅 明 書在 襲。 顯 唐六 也。 二事 為論史者所忽視 擇 其 (要點言 典 觀 唐 開 即 而 其 代 元 唐 綽 與 此 略述 書竟 書 行 時 代 政上 所修六 盧辯 編 職官乃 之, 章 職 修之經 有 謂 等摹 遂 其 官淵源流變之史料 或 關 唐 之隋 成 典 代 承 誤 餘 解 過 為 乃 附 倣 施 口 政 排 北 周 從 唐 種 則不 得 即 比 魏 官之故 簡 制 當時 度之三 周 便 知 太 略 官之 於徵 不 和 得 及其 獨 施 但 不 唐代 遺 引之 行令式 詳 有 源 高 意者 而 為 制 附以 職 事 Ê 類 度 考 官 實 以合古 楊 於前 實 殆 與 非 由

焉。

魏書壹壹叁官氏志略云:

直意將軍之徒是也。舊令亡失,無所依據。太和中,高祖韶羣寮議定百官,著於令。 自太祖至高祖初, 其内外百官屢有減置, 或事出當時, 不爲常目, 如萬騎、 飛鴻、常忠、

同書柒下高祖紀下(北史叁魏本紀同)略云:

孝莊

初

以爾朱榮有扶翼之功,拜柱國大將軍,位在丞相上。

其有當局所疑而令文不載者, 隨事以聞, 太和十七年六月乙巳韶曰:「遠依往籍, 近採時宜,作職員令二十一卷, 當更附之。 權可付外施行,

十九年十二月乙未朔引見羣臣於光極堂,宣示品令,爲大選之始。

寅恪案:北魏在孝文帝太和制定官制以前,其官職名號華夷雜糅,不易詳考,自太和改制以

官品令一卷,其書諒與太和十九年十二月朔宣示羣臣之品令有關也。 後,始得較詳之記載,今見於魏收書官氏志所叙列者是也。新唐書伍捌藝文志史部職官類有 朝前期發展之文化,其事已於前論禮儀章考辨證明, 茲不必詳及。 魏孝文之改制,即吸收南 魏

隋書貳陸百官志序略云:

漢高祖職官之制因於嬴氏,其間同異,抑亦可知。光武中興,聿遵前緒,唯廢丞相與御史 大夫,而以三司綜理衆務,泊於叔世,事歸臺閣,論道之官備員而已。魏晉繼及,大抵略

令, 今之存録者, 不能詳備焉。 創據關右, 同。爰及宋齊,亦無改作。梁武受終,多循齊舊,然而定諸卿之位,各配四時,置戎秩之 自餘庶僚頗有損益。煬帝嗣位,意在稽古, 有可稱焉。 百有餘號。 日不暇給, 陳氏繼梁, 高祖踐 極, 泊乎克清江漢, 百度伊始, 不失舊物。 復廢周官, 爰議憲章, 高齊創業, 建官分職, 還依漢魏, 唯以中書爲内史, 酌酆鎬之遺文, 置六官以綜務, 亦遵後魏,臺省位號與江左稍殊。 率由舊章, 大業三年, 侍中爲納 始行新 詳其典 有周

新唐書肆陸百官志序(舊唐書肆貳職官志序略同)略云:

唐之官制, 時考覈 日府, 由職有常守, 而升降之, 各統其屬,以分職定位。 其名號禄秩雖因時增損,而大體皆沿隋故。其官司之别曰省,曰臺, 所以任羣材,治百事。 而位有常員故也。 其辨貴賤, 方唐之盛時, 其制如此 其爲法則精而密, 叙勞能, 則有品,有爵, 其施於事則簡而易行, 有勳 有階, 日監, 日 以

之文,略詮論一二,以資參證,至前所謂忽視及誤解之點,則於此章之末論之,庶於叙説較便 寅恪案:上引史文,不待解釋,若能注意「高齊創業,亦遵後魏」,「〔隋〕高祖踐極,復廢周官 還依漢魏」及「唐之官制大體皆沿隋故」數語,則隋唐官制之系統淵源已得其要領。茲更依舊史

隋書貳柒百官志略云:

後齊制官,多循後魏。

樂諸官則與後來兵制及音樂有關,俟於後音樂章及兵制章詳論之。

高齊職官之承襲北魏,不待贅論,

惟其尚書省五兵尚書之職掌及中書省所領進御之音

同書貳捌百官志:

寅恪案

所謂前代之法即

所謂漢魏之制,

實則大抵自北

魏太

和

傳授北

齊之制

此隋

官

制

承

北

[隋]高祖既受命,改周之六官,其所制名多依前代之法。

承北周之一例證也。 杜佑於通典貳伍職官典柒總論諸卿 條 子注中 論隋 之改制 頗 為 有 其

唐六典其意亦同, 其言當於下論六典時再詳引之。 杜氏注略

而年代短促,人情相習已久,不能革其視聽,故隋氏復廢六官多依北

後周依周禮置六官,

空職 事。 官職重設, 自餘百司之任多類於斯, 禮部與太常分春官宗伯職事, 庶務煩滯,加六尚書似周之六卿,又更别立寺監,則户部與太府分地 欲求 理要, 刑部與大理分秋官司寇職事, 實在簡省。 工部與將作 分冬

寅恪案: 似為隋代創制 杜 君 卿 而唐復因之, 謂隋之職官多依北齊之制 實則亦北魏末年及北齊之遺習, 自是確實。 然尚 有 事 不過隋承之,又加 弱 於職官之選任 以普 者, 遍 初 化而 視之

其事悉廢漢以來州郡辟署僚佐之制,改歸吏部銓授,乃中國政治史上中央集權之一大變革

也。故不可不略考論之。

隋書貳捌百官志(唐六典叁拾刺史條、通典叁叁職官典鄉官條同)略云:

[開皇三年]舊周齊州郡縣職自州都郡縣正已下皆州郡將縣令至而調用, 理時事,

至是不知

[開皇]十五年罷州縣鄉官。

時事,直謂之鄉官,别置品官,吏部除授。

同書柒伍儒林傳劉炫傳略云:

置綱紀,郡置守丞,縣唯令而已,其所具僚則長官自辟,受詔赴任, [牛]弘又問:「魏齊之時令史從容而已,今則不遑寧舍,其事何由?」炫對曰:「往者州唯 每州不過數十

不然,大小之官悉由吏部,纖介之跡皆屬考功。」

通典叁叁職官典總論縣佐條漢有丞尉及諸曹掾句下杜氏注云:

多以本郡人爲之,三輔則兼用他郡,及隋氏革選,盡用他郡人。

郡, 寅恪案:若僅據此,似中央政府之吏部奪取地方政府州郡縣令自辟之權,以及縣佐之迴避本 均始於隋代,然若就其他史料考之,則知殊不然也。如北齊書捌幼主紀(北史捌齊本紀同

略云

三職

官

帑藏空竭, 乃賜諸佞幸賣官, 或得郡兩三, 或得縣六七, 各分州郡, 下逮鄉官, 亦多降中

通典壹肆選舉典略云:

者,故有勑用州主簿、

粉用郡功曹。

功曹者。自是之後,州郡辟士之權浸移於朝廷,以故外吏不得精覈, (漢代)州郡佐吏自别駕長史以下,皆刺史太守自辟,歷代因而不革。泊北齊武平中, 多有佞倖, 乃賜其賣官, 分占州郡, 下及鄉官, 多降中旨, 故有勑用州主簿、 由此起也。 後

後周其刺史僚佐則自署,府官則命於朝廷。

魏 [隋]牛弘爲吏部尚書,高構爲侍郎,最爲稱職。當時之制,尚書舉其大者,侍郎舉其 北齊州郡僚佐已多爲吏部所授,至隋一切歸在省司。 則六品以下官咸吏部所掌, 自是海内一命以上之官州郡無復辟署矣。(原注云:自後

司,此隋代政治中央集權之特徵,亦即其職官選任之制不因北周而承北齊之一例證也。 寅恪案:北周刺史尚能自署僚佐, 而後魏、北齊州郡僚佐則已多為吏部所授, 至隋一切歸之省

又隋書貳捌百官志略云:

高祖又採後周之制,置上柱國、柱國、 司、上儀同三司、儀同三司、大都督、帥都督、都督,總十一等以酬勤勞。 上大將軍、大將軍、上開府儀同三司、 開府儀同三

唐六典貳肆左右衛大將軍各一人正三品注略云:

自兩漢至北齊大將軍位視三公,至隋十二大將軍直爲武職,位左右臺省之下,與右(近衛 本考訂云:右疑當作古)大將軍但名號同, 而統務别。

肆 胡化系統,當於後兵制章詳之,茲僅節録舊籍關於此名號之源流,以備參證,觀者自能得之, 北魏之末年,而西魏北周承之,故隋採此制,可言祧北齊而承魏周。蓋楊氏王業所基,別是 寅恪案:此為隋制之因於北周而不承北齊者,似為變例,然考所謂柱國大將軍之號其實亦始於 職官典勳官條俱略同 不詳論也。 如周書壹陸侯莫陳崇傳後(北史陸拾王雄傳後、)略云: 通典貳捌職官典將軍總叙條及叁

禁闥而已,此外六人各督二大將軍,分掌禁旅,當爪牙禦侮之寄,當時榮盛莫與爲比,故 統三年,魏文帝復以太祖建中興之業,始命爲之。其後功參佐命、 初魏孝莊帝以爾朱榮有翊戴之功,拜榮柱國大將軍,位在丞相上。榮敗後, 今之稱門閥者咸推八柱國家云。今并十二大將軍録之於左: 自大統十六年以前任者凡有八人。太祖位總百揆,督中外軍,魏廣陵王欣元氏懿戚,從容 望實俱重者亦居此職 此官遂廢。

使持節柱國大將軍大都督大司馬河內郡開國公獨孤信。

(下略)。

右與太祖爲八柱國。

(上略)。

使持節大將軍大都督陳留郡開國公楊忠。

(下略)。

周書貳文帝紀(北史玖周本紀同)略云: 兹請言宇文泰摹倣周官之事,先略引舊史之文有關於此者,然後再討論之。

魏廢帝三年春正月始作九命之典,以叙内外官爵,以第一品爲九命,第九品爲一命,改流

外品爲九秩, 亦以九爲上。

綽、盧辯依周制改創其事,尋亦置六卿官,然爲撰次未成,衆務猶歸臺閣,至是始畢,乃 魏恭帝三年春正月丁丑初行周禮,建六官。初太祖以漢魏官繁,思革前弊,大統中乃命蘇

命行之。

北史伍魏本紀云:

貴爲大司寇,以司空于謹爲大司空。 大統十四年五月以安定公宇文泰爲太師,廣陵王欣爲太傅,太尉李弼爲大宗伯,前太尉趙

通鑑壹陸壹梁紀太清二年五月載此事, 胡注云:

宇文相魏,倣成周之制建官。

周書貳肆盧辯傳(北史叁拾盧同傳附辯傳略同)略云: 寅恪案:此即周書貳文帝紀、北史玖魏本紀所謂「大統中置六卿官」者也。

修矣。」太祖以辯有儒術,甚禮之。自魏末離亂,孝武西遷,朝章禮度湮墜咸盡,辯因時 號及命數附之於左 命行之,自茲厥後,世有損益,於時雖行周禮,其內外衆職又兼用秦漢等官,今略舉其名 儀、車服、器用,多依古禮,革漢魏之法,事並施行。辯所述六官, 綽專掌其事,未幾而綽卒,乃令辯成之。於是依周禮建六官,置公卿大夫士,並撰次朝 制宜,皆合軌度。性强記默契,能斷大事,凡所創制,處之不疑。初太祖欲行周官,命蘇 盧辯,范陽涿人,累世儒學。辯少好學,博通經籍,舉秀才,爲太學博士,以大戴禮未有 辯乃注之。其兄景裕爲當時碩儒, 謂辯曰:「昔侍中注小戴, 今爾注大戴, 太祖以魏恭帝三年始 庶纂前

柱國大將軍、大將軍。

右正九命。

驃騎車騎等大將軍開府儀同三司、雍州牧。

右九命。

驃騎車騎等將軍左右光禄大夫、户三萬以上州刺史。

右正八命。

(丁畔)

隋書貳柒百官志略云:

觀上 所引舊載宇文泰摹倣成周, 創建官制之始末, 周太祖初據關內,官名未改魏號,及方隅粗定,命尚書盧辯遠師周之建職,置三公、 孤,以爲論道之官,次置六卿,以分司庶務。 制度既畢,太祖以魏恭帝三年始命行之。 亦可略知梗概。周禮一書, 其真偽及著作年

代問題古今説者多矣,大致為儒家依據舊資料加以系統理想化之偉作,蓋託古改制 日論史者尚復如此。夫評議其事之是非成敗,本非本章之主旨及範圍,故俱置不論。茲所言 號者則武則天,四代而已。四者之中三為後人所譏笑,獨宇文之制甚為前代史家所稱道 ·,則無疑義也。自西漢以來,摹倣周禮建設制度,則新莽、周文帝、宋神宗, 僅字文泰摹倣周禮創建制度之用心及其所以創建之制度之實質而已。 而略傅會其 而未嘗實 至今

富遠不及高歡所轄之境域,固不待言;以文化言,則魏孝文以來之洛陽及洛陽之繼承者鄴都之 宇文泰憑藉六鎮 一小部分之武力, 割據關隴,與山東、江左鼎足而三,然以物質論 其 人人力財

除整軍 改關 人姓 其 又與 而 4 其 廣 介確 作 北 弱 史李弼 係。 證之一也(見中央研究院歷史語言研究所集刊第五本第二分)。約言之,西魏宇文泰改造漢 包括 甪 依 氏及郡望之政策分為二階段, 制 載 隴 據其 度, 頗 既 務 關隴物質本位政策相關之府兵制, 郡 使 況值梁武之時 有 其 寅恪嘗於考辨李唐氏族問題文中論之,如李唐武周先世雜 其 能 農 望之第 甚衆, 亦豈荒 傳及魏徵撰李密墓誌銘則又皆以為隴西成紀人,究其 後則逕 、融合成為一家, 恢復不 紛歧, 义 命 力 要言之, 輔 圖富強等充實物質之政策外, 階段, 如李弼 同之階段以 賜以胡 助 殘僻陋之關隴 庾子 其 物物 如隋 姓, 質即 即陽傅周 山所謂「五 以關 族 使繼 立言所致, 唐皇室之郡望仍 整軍務農政策之進行, 周 隴 所可相比。 書、兩 鮮卑部落之後。 其先則改山東郡望為關隴 禮經典制度之文, 地域為本位之堅強 十年間 其餘 當於後兵制章詳言之, 唐 江表無事」之盛世乎?故宇文苟欲抗衡高氏及蕭梁 至於江左,則自晉室南遷以後, 書弼 可以類推 稱弘農隴 必應別 孫 追周. 密傳及新唐 陰適 点團體。 更 有精 可以 西是 末隋文帝恢 未能一一於此詳悉論列也 關 神上 郡望, 此種 也。 維繫其關隴 隴胡漢現狀之實 獨立有自成一系統之文化政 書宰相 於此不置論。茲舉 所以紀述差異之故, 關 關隴文化本位 於北 復漢 且加 考所引隋 世 姓之時 周 以假託 轄境以 系表俱 隋唐 本神州文化正統之 書經籍 而 己。 之政 人物之郡 内之胡漢諸 屬之遼東襄平, 大抵僅 使之與六鎮 其 策 志之文 史料 關 望 迴至 範 由 係 氏 韋 史 以 所 即 族 頗

闡發當日北朝東西分峙之情勢者,以為例證

北齊書貳肆杜弼傳(北史伍伍杜弼傳略同)略云:

已久, 今督將家屬多在關 盡投黑獺,士子悉奔蕭衍,則人物流散, 弼以文武在位罕有廉潔, 專事衣冠禮樂,中原士大夫望之,以爲正朔所在。 言之於高祖(高歡)。 西,黑獺常相招誘, 何以爲國? 高祖曰:「弼來!我語爾: 人情去留未定, 江東復有一吴兒老翁蕭 我若急作法網, 不相饒借, 恐督將 天下濁

足, 觀高 漢魏以來江左、山東之文化,而上擬周官之古制。 徒泥周 於禮制竟其業者, 地方保守性之特長,又假借關中之本地 饒固 歡之用心, 豈可與巨君 終以出於 能 隴之地 一舊文 使武 夫 則知當日分爭鼎立之情勢, 則財富文化兩俱 時之權宜 實僅 實此之由也。否則宇文出於邊裔 有 介甫諸人儒化者相比並哉 所留戀 利用 其 名號 故創制未久, 而鄴都典章文物悉繼 不如, 若勉強追隨, 以暗合其 姬周舊土,可以為名號,遂毅然决然捨棄摹倣 子孫已不能奉行, 不能 當 然而其成敗所以與新宋二代不同 日現狀 不有維繫人心之政策 蘇綽既以地方性之特長創其始, 太和洛陽之遺業, 將愈相形見絀 漢化至淺, 故能 逐漸改移, 收摹倣之功用, 縱有政事之天才, 故利用 者矣。 亦可令中 還依漢魏之舊 關中 夫高歡 者, 而少滯 原土 + 寧具詩 盧辯復 Œ 族 所 族 不能 以 如 格 其 略 不 蘇 通之 以習 綽輩 並

宣 帝露門元旦受朝賀時, 君臣皆服漢魏衣冠, 即可以證明, 此事已於前禮儀章論之, 茲再舉

一事於下

周書肆明帝紀(北史玖周本紀同)云:

武成元年秋八月己亥改天王稱皇帝,追尊文王爲帝,大赦改元。

.書叁伍崔猷傳(北史叁貳崔挺傳附猷傳略同)略云::

口

故不得不先改革之也。 寅恪案:周明帝世距始依周禮創建制度之時至近,即已改天王之號,遵秦漢稱皇帝,蓋民間習 合當時現實之利害也。夫周禮原是文飾之具,故可不拘,宇文泰已如是,更何論宇文護乎? 於皇帝之尊稱已久,忽聞天王之名, 世宗即位,徵拜御正中大夫,時依周禮稱天王,又不建年號,猷以爲世有澆淳,運有治 朝廷既尊周禮,無容輒違此義。」護曰:「天下事大,畢公沖幼耳。」猷曰:「昔周公輔成王 中年又居長, 亂,故帝王以之沿革,聖哲因時制宜。今天子稱王,不足以威天下, 以朝諸侯,況明公親賢莫二,若行周公之事,方爲不負顧託。」事雖不行,當時稱其守正。 朝議從之。 今奉遵遺旨, 又宇文護不依周禮立子,而依殷禮立弟,亦不效周公輔成王者,所以適 世宗崩, 翊戴爲主,君以爲何如?」猷對曰:「殷道尊尊, 遺韶立高祖, 晉公護謂猷曰:「魯國公禀性寬仁, 太祖諸子之 誠如崔猷所言「不足以威天下」,即不足以維持尊嚴之意 請遵秦漢稱皇帝, 周道 親親 建

三職

周書貳叁蘇綽傳(北史陸叁蘇綽傳同)略云:

行之。

自是之後文筆皆依此體

自有晉之季, 文章競爲浮華,太祖欲革其弊。 因魏帝祭廟,羣臣畢至,乃命綽爲大誥,

通鑑壹伍玖梁紀中大同十一年(即西魏文帝大統十一年)六月丁巳魏主饗太廟條 胡注

宇文泰令蘇綽做周書作大誥,其文尚在,使當時文章皆依此體,

亦非所以崇雅點浮也

周 書貳貳柳慶傳(北史陸肆柳虬傳附慶傳同)略云:

綽謂慶曰:「近代以來文章華靡,逮於江左, [大統]十年除尚書都兵郎中如故,並領記室。時北雍州獻白鹿,羣臣欲草表陳賀,尚書蘇)柄民軌物, 「枳橘猶自可移,況才子也。」 君職典文房, 宜製此表, 以革前弊。」慶操筆立成, 彌復輕薄,洛陽後進,祖述不已。相公(宇文 辭兼文質, 綽讀而笑

日

形似, 寅恪案:蘇綽作大誥在大統十一年。周書貳文帝紀(北史玖魏本紀同)載魏恭帝元年 帝紀所載武成元年前一歲九月丁未帝幸同州故宅, 但一檢周書肆明帝紀所載武成元年後之詔書, 其體已漸同晉後之文, 可知此種矯枉過正之偽體 太祖(宇文泰)因柳虬之責難,令太常盧辯作誥諭公卿,其文體固無異蘇 ,一傳之後,周室君臣即已不復遵用也。 賦詩曰: 若更檢周書, 則見明 無復蘇綽 綽所作之大 所做周 夏四月帝大

玉燭 秋氣 金 興歷 。呵 還如過 白水, 更似 入新豐。 霜潭漬晚菊, 寒井落 疎 杯 延

故老,令聞歌大風。

時 則 所及料者 竟 是 南 朝 後期 文士、 北周 羈旅纍臣如庾義城、王石泉之語, 此豈宇文泰、 蘇綽 創 造大誥 文體

事實 弱 間 又近日論文者有以唐代貞元、元和古文運動乃遠承北朝蘇綽摹倣古體之遺風者, 係 俗體文之薰習, 不合。蓋唐代貞元、元和古文運動由 一文(見哈佛亞細亞學報第 取古文之體 以試 期)中 作 略發之, 小 説, 於天寶亂後居留南方之文士對於當時 而卒底於成功者。 以其與 本書 無涉, 此意嘗於論韓愈與 故不多及也 政教之反動及民 鄙意其説 一唐代 小 甚與

明 過 兹所舉一二例已可證宇文泰摹古之制, 此 工具, 意, 江左混 而知宇文所摹倣之周 而非 同,至隋 其 基本霸業永久實質之所在。此 氏繼其遺業, 制其實質究為如 遂明 身没未久, 顯不疑, 何 也 點固當於兵制章詳論之, 其子 掃 而幾盡去之。 孫已不能遵用, 蓋周禮本其 而復返 然就 職官 於漢魏 一時權宜文飾之 漸 亦闡 與 Ш

夏官 所謂 而 仍襲漢 大司馬之文即 周禮者 乃託 魏之官職 附於封 大國 大抵為 建之制 三軍 次國 度也, 地方政府及領兵之武職, 其最 軍 愛在 小國 行封國 軍之 制 制 是宇文之依周官改制 今據周 而 不 用 書 郡 八北史 縣 制 又其 盧 辯 大致 傳 軍 所 隊 亦僅 載 必 略依 不 限 改 於中 從周 周

央政 小 事 國 則 用府兵番衛 府之文官而 軍之設置乎? 制 其地方政府既仍襲用郡縣制, 封爵只為虚名, 而不畀以土地人民政事, 軍 集大權於中央, 其受封藩國者, 何嘗得具周官所謂大國三軍、 次國二軍、

又周書貳叁蘇綽傳(北史陸叁蘇綽傳同)略云:

守百里之封, 爲卿相, 官則命於天朝,其州吏以下並牧守自置,自昔以來, 又爲六條詔書奏施行之。 無妨子孫之愚瞽,今之選舉者當不限資蔭,唯在得人。苟得其人,自可起厮養而 伊尹、傅説是也, 而況公卿之胄乎? 其四擢賢良曰:「今刺史守令悉有僚吏,皆佐治之人也。刺史府 而況州郡之職乎?苟非其人,則丹朱、商均雖帝王之胤 州郡大吏但取門資。夫門資者乃先世 不能

文所以雖傚周禮以建官,而地方政治仍用郡縣之制,絕無成周封建之形似也。 尚門資猶以為非,則其不能亦不欲實行成周封建之制,以分散其所獲之政權 顯宗傳),而蘇綽實亦即宇文泰不尚門資之論,其在當時誠為政治上一大反動。 寅恪案:北朝自魏孝文以來,極力摹倣南朝崇尚門第之制(見魏書陸拾、北史肆拾韓麒 其 事 夫州郡僚吏之 甚明, 麟 傳附

又考晉書叁玖荀勖傳略云:

又議省州郡縣半吏以赴農功,

勖議以爲省吏不如省官,若欲省官,私謂九寺可并於尚

一〇六

蘭臺宜省付三府, 然施行歷代, 世之所習, 是以久抱愚懷, 而不敢言。

符周 周 然則漢魏以來中央政府職官 禮託體 制 耳。 甚 宇文創建周官之實質及其 高 實則僅實行其近代識者改革中央政府官制之議, 而加以擴大, 重複, 識者雖心知其非, 限度如此, 論史者不可不正確認識者也。 祇以世之所習而不敢言, 宇文之改革摹倣 並改易其名, 以

前所 主 此 寅恪此書主旨在説明唐代官制近承楊隋,遠祖(北)魏、(北)齊而祧北周者, 唐六典提 謂 既 本甚易知,然世仍有惑於六典之形式,不明瞭其成書之原委,而生誤會,遂謂 圍 唐六典施用 别 則 第 但彼等所討論者為六典施行與 與寅恪所持之説不合, 要已有 一事即唐六典之性質 材料 即 正確之論斷, 同, 文詳為引申, 故六典一書在唐代施行之問題已大體解决, 不妨引用也 近日本西京東方文化研究所東方學報第柒冊內 因不得不略舉史實 茲略加闡 否之問題, 明。 關於此 寅恪所考辨者為唐代官制淵源系統之問題 以為證明。 書之施 行問 雖所舉材料不出四 題, 四庫全書柒玖史部 與周官絕無干涉, 不必別 藤乾吉 庫館臣 其得周官遺 更討 氏復 於其所 職 所引 官 但

大昌考古編 肅大唐新 語玖著述類 玖六典條)云 (参新唐書伍捌藝文志史部職官類六典三十卷注文及壹叁貳韋述傳, 又

元十年玄宗詔書院撰六典以進, 時張説爲麗正學士, 以其事委徐堅。沈吟歲餘,

綿歷數載。其後張九齡委陸善經,李林甫委苑咸,至二十六年始奏上,百寮陳賀,迄今行 士毋嬰(煚)等檢前史職官,以今(令)式分入六司,以今朝六典象周官之制, :「堅承乏已曾七度修書,有憑准,皆似不難,惟六典歷年措思,未知所從。」 説又令學 然用功艱難

陳振孫書録解題陸職官類唐六典叁拾卷(參晁公武郡齋讀書志柒職官類唐六典條)云: 書院。(武英殿聚珍本原注案:唐書藝文志張説以其事委徐堅,經歲無規制,乃命毋煚 上,考新舊唐書,九齡以二十四年罷政事,尋謫荆州,程大昌謂書成於九齡爲相之日,當 官之制,其沿革並入注,然用功艱難;其後張九齡又以委苑咸,二十六年奏草上,至今在 事委徐堅,思之歷年,未知所適;又委毋煚、余欽、韋述,始以令式分入六司, 寫白麻紙凡六條,曰:「理、教、禮、政、刑、事典,令以類相從,撰録以進。」張説 題御撰 在二十四年,林甫注成奏進,當在二十七年,故是書卷首止列林甫,而不及九齡也。) 咸廙、業孫、季良、韋述等參撰,及蕭嵩知院,加劉鄭蘭、蕭晟、盧若虚;張九齡 加陸善經;李林甫代九齡, 加苑咸。委苑咸者, 乃李林甫也。至云二十六年冬草 ,李林甫等奉勅注。按:韋述集賢記注,開元十年起居舍人陸堅被旨修六典,上手 象周禮六 以其

今案新書百官志皆取此書,即太宗貞觀六年所定官令也。周官六職視周禮六典已有邦土邦

言 是政出於三也。 既有太尉、 不可考證 司徒、 唐志内外官與周制迥然不同, 」(寅恪案: 司空, 此上乃范祖禹唐鑑 而又有尚書省, 是政出於二也。 而强名六典, 貳武德七年論文。 可乎?善乎范太史祖 既有尚書省)本朝裕陵好觀六典 而又 有九 馬之

兀豐官制盡用之,

中書造命,

門下審覆,

尚書奉行

機事往往留滯,

上意頗

以

爲悔

強遷就 以 堅之學術 未嘗詳思唐代官制 禮之制 證 同於周 明唐代 旨之所在也。 角馬、不今不古之書,亦有所不能顧 而 唐代 是以無從措手, 唐玄宗欲依周禮太宰六典之文, 成唐六官之典, 禮之序官 僅取令式 然猶用功歷年, 經驗,七次修書,獨於此無從措手,後來修書學士不得已乃取唐代令式分入六司 現行官制合於周 實有其官, 條文按其職掌所關 ,近因(北)齊隋,遠祖漢魏,與周禮之制全不相同,難強為傅會也。 及尚書省六部之文摹倣周禮, 後來繼任之人固明知其如是, 但以奉詔修書, 不能 儻取之以強附古經,則 始得畢事。 禮 且轉能反證唐制 今觀六典一書並未 分別性質, 真計出無聊者也。由此言之, 非獨 與周禮其系統及實質絕無關 約略歸 真面之迥殊, 比較 能將唐代職官之全體 近似, 以文飾 類 而 己。 至於其餘部 亦彌 太平。 其書只每卷之首列 感駢枝之可去。 帝王一 依據唐六典不徒 不敷行 分, 涉, 分而為六,以 時 則 īfij 塞責,即 興到之舉, 此反證 周 徐堅 禮 叙官 故以 原 不足 使 有 無 勉 殆

眩惑於名號所致,茲不欲詳辨,僅逐寫唐儒論武曌改制之言於此,亦可以理惑破幻矣。 又治史者若有因披覽六典尚書省六部職掌之文,而招現一種唐制實得周禮遺意之幻覺者,

唐會要伍柒尚書省分行次第條云:

月五日改爲六官,准周禮分,即今之次第乃是也。 武德令吏、禮、兵、民、刑、工等部。貞觀令吏、禮、民、兵、刑、工等部。 光宅元年九

通 典貳叁職官典伍吏部尚書條周禮天官太宰掌建邦之六典,以佐王理邦國下注云: 多定爲六曹,稍似周禮。至隋六部,其制益明。 六典之職,以佐王理邦國。漢成帝初分尚書,置四曹,蓋因事設員,以司其務,非擬於古 變冢言太者,百官總焉,則謂之冢宰,列職於王,則謂之太宰,宰主也。周公居攝,而作 禮部爲春官,兵部爲夏官,刑部爲秋官,工部爲冬官,以承周六官之制。若參詳古 至光武乃分爲六曹, 迄於魏晉, 或五或六, 亦隨宜施制, 大唐武太后遂以吏部爲天官, 户部爲 無有常典。 自宋齊以來,

今,徵考職任,則天官太宰當爲尚書令,非吏部之任,今吏部之始宜出於夏官之司士。

律令性質本極近似, 不過一偏於消極 方面,一偏於積極方面而已。

太平御覽陸叁捌刑法部列杜預[晉]律序云:

唐六典陸刑部郎中員外郎條云:

律以定罪名,

令以存事制。

凡律以正刑定罪,令以設範立制,格以禁違止邪,式以軌物程事。

新唐書伍陸刑法志序云 中央市公司公信息的。 的复元中元本儿母、流时成功、其中已从以子经

之所常行之事也。 唐之刑書有四: 日律、 式者,其所常守之法也。 令、格、式。令者,尊卑貴賤之等數,國家之制度也。格者, 百官

建晉室,統制中國,其所製定之刑律尤為儒家化,既為南朝歷代所因襲,北魏改律,復採用 員令、官品令之範圍,固不待言也。又古代禮律關係密切,而司馬氏以東漢末年之儒學大 夫漢代律令區別雖尚有問題,但本書所討論之時代, 則無是糾紛之點, 若前 職官章 下所論即. 在職 族

四

度之三源 故前 禮儀 嬗 蜕 章 經由 律有涉者, 所考辨者大抵與之有關 北)齊隋, 讀者取前章之文参互觀 以至於唐, 也。 茲特以 實為華 -夏刑律 禮儀 職 不 官 桃之正 刑律 統 一章先 亦適 後 在 聯 本 書 綴 所 凡 討 隋 論 唐 制

之可也

而

與

刑

已吸收 支, 始以 又關 點 在 則 之故物也 亦不符 與禮 凉 於隋 州之 與江左之專守晉律 ifii 止 後之刑 南 限 南 儀 朝之律 遺 朝前 事實之言也。 於 唐 梁陳 職官 律 刑 留及發 南 律 雖 期 朝 因子在 之淵 諸 至陳 時 其 前 代之律 展者 所 制度之演變稍異者也。 期 併 採用 源 者有 其第 内 實 於隋 特為顯 者諒 也。 則 學亦宋齊之舊貫 其大體固 所不同, 南 二事即 其祀 朝後 但謂 止於 著, 隋 南 與禮儀 澽 期之律學 北魏之初入中原, 及正 故元 唐 朝 斬」(程樹 刑律 前 始定律 請先證 魏之刑 也。 期, 職官 頗 與 但律 隋 德先 其 採南朝後期之發展 明 律 相 唐 前 既兼 第 學在 同, 取 刑 期 生後魏律考 精用宏, 無大 律 其議律之臣乃山東士族, 事 然亦有略異者 採江左, 近 江東無甚 異 承 北 同 轉 齊 ,而其中河西之因子即魏晉文化 序 勝於江左承用之西晉舊 發 所言 故謂 展, 遠祖 如禮儀之比 端)者 自 宋齊 後 固 晉 魏 非 氏 其第 時 代之律 而 其 (見前 頗 以 後 中 傳 律 元 江 事 漢 禮 魏 學 即 分 左 代之律 儀 刑 南 天 仍 元 律 兩晉 子 魏 北 中 IF.

隋 賣 伍 刑 法志 略 云

晉氏平吴

九州寧 乃令賈充大明刑憲, 内以平章百姓, 外以和協萬邦(寅恪案: 此 句

如干人同議,以此爲長,則定以爲梁律(寅恪案:此爲當時流行之合本子句方法。見蔡元 其制唯重清議禁錮之科,其獲賊帥及士人惡逆免死付治,聽將妻入役,不爲年數, 培先生六十五歲慶祝論文集拙著支愍度學說考及前中央研究院歷史語言研究所集刊第捌本 丙丁二事注釋不同,則二家兼載。咸使百司議其可不,取其可安,以爲標例,宜云:某等 宜悉除之,求文指歸可適變者,載一家爲本,用衆家以附,丙丁俱有,則去丁以存丙,若 叁、漢書陸拾杜周傳,王或當作主也),因循創附,良各有以。若遊辭費句無取於實録者, 郎,使損益植之舊本,以爲梁律。天監元年八月乃下詔曰:「律令不一,實難去弊, 得齊時舊郎濟陽蔡法度家傳律學,云齊武時删定郎王植之集注張[斐]、杜[預]舊[晉]律, 指晉律諸侯篇), 寔曰輕平, 稱爲簡易, 是以宋齊方駕轥其餘軌。梁武初即位時議定律令, 罪之律,復父母緣坐之刑,自餘篇目條綱輕重繁簡一治用梁法。 第二分拙著讀洛陽伽藍記書後)。」陳氏承梁季喪亂, 合爲一書,凡一千五百三十條,事未施行,其文殆滅,法度能言之。於是以爲兼尚書删定 昏墨有刑,此蓋常科,易爲條例,前王之律,後王之令(寅恪案:此語見史記 删改科令, 於是稍求得梁時明法吏, 令與尚書删定郎范泉參定律令, 刑典疏闊,及武帝即位,乃下韶搜舉 制律三十卷。 殺傷

隋書陸陸裴政傳(北史柒柒裴政傳同)略云:

韶與蘇威等修定律令, 政採魏 晉刑典, 下至齊梁, 沿革輕重取其折中, 同撰著者十

人,凡疑滯不通,皆取決於政。(前文已引。)

據此,南朝前期之宋齊二代既承用晉律,其後期之梁律復基於王植之之集注張斐、杜預晉律, 俘入仕北朝, 知。北魏、北齊之律輾轉傳授經隋至唐,是南支之律並不與陳亡而俱斬也。又裴政本以江陵梁 之人,芳之入北在劉宋之世,則其所採自南朝者雖應在梁以前,但實與梁以後者無大差異可 而陳律又幾全同於梁律,則南朝前後期刑律之變遷甚少。北魏正始制定律令,南士劉芳為主議 史言其定隋律時下採及梁代, 然則南朝後期之變遷發展當亦可浸入其中, 恐止為

證明第一事既竟,請及第二事:極少之限度,不足輕重耳。

第書貳太祖紀(北史壹魏本紀同)略云:

天興元年十有一月詔三公郎中王德定律令,申科禁,吏部尚書崔玄伯(宏)總而裁之。(參 ·魏書貳肆及北史貳壹崔玄伯傳。)

同書肆上世祖紀(北史貳魏本紀同)云:

神縣四年冬十月戊寅韶司徒崔浩改定律令。

口

書肆下世祖紀(北史貳魏本紀同)云:

餘有不便於民者, 正平元年六月韶曰:「夫刑網 北史叁肆游雅傳及魏書伍貳、 依比增損。 太密, 」韶太子少傳游雅 犯者更衆, 朕甚愍之, 中書侍郎胡方回等改定律制。 有司其案律令, 務求厥中, 自

北史叁肆胡方回傳。)

魏書肆捌高允傳(北史叁壹高允傳同)略云:

伍肆、

[允]博通經史、天文、術數,尤好春秋公羊。[世祖]又詔允與侍郎公孫質、李虚、胡方回

共定律令。初真君中以獄訟留滯,始令中書以經義斷諸疑事。允據律評刑三十餘載 允所製詩賦 、誄頌、箴論、 表讚、 左氏公羊釋、毛詩拾遺、

論雜解、

議何鄭膏肓事

内外

凡百餘篇

别有集行於世。

述中其議定刑律諸人之家世、學術、 寅恪案:此北魏孝文太和以前即北魏侵入中原未久時間議定刑律之極簡紀述也。 鄉里環境可以注意而略論之者,首為崔宏、 即就此 浩父子, 極簡 此

人乃北魏漢人士族代表及中原學術中心也。其家世所傳留者實漢及魏晉之舊物。 史記拾文帝紀

十三年五月齊太倉令淳于公有罪當刑條索隱引崔浩漢律序云: 文帝除肉刑 而宮不易。

據此, 則浩必深通漢律者也。 當日士族最重禮法。 禮律古代本為混通之學, 而當時之學術多是

四

刑

律

特別重 律學其 月壬 律 中 崔浩之外第 所謂「冠冕州邦」者, 律 序 不 左之專 111 申 傳, 令之勤 中 考柒春 遺 法仁平知名(俱見魏書伍伍、 傳授 已及之, 詔 傳 以其 設諸. 家 餘年以 西 故崔 秋决獄考), 則雅之家世 始 用 北 冠冕州 通儒 得布帛 學派好尚言之, 西 人如范陽盧玄、 其説 經義 晉刑 隅 氏 雖 無 為保持漢魏晉學 父子之通 邦。 即具備鄙説 律 甚 斷 史稱其尤好春 可 一千匹、穀 學術 考, 諦, 獄 漢書藝文志有公羊董仲舒春秋治獄十六篇,允既篤 而 其律 夫所謂一賢 必非 然據魏書北史魏 故特為 則其學術正是 漢律自不 家之學 疑亦是為公羊辯護者。 渤海 庸泛。 所謂 一千斛之厚 北史叁肆游明根、 一術之地 申 秋公羊, 高 (儁之胄」者, 術不 足怪 地方環境薰習之第二條件。 述, 允 雅既與正平定律之役,而其從祖弟明根復又參定律令並 越張 不敢 漢儒之嫡傳無疑(此點程樹德先生九朝律 域 廣平 又崔 世 其 賜 祖紀、 撰 方回之律學 掠美也)。斯又江左之律學 游雅等皆當日 即 著中 杜之 浩 明 與 具備鄙 根子肇既 游肇傳)。 一範圍 胡 高 復有關 考漢儒多以春秋决獄 方 允傅 以事 者 回有 説所謂家世 於公羊春 徵為廷尉 漢 夫漢魏之時法律皆家世之學, 游雅 關 要當有 理 觀游 人中 推之, 傳等, 方回 士 傳留之學 秋者 所 雅之高自矜 小 族 當 不 出 卿, 領 所 知魏 自 亦漢律之 同 (参見程 袖 好春 無者也 也。 其 西北 後又徙為廷尉 議 術之第 太 其 秋 武 高 何 考壹 詔 神 系 自中 公羊 樹德先 鄭 允 又游 及高 書 在 統 廳 條 稱 伍 原 四 其在 年 雅 後 生 事 而 經

永

順帝時廷尉河南吴雄季高以明法律斷獄,起自孤宦,致位司徒,及子訢、孫恭三世廷尉、

柒崔祖思傳略同)略云: 記書捌肆楊震傳附楊賜傳載賜以世非法家,固辭廷尉之職。又南齊書貳捌崔祖思傳(南史肆

上(齊高帝)初即位,祖思啓陳政事曰:「憲律之重由來尚矣,實宜清置廷尉,茂簡三官。 漢來治律子孫並世其業,聚徒講授至數百人,故張于二氏絜譽文宣之世,陳郭兩族流稱武 僚屬,苟官世其家,而不美其績,鮮矣。若劉累傳守其業,庖人不乏龍肝之饌,斷可知 弘,庭缺于訓,刑之不措,抑此之由。如詳擇篤厚之士,使習律令,試簡有徵,擢爲廷尉 明之朝,決獄無冤,慶昌枝裔,槐衮相襲,蟬紫傳輝。今廷尉律生乃令史門户,族非咸

後漢書玖貳鍾皓傳略云:

章懷注引海内先賢傳曰:「繇,主簿迪之子也。」 類川長社人也。爲郡著姓,世善刑律,以詩律教授,門徒千餘人。皓孫繇。

三國志魏志壹叁鍾繇傳注引先賢行狀略云:

四

鍾皓博學詩律, 教授門生千有餘人, 二子: 迪、敷。繇則迪之孫

同書同卷鍾繇傳略云:

魏國初建,爲大理,遷相國;文帝即王位,復爲大理;及踐阼,改爲廷尉。 入爲御史中丞侍中廷尉。聽君父已没,臣子得爲理謗,及士爲侯,其妻不復配嫁 子毓。

毓所創也。

二國志魏志貳捌鍾會傳略云:

柒公孫表傳同)略云 左士族其家世多不以律學相傳授,此又河北、江東之互異者也。又魏書叁叁公孫表傳(北史貳 廷尉卿,恐猶是當時中原士族承襲漢魏遺風,法律猶為家世相傳之學,觀崔祖思之論,可知 由此言之(其例證詳見程著九朝律考捌漢律家考及玖魏律家考,茲不贅),游氏之議定法令,任 鍾會,太傅繇少子也。及會死後,於會家得書二十篇,名曰道論,而實刑名家也

機心,而導其利巧,深非之。表承指上韓非書二十卷,太祖稱善。第二子軌,軌弟質。 初太祖以慕容垂諸子分據勢要,權柄推移,遂至滅亡,且國俗敦樸,嗜欲寡少,不可啓其

魏書、北史雖不載公孫質律學傳授由來,然即就公孫表傳表上韓非書一端言,其事固出於迎合 時主意旨,或者法家之學本公孫氏家世相承者,亦未可知也。

總之,拓跋部落入主中原,初期議定刑律諸人多為中原士族,其家世所傳之律學乃漢代之舊,

與南朝之顓守晉律者大異也。

精用宏, 宜其經由北齊, 至於隋唐, 成為二千年來東亞刑律之準則也。茲略引史載北魏太和正 江左二因子俱關重要,於是元魏之律遂匯集中原、河西、江左三大文化因子於一爐而冶之,取 因子似與前時所定者無甚不同。第二次之所定, 則河西因子特為顯著。 始數次修律始末以論證之。其關於河西文化者,可參閱前禮儀章。 魏孝文太和時改定刑律共有二次,第一次所定者恐大抵為修改舊文,使從輕典,其所採用之 至宣武正始 定律河西與

太和元年九月乙酉韶羣臣定律令於太華殿。

魏書柒高祖紀(北史叁魏本紀同)云:

書肆捌高允傳(北史叁壹高允傳同)略云:

百

書壹壹壹刑罰志略云:

同

過吹毛而舉,其一切罷之。」於是更置謹直者數百人,以防諠鬬於街術,吏民各安其職 [太和]三年下韶曰:「治因政寬,弊由網密,今候職千數,姦巧弄威,重罪受賕不列, 先是以律令不具,姦吏用法致有輕重,韶中書令高間集中祕官等修改舊文,隨例增减,又

粉羣官參議厥衷,經御刊定,五年冬訖,凡八百三十二章。

原儒士, 寅恪案: 保持漢代學術之遺風者,前已言之矣。 此太和第一次定律,其議律之人如高允、 高間等(參魏書伍肆、北史叁肆高間傳

魏書柒下高祖紀(北史叁魏本紀同)云:

太和十五年五月己亥議改律令,於東明觀折疑獄。八月丁巳議律令事。

十六年四月丁亥朔班新律令,大赦天下。五月癸未韶羣臣於皇信堂更定律條流徒限制,帝

寅恪案:魏書、北史李沖傳云:十七年二月乙酉韶賜議律令之官各有差。

此新律孝文雖自下筆,而備咨訪取决者,實為李沖。前代史籍多以制作大典歸美君主, 及議禮儀律令,潤飾辭旨,刊定輕重,高祖雖自下筆,無不訪決焉。(前文已引)

之與河西關係前已詳論,茲不復贅。又魏書、北史源賀傳附懷傳云: 有主撰之人,如清代聖祖御製諸書即其例也。然則此太和新律總持之主人乃李沖非孝文也。沖

思禮後賜名懷,遷尚書令,參議律令。(前文已引)

源氏雖非漢族,亦出河西,其家子孫漢化特深,至使人詈為漢兒(見前引北史源師傳)。然則源

口

書壹壹壹刑罰志云:

矣。又有可注意者,即太和新律已於太和十六年四月頒行, 和定律, 懷之學亦猶李沖之學, 江東文化因素似未能加入其中, 皆河西文化之遺風。太和第二次定律河西因子居顯著地位, 恐亦由此未能悉臻美備, 其時猶在王肅北奔前之一歲。 遂不得不更有正始定律之舉 觀此 蓋 可知 太

魏書捌世宗紀(北史肆魏本紀同)云:

同書陸玖袁飜傳(北史肆柒袁翻傳同)略云:正始元年十有二月己卯韶羣臣議定律令。

少以才學擅美一時,正始初韶尚書門下於金墉中書外省考論律令, 林監王元龜,尚書郎祖瑩、宋世景,員外郎李琰之,太樂令公孫崇等並在議限。又韶太師 秀入國, 彭城王勰、 紹,廷尉監張虎,律博士侯堅固,治書侍御史高綽, 李韶、 陳郡項人也。父宣有才筆, 而大將軍劉昶每提引之,言是其外祖淑之近親,令與其府諮議參軍袁濟爲宗。 司州牧高陽王雍、中書監京兆王愉、前青州刺史劉芳、左衛將軍元麗、兼將作 國子祭酒鄭道昭、 廷尉少卿王顯等入預其事。 爲劉彧青州刺史沈文秀府主簿。皇興中東陽州平,隨文 前軍將軍邢苗 翻與門下録事 奉車 都尉程靈虬, 常景、 羽 孫

垂心 世宗 外省論律令, 憲典, 即 位, 意在寬政, 刊革令朝, 諸有疑事斟 但時屬征役, 正始元年冬韶 酌新舊, 更加思理,增减上下必令周備, 未之詳究, 日: 議獄 定律有國攸慎, 施於時用, 猶致疑舛。 輕重 随有所立, 損 尚書門下可於中書 益世或不 别以 同

庶於循變協時,

永作通

制。

其事者劉芳、 之因子當有彌 詳悉重 寅恪案:抽繹正始議律之詔語,知於太和新律意有所不滿, 出 但略述最有關之語以資論證。 常景二人而已。二人魏書、 補 而太和新律中江左因子最少,前已言及,今正始修律議者雖多, 北史俱有傳,前禮儀章已將其傳文節引之矣。茲不復 考劉芳本南朝士族以俘虜入魏, 故此次之考論必於太和新律所缺乏 其律學自屬江左系統 但前 後實

自青州刺史]還朝,議定律令, 芳斟酌古今, 爲大議之主, 其中損益多芳意也。 (前文已

無疑。

魏書、

北史芳傳

云

引

據此, 南 以輸入江左文化,使其益臻美備, 入北, 正始議律芳實為其主持者,其所以委芳以主持之任者,殆不僅以芳為當世儒宗, 正與劉芳同 類, 其律學亦為南學, 而補太和新律之缺憾耶?至此次與議之袁飜其以江左士族由 更無待論也 實欲藉

洛陽伽藍

記壹城内永寧寺條略

云

[常]景字永昌,河内人也。敏學博通,知名海内。太和十九年爲高祖所器,拔爲律學博 刑法疑獄多訪於景。正始初韶刊律令,永作通式,勅景共治書侍御史高僧裕 羽林監

議。 王元龜、尚書郎祖瑩、散騎侍郎李琰之等撰集其事,又詔彭城王勰、青州刺史劉芳入預其 景討 正科條,商推古今,甚有倫序,見行於世,今律二十篇是也。

寅恪案:

前禮儀章引常爽、常景祖孫傳,

知其家世本出涼州,

爽為當日大師,

代表河西文化,

景纂成其 凡五十餘

景之起家為律博士,尤足徵刑律為其家世之學也。 魏書、 北史常景傳又謂

卷。永熙二年監議[五禮](依徐崇説補)事。(前文已引) 先是太常劉芳與景等撰朝令,未及班行,别典儀注,多所草創, 及世宗崩,召景[自長安]赴京,還修儀注,又勅撰太和之後朝儀已施行者, 未成, 芳卒,

出涼州 史上 此 .事固與刑律有別,但可知景為繼劉芳之人,為當日禮儀、刑律之所從出,其在元魏末期法制 地位之重要, 駿為河西大儒劉昞之門人, 靈虬又從學常爽, 故靈虬刑律之學亦河西之流派也。 自可知也。至程靈虬者,程駿之子(魏書、 北史程駿傳,前文已引),家世本

大體似較漢律為進化 並 元魏刑律實綜匯中原 加 以江左所承西晉以來之律學,此誠 ,然江左士大夫多不屑研求刑律,故其學無大發展。且漢律之學自亦有精 士族僅傳之漢學及永嘉亂後河西流寓儒者所保持或發展之漢魏晉文 可謂集當日之大成者。 若就南朝承用之晉律論之,

湛之義 遺留者亦稍不同 旨 為江 ,故北 東所墜失者, 魏前後定律能綜合比較 而河西區域所保存漢以來之學術, 取精用宏, 所以成此 別自發展, 偉業者 與北 實有其 魏初期中 廣 收 博取 原 所

北齊刑律最為史家所稱, 隋書貳伍刑法志略云:

之功

並非

偶

然所

致也

令明審 河 清 三年 尚書令趙郡 科條簡要。 又勅仕門子弟常講習之, 王叡等奏上齊律十二篇, 又上新令四十卷, 齊人多曉法律, 蓋由此 大抵採 也 魏 晉故事。

[周律] 比於齊法,煩而不要。

故齊律之善於周律不待詳論。 而 推原其故, 齊律實出於封繪 蓋高氏爲勃海蓨人。 之手, 祖宗家法俱 但程樹德先生九朝律考壹柒北齊律考序云: 勃海封氏世長律學, 有淵 源。 封隆之參定麟趾格 封繪 議定律令,

釋齊律 因襲北魏 寅恪案 出 並非 渤 海 所以美備之故。 曲 程氏之説以高 刑律亦不能獨異, 皇室鄉里之特殊之原因。 則 偶然之事 齊皇室 鄙意封 實無相 故此乃全體文化之承繼及其自然演進之結果,觀於前論禮儀、 氏世 與封 傳律 關之必然性也。 氏 北齊刑律較優於南 同 學, 鄉 里, 本 南 而 北 封 朝學術 氏又世 竊謂齊律之美備殆由 朝 中 長 律學 前已言之, 心 移 於家 似欲 族 北齊之典章 取家 承 之 襲 北 世 例 及鄉 魏 刑 其 制 律 與 里 之演 度 高 端 既 齊 以 進 帝 所 字

北周 而 天然淘汰盡矣。 故隋受周禪,其刑律亦與禮儀、職官等皆不襲周而因齊,蓋周律之矯揉造作,經歷數十年 、制律,強摹周禮,非驢非馬,與其禮儀、職官之制相同, 已於前職官章詳論之, 茲不復

隋書貳伍刑法志略 - Z

損益。 高祖既受周禪, 三年又勅蘇威 開皇元年乃韶尚書左僕射高頌等更定新律奏上之, 、牛弘更定新律, 自是刑網簡要, 疎而不失。 多採後齊之制, 而頗有

唐 承隋業,其刑律又因開皇之舊本,唐會要叁玖定格令門(參考舊唐書伍拾刑法志 武德元年六月十一日韶劉文静與當朝通識之士因隋開皇律令而損益之,

遂制爲五十三條,

大理卿郎楚之、司門郎中沈叔安、内史舍人崔善爲等更撰定律令,十二月十二日又加内史 務從寬簡,取便於時。其年十一月四日頒下,仍令尚書令左僕射裴寂、 瑪、禮部尚書李綱、 國子博士丁孝烏等同修之,至七年三月二十九日成, 吏部尚書殷開山 韶頌於天

寅恪案:唐律因於隋開皇舊本, 隋開皇定律又多因北齊, 而北齊更承北魏太和正始之舊

下。

大略以開皇爲準,

正五十三條,凡律五百條,

格入於新律,

他無所改正。

其源流演變固瞭然可考而知也。茲就唐律中略舉其源出北齊最顯而易見之例數則,

唐律疏議壹名例篇云:

中分爲法例律, 魏因漢律爲一十八篇,改漢具律爲刑名第一。 宋、齊、梁、後魏因而不改。爰至北齊併刑名、法例爲名例、 晉命賈充等增損魏律爲二十篇, 後周復爲刑 於魏刑名律

寅恪案:此隋唐律因北齊而不襲後周之一例證。

隋因北齊, 更爲名例, 唐因於隋, 相承不改。

同書柒衛禁篇云:

宋泊於後周此名並無所改。至於北齊,將關禁附之, 衛禁律者,秦漢及魏未有此篇,晉賈充酌漢魏之律, 更名禁衛律, 隨事增損, 創制此篇,名衛宫律, 隋開皇改爲衛禁律。 自

寅恪案:此隋唐律因北齊而不襲後周之又一例證。

同書壹貳户婚篇云:

以婚事附之,名婚户律;隋開皇以户在婚前,改爲户婚律。 户婚律, 漢相蕭何承秦六篇律後加廐興户三篇, 爲九章之律; 迄至後周, 皆名户律;

同書貳壹鬭訟篇云: 寅恪案:此為隋唐律承北齊而不襲後周之又一例證。

從秦漢至晉, 未有此 篇。 至後魏太和年分繫訊律爲關 律, 至北齊以訟事附之, 名爲鬭 訟

律,後周爲鬬競律,隋開皇依齊鬪訟名,至今不改。

寅恪案:此隋唐律因北齊不襲後周之又一例證。

書貳捌捕亡篇云:

百

捕亡律者,魏文侯之時李悝制法經六篇,捕法第四,至後魏名捕亡律,北齊名捕斷律, 後

又同書貳玖斷獄篇云:

周名逃捕律, 隋復名捕亡律。

至後周復爲斷獄律。

斷獄律之名起自於魏, 魏分李悝囚法, 而出此篇。 至北齊, 與捕亡律相合,

寅恪案:初觀此有似隋制律時此點不因北齊而轉承後周者,但詳繹之,則由北齊律合後魏律之 轉可證明北魏、 捕亡與斷獄為一, 為之附辨於此。 名捕斷律,隋律之復析為二,實乃復北魏之舊,非意欲承北周也。 、隋、唐律為一系相承之嫡統,而與北周律無涉也, 恐讀者有所疑滯, 然則 據此 特

九 音 樂

以為隋唐胡樂悉因於北周也。 者。本章所欲論者,在證述唐之胡樂多因於隋,隋之胡樂又多傳自北齊,而北齊胡樂之盛實由 之。至胡樂則論述較詳,蓋自來中外學人考隋唐胡樂之源流者,其著撰大抵關於唐代直接輸入 承襲北魏洛陽之胡化所致。因推究其淵源,明述其系統,毋使考史者僅見鄭譯七調之例, 之胡樂及隋代鄭譯七調出於北周武帝時龜茲人蘇祗婆之類,皆已考證詳碻,此本章所不欲重論 今論隋唐音樂之淵源,其雅樂多同於禮儀,故不詳及,惟有涉誤會及前所未論者乃解釋補充 遂誤

隋書壹肆音樂志略云

國舊事,考尋古典。」高祖不從曰:「梁樂亡國之音,奈何遣我用耶?」是時尚因周樂,命 開皇二年齊黃門侍郎顏之推上言:「禮崩樂壞,其來自久,今太常雅樂並用胡聲,請馮梁 常卿牛弘、國子祭酒辛彦之、國子博士何妥等議正樂,然淪謬既久,積年議不定,高祖大 工人齊樹提檢校樂府,改换聲律,益不能通。俄而柱國沛公鄭譯奏上請修更正,於是韶太

寅恪案:此條所紀有應解釋補充者數事,即顏之推所謂「今太常雅樂並用胡聲」之語指隋書壹肆

音樂志所載:

四夷樂,其後帝娉皇后於北狄,得其所獲康國、龜茲等樂,更雜以高昌之舊,並於大司樂 [周]太祖輔魏之時,高昌欵附,乃得其伎,教習以備饗宴之禮。及天和六年, 武帝罷掖庭

習焉,採用其聲,被於鍾石,取周官制以陳之。

節,蓋周之樂官採用中央亞細亞之新樂也。但志謂高祖以梁樂為亡國之音,不從顏之推之

似隋之雅樂不採江左之舊者,則實不然。隋書壹伍音樂志略云:

開皇九年平陳,獲宋齊舊樂,韶於太常置清商署以管之,求陳太樂令蔡子元、于普明等, 弘奏下不許作旋官之樂,但作黃鍾一宮而已。於是牛弘及祕書丞姚察、 相爲宫, 可用,請悉停之。」晉王廣又表請,帝乃許之。牛弘遂因鄭譯之舊,又請依古五聲六律旋 承,以爲合古,且觀其曲體,用聲有次,請修緝之,以備雅樂。其後魏洛陽之曲,據魏史 復居其職。由是牛弘奏曰:「前克荆州,得梁家雅曲,今平蔣州,又得陳氏正樂, 云太武平赫連昌所得,更無明證,後周所用者皆是新造,雜有邊裔之聲,戎音亂華,皆不 高祖猶憶[何]妥言(寅恪案:何妥非十二律旋相爲官義,見隋書壹肆音樂志),注 通直散騎常侍許善 史傳相

Ŧī.

許善心,兼内史舍人虞世基,儀同三司東宫學士饒陽伯劉臻等奏曰:「金陵建社, 年三月乙丑韶書)。 帝則皇規粲然更備,與内原(寅恪案:內原即中原,隋諱嫌名故改)隔絶, 儀同三司劉臻、 祕書監奇章縣公牛弘, 通直郎虞世基更共詳議。 祕書丞北絳郡公姚察, 十四年三月樂定(參隋書貳高祖紀開皇十四 通直散騎常侍虞部侍郎 三百年於茲 朝士南

伏惟明聖膺期,會昌在運,今南征所獲梁陳樂人及晉宋旗章宛然俱至,臣等伏奉明

博訪知音,旁求儒彦,研校是非,定其去就,取爲一代正樂,具在本

詳定雅樂,

據此 可 ,則隋制雅樂,實採江東之舊,蓋雅樂系統實由梁陳而傳之於隋也。 」於是並撰歌辭三十首, 韶並令施用。 其中議樂諸臣多是南

陳書貳柒姚察傳(南史陸玖姚察傳同)略云:

朝舊人,其名氏事蹟前已述及者,茲從略省,

惟補記前文所未載者如下:

姚察,吴興武康人也。九世祖信吴太常卿,有名江左。〔梁〕元帝於荆州即位, [陳後主世]遷吏部尚書。陳滅入隋,開皇九年韶授祕書丞。

北齊書肆伍文苑傳顏之推傳(北史捌叁文苑傳顏之推傳同)略云:

顏之推,琅邪臨沂人也。 鎮西府諮議參軍。[湘東王] 繹遣世子方諸出鎮郢州,以之推掌管記, 九世祖含從晉元東度,官至侍中右光禄西平侯,父熙梁湘東 值侯景陷郢州 被囚

隋書柒陸文學傳劉臻傳(北史捌叁文苑傳劉臻傳同)略云:

劉臻,沛國相人也。父顯,梁尋陽太守。臻爲邵陵王東閣祭酒,元帝時遷中書舍人。 陷,復歸蕭詧,以爲中書侍郎。 周冢宰宇文護辟爲中外府記室,後歷藍田令畿伯下大夫。 江陵

等議定隋樂,以所獲梁陳樂人備研校,此乃隋開皇時制定雅樂兼採梁陳之例證也。 寅恪案:姚察、顏之推 、劉臻皆江左士族,梁陳舊臣,宜之推請依梁舊事,以考古典,察、 臻

隋書壹伍音樂志略 云

高祖受禪,

進位儀

同三司

伎。及大業中, 煬帝乃定清樂、 始開皇初定令,置七部樂:一曰國伎,二曰清商伎,三曰高麗伎,四曰天竺伎,五曰安國 爲九部樂,器工依創造,既成, 六曰龜茲伎, 七曰文康伎; 又雜有疎勒、扶南、康國、百濟、突厥、 西涼、 大備於茲矣。 龜茲、天竺、康國、疎勒、安國、高麗 新羅、俀國等 禮畢,以

其始即清商三調是也。 並漢來舊曲,樂器形制並歌章古辭與魏三祖所作者皆被於史

Ŧī.

音

始於涼州得之。宋武平關中, 屬晉朝 遷播, 夷羯竊據, 其音分散。 苻永固(寅恪案: 因而入南, 不復存於内地, 苻堅字永固, 及平陳後獲之。 此避隋諱改)平張 高祖聽之,

善其節 曰:「此華夏正聲也。 」其樂器有鐘 磬、 琴、瑟、擊琴、 琵琶、

節鼓、 笙、笛、簫、篪、 填等十五種爲一部, 工二十五人。

寅恪案:此隋定樂兼採梁陳之又一例證也,此部樂器中既有琵琶、箜篌,是亦有胡中樂器,然 則亦不得謂之純粹華夏正聲,蓋不過胡樂之混雜輸入較先者,往往使人不能覺知其為輸入品

耳。同書同卷音樂志略云:

平河西得之,謂之西凉樂, 西涼者起苻氏之末,吕光、 至魏周之際遂謂之國伎。 沮渠蒙遜等據有涼州, 變龜茲聲爲之, 今曲項琵琶、 號爲秦漢伎; 豎頭箜篌之徒並出 魏太

域,非華夏舊器。

之際遂謂之國伎,則流傳既久,渾亡其外來之性質,凡今日所謂國粹者頗多類此,如國醫者是 寅恪案:此河西文化影響北魏遂傳至隋之一例證,其系統淵源,史志之文尤明顯矣。至云魏周

隋書壹伍音樂志略云:

也,

以非本書範圍,故不置論。

龜茲者, 起自吕光滅龜茲, 因得其聲。吕氏亡,其樂分散,後魏平中原,復獲之。 其聲後

音伎, 有此勑,而竟不能救焉。煬帝大製艷篇,辭極淫綺,令樂正白明達造新聲,帝悦之無已, 復正聲, 此不祥之大也。公等對親賓宴飲, 宜奏正聲, 聲不正, 何可使兒女聞也。」帝雖 , 估衒公王之間, 舉時争相慕尚。高祖病之, 謂羣臣曰:「聞公等皆好新變, 所奏無 王長通、李士衡、郭金樂、安進貴等,皆妙絶弦管,新聲奇變,朝改暮易, 至隋有西國龜茲、齊朝龜茲、土龜茲等,凡三部。開皇中其器大盛於間閈,

北 寅恪案:隋代上自宫廷,下至民衆,實際上最流行之音樂,即此龜茲樂是也。考龜茲樂多傳自 齊,如曹妙達者,固是齊人也。隋書壹叁音樂志略云: 因語明達云:「齊氏偏隅,曹妙達猶自封王,我今天下大同,欲貴汝,宜自修謹!」

煬帝矜奢,頗玩淫曲,御史大夫裴蘊揣知帝情,奏括周、齊、梁、陳樂工子弟及人間善聲 高齊之舊曲云。 調者凡三百餘人,並付太樂,倡優獶雜咸來萃止。其哀管新聲淫絃巧奏,皆出鄴城之下,

觀此,則知隋世之音樂實齊樂也。又其所謂「倡優獶雜」者即隋書壹伍音樂志之

開皇初並放遣之。及大業二年突厥染干來朝,煬帝欲誇之,總追四方散樂大集東都。 始齊武平中有魚龍爛漫、 ,名爲百戲。周時鄭譯有寵於宣帝,奏徵齊散樂人並會京師爲之,蓋秦角抵之流者也, 俳優朱儒、山車巨象、拔井種瓜、殺馬剥驢等奇怪異端百有餘

亦受齊樂工之影響。如隋書壹伍音樂志云: 節所言之散樂,亦即齊之百戲也。又隋代不僅俗樂即實際流行之音樂出於北齊,即廟堂雅奏

高祖遣内史侍郎李元操、 直內史省盧思道等列清廟歌辭十二曲,令齊樂人曹妙達於太常教

可證也,考北齊盛行之樂皆是胡樂,隋書壹肆音樂志述齊代音樂略云:

習,以代周歌。

雜樂有西涼、鼙舞、清樂、龜茲等,然吹笛、彈琵琶、五弦歌舞之伎自文襄以來皆所愛 至河清以後傳習尤盛。後主唯賞胡戎樂,耽愛無已,於是繁手淫聲争新哀怨,故曹妙

安未弱、安馬駒之徒至有封王開府者。

達、

寅恪案:曹、安等皆西胡氏族也,北齊之宫廷尤其末年最為西域胡化,其關於政治及其他伎術 茲置不論。即觀北齊書伍拾恩倖傳(北史玖貳恩幸傳同)所載關於音樂歌舞者, 可知皆出於

西域醜胡龜茲雜伎封王者接武,開府者比肩。胡人樂工叨竊貴幸,今亦出焉。

西胡之族類也,如傳序略云:

傳末略云:

又有史醜多之徒胡小兒等數十,咸能舞工歌,亦至儀同開府封王。至於胡小兒等眼鼻深 一無可用。

然則北齊宫廷胡化音樂勢力之廣大有如是者, 更可注意者, 即恩倖傳韓鳳傳云:

此。 戊日 壽陽陷没, 「急時且守此作龜茲國子, 更可憐人生如寄, 鳳與穆提婆聞告敗, 握槊不輟曰:「他家物, 唯當行樂, 從他去。 何因愁爲?」君臣應和若 」後帝使於黎陽 臨 河築城

知, 實為承襲北魏洛陽之遺風,洛陽伽藍記叁城南永橋以南圜丘以北伊洛之間夾御道有四夷館 夫握槊西胡戲也,龜茲西域國也,齊室君臣於存亡危急之秋猶應和若此,則其西胡化之程度可 何怪西胡音樂之大盛於當時, 而傳流於隋代也。鄙意北齊鄴都所以如此之西胡化者, ,其故

日奔塞下, 西夷來附者處崦嵫館,賜宅慕義里。自葱嶺以西至於大秦,百國千城莫不欸附, 門巷修整,閶闔填列,青槐蔭陌,緑柳垂庭,天下難得之貨,咸悉在焉。 所謂盡天地之區矣。樂中國土風因而宅者,不可勝數, 是以附化之民萬有餘 商胡販客

又同書同卷菩提寺條云:

菩提寺,西域胡人所立也,在慕義里。

鄴都西域胡化尤其胡樂之盛必與此有關。 蓋北魏洛陽既 有萬餘家之歸化西域胡人居住, 其後東魏遷鄴, 否則齊周東西隔絕, 若以與西域交通論 此類胡人當 亦隨之移徙, 北周領土更

Ŧī.

音

樂

為便 之盛,遂至隋代 利 不應北 猶承 齊宫廷胡小兒如是之多,為政治上一大勢力,而西域文化如音樂之類北 八其遺 風也。故隋之胡樂大半受之北齊,而北齊鄴都之胡人胡樂又從北 齊如是

陽轉徙而來, 此為隋代胡樂大部分之系統淵源, 前人尚未論及, 因為備述之如此

故不多述,僅節録唐會要之文如下(參考舊唐書貳捌音樂

新唐書貳壹 禮樂志等):

至唐初音樂之多承隋舊,其事甚顯,

唐會要叁貳雅樂條略云:

書叁叁讌樂條 高祖受禪, 軍國多務,未遑改創,樂府尚用隋代舊文。 云

口 略

麗, 武德初未暇改作, 六龜茲, 七安國, 八疏勒 每讌享因隋舊制, 九康 國。 奏九部樂:一讌樂,二清商,三西凉,四扶南,

從西域輸入者則事在本章主旨範圍之外,故置不論 寅恪案:唐之初期其樂之承隋亦猶禮之因隋,其系統淵源,蓋無不同也。若其後之改創及直接

研究所集刊第柒本第叁分, 兹略增訂, 以爲此書之一章。) (此章本題爲府兵制前期史料試釋, 載中央研究院歷史語言

復更多所誤會。夫唐代府兵之制,吾國史料本較完備,又得日本養老令之宫衛軍防諸令條,可 實,是執一貫不變之觀念,以説此前後大異之制度也,故於此中古史最要關鍵不獨迄無發明 追述前事,亦未可盡信。茲擇取此制前期最要之史料,試為考釋,其間疑滯之義不能通解者殊 史者於時代之先後往往忽略,遂依據此制度後期即唐代之材料,以推説其前期即隋以前之事 府兵之制起於西魏大統,廢於唐之天寶,前後凡二百年,其間變易增損者頗亦多矣。後世之考 以推比補充, 又所據史籍 其制度概略今尚不甚難知。惟隋以前府兵之制,則史文缺略,不易明悉,而唐人 皆通行坊刻 未能與傳世善本一一詳校,尤不敢自謂有所創獲及論斷也。

六兵

總叙條及叁肆職官典壹陸勳官條略同)云: 北史陸拾(周書壹陸同,但無「每一團儀同二人」至「並資官給」一節,又通典貳捌職官典拾將軍

戚, 統三年,魏文帝復以周文帝建中興之業,始命爲之。其後功參佐命、望實俱重者亦居此 爲比,故今之稱門閥者咸推八柱國家。今並十二大將軍録之於左: 初魏孝莊帝以爾朱榮有翊戴之功,拜榮柱國大將軍,位在丞相上。榮敗後,此官遂廢。大 從容禁闥而已, 自大統十六年已前任者凡有八人。周帝位總百揆,都督中外軍事,魏廣陵王欣元氏懿 此外六人各督二大將軍。 分掌禁旅, 當爪牙禦侮之寄, 當時榮盛莫與

使持節太尉柱國大將軍大都督尚書左僕射隴右行臺少師隴西郡開國公李虎(略)與周文帝爲

使持節大將軍大都督少保廣平王元贊。(略)

八柱國。

日下 是爲十二大將軍。每大將軍督二開府,凡爲二十四員,分團統領,是二十四軍。每一團儀 則教旗習戰, 自相督率, 不編户貫, 無他賦役,每兵唯辦弓刀一具,月簡閱之,甲槊戈弩並資官給。 都十二大將軍。十五日上, 則門欄陛戟, 警畫巡夜

閱

及

初置府

而德望素

六兵

制

之材料 制 起 源 以相 之史料, 比 證 君實 試作 當 較新 所見者既是止 之解 釋於下 此 條, 故今日 惟有依此 條之記 載, 旁摭 其 他

文比 北魏 卑舊俗為依 甚 附 都 晚 別採 年六 其 ·及 所憑藉之人材地利遠在高歡之下,若欲與高氏抗 無待贅論。高歡 鮮 蕭 八柱 卑部落 氏 歸 取一系統之漢族文化, 鎮之亂 治 」國者, 其 下 舊制 建康 有異於鮮卑之制 乃塞上鮮卑 摹擬 江 、宇文泰俱承此反對漢化保存鮮卑國粹之大潮 資其 陵 鮮卑舊時 承襲之漢魏晉之二系統, 此宇文 野 心利 族對 以籠絡其部下之漢族 而 用之理 於魏孝文帝所代表拓跋氏歷代漢化政策之一大反 八國即八部之制者也。 適符於周官之文者, 由 也。苟明乎此 爭, 乃黑獺 而是種漢化又須有以異 魏書壹壹叁官氏志云: 則惟有於隨 泰所以使 則 別有 知宇文泰最 利 蘇 流 綽、 順此 用之處 而興起之梟傑也。 初之 鮮卑 盧辯之徒以 特取 創 於高 反 制 動 周官 氏治 潮流 動 實 周 為緣 以 官之 史實 下洛

族之興, 自此始也。 又命叔父之胤曰乙族氏, 後改爲叔孫氏; 使諸兄弟各攝領之, 又命疏屬日 車焜氏,

初安帝統國,諸部

有九十九姓。

至獻帝時,

七分國人,

乃分其氏。

擬 車氏。 天興元 八座 凡與帝室爲十 謂之八國。 月置 部大夫散騎常侍待韶 姓。 凡此 諸 部, 其渠長皆自統 等官, 其 衆。 八部大夫於皇城

四

方四

維

面 置

天賜元年十一月以八國姓族難分,故國立大師、小師,令辯其宗黨,品舉人才。自八國以

郡各自立師,職分如八國,比今之中正也。宗室立宗師, 亦如州郡八國之儀。

神瑞元年春置八大人官,大人下置三屬官,總理萬機,故世號八公云。

又同書壹佰拾食貨志云:

天輿初制定京邑,東至代郡,西及善無,南極陰館,北盡參合,爲畿内之田,其外四方四 維置八部帥以監之。

周 書貳文帝紀下魏恭帝元年(通鑑壹陸伍梁元帝承聖三年春同)云:

者爲九十九姓後,所統軍人亦改從其姓。 魏氏之初,統國三十六,大姓九十九,後多絶滅,至是以諸將功高者爲三十六國後,

紀下、北史玖周本紀上西魏恭帝元年及通鑑壹陸伍梁元帝承聖三年所載西魏諸將賜胡姓之例, 陵王元欣列入其中之一,即擬拓跋鄰即所謂獻帝本支自領一部之意,蓋可知也。 寅恪案:拓跋族在塞外時,其宗主為一部,其餘分屬七部,共為八部。宇文泰八柱國之制 云:「凡此諸部,其渠長皆自統衆」,則凡一 所統軍人亦改從其姓」,明是以一軍事單位為一部落,而以軍將為其部之酋長。據魏書官氏志 有直接隸屬即類似君臣之關係與名分義務,此又可以推繹得知者。宇文泰初起時,本非當 部落即一軍事單位內之分子對於其部落之酋長即軍 據周 、害漬 以廣

文帝紀上(北史玖周本紀上略同)略云: 魔諸軍之主帥,實與其他柱國若趙貴輩處於同等地位, 適以機會為貴等所推耳。 如周

材。 三軍未有所屬,諸將以都督寇洛年最長,相與推洛,以總兵事。洛素無雄略,威令不行 矣。」諸將皆稱善 乃謂諸將曰:「洛智能本闕,不宜統御, [賀拔]岳果爲[侯莫陳]悦所害,其士衆散還平凉,惟大都督趙貴率部曲收岳屍還營。於是 」於是趙貴言於衆曰:「元帥 竊觀宇文夏州遠邇歸心, 士卒用命, 今若告喪, 必來赴難, (賀拔岳)勳業未就, 近者迫於群議, 奄罹凶酷, 豈唯國喪良宰, 推相攝領, 今請避位, 更擇賢 因而奉之, 則大事集 固 亦衆無

又同 [書壹陸趙貴傳(北史伍玖趙貴傳、通鑑壹陸柒陳武帝永定元年同)云: 初貴與獨孤信等皆與太祖(宇文泰)等夷。

及周 (書壹伍于謹傳(北史貳叁于謹傳及通鑑壹陸陸梁敬帝太平元年同)云:

謹既 太祖等夷

周官六軍之制。此則雜糅鮮卑部落制與漢族周官制,以供其利用,讀史者不可不知者也。 其柱國相等,又不欲元魏宗室實握兵權,故雖存八柱國之名, 皆是其證。 但八柱國之設, 雖為摹倣鮮卑昔日八部之制,而宇文泰既思提高 而以六柱國分統府兵, 一己之地位, 以比 不與

統十六年以前 不甚顯著, 利用之,以漸收其他柱國之兵權, 又宇文泰分其境内之兵,以屬趙貴諸人,本當日事勢有以致之,殊非其本意也。 斷限者,以其為李虎卒前之一年也。蓋八柱國中虎最先卒, 故易為考史者所忽視。 ,故通鑑即繫此事於梁簡文帝大寶元年即西魏文帝大統十六年。其所以取此年為 茲請略發其覆:據周書、 而擴大己身之實力, 此又為情理之當然者。 自虎卒後, 而八柱國中六柱國統兵 北史、 通典之紀八柱 但 故遇機會, 必 國 此 事跡象 皆斷 自大 史籍

通 鑑壹陸肆梁簡文帝大寶二年即西魏文帝大統十七年云: 之制始一變。

五月魏隴西襄公李虎卒。

師 國:一為柱 通 鑑此 而為柱國,明是繼李虎之位。魏書壹玖、北史壹柒俱載子孝事蹟,但北史較詳。北史云: 條所出,必有確實之依據,自不待言。 國大將軍太傅大司徒廣陵王元欣,一即柱國大將軍少師義陽王元子孝。 周書叁捌元偉傳附録魏宗室王公名位中有二柱 元子孝以少

深自貶晦,日夜縱酒, 後例降爲公, 復姓拓拔氏, 未幾卒。

入關,不及從駕,後赴長安,封義陽王,後歷尚書令柱國大將軍。子孝以國運漸移,

載子孝為柱 少師(柱國)[李]虎卒。 國年月,萬斯同西魏將相大臣年表恭帝元年甲戌條云:

六

兵

制

義陽王子孝柱國大將軍。

可據。 萬表以義陽王子孝繼李虎之職,自屬正確。但列李虎卒於恭帝元年, 顯與通鑑衝突,

(謝啓崐西魏書壹捌李虎傳載虎卒於恭帝元年五月, 亦誤。

又周書壹玖達奚武傳(北史陸伍達奚武傳及通鑑壹陸肆梁簡文帝大寶二年元帝承聖元年俱略同)

元年)武振旅還京師, [大統]十七年(北史脱「七」字)韶武率兵三萬經略漢川。 朝議初欲以武爲柱國,武謂人曰:「我作柱國不應在元子孝前。 自劍以北悉平。 明年 即 魏 固

武取 元子 可 軍士,以隸屬於己。元子孝與元欣同為魏朗宗室, 之旁證。 ?知西魏廢帝元年即李虎卒後之次年,達奚武以攻取漢中之功應繼虎之後任為柱國,而武 南鄭 孝也 虚 武之讓柱國於子孝, 於梁 位 此亦李虎卒於大統十七年,而其次年即廢帝元年達奚武班師還長安時(通鑑繁達 ,黑獺遂得增加一己之實力以制其餘之五柱國矣。 元帝承聖元年即西魏廢帝元年五月,故武之還長安尚在其後),其遺缺尚 非僅以謙德自鳴, 始窺見宇文泰之野心, 欲併取李虎所領之一部 從容禁闥 無將兵之實, 故周書貳文帝紀下(通鑑壹陸 若以之繼柱 未補 國之 奚 於

伍梁元帝承聖二年同)云:

廢帝二年春, 魏帝韶太祖去丞相大行臺, 爲都督中外諸 軍事

此為宇文泰權力擴張 其 周書貳 偶然 拾閻慶傳(北史陸壹閻慶傳同)云: 抑可知也。又元子孝為虚位柱國, 壓倒 同輩名實俱符之表現, 而適在李虎既卒、 既不統軍 而實領李虎舊部者當為宇文泰親 達奚武 讓 柱國 於元 子孝之

賜姓大野氏。晉公護母,慶之姑也。

而以己之親信資位較卑若閻慶者代領其軍歟? 依西魏賜姓之制, 則慶當是虎之部下; 慶與宇文氏又有戚誼 ,統軍之將帥與所統軍人同受一姓。 慶與李虎同姓大野氏, 虎之年位俱高於 此無確 ,或者虎卒之後, 證, 姑備 一説而已。 ,黑獺即以柱國虚位界元子孝,

帥。 部外具獨立之勢。宇文泰與趙貴等並肩同起,偶為所推,遂居其上,自不得不用八柱國之虛 若改移此部屬之觀念, 制 總而言之, 但在宇文氏創業之時, 而以六柱國分統諸兵。後因李虎先死之故,併取其兵,得擴張實力,以懾 府兵之制, 及變革此獨立之制度,乃宇文泰所未竟之業,而有待於後繼者之完成者 其初起時實摹擬鮮卑部落舊制 依當時鮮卑舊日觀念,其兵士尚分屬於各軍將,而不直隸於君主。 而部落酋長對於部內有 直轄 服 其 之權, 同 起之酋 對於

宇文泰之建國, 兼採鮮卑部落之制及漢族城郭之制, 其府兵與農民迥然不同, 而在境内為一特

六

兵

制

殊集團 及階級。 北史陸拾所謂「自相督率,不編户貫」,及周書叁孝閔帝紀(北史玖周本紀上同

元年八月甲午詔曰:

今二十四軍宜舉賢良堪治民者,軍列九人。

皆足證也。

上凡六等之户而言,文獻通考壹伍壹兵考作「六等之民」,當得其義。魏書壹佰拾食貨志云: 鄴侯家傳所謂「六户中等已上」者,此「六户」與傳文之「六家」不同,蓋指九等之户即自中下至上

顯祖(今本通典伍食貨典作莊帝,不合)因民貧富,爲租輸三等九品之制。

宇文泰殆即依此類舊制分等也。又周書貳文帝紀下魏大統九年(通鑑壹伍捌梁武帝大同九年同

於是廣募關隴豪右,以增軍旅。

者固應視為貴族 然則府兵之性質, 即在 其初元是特殊階級。其鮮卑及六鎮之胡漢混合種類及山東漢族武人之從入關 關 隴所增收編募 , 亦止限於中等以上豪富之家, 絕無下級平民參加於其

又鄴侯家傳「六家共之」之語,「共」若依通鑑作「供給」之「供」,自易明瞭。惟「六家」之語 間 與後來設置府兵地域內其兵役之比較普遍化者, 迥不相 旧也。

日本岡崎文夫教授於其所著關於唐衛府制與均田租庸調法之一私見(東北帝國大學十周年

最

涌

故以「六家供備」代「並資官給」,觀其於「六家共(依通鑑通作供)備」下,即連接「撫養 如子弟」之語,尤足證其意實目六柱國家。至其詞涉誇大,不盡可信,則與傳文之解釋又別是 家」疑亦同指六柱國家而言也。北史云:「甲槊戈弩並資官給」,李書既以府兵自初屬六柱國家, 紀念史學文學論集)中,雖致疑於何故不採周禮以來傳統之五家組合,而取六家組合,但亦未 「六家主之」及「自初屬六柱國家」等語,其「六家」之語俱指李弼等六家,故其「六家共備」之「六 有何解釋。 事,不可牽混並論也。 鄙意通鑑採用鄴侯家傳已作「六家」,故「六」字不得視為傳寫之誤。然細繹李書, 訓導,有

又玉海壹叁捌兵制叁注云:

或曰:「宇文周制府衛法,七家共出一兵。」

傳中「六家共備」之「共」,南宋人已有誤讀為「共同」之「共」者,七家共出一兵之臆説殆因此 生。伯厚置諸卷末子注或説中,是亦不信其為史實也。 寅恪案:七家共出一兵,為數太少,决不能與周代情勢符合,無待詳辨。但可據此 推知鄴侯家

Iffi

能限於每隔十五日之定期,且當日兵士之數至少,而戰守之役甚繁,欲以一人兼兵農二業,亦 史陸拾「自相督率,不編户貫」及「十五日上,則門欄陛戟,警晝巡夜;十五日下,則教旗 則鄴侯家傳所謂「郡守農隙教試閱」者,絕非西魏當日府兵制之真相,蓋農隙必不

六

唐代府兵之制,以為當西魏初創府兵時亦應如是, 近真。溫公作通鑑,其叙府兵最初之制,不採北史之文,而襲家傳之誤, 極 不易也。 又北史謂軍人「自相督率,不編户貫」, 其誤明 則更與郡守無關, 矣。李延壽生值 此則鄴侯家傳作者 殊可惜也。 唐初, 所 紀史 事 李繁依 猶 為

吾輩今日可以依據北 史所載, 解决府兵之兵農分合問題。 新唐書伍拾兵志云

蓋古者兵法起於井田,自周衰 王制壞而不復。至於府兵, 始一萬之於農。

葉適習學記言叁玖唐書表志條駁兵農合一 然則豈必高祖太宗所以盛哉!乃遵其舊法行之耳。兵農已分,法久而壞,不必慨慕府兵, 宇文蘇綽患其然也, 當其時無歲不征, 無戰不克, 始令兵農各籍, 而財貨充溢, 之説, 不相牽綴, 略云: 民無失業之怨者,徒以兵農判爲 奮其至弱, 卒以滅齊。 隋因之,

二故也。

平一字

相同, 誤用家傳以唐 史料缺略, 誤 兵農· 離 爲合, 歐陽永叔以唐之府兵為兵農合一是也。但概括府兵二百年之全部, 無根 合一,則已謬矣。 誤認府兵之制二百年間前後一貫,無根本變遷之故耳。 制釋西魏府兵, ,徇空談而忘實用矣。 本之變遷, 致認唐高祖太宗之府兵仍是兵農分離之制 葉水心以宇文蘇綽之府兵為兵農分離,是也。 而歐陽、 葉氏復兩失之, 宋賢史學, 今古罕匹, (通鑑貳壹貳唐玄宗開 則更謬矣。 認其初期亦與唐制 但亦以為其制 所以 一 致疏失者, 馬 君 實 經 元

兵為兵農合一,此則較葉氏之無真知灼見,好為異説而偶中者,誠有間矣。 十年紀張説建議召募壯士充宿衛事,以為「兵農之分從此始」,是司馬之意亦同歐陽,以唐代府

全

隋書貳高祖紀下(北史壹壹隋本紀上、通鑑壹柒柒隋文帝開皇十年同)云:

開皇十年五月乙未韶曰:「魏末喪亂,字縣瓜分,役車歲動,未遑休息,兵士軍人權置坊

縣,墾田籍帳一與民同,軍府統領宜依舊式,罷山東、河南及北方緣邊之地新置軍府。」

府,南征北伐,居處無定,恆爲流寓之人,竟無鄉里之號,朕甚愍之。凡是軍人可悉屬州

同書貳肆食貨志(通典貳及叁及伍及柒食貨典,又周書伍武帝紀上、北史十周本紀下俱同)云:

至[齊武成帝]河清三年定令,乃命人居十家爲比鄰,五十家爲間里,百家爲族黨。男子十 八已上六十五已下爲丁,十六已上十七已下爲中,六十六已上爲老,十五已下爲小。率以

十八受田,輸租調,二十充兵,六十免力役,六十六退田,免租調。 之,除其縣籍,是後夏人半爲兵矣。 [周武帝]保定元年改八丁兵爲十二丁兵,率歲一月役。建德二年改軍士爲侍官,募百姓充

及[隋高祖]受禪,又遷都,發山東丁,毀造宫室,仍依周制役丁爲十二番,匠則六番。頒

制

六

新令:男女三歲已下爲黄,十歲已下爲小,十七已下爲中,十八已上爲丁。丁從課役,六

十爲老, 乃免。

其丁男、中男、永業、露田皆遵後齊之制。

開皇三年正月[隋文]帝入新宫,初令軍人(人即民也,北史壹壹隋本紀上通典柒食貨典及

通鑑壹柒伍陳長城公至德元年三月俱無軍字)以二十一成丁,減十二番每歲爲二十日役,

减調絹一疋爲二丈。

通鑑壹柒伍陳長城公至德元年三月胡注云:

後周之制民年十八成丁,今增三歲,每歲十二番則三十日役,今減爲二十日役,及調絹減

通典貳捌職官典拾將軍總叙條云:

隋凡十二衛,各置大將軍一人,將軍一人,以總府事,蓋魏周十二大將軍之遺制。

唐六典貳肆左右衛大將軍條注云:

隋左右衛, 左右武衛, 左右候, 左右武候,左右領軍,左右率府,各有大將軍一人,

十二衛大將軍也。

上章已論宇文泰欲漸改移鮮卑部屬之觀念及制度,而及身未竟其業,須俟其後繼者始完成之。

兹所引史料,足證明此點,亦即西魏府兵制轉為唐代府兵制過渡之關鍵所在也。 鄴侯家傳(新

書伍拾兵志 通鑑貳壹陸唐玄宗天寶八載同)云:

自置府以其番宿衛,禮之謂之侍官,言侍衛天子也。至是衛佐悉以借姻戚之家爲僮僕執

寅恪案 京師 周武帝改軍士為侍官, 人相詆訾者,即呼爲侍官。 即變更府兵之部屬觀念,使其直隸於君主。

想最有意義之措施,不可以為僅改易空名而忽視之也。

此湔洗鮮卑部落思

又最初府兵制下之將卒皆是胡姓, 即同胡人。周武帝募百姓充之,改其民籍為兵籍,乃第

府兵之擴大化即平民化。此時以前之府兵既皆是胡姓, 則胡人也, 百姓, 則夏人也, 故云:

岡崎教授於其所著論文之第陸頁第柒行引隋書食貨志及通典此條俱少一「夏」字,豈別有善本依 是後夏人半為兵矣。」此條「夏」字隋書通典俱同有之,必非誤衍,若不依鄙意解釋恐不易通。 耶? 抑以其為不可解之故,遂認為衍文而刪之耶? 寅恪所見諸本皆是通行坊刻,若其他善

本果有 異文, 尚希博雅君子不吝教誨也。 據通鑑壹陸捌陳文帝天嘉二年胡注云:

保定元年改八丁兵為十二丁兵者,

凡境内民丁分爲八番,遞上就役。 十二丁兵者, 分爲十二番, 月上就役, 周而復

始。

文既明言兵丁,而胡氏僅以「境内民丁」釋之,絕不一及兵字,其意殆以為其時兵民全無區別, 百姓充侍官之前者尚十二年, 此年之令文, 周書、隋書、北史、通典所載悉同, 當無為脱。

與後來不異,則疑有未妥也。

此時期漸次完成者也 然高齊文化制度影響於戰勝之周及繼周之隋者至深且鉅,府兵制之由西魏制而變為唐代制即在 周 武帝既施行府兵擴大化政策之第一步,經四年而周滅齊,又四年而隋代周, 其間時間甚短

傅良歷代兵制伍云:

陳

令民十八受田, 輸租調, 二十充兵, 六十免力役, 六十六還田, 免租調), 加以宇文泰之 魏周齊之世已行租調之法,而府兵之法由是而始基(通鑑陳紀齊顯(寅恪案:顯當作世)祖 賢,專意法古,當時兵制增損尤詳,然亦未易遽成也。故其制雖始於周齊, 而其效則漸見

彰於唐,以此知先王之制其廢既久,則復之必以漸歟?

則殊有識。 寅恪案: 陳氏語意有 蓋後期府兵之制全部兵農合一,實於齊制始見諸明文,此實府兵制之關鍵也。 未諦者,不足深論 但其注引齊制「十八受田, 輸租調,二十充兵」之文,

時法令之文與實施之事不必悉相符合,今日考史者無以知其詳,故不能確言也。

又隋書貳柒百官志尚書省五兵尚書條略云:

五兵統右中兵

(掌畿内丁帳、事力、蕃兵等事。)

(掌河南及潼關已東諸州丁帳及發召征兵等事。)

右外兵

(掌河北及潼關已西諸州, 所典與左外同。)

等事,疑北齊當日實已施行兵民合一之制,此可與隋書食貨志所載齊河清三年令規定民丁充兵 寅恪案:北齊五兵尚書所統之右中兵、左外兵、右外兵等曹,既掌畿內及諸州丁帳及發召征兵 年限及其與受田關係者可以參證也

隋文帝開皇十年詔書中有「墾田籍帳悉與民同」之語,與北史所載府兵初起之制兵士絕對無暇 步之君主直轄化即禁衛軍化,及徵調擴大化即兵農合一化而已。隋之十二衛即承魏周十二 ,或指 自有 邊地屯墾之軍而言,史文簡略,不能詳也。隋代府兵制變革之趨向, 不同。此韶所言或是周武帝改革以後之情狀,或目府兵役屬者所墾,而非府兵自耕 在較周 武 帝更

題, 不屬州縣,在形式上尚須與人民有別,故此令文中仍以軍民並列,至北史、通典以及通 文「八兵丁」及「十二丁兵」顯有關係。而開皇三年令文隋書所載有「軍」字者, 旨, 今以史文不詳, 姑從闕疑。但依通鑑至德元年之胡注, 然就法令形式言, 露田皆遵後齊之制 則已大反西魏初創府兵時「自相督率, 以其時兵民在事實上已無可別, 即此簡略之記述或已隱括北齊清河三年規定受田與兵役關係 」及「發使四出,均天下之田」(隋書貳肆食貨志), 不編户貫」即兵民分立之制, 故得略去「軍」字, 則隋開皇三年令文與周保定元年令 並非李延壽、 其令「丁男、 雖實施 以開皇十年前軍兵 杜君卿及司 如 何, 中男、 鑑所載 令之主 固 馬君 有

由是言之, 實任意或偶 開皇 爾有所略漏明矣。 三年令文卻應取前此保定元年令文胡注中境内兵民合一之義以為解釋也。

夫開

三年境內軍民在事實上已無可別, 則開皇十年以後, 胡之意旨, 豈可不謂唐代府兵之基本條件, 即兵民合一者, 實已完成於隋文之世耶? 抑更可知, 故依據唐宋諸賢李、

岡崎教授論文之結論云:

實行如何, 隋以軍兵同於編户云者, 尚有問題,綜合兩方面實施者, 僅古制之復舊 而已。 唐之兵制也。 北齊雖於法令上規定受田與兵役之關係, 其

妄見 遽取以實施耶? 又以其他法制諸端論,唐初開國之時大抵承襲隋代之舊, 寅恪案: 史料簡缺 丁賦之大政,轉有鉅大之創設,且遠法北齊之空文,而又為楊隋盛時所未曾規定行用者 附識 北齊法令之實施與否,於此可不論。茲所欲言者,即據上引開皇三年令文及唐宋諸賢 似可推知隋代先已實施兵民合一之基本條件,不必待李唐開國以後, 於此 誠難確 此亦與唐初通常情勢恐有未合也。然則府兵制後期之紀元當斷自隋 以供他日修正時覆視之便利 知, 岡崎教授之結論,要不失為學人審慎之態度。 一云爾, 殊不敢自謂有所論斷 即間有變革,亦所關較細者, 寅恪姑取 方始剏行之也。 始歟? 時未定之 豈獨於 總

總合上引史料及其解釋,試作一結論如下:

代。 府兵制之前期為鮮卑兵制, 周文帝 而唐之高祖、 為大體兵農合一制,為君主直轄制 蘇綽則府 太宗在此制度創建、 兵制 為大體兵農分離制,為部酋分屬制,為特殊貴族制;其後期為華夏 創建之人, 變革、 周武 帝、隋文帝其變革 為比較平民制。其前後兩期分畫之界限 廢止之三階段中, 之人, 恐俱無特殊地位 唐玄宗、 者也。 張説 其廢止之 則在隋

附記:本文中所引通典諸條, 後查得宋本與通行本並無差異, 特附識於此

七財政

所 社會之變革 沂 在不可 系統 及前 中 旨 外史家論吾 淵 唯在 時 亦俱 源之範 西 北 闡 述 在 圍也。 此時者相同 隅之地 繼 國 南 南北朝隋唐經濟財 北 考此 方制 朝正統之唐代, 度轉變為中 二事轉變之樞紐 但欲説 明其 政制度者頗多,其言有得有失,非此章範圍所能涉 央政 其中央財政制度之漸次江南地 (本末, 在武 府之制度,易言之, 則天及唐玄宗二代, 非先略知南北 朝之經濟財政其差異最 即河 與兵制 西 方化, 易言之, 地方化二事, 選舉 及其 即南 蓋 他 政治 此

U 題 比 今日所保存之南北朝經濟財政史料, 此章所 有 北 均給民 政府保有廣大之國有之土地。此 朝 不能詳, 為 進 田 之制 步 而其 故僅略舉其文, 而 或 南 家 朝 財 無之也 政 制 至北魏以後者亦須稍附及之, 度 亦因之 蓋承 南 北朝較詳, 南朝尤略。然約略觀之, 朝 永嘉以 人 與與 民 北 所 後, 朝 經喪亂之慘酷不及北 有 屢經變亂 所 不 同 即 ,人民死亡流散所致。 以見其因襲所自, 較 為 進 朝之甚,故社 步 是也。 其最大不同之點 北 會經 並可 魏 故 均 濟情形 與南北 田 北 朝 則

互較,而後隋唐財政制度之淵源系統及其演進之先後次序始得而明也。

初受田者,男夫一人給田二十畝,課薛,餘種桑五十樹、棗五株、榆三根;非桑之土,夫 縮。諸民年及課則受田,老免,及身没則還田,奴婢、牛隨有無以還受, 給一畝,依法課蒔榆、棗,奴各依良。諸桑田皆爲世業,身終不還,恆從見口,有盈者無 之限,但通入倍田分,於分雖盈,没則還田,不得以充露田之數,不足者以露田充倍。 太和九年下韶均給天下民田,諸男夫十五以上受露田四十畝,婦人二十畝,奴婢依良,丁 諸麻布之土男夫及課別給麻田十畝,婦人五畝,奴婢依良,皆從還受之法。諸宰民 不足者受種如法, 盈者得賣其盈, 不足者得買所不足, 不得賣其分, 亦不得買過 限四牛。所授之田率倍之,三易之田再倍之,以供耕作及還受之盈 諸桑田不在還受

人競商販,不爲田業,故使均輸欲爲懲勵,雖以此爲辭,其實利在侵削。又都西有石頭 百;無文券者隨物所堪,亦百分收四,名爲散估,歷宋、齊、梁、陳如此以爲常。以此

七

財

有大市百(寅恪案:通典壹壹食貨典雜稅門百字作自)餘,小市十餘所,大市備置官司,稅 炭、魚、薪之類過津者並十分税一,以入官。其東路無禁貨,故方山津檢察甚簡。淮水北 東有方山津,各置津主一人,賊曹一人,直水五人,以檢察禁物及亡叛者,其荻、

斂既重, 時甚苦之。

[北周] 閔帝元年初除市門稅,及宣帝即位,復興人市之稅。

以其所入以供御府聲色之費,軍國之用不豫焉,未幾而亡。 出錢。而給事黄門侍郎顏之推奏請立關市邸店之稅,開府鄧長顋贊成之,後主大悦。於是 [北齊]武平之後,權幸並進,賜與無限,加之旱蝗,國用轉屈,乃料境内六等富人,

通典貳田制下云:

隋

書貳肆食貨志略云 北齊給授田令,仍依魏朝。每年十月普令轉授,成丁而授,丁老而退,不聽賣易。

退田, 免租調(此節前兵制章已引)。京城四面諸坊之外三十里爲公田, 受公田者, 三縣代 遷户執事官一品已下逮於羽林、武賁各有差,其外畿郡華人官第一品已下羽林、武賁已上 十六已上爲老,十五已下爲小。率以十八受田,輸租調,二十充兵,六十免力役,六十六 至[北齊]河清三年定令,乃命男子十八已上六十五已下爲丁,十六已上十七已下爲中,六

各有差。職事及百姓請墾田者名爲受田,奴婢受田者親王止三百人。(中略)。八品已下至 庶人限止六十人,奴婢限外不給田者皆不輸。其方百里外及州人一夫受露田八十畝,婦四 十畝,奴婢依良人限數,與在京百官同,丁牛一頭受田六十畝,限止四牛。又每丁給永業 二十畝爲桑田,其中種桑五十根、榆三根、棗五根,不在還受之限,非此田者悉入還受之

又同書同卷略云:

分。 土不宜桑者給麻田, 如桑田法。

丁,丁從課役,六十爲老,乃免。自諸王已下至於都督皆給永業田各有差,多者至一百 田,以供公用。 園宅率三口給一畝,奴婢則五口給一畝。京官又給職分田,外官亦各有職分田,又給公廨 頃,少者至四十畝。其丁男、中男、永業、露田皆遵後齊之制,並課樹以桑、 [隋高祖] 頒新令,制人男女三歲已下爲黄,十歲已下爲小,十七已下爲中,十八已上爲 榆及棗。其

[武德]七年三月二十九日始定均田賦稅,凡天下丁男給田一頃,篤疾廢疾給四十畝,寡妻 之,口分則收入官,更以給人。 妾三十畝,若爲户者加二十畝。所授之田十分之二爲世業,餘爲口分田,身死則承户者授

唐會要捌叁租稅上(参考通典貳田制下及舊唐書肆捌食貨志、新唐書伍壹食貨志等)略云:

同書玖貳內外官職田(參考前條有關諸書)略云:

武德元年十二月制內外職官各給職分田。

均 甄 有 據 琛傳同 不同 此 田之制 簡略之 然則 一徵引 其國 南 朝 用 或 注 即 重於關 可見北朝俱有均 民經濟國家財政較 市之稅 田之 北朝雖晚 北朝為 制, 魏、 期亦征關 進步, 齊、 抑又可 隋、 市之税, 唐之 知也。 然與 田 制 魏書 南朝此 實同一 陸捌甄 系統 稅之地 深傳 位其 Ifij 北 南 史肆 朝則 輕 重 頗 無

南 北 社會經濟國家財政之差異要點, [於世宗時]上表曰:「今傷弊相承, 甄琛此數語足以盡之矣。 仍崇關鄽之税, 大魏恢博, 唯受穀帛之輸。」

以演 也。 但 則 濟之發展 展之程度幾達 隋 天之世 雖為北朝所併滅 進。 夫唐 雖統 唐代之新財 漸超 代之國家財 南 生養休息約經半世紀之久, 越北 最 北 高 朝舊 度, 而為時甚短, 又經隋 其遺制當仍保存於地方之一 政制度, 政制度本為北朝之系統, 而舊 日之限度, 而達到南 E 初視之似為當時政府一二人所特創 北朝之區域自西晉永嘉亂後其社會經濟之發達未 社會經濟逐 末之擾亂 朝當時之歷程時, 而北 隅, 漸 朝之社會經濟較南朝為落後, 社會經濟之進步亦為之停頓 迨經過長久之期間, 進 展, 約再歷半 則其國家財 實則本為南朝之 世紀, 唐代所統治之北朝舊 政制 至玄宗之時 度 有盛 直 亦 至 至唐高 舊制 唐代 不能 於此 社 不 時 蓋南 隨之 會 宗武 則 經 進

政 江 在 内 品 論 南 玄宗 府 隅歷代 本 南 其 地 策 為文 淵 制 方 承宇文 地 化者 方者 度之 既 其 源 對 為邊防 而 西 化 經 所 泰關 需 西 對 濟 從 北 甚 而 北 於 發 出 隅 高 施 迴 造 邊 要地 西 中 行之, 展 於 品 納布 此 疆 北 本 與 域 既 位 與 採 西 即 其地 則取 之政 前 南 前 軍 北 其 影 朝相 事 諸 所 弱 所 謂 於 謂 積 方 積 策 外 響 於隋 等, 傳 極進 族 河 唐代 唐代 極 政 西 鄰 九 統之財 地 制 北 接 制 則 策 展之政策。 唐 方化者 度之 度之 邊 制 承 繼北 則 政 歷來 疆 度之全部 河 江 此 經 本 两 重 不 南 河 朝系統之中 濟 其 和 地 湟 於 獨 地 制 方化者 糴 方化 關 東 者 地方傳統有效之制 為文化交通 度經長久之演進, 涉政治史者本章可不置論 北 前章 此 世 央 至於玄宗之世 即 政 請 Ė 端之涉及政 府 之孔道, 指 詳言之。 就 遂取 此 言 者各舉 度實 用此 也 頗能 治 亦為 但 又河 有 對 除 舊 軍 適合國防要 事 例 擴大 於 日 或 文 者 以 東 化 隴 南 防 兹所 朝舊 證 推 北 不 軍 端 明之, 廣 更 事 域 能 詳 外 論者 取 在 制 而改為中 地 述 要 消 IL 之 即 其 關 極 品 朝 保 弦 於 九 維 地 區 存 央 持 唐 域 域

地 當國 即營 優勝 家 長 安、 在 積 洛陽為東京 11 極 洛陽 周 進 以 行 前 西北 東 軍 西 隋唐 兩京 政 開 範 拓 政 承之, 圍 俱為政治文化之中 限 策之時, 於 故長安、 關 隴 尤能 巴蜀 洛陽天子往來行幸, 得 規 形勢近 心 模 狹 而 小 便之利, 長安為 其 松平 西 然其 魏、 濟 治 誠 如李 北 能 地 之經 自給 周 林 以 甫 濟 來 自 關 運 所 謂 周 中 輸 東 滅 則 本 位 西 遠 北 之 网 齊 及 根 後 據

農産豐收, 若值天災, 宫衛百官俸食之需, 本章所欲論者, 長安遷居洛陽, 也(參新唐書貳貳叁上姦臣傳李林甫傳及通鑑貳壹肆唐紀叁拾開元二十四年條等)。夫帝王之由 農産品不足以供給長安帝王宫衛及百官俸食之需時, 然後復還長安。茲就隋唐二代各舉 除別有政治及娛樂等原因, 即經濟供給之原因是也。蓋關中之地農産物雖號豐饒, 而其地水陸交通不甚便利 如隋煬帝、武則天等茲不論外,其中尚有一主因 一例如下: 運轉米穀亦頗困難, 則帝王往往移幸洛陽 故自隋 其實 唐以 不能充分供 關 公給帝 中 俟關中 之地 為

隋書貳高祖紀下(北史壹壹隋本紀上略同)云:

開皇十四年八月辛未關中大旱,人饑,上率户口就食於洛陽。十五年三月己未至自東巡

茶

通鑑貳佰玖唐紀貳伍景龍三年末云:

是年關中饑 后家本杜陵 不樂東遷, 米斗百錢, 乃使巫覡彭君卿等説上(中宗)云:「今歲不利東行。 運山東、江淮穀輸京師, 牛死什八九。羣臣多請車駕 幸東 」後復有言

者,上怒曰:「豈有逐糧天子耶?」乃止。

可知隋唐時關中長安之經濟供給情勢矣。

觀此二例,

至唐玄宗之世,為唐代最盛之時,且為積極施行西北開拓政策之際,當日關中經濟供給之問題

尤較前代為嚴重,觀舊唐書玖捌裴耀卿傳(通典拾食貨典漕運門同,其他有關材料不備列)所

居。今國用漸廣,漕運數倍於前,支猶不給,陛下數幸東都,以就貯積,爲國家大計,不 乏。往者貞觀永徽之際禄廪數少,每年轉運不過一二十萬石,所用便足,以此車駕久得安 業本在京師, 支一二年。從東都更廣漕運, 對曰:「今既大駕東巡,百司扈從,太倉及三輔先所積貯且隨見在發重臣分道 憚劬勞, 祇爲憂人而行, 豈是故欲來往。 明年(開元二十一年)秋霖雨害稼,京城穀貴,上將幸東都,獨召耀卿,問救人之術。 七百萬石,省脚錢三十萬貫。 倉。」上深然其言。尋拜黄門侍郎同中書門下平章事, 充轉運使, 語在食貨志。凡三年運 船候水始進,吴人不便河漕,由是所在停留,日月既淹,遂生隱盗,臣望沿 險,既用陸脚, 及河南府陝州, 即無憂水旱。今天下輸丁約有四百萬人,每丁支出錢百文,五十文充營窖等用, 萬國朝宗,百代不易之所,但爲秦中地狹,收粟不多,儻遇水旱,便即匱 無由廣致。若能開通河漕,變陸爲水,則所支有餘,動盈萬計。 以充其費。 租米則各隨遠近,任自出脚,送納東都。從都至陝, 以實關輔,待稍充實,車駕西還,即事無不濟。 若能更廣陝運, 支粟入京, 倉廪常有三二年糧, 臣以國家帝 賑 流相 且 貯納司農 河南 河 次置 路艱 計 耀

七

財

及舊唐書肆玖食貨志下(參考通典拾食貨典漕運門等)所云:

[開元]十八年宣州刺史裴耀卿上便宜事條曰 防。 緣水陸遥遠,轉運艱辛,功力雖勞, :「江南户口稍廣, 倉儲 不益。 今若且置武牢、 倉庫所資, 洛口 惟出 等倉 租 庸, 江南 更

公私無益。」疏奏不省(至二十一年始施用其言)。

二百萬

石,

即望數年之外倉廪轉加。

其江淮義倉下濕不堪久貯,

若無

船可運,

年 得

口

即却還本州,

更得其船充運,

並取所減脚錢,

更運江淮變造義倉,

, 三 兩

則可知玄宗時關中經濟不能自足情形及其救濟之政策。裴耀卿之方略,第一在改良運輸方法,

步之政策 即沿流相次置倉 更進 一步之政策則為就關中之地收買農産物, 第二在增加運輸數量,即運江淮變造義倉。斯二者皆施行有效,然此尚為初 即所謂和糴;而改運江淮之粟為運

新唐書伍叁食貨志(參通鑑貳壹肆唐紀開元二十五年條)云:

即所謂

迴造

納布是也

倉者百餘萬斛, 米賤則少府加估而糴, 自是玄宗不復幸東都。天寶中歲以錢六十萬緡賦諸道和糴,斗增三錢,每歲短遞輸京 開元後西舉高昌、 租不足以供軍,於是初有和糴。牛仙客爲相,有彭果者獻策廣關輔之糴, 龜茲、 焉耆、 小勃律, 貴則賤價而糶。 北抵薛延陀故地, 緣邊數十州戍重兵, 京師糧 禀益 田

弱 究所集刊第伍 於 和 糴 在 當 本第壹分讀高 日政治上之重要, 力士外傳 表弟俞 論 變造和糴之法)。 大綱君曾詳論之, 今所欲論者, 茲不復贅(見中央研 乃和糴之起 究 院歷 源 史 及 與 語 牛仙

客之關 新 唐書壹叁叁牛仙客傳略同)略云: 至彭果與 此政策之内容究有何聯繫, 難以考知, 故置不論。舊唐書壹佰叁牛 一仙客傅

少卿 庫盈滿,器械精勁,皆如希逸之狀。上大悦,以仙客爲尚書, 代信安王禕爲朔方行軍大總管, 牛仙客, 涇州鶉觚人也。 度時省用所積鉅萬,希逸以其事奏聞。上令刑部員外郎張利貞馳傳往覆視之, 令式可也」, 以其事, 蕭嵩代君奧爲河西節 仍知門下事。 乃加實封二百户,其年十一月九齡等罷知政事,遂以仙客爲工部尚書 判凉州别駕事 遂以軍功累轉洮州司馬。開元初王君與爲河西節度使,以仙客爲判官,甚委信 不敢 措手裁決。 仙客既居相位, 仍知節度留後事, 度使, 初爲縣小吏,縣令傅文静甚重之。文静後爲隴右營田使, 右散騎常侍崔希逸代仙客知河西節 又以軍政委於仙客。及嵩入知政事, 獨善其身, 竟代嵩爲河西節度使, 唯諾而已。 百司有所豁決, 中書令張九齡 判涼 度事。 數稱 州 事。 薦之。 初仙 仙客曰:一但依 同中 開 執奏以 客在 仙客所 元廿 書門 稍遷太僕 引仙 河 四年秋 爲 下三 積 西 客

七 寅恪案:仙客以河湟 財 政 典史, 躋至宰相, 其與張九齡一 段因緣為玄宗朝政治之一大公案,

但與

弱 和 事 敢 也, 中, 糴 肆食貨志 端端 其 事 以仙 史雖言其議發於彭果, 無直 議 俾執中央政權是也。 質言之,即以西北邊隅之土著,致力於其地方之足食足兵之政略, |接關係,故此可不論。茲可注意者,為仙客出生及歷官之地域並其在官所職掌 由 客之 (参通典壹貳食貨典輕重門義倉條 此 庸謹, 推 論 則以 乃敢主 和糴政策為足食足兵之法, 之者, 然實因仙客主持之力, 史傳言其在相位庸碌, 不敢有所裁决, 自是實録 其事其法必其平)略云: 乃能 生所素習, 其淵源所在疑捨西北邊隅莫屬 施行。夫關 且認知其能 中用和糴法, 而大顯 收效者, , 但施 乃特創之大 成效 否則 行和 也 羅於 遂特 及功 隋 必

芳、宕、旭、洮、岷、渭、紀、河、廓、豳、雕、涇、寧、原、敷、丹、延、綏、銀、扶 一月韶 州異於餘 令百姓就食 敗,若時或不熟,當社有饑饉者,即以此穀賑給。十四年關中大旱,人饑,上幸洛陽, 日隨其所得 [開皇]五年五月工部尚書襄陽縣公長孫平奏令諸州百姓及軍人勸課當社共立義倉, 收穫之 若人有旱儉少糧,先給雜種及遠年粟。」十六年正月又韶秦、疊、成、 日: 本置義倉, 勸課出粟及麥,於當社造倉窖貯之, 雲、 從官並准 夏、 見口賑給, 長、靈、鹽、蘭、 止防水旱, 不以官位爲限,是時 百姓之徒不思久計 豐、鄯、 凉、 即委社司執帳檢校,每年收積勿使損 義倉貯在人間, 世、 輕爾費損, 瓜等州 所有義 於後乏絶。 多有 倉雜 費損。十五 種並 又北 年 因

等州社倉並於當縣安置。 二月又韶社倉准上、中、下三等税;上户不過一石,中户不過七

斗, 下户不過四斗。

唐 會要捌捌倉及常平倉(參通典壹貳食貨典及兩唐書食貨志等)略云:

備凶年,深是可嘉,宜下有司,議立條制。」户部尚書韓仲良奏:「王公以下墾田 二年四月尚書左丞戴胄上言,請立義倉。 上曰:「既爲百姓先作儲貯,官爲舉掌,以 畝納二

升,貯之州縣,以備凶年。」制可之。永徽二年閏九月六日勑:「義倉據地收稅,實是勞

煩, 宜令率户出粟, 上下户五石, 餘各有差。」

演變之跡象與隋西北邊諸州相同,則殊無疑,豈其間亦有因襲摹倣之關係耶?未敢確言之也。 户之等第納粟,實已變開皇初立義倉時之勸導性質為強迫徵收矣。唐初之義倉似 卒令率户出粟, 變為一 依據隋志 於西北諸州邊防要地者 紀述,知隋初社倉本為民間自理,後以多有費損, 種賦稅,中唐以後遂為兩稅之一之重要收入,其詳本章所不能論,然其 ,以其處軍 食為國防所關,不得如他處之便可任人民自由 實同 虚設, 乃改為官家收辦, 處 即做隋制 理 又依 但

又觀唐會要玖拾和糴門所載如:

氏長慶集肆壹論和糴狀所云: 元]四年八月韶京兆府於時價外加估和糴, 先是京畿和糴多被抑配, 百姓苦之。

七財政

曾爲和糴之户,親被迫蹙,實不堪命,臣近爲畿尉,曾領和糴之司,親自鞭撻,所不忍 散配户人, 日 若有司出錢, 開場自糴, 比於時價, 1和糴, 促立程限, 則官出錢, 人出穀, 嚴加徵催, 兩和商量, 苟有稽遲, 則被追捉, 甚於稅賦 稍有優饒,利之誘人,人必情願。臣久處村間, 然後交易也。 比來和羅, 事 號爲 則 不然, 和糴, 但令府縣 其實害

則 者,即和 和 其何以由「和」買而變為強徵, 糴 至少在德宗、 糴之制本為軍食而設,如唐會要捌捌倉及常平倉云: 憲宗之世,實際上為「散配户人,嚴加徵催」之強迫收取人民農産品之方 殊可深思。 其在玄宗時 如何情形固不能確 知, 但有 可決言

覩

貞元八年十月勑:「諸軍鎮和羅貯備共三十三萬石。」

及同書玖拾和糴云:

長慶元年二月勑:「其京北、 徒擾邊民, 故罷之。」 京西和羅使宜勒停,先是度支以近儲無備,請置和羅使,

間 即 制 可瞭然隋代以全國社倉人民處理不善, 江南尚且實施,西北更應一律遵行,而西北自貞觀至開元其間皆有軍事關係, 納粟於軍鎮 其後改為依户等納粟, 特在西北邊州軍防之地改官辦之制 亦是「配户徵催 之制也。 唐貞 (觀義 倉之制 即是 為屯駐 為全 令人民 或 重兵 直接

觀通 典壹貳食貨典輕 重門義倉條(參舊唐書玖叁及新唐書壹壹壹薛訥傳 云

費用向 高宗武太后數十年間義倉不許雜用,其後公私窘迫,貸義倉支用, 自中宗神龍之後,

則知西北邊州軍需之廣,義倉亦必貸盡而有所不足也。但欲足軍食,

西北數十州多宿重

肆唐紀叁拾開元二十五年九月條 (參前引新唐書食貨志)云:

捨和糴莫由,

故通

演賣

兵, 地租管田皆不能贍, 始用和糴之法。

有彭果者,

因牛仙客獻

粟各數百萬斛。 請行羅法於關中。 」自是關中蓄積羡益, [九月]戊子敕:「以歲稔穀賤傷農, 車駕不復幸東都矣。 癸巳, 命增時價什二三, 敕河 南、南、 北 和 租應輸 糴 東 ·西畿

太原倉者皆留輸本州。

是西北邊州本行和糴之法,

以能足食足兵顯名,致位宰相,則西北和糴之法仙客必早已行之而有效。而其所以 除有充足之財貨足以為和買之資外,尚須具備有二 條件: 一為其地農民人口繁殖 足以增 能著效

而牛仙客、彭果因以推行於關中。牛仙客本由河湟典史歷官西北甚

數量,二 為其地已習用此類帶有強迫性收買之方法。 請略言之

加農産

品

t

季西北 諸州雖罹 就地收購農産物之謂 戰禍, 然休養生息至唐玄宗之晚年,必已恢復繁盛,加以政府施行充實西北 故必須其 地農民 人口繁殖, 有充分之生産, 始得行收購之實。

河 邊州之政策 西 節度使 條 故其 述當 日河西之盛況 地遂為當日全國最富饒之區域。 (寅恪案:此採自 明皇雜 通鑑貳壹陸唐紀叁貳天寶十二載以哥 録, 又元氏長慶集貳肆和李校 書 舒 新 翰

西凉伎 詩亦 可參考)云:

西北 邊州富庶若此 和糴 心政策 第一 條件既 已備具, 則就其地以推 行此 政策, 自不 木 口

右。

中

國盛强

自安遠門西盡唐境萬二千里,

間間

相望,

桑麻翳野,

天下稱富庶者無

如

自 又和糴之法若官所出價, 逾於地方時估者甚高, 續方法似無大異,以上下相習, 可 皇 甚多, 動 雖西 與胥吏交易。 已行按户納粟 是以 在 北 則不易支久;如官方所出價與地方時估相差無幾,則區 西北 邊州 必帶有習慣性及強迫性, 邊州 施行貞觀義倉之制, 於官倉或軍 蓋農民大抵畏吏胥如虎 諒 亦不過依隋代 倉之制 為日已久, 已變為 按户納粟於軍倉之制, 和糴之法始能施 其性 狼, 遂能成效卓著也。 一種 質 即 避之惟恐不及, 賦 雖可以利誘民, 然政府所費過鉅, 與白香山 税, 行有效, 而 史言西北宿重兵, 所謂 但略給價, 而不致 此則無古今之異, 至元和時關中和羅之法所以變為 「散配户人, 區微利之引誘, 病民。 以資 嚴加徵催 其 考西 利 誘, 地早行 北邊州 不俟煩言 必不能使農民 其 如收 基 和 本之手 實 自 購 糴 之數 無 隋 而 則

時 之政者 政府 既 能給價 蓋 和 耀之法本帶 人民亦易負擔, 強迫 性 故當 質 時尚 以 非 如是, 不視為病民之政耳。 無 以 成 事 丁, 不過 此和糴之法所應具備之第二 值 國庫 一優裕, 人民富 庶之

修件せ

尚 地 煌 總而言之, 口 掇 方制度 道中 據 五 以 年以前其詳雖 推 輯 變而 西北 陸 知 其 陸 大 號 成中央政府制 邊州早行和糴之法, 概 寅恪曾考論其中升斗兩字, 載一九三六年十月清華學報讀秦婦吟文中 不 也 一可考, 但今敦煌所出寫本中猶存天寶四載豆盧軍和羅計帳殘本(刊 度,所謂唐代制度之河西地方化者是也。 史已明言。 牛仙客推行引用於關 輔, 至和 此和 耀之法在西 糴之法乃 北 由 載 西 開 敦 北 元

會 京 必要。 要捌叁租 既 但江 藉之充實 用 4 稅下 淮之農産 仙客 開中 所載開元二十五年三月三日敕文)云: 和 糴 之法, 品 財富力量 雖不需 關 也。故舊唐書致玄宗本紀下(參考前引通 中 ,而其代替農産品 經 濟可以自給, 可作財貨以供和糴收購之 則裴 耀 卿轉 運 江 淮 變造 鑑開元二十 等農産 [麻]布 品 之政 五年條 則 仍 策 須 成 及唐 輸 為

開元二十五年二月戊午罷江淮運,停河北運。

通典陸食貨典賦稅下略云:

元二十五年定令〕, 其江南諸州 租並 迴 造納布。

七

財

政

唐代自開國以來其人民所繳納之租本應為粟,今忽改而為布,乃國家財政制度上之一大變革 此中外史家所共知者也。嘗就閱讀所及,凡論此改革之文雖頗不少,似尚未有深探此變制之所

之慣例, 竊以為此 從來者,不揣鄙陋, 代之制度矣。據 至武則天時此制 制乃南 朝舊制 Sir M.A.Stein 著 Innermost Asia, Vol. III, Plates CXXVII 載其在 試略證論之: 南朝雖併於北朝,此納布代租之制仍遺存於江南諸州, 乃漸推廣 施行, 至玄宗開 元二十五年中央政府以之編入令典 殆為地 遂成為 方一隅

tery所發見之布二端,其一端之文為:

婺州信安縣顯德鄉梅山里祝伯亮租布

一端。

光宅元年十一月日。

寅恪案:此乃代租之布, 故謂之租布。考婺州在唐代為江南道轄地,此即開元二十五年新令所

語

其江南諸州租並迴造納布

之明證。 不過其事已於武后時即有之矣。武則天世東北邊疆屢有戰事,顏魯公文集附載殷

時清河郡寄客李華(寅恪案:通鑑考異依舊傳作萼)爲郡人來乞師於公曰:「國家舊制江淮

撰行狀(參全唐文伍壹肆)略云:

郡租布貯於清河, 河北 租調絹七十餘萬, 以備北軍, 當郡綵綾十餘萬, 累年稅錢三十餘萬, 爲日久矣。 相傳[謂]之天下北庫,今所貯者有江東布三百餘 倉糧三十萬, 討 默啜

甲仗藏於庫内,五十餘萬。」

疑即 述李萼之言作 租布及殷亮所述之言, 亮之租布即當日 寅恪案:李萼所謂國家舊制為日已久,未能確定其時代,然其言江淮租布與討默啜甲仗聯文, ;武后時事。蓋中央亞細亞發見之光宅元年婺州租布, 江東租布遺傳於今日者耳。又租布成一名詞,乃代租之布之義,觀於祝伯亮之 俱可證知,而通鑑貳壹柒唐紀叁叁至德元載三月條司馬君實紀此事, 其地域時代俱與萼言符合, 故此祝伯 其

文作「江淮租布」,為得其真也。 殊為含混,失其本意,轉不如極喜更易舊文之宋子京,其於新唐書壹伍叁額真卿傳仍依殷亮原 國家平日聚江淮河南錢帛於彼,以贍北軍,謂之天下北庫,今有布三百餘萬匹云云。

以知其為南朝之遺制耶?應之曰: 或問:今日租布實物之發現即迴造納布之制已行於武則天時江南諸州之明證 如 南齊書叁武帝紀云 南朝財政制度史籍所載雖甚簡略, 不易詳考, ,是固然矣, 但亦有可推知 然何

永明四年五月癸巳韶揚、南徐二州今年户租三分二取見布,

七 財 政 一分取錢, 來歲以後遠近諸州

輸錢處並減布直,匹准四百,依舊折半,以爲永制。

问書肆拾竟陵王子良傳云:

韶折租布二分取錢。


此 子欲解 亦 卷 即南 日 所 折納布 釋, 紀同 朝化者是也 以免枝 是事 租若折 絶無 蔓。 納布 但武 H 疑 帝紀 即是租布, 而 其 明 所言錢布之比例似有矛盾, 又納錢一事亦別 言户 租, 亦即迴造納布, 蕭子良傳則 謂之折 此 所謂 租 唐代 布 制 由 度之江 此 推 成問題 南 斷 地 方化 租 可 本章 折 納

附記 後於 仁井田陞氏吐魯番發見之唐代庸調布及租 此章作於一九四〇年春季,其年夏季付商務印書館印刷,久未出版,至一九四三年 春 季 著者始 此, 以免誤會。 於桂林廣西大學 圖書館得見一 一布一文,與此章所論略同。 九四〇年出版之東方學報第壹 特附記歲月先 壹卷第 壹冊

皇轉徙, 總而言之,二代之制度因時間與地域參錯綜合之關係,遂得演進,臻於美備,徵諸史籍, 強於憂患疾病之中, 象明顯, 定本及不得已而著書之意云爾。 多可推尋,决非偶然或突然所致者也。寅恪自惟學識本至淺陋,年來復遭際艱危, 往日讀史筆記及鳩集之資料等悉已散失,然今以隨順世緣故,不能不有所撰述, ,極為簡略,僅稍舉例,以闡説隋唐二代制度之全體因革要點與局部發展歷程而已。 姑就 一時理解記憶之所及,草率寫成此書。命之曰稿者, 一九四〇年四月陳寅恪書於昆明青園學舍, 時大病初愈也。 所以見不敢視為 其跡 乃勉

唐代政治史述論 稿

唐質題寫




自

中也。儻承通識君子不誤會創草茲稿之本旨, 欲令初學之讀通鑑者得此參考, 或可有所啟發, 於政治史類, 寅恪嘗草隋唐制 未能涉及。 而資治通鑑一書, 茲稿所言則以唐代之政治史為範圍, 度淵源略論稿, 尤為空前傑作。今草茲稿, 於李唐一代法制諸端,妄有所論述。至於政治史事,以限於體 而糾正其譌謬,何幸如之! 原不敢謂有唐一代政治史之綱要, 蓋所以補前稿之未備也。 可謂不自量之至!然區 。夫吾國舊史多屬 悉在此一 區之意, 僅

壬午七夕陳寅恪書於桂林良豐雁山別墅。

下篇	中篇	上篇
外族盛衰之連環性及外患與内政之關係	政治革命及黨派分野	統治階級之氏族及其升降
=	三六	八三



朱子語類壹叁陸歷代類叁云:

朱子之語頗為簡略,其意未能詳知。然即此簡略之語句亦含有種族及文化二問題,而此 唐源流出於夷狄,故閨門失禮之事不以爲異。

實李唐 之氏族問題,然後再推及其他統治階級之種族及文化問 代史事關鍵之所在, 治唐史者不可忽視者也。茲請先論唐代三百年統治階級中心皇室 題

若以女系母統言之, 唐代創業及初期君主, 高宗之母為長孫氏,皆是胡種,而非漢族。故李唐皇室之女系母統雜有胡族血胤 如高祖之母 為獨 孤氏, 太宗之母為竇氏,

即紇

豆

二問題

世所共

知,不待闡述,茲所論者專以男系父統之氏族為範圍也。

出自李唐皇室自撰之譜牒, 唐之皇室本有自撰之譜牒,原書今不可見。然如册府元龜及兩唐書等唐皇室先世淵源之記載固 唐室自叙其家世之著述, 復取其他史料互相參證, 即唐太宗御撰之晉書亦唐皇室自述其氏族淵源之要籍。 以討論此問題焉。 故茲依據此

類

壹佰序傳及晉書捌柒涼武昭王傳等書者,皆不及新唐書柒拾上宗室世系表所載之詳備,今即依 李唐世系之紀述,其見於册府元龜壹帝王部帝系門、舊唐書壹高祖紀、新唐書壹高祖紀、 北史

此表與其他史料討論之。表云:

德真。三子:長曰起頭,長安侯。生達摩,後周羽林監太子洗馬長安縣伯。次曰太祖 高祖紀云:「率豪傑鎮武川,因家焉。」新唐書壹高祖紀同)。生懿祖光皇帝,諱天賜,字 都所陷。後魏安南將軍豫州刺史,生獻祖宣皇帝諱熙,字孟良,後魏金門鎮將(舊唐書壹 字景順,以國亡奔宋,爲汝南太守。後魏克豫州,以地歸之,拜恒農太守,復爲宋將薛安 (虎),次曰乞豆。 [李] 歆字士業,西涼後主。八子:勗、紹、重耳、弘之、崇明、崇産、崇庸、 崇祐。 重耳

此 其 為西涼李暠之正支後裔一事以外,尚有七事, 表所載必出唐室自述其宗系之舊文。茲就其所紀李重耳、 條列於下: 李熙父子事實,分析其内容,

- (一)其氏爲李。
- 二)父爲宋汝南太守。
- 三)後魏克豫州,父以地歸之。
- (四)父爲後魏恒農太守。

(五)父爲宋將薛安都所陷,即所擒。

(六)父爲後魏安南將軍豫州刺史。

(七)子爲後魏金門鎮將。

考宋書伍文帝紀云:

郭道隱委守走。索虜攻懸瓠城,行汝南郡事陳憲拒之。 [元嘉]二十七年二月辛已索虜寇汝南諸郡,陳、南頓二郡太守鄭琨,汝陽、潁川二郡太守

文同書柒貳南平穆王樂傳云: 工

又同書柒柒柳元景傳略云: 索虜大帥拓拔燾南侵陳穎,遂圍懸瓠城,太守陳憲保城自固。

先登,生禽李初古拔父子二人。(中略)。殿中將軍鄧盛、幢主劉驂亂使人入荒田,招宜陽 古拔嬰城自固,法起、安都、方平諸軍鼓譟以陵城。(中略)。安都軍副譚金、薛係孝率衆 都、略陽太守龐法起入盧氏。(中略)。[閏]十月法起、安都、方平諸軍入盧氏。(中略)。 人劉寬糾,率合義徒二千餘人,共攻金門陽,屠之。殺戍主李買得,古拔子也,爲虜永昌 法起諸軍進次方伯自,去弘農城五里。(中略)。諸軍造攻具, [元嘉]二十七年八月[隨王]誕遣振威將軍尹顯祖出貲谷,奮武將軍魯方平、建武將軍薛安 進兵城下。偽弘農太守李初

王長史, 勇冠戎類。永昌聞其死, 若失左右手。

又同書玖伍索虜傳略云:

郡口北屯汝陽。(中略)。太祖嘉憲固守, 韶曰:「右軍行參軍行汝南、新蔡二郡軍事陳憲 多。攻圍懸瓠城,城内戰士不滿千人。先是,汝南、新蔡二郡太守徐遵之去郡,南平王遣 左軍行參軍陳憲行郡事,憲嬰城固守。(中略)。燾遣從弟永昌王庫仁真步騎萬餘將所略六 帝紀作琨), 綏遠將軍汝南、 盡力捍衛, [元嘉]二十七年,燾自率步騎十萬寇汝南。(中略)。宣威將軍陳、 全城摧寇,忠敢之效宜加顯擢,可龍驤將軍汝南、新蔡二郡太守! 類川二郡太守郭道隱并棄城奔走。 虜掠抄淮西六郡, 南頓二郡太守鄭緄 殺戮甚

又魏書陸壹薛安都傳云:

遁。及世祖(拓拔燾)臨江,拔乃得還。 後自盧氏入寇弘農,執太守李拔等,遂逼陝城。時秦州刺史杜道生討安都, 仍執拔等南

魏書薛安都傳言:「執李拔等,仍執拔等南遁。及世祖臨江,拔乃得還」,則李初古拔當不止 據上引史實,則父稱李初古拔,子稱李買得,名雖類胡名,姓則為漢姓,其氏既為李,是與上 列第一條適合。李初古拔為弘農太守,弘農即恆農,後魏以避諱故改稱恆農,是與第四條適 李初古拔為宋將薛安都所擒, 是與第五條適合。 宋書柳元景傳言:「生擒李初古拔父子」,

先行 餘地。 祖紀等書 為宋汝南 一十七年。 至於 郡事 殆買 據宋 李熙為金門鎮 北 得 太守一事,徵諸上引史實, 李熙率 書柳 後以 當時前後宋之汝南太守其姓名皆可考知, 魏諸鎮設置之時代及其地望等問題則別 死 難 守城功擢補 豪傑鎮 元 以弟 景傳言: 將 武 或兄代領其職, 川因 李買得亦為金門隖戍 一李買得為永昌王 實官。 而 留 故依據時日先後 居之記 絕不可能。蓋既言:「為宋將薛安都所陷」, 其時 今不能 載, 一長史, 確知。 乃後來宇文泰所改造 主, 為一事, 地 永昌聞 排比 但册府元龜壹帝 郭道隱則棄城走,徐遵之則去郡,陳 理專 推計, 『其死, 名如是巧 非茲所討論者也。 實無李重耳可為宋汝南 若失左右手」, 同 王部帝系門 並非 亦可 事 實, 認 又第 則李氏 為與 及兩 俟後詳 一條 第 必在 唐 父子與 李 七 太守之 條 憲則 元 重 耳 滴

題 帝王部 魏之汝南太守所修改 可不 討論矣。 帝系門之文, 魏書薛安都傳言: 豫州 而成者也。 刺 史之上有「贈」字, 第六條之安南將軍豫州 「[安都]仍執[李]拔等南遁。 是豫 州 刺史乃後來追 刺 史當即與第 及世祖臨江 贈 二條有 之官 關 拔乃得還」, 故 於 檢册 此 不 府 成 元 是 問 龜

事

於元嘉

十七年三月,

繫李初古拔被擒事於元嘉二十七年閏十月,

地理接近及人事關係論,

李初古拔殆

於未被擒以

前曾隨

永

乃昌

永

Ŧ

歸

係密

切

可以

推

知。

宋書索虜傳又言:「永昌

王北屯汝陽」,考資治通鑑繫永昌王

而汝陽

縣本屬

汝南

郡屯

後

汝

陽

別

分為汝陽郡者,

故以時日先後、

屯

兵豫州之境,

因有汝南太守之授。然則此唐室譜牒所言之汝南太守實非宋之汝南太守,

李初古拔原有自北至南復自南還北一 耳之由北 奔南 又由南歸北耶?幸賴其與他種記載符合及矛盾,留一罅隙, 段因緣, 李唐自述先世故實, 竟或因此加以修改,以傅會 千載而後遂得

以

復次 侯景傳),天下後世傳為笑談。豈知李唐皇室先世之名字亦有與此略相類似者乎?又據魏 貳薛辯傳附長子初古拔傳(北史叁陸薛辯傳同)云: 魏書薛安都傳之李拔即宋書柳元景傳李初古拔之消稱及雅名。 而 後代史官屬文,因施刪略。 南史捌拾侯景傳作羽乙周, 夫侯景稱帝, 正與此同例。 七世 蓋胡人名字原是對音 |廟諱父祖之外皆王偉追造(見梁書南 梁書伍陸侯景傳 故成繁鄙 異於華 載 景之祖 史 夏

. 書叁貳高湖傳亦附載高各拔之名。然則初古拔或車輅拔乃當日通常胡名, 長子初古拔, ,一曰車輅拔(北史輅作穀),本名洪祚,世祖賜名。

頗疑李初古拔如其

總而言之, 時薛洪祚之例 前所列之七條,第一、第四、第五、第七四條之中,李重耳父子事實皆與 亦本有漢名 特以胡名著稱於史耳 、李初古拔

不屬於南, 父子事實適合。 第五條既言:「為宋將薛安都所陷」,則元嘉二十七年南北交兵之際李氏父子必屬 否則何得謂為宋將所擒?故今易原文之劉宋為後魏,則第二、第三條之事實不獨不 第六條乃第二條之附屬, 無獨立性質,可不別論。第二條、第三 條實 於北 互相 而 關

之事。故今假定李唐為李初古拔之後裔, 與其他諸條相反, 安都」之姓名專名、「弘農」「金門」之地理專名, 而且與之相成。況其他諸條中涵有「元嘉二十七年」一定之時間、「李氏」「薛 或不至甚穿鑿武斷也。 而竟能兩相符應, 天地之間似無如此 偶然巧值

抑更有可論者,據唐會要壹帝號條上云:

獻祖宣皇帝諱熙(涼武昭王暠曾孫,嗣涼王歆孫,弘農太守重耳之子也)。武德元年六月二十二 日追尊爲宣簡公,咸亨五年八月十五日追尊宣皇帝,廟號獻祖,葬建初陵(在趙州昭慶縣界,

儀鳳二年五〔?〕月一日追封爲建昌陵,開元二十八年七月十八日韶改爲建初陵)。

懿祖光皇帝諱天賜(宣皇帝長子)。武德元年六月十二日追尊懿王,咸亨五年八月十五 廟號懿祖,葬啓運陵(在趙州昭慶縣界,儀鳳二年三〔?〕月一日追封爲延光

日追

陵,開元二十八年七月十八日韶改爲啓運陵)。

元和郡縣圖志壹柒(參閱舊唐書叁玖地理志,及新唐書叁玖地理志趙州昭慶縣條):

皇十三代祖宣皇帝建初陵。 昭慶縣, 本漢廣阿縣, 屬鉅 高四丈, 鹿郡。 週迴八十丈。

皇十二代祖光皇帝啓運陵。高四丈, 週迴六十步。 二陵共坐, 週迴一百五十六步。

在縣西

南二十里。

册府元龜壹帝王部帝系門略云:

隴西公;周受禪,襲封唐國公。高祖即元皇帝之世子,母曰元貞皇后,七歲襲封唐國公, 生天賜, 仕魏爲幢主, 史。生熙, 唐高祖神堯皇帝姓李氏,隴西狄道人。其先出自李暠,是爲涼武昭王,薨,子歆嗣位,爲 沮渠蒙遜所滅。歆子重耳奔於江南,仕宋爲汝南郡守,復歸於魏,拜弘農太守,贈豫州刺 録佐命功,居第一,追封唐國公。 起家金門鎮將。後以良家子鎮於武川,都督軍戎百姓之務,終於位, 大統時贈司空。 生世祖元皇帝昞,在位十七年, 生太祖景皇帝虎 封趙郡公, 徙封隴西公; 封汝陽縣伯 周受魏

義寧二年受隋禪。

文相参校 院歷史語言研究所藏有拓本,頗殘闕不可讀。茲取與黃彭年等修畿輔通志壹柒肆古蹟略 今河北省隆平縣尚存唐光業寺碑,碑文為開元十三年宣義郎前行象城縣尉楊晉所撰,中央研究 而節録其最有關之數語於下: 所載碑

略)。詞曰:維王桑梓,本際城池。(下略)。 皇祖懿王謹追上尊號,)。皇祖瀛州刺史宣簡公謹追上尊號, 諡光皇帝, 皇祖妣妃賈氏謹追上尊號, 諡光懿皇后。(中 諡宣皇帝, 皇祖妣夫人張氏追上尊號,

州 據魏書壹佰陸上地形志南趙郡廣阿縣條、隋書叁拾地理志趙郡大陸縣條及元和郡縣圖志壹柒趙 代所葬之地 案:李熙、天賜父子共塋而葬,即族葬之一證。光業寺碑 李虎之封趙郡公當即由於此也。又漢書貳捌地理志載中 南 昭慶縣條等, 趙郡 廣阿縣即李氏父子葬地復有堯臺。 即其家世居住之地, 知李氏父子葬地舊屬鉅 絶無疑義, 鹿郡, 與山 李虎 而唐皇室自稱其祖留居武川之説可不攻自破矣。 死後, 東著姓趙郡李氏居住之舊常山郡壤地鄰接 追封唐國公, Ш 國唐縣有堯山, 頌詞復有「維王桑梓」之語, 蓋止 取義 魏書壹佰陸上 於中 Щ 則李氏累 鉅 地 鹿等 又

以爲天意。 初,帝奉韶爲太原道安撫大使,帝以太原黎庶陶唐舊民, 奉使安撫不踰本封, 因私喜此行

並非如通常廣義兼該太原而言也。 至大唐創業起居注所云:

地

所流傳之放勳遺蹟,

也。 則為後來依附通常廣義之解釋, 和郡縣圖 然則李 志壹伍 唐豈真出於趙郡耶?若果為趙郡李氏, 殊與周初追封李虎為唐國公時暗示其與趙郡相關之本旨不同 是亦華夏名家, 又何必假稱出於隴西耶?考

开州

堯山縣, 本曰柏人, 春秋時晉邑,戰國時屬趙, 秦滅趙,屬鉅鹿郡,後魏改「人」爲「仁」,

天寶元年改爲堯山縣。

上篇

統治階級之氏族及其升降

九

又同書壹柒云:

平棘縣,本春秋時晉棘蒲邑,漢初爲棘蒲,後改爲平棘也,屬常山

李左車墓在縣西南七里。

東,南祖居巷之南,西祖居巷之西,亦曰三祖宅巷也。三祖李氏亦有地屬高邑縣。

趙郡李氏舊宅在縣南二十里,即後魏以來山東舊族也,亦謂之三巷李家云。東祖居巷之

本趙公子元之封邑,漢於此置元氏縣,屬常山郡,西漢常山太守皆理於元氏。 在縣西北十五里,即後魏車騎大將軍陝定二州刺史尚書令司徒公趙郡李徽伯之舊

柏鄉縣,本春秋時晉鄗邑之地,漢以爲縣,屬常山郡,後漢改曰高邑,屬常山國,齊天保

七年移高邑縣於漢房子縣東北界,今高邑縣是也。

高邑縣故城在縣北二十一里,本漢鄗縣地也。

本六國時趙房子之地,漢以爲縣,屬常山郡。

本漢鄗邑縣之地, 屬常山郡。

百陵崗

在縣東十里,即趙郡李氏之别業於此崗下也,崗上亦有李氏塋冢甚多。

昭慶縣,本漢廣阿縣,屬鉅鹿郡。

皇十三代祖宣皇帝建初陵。

說起見,特重出其概略於此。 皇十二代 祖光皇帝啓運陵, 一陵共坐, 在縣西南二十里。(昭慶縣條前已引及, 爲便於解

傳末附 顯著支派當時之居地可以推知也。 地域核之 元 和 郡縣圖志著者李吉 載 趙郡李氏世系 則趙郡李氏其顯著支派所遺留之故蹟,俱不出舊常山郡之範圍。 .甫出於趙郡李氏,故關於其宗族之先塋舊宅皆詳載之,若一 一節(新唐書柒貳宰相世系表趙郡李氏條及鄧名世古今姓氏書辨證 但其衰微支派則亦有居舊鉅 鹿郡故疆者, 考北 據此 史叁叁李孝伯 取其分布之 則 趙 郡

趙王倫之難, 徙居常山。楷子輯, 輯子慎、 敦, 居柏仁, 子孫甚微。

支,其徙居柏仁之時代雖未能確定,然李楷避西晉趙王倫之難,下數至其孫慎及敦,僅有一 支之子孫, 宋齊之世 則李慎 廣阿二縣,後魏時俱屬南趙郡,土壤鄰接, 故以地域鄰接及時 或者雖不與趙郡李氏之居柏仁者同族 李敦徙居柏仁,約在江左東晉之時。李熙父子俱葬於廣阿,計其生時亦約當 代先後二者之關係綜合推論, 但以同姓一 實可視為一地域。趙 頗 姓 疑 李唐先世本為趙 同 居一地之故, 郡李氏 郡李氏柏仁 子孫甚微之一 遂因緣攀附 南朝

料,依常識之判斷,李唐先世若非趙郡李氏之「破落户」, 自託於趙郡之高門, 代之官書,其紀述皇室淵源間亦保存原來真實之事蹟,但其大部盡屬後人諱飾誇誕之語,治 衡以南北朝庶姓冒稱士族之慣例, 殊為可能之事。 即是趙郡李氏之「假冒牌」。至於有唐 總而言之, 據可信之材

史者自不應漫無辨別, 遽爾全部信從也。

又魏書玖玖私署涼王李暠傳本不載重耳南奔始末,傳世之十六國春秋纂録陸西凉録亦無其事。 修晉書更不足辨論矣。 今敦煌本之十六國春秋殘卷惜未得見,不知與此有關否?至於偽本十六國春秋載重耳事採自唐 而湯球之十六國春秋輯補轉取唐修晉書之涼武昭王傳添此一段蛇足(見湯書叙例 殊為無識。

復次, 周書肆明帝紀(北史玖明帝紀同)云:

二年三月庚申韶曰:「三十六國九十九姓, 自魏氏南徙, 咸稱河南之民。今周室既都關中,

宜改稱京兆人。」

隋書叁叁經籍志史部譜序篇序云:

姓;及周太祖入關,諸姓子孫有功者,並令爲其宗長, 後魏遷洛, 部落大人者,並爲河南洛陽人。其中國士人則第其門閥, 有八氏 十姓, 咸出帝族;又有三十六族,則諸國之從魏者;九十二(九?)姓世 仍撰譜録, 有四海大姓、郡姓、州姓、 紀其所承, 又以關内諸

玖周本紀上)後亦四年,故從入關之遷洛諸胡族其改京兆郡望當在有功諸漢將改關內郡望之後 據上引史文,嚴格解釋,則隋志之文自「後魏遷洛」至「並為河南洛陽人」止一節,專指胡人而 (公元五五八年)三月庚申詔書亦指胡人而言,明帝二年在魏孝武帝入關之年(公元五三四 一十四年, 其本末見於魏書壹壹叁官氏志等即魏孝文帝改胡姓為漢姓之事也。周書、 在西魏恭帝元年(公元五五四年)改有功諸將姓為胡姓(事見周書貳文帝紀下、 北史周 明帝 北 史

又隋志之文自「其中國士人」至「又以關內諸州為其本望」止一節,實專指漢人而言。然則李唐之 未嘗留意?抑別有其他較勝之説耶?此則深願求教於博識 謂「又以關內諸州為其本望」,豈非寅恪之假説得此史文而益證實耶?所不解者,昔人於此 稱西涼嫡裔 即所謂「並令為其宗長,仍撰譜牒, 紀其所承」,其改趙郡郡望為隴 通人也。 西 那望, 何以 即所

肆唐代祖宗忌日表等均同)云: 復次, 唐會要叁皇后條 (開元十三年光業寺碑文及巴黎圖書館藏敦煌寫本伯希和號第貳仟伍

宣皇帝(熙)皇后張氏。

光皇帝(天賜)皇后賈氏。

元皇帝(昞)皇后獨孤氏。

據此

張賈皆是漢姓, 其為漢族,

當無可

疑。

梁氏如梁禦之例,

雖有出自

胡族之嫌疑

(見周書

本是華夏, 故李虎妻梁氏在未能 大部分皆是漢族 北史伍玖梁禦傳, 其與胡夷混雜, 乃一較晚之事實也。 未可以其中有 確 切證明其氏族所出以前 又魏書壹壹叁官氏志云:「拔列氏後改為梁氏」),但梁氏本為漢 極少數出自胡族之故, 仍目之為漢族,似較妥慎。 遽概 括推定凡以梁為氏者皆屬 然則李唐血統其 胡族也。

茲依據上述資料,作一李唐皇室血統世系表,起自李熙,迄於世民,以備參考。至李重耳則疑

本無其人, 或是李初古拔之化身,

確知為胡族者, 標以 故不列入,以示闕疑之意。凡女統確知為漢族者, 符號; 雖有胡族嫌疑, 但在未發見確證, 仍可認為漢族者 標以

則 標以……符號

李 張 熙 氏 天 晋 賜 氏 虎 梁: 氏 獨孤氏 昞 寶氏 淵 長孫氏 世 民

独 依 歷 據上 引 實 資料 不 限 及其 於李 解 唐皇 釋, 室 再 將 族 李唐 凡多 世 「系先後改易之歷程及胡漢文化問題加 數 北 朝 隋唐 統治階級之家 ,亦莫不如是 以説明。 斯實 此 世 中 系 改 威

史上

大問

題

亦史學

中千載待發

而未

發之

覆也

得中 胡 留 北 宣 出 武 其 史 (見北齊書壹神武紀上、 別拾: 或 以成 期之重要事 卑 八年)四月十三日河陰之大屠殺, 民族對於漢 本來之胡化 著之例 西 孝明之世 拓 其霸 北 魏 拔 部之地 也。 書捌叁上 部 業。 落 一變也。 此 此民族以饑饉及虐政之故激成 化 侵 其他之小部分, 由賀拔岳 之反動亦愈甚, 而 漢化 入中國 則已達頂點, 成一 外戚 不為洛都漢化之所浸染。 六鎮鮮卑及胡 政策 北朝東西並峙之局, 傳賀 統治 北史陸齊本紀上、隋唐貳肆食貨志)。 其 (子孫遵行不替, 及魏孝文帝遷都洛陽, 八納傳 北部之後 而逐 卒釀成六鎮之叛 漸 化漢族 北 遂為胡人及胡化民族反對漢化之公開 史 腐化矣。然同時邊塞六鎮之鮮卑及胡 玖捌魏書壹佰 即 既保持 開 宇文泰率領西徙, 故中央政權所在之洛陽其漢化 叛亂 此治史者所習知也。 始 施 胡部特 闌, 行 南向 漢 幺 化 爾朱部 遷徙, 性 一高 政 策 車 而 落乘 傳 其 割 故歡之武 不 如解 及 據 大部 然宇文氏 漸 機 (魏書 染漢 關 其漢化 加 散 隴 分輾轉 起。 壹壹 部 力遂 化 落 只分有 表示, 亦 愈深, 化之漢族 程度更為增 至武 幺 同 能 無敵 移 則 一官氏 於 抗 為 泰元年(公元 編户之類 亦中古 高 少數之六鎮 於 則邊塞六鎮 衡 志 善 高 中 歡 等), 統 戰 則 原 高 之民 史劃 仍 見 保 其 至

自 僅 復局 由 一二君 促 於 關 主之賢愚及諸臣材不材之所致 隴 隅之地, 終能併吞分有多數六 蓋必別 鎮 民族 有 一全部系統之政策, 及雄 據山 東富 饒區 為此 域之高 東西 齊, 16 其故

即

周

齊

兩

朝

勝

敗興亡决定之主

因

可以

斷

言也

朔所 宇文 之薰習 故 制 離之集 之府 必別 制 此 度 及宇文泰之徹底, 在 別撰譜牒 兵 淵 新 魏 庫 覓 取 得神 始能 領少 制 源 塗 江 孝文皆 略論 及屬 徑 左 匪 塗 即 州 獨 徑 蕭 數 内安反側 知此 文化 物質 氏共成 稿, 於官制之周官皆是其事。 就 西 紀其所承(見前引隋書叁叁經籍志譜序篇序), 融合 遷之胡 其 茲不贅論。 意者 割 IF. F 故仍 其 據之 統 應處同 鼎峙 外禦強鄰。 所割 人及胡化 所 土 不忘南侵也), 但秦魏俱欲以魏晉以來之漢化籠罩全部 在之江 據 之局 一利害之環境, 依 此字文泰之新塗徑今姑假名之為「關中 關 附 隴 漢 東而 古 族 而精神文化方面 區 而其 昔 域 割 代之不可, 其改易隨賀拔 内之鮮卑六 據 物 不復以 稱為漢化 質 弱 即精神上亦必具 隴 及精 Ш 隅之地, 神 其事 發源 東江左為漢化之中心也, 尤為融合複雜民族 鎮民族 一者 岳等西遷有功漢將之山 之 既 力量 地 不 欲與 能 又以諸將功高者繼塞外鮮卑部 (魏 同 及其他胡 之憑藉, 成 出 財 孝文之遷都 複 一淵 富 僅餘一字文泰 雜 兵 本位政策 、強之山 民 之要道。 漢 源之信仰 俱遠 族, 土著之人為一不可 洛陽 不如 東郡 其 故不 東 詳 在 高 其 之新 望 即 具 得 此 同 氏 意 東 為 於 不 受 及神 凡 以 亦 南 扭 前 屬 塗 项 如 文化 於兵 於南 内 州 Œ Thu

(見周書貳文帝紀下及北史玖周本紀上西魏恭帝元年條等),亦是施行「關中本位政策」之例

如欲 解 决李唐氏族問題當於此中求之也

帝專 趙郡 郡 111 氏 制度 望為關 之兵卒 概括言之, 恭帝 西 年(公元五五四年)復魏孝文帝所改鮮卑人之胡姓及賜諸漢將有 其 唐 淵 郡望為隴西,偽託西涼李暠之嫡裔及稱家於武 郡望及冒託 列八大柱國之李弼一族, 一階段之所改, 亦從其 元年韶 則恐尚 政 源 内 郡 略 一與六鎮有 宇文泰改易氏族之舉, 論 望, 於大象二年(公元五八〇年)十二月癸亥迴改胡姓復為漢姓 稿 主 以諸將之有功者繼 在 兵制章 以斷 西涼 將之胡 其 關 後 而多數氏族仍停留於第一階段之中,此 嫡 絶 裔也。 見前 姓 其鄉 即李熙留 茲不 逕取 引周 土之思(初止改易漢人之山東郡望, 贅 周書壹伍李弼傳、 職是之故 家武 承 論 鮮卑部落之制以 書肆明帝紀及北史玖周本紀上明帝二年三月 鮮卑三十六大部落及九十九小部落之後,凡改胡姓諸 可分先後二階段:第一 0 川之例, 李唐之得賜姓大野, 北朝、 以鞏固其六鎮團體之情感。 舊唐書伍叁李密傳(密為弼之曾孫 隋唐史料中諸人之籍貫往往紛歧, 治 川等,均是此階段中所為也。第 軍 此 階段 即 即 李唐所以 府 在此階段中 則改易西遷關隴漢人中之山 兵制 其改易胡人之河 功者以胡姓之前 初期之主旨(詳見 雖 去大野之胡 其 所為也。 結 此階段當 果只 庚申 作 南 詔 如與 凡李 姓 至 郡望為京 到 在 一階 書), 壹叁拾李 抽 周 兀 迴 著隋 將所 李 但 復 末 段 魏 唐 隋 恭帝 東郡 唐 仍 宇 即 改 並 稱 統 唐 西 其 附 兆

泌傳 孫密傳、 (泌 為弼之六代孫),及新唐書柴貳上宰相世系表俱以為遼東襄平人, 文苑英華玖肆捌魏徵撰李密墓誌銘則以為隴西成紀人。蓋公私著述叙及籍貫或僅 而北史陸拾李 據

潰 第 仍舊 階段立言, 施 行關 中 或逕依本來未改者為説 本位政策」, 其統 治階級自不改其 ,斯其所以彼此差異也。 歧視山東人之觀念(見 但隋 唐 兩 舊唐 朝 繼 書柒捌 承宇文氏之

諸州 今日, 為弘農楊震長子牧之後。 唐書壹 為其本望」者。以非本篇範圍,故不詳論, 治史者竟無 佰 肆 張 行成傳)。 一不為其所欺, 故隋唐皇 此即隋書經籍志所謂「令為其宗長, 室亦依舊自稱弘農 誠可歎也(據新唐書柒壹 讀者可以依據有關史料類 楊 震 下宰相世系表楊氏 隴西李 仍撰譜牒, 暠之嫡 (推也)。 裔 紀其所 偽冒 條 承 隋 相 又以 皇 傳 室 迄於 關 自 稱 内

復次 即目為胡人, ,漢人與胡人之分別,在北朝時代文化較 其血統如何, 在所不論。 茲舉 血統尤為重要。凡漢化之人即目為漢人,胡化之 例以證明之:

北齊書貳肆杜弼傳(北史伍伍杜弼傳同)云:

顯 祖 高洋)曹問弼云:「治國當用何人?」對曰:「鮮卑車 會須用中國人。 顯 祖以

譏己。

至於其所漸染者則為胡化,而非漢化。杜弼斥鮮卑, 母 系血統屬於何種,但其自稱及同時之人均以為其家世出自渤海 而高洋以為譏己, 固當 日 華

受胡化者,即自命為胡人也。

又北史貳捌源賀傳(參考魏書肆壹源賀傳、北齊書伍拾恩倖傳高阿那肱傳,至隋書陸陸源師傳

删去「漢兒」二字,殊失當時語意矣)略云:

拓拔部 太武素聞其名, 源賀,西平樂都人,私署河西王秃髮傉檀之子也。傉檀爲乞伏熾盤所滅, 一語異譯, 謂曰:「卿與朕同源, 故拓拔燾謂之同源也。) 因事分姓,今可爲源氏。」(寅恪案:鮮卑秃髮部即 賀自樂都奔魏

不行。 禮當雩祭郊壇,非謂真龍別有所降。」阿那肱忿然作色曰:「漢兒多事,强知星宿。」祭事 (玄孫)師仕齊爲尚書左外兵郎中,又攝祠部。後屬孟夏,以龍見請雩。時高阿那肱爲録尚 ず, 謂爲真龍出見, 大驚喜, 問龍所在,云作何顏色。師整容云:「此是龍星初見, 依

又此 之分別,不論其血統,只視其所受之教化為漢抑為胡而定之確證,誠可謂 夫源師乃鮮卑禿髮氏之後裔,明是胡人無疑,而高阿那肱竟目之為漢兒,此為北朝漢人、胡人 點為治 吾國中古史最要關鍵,若不明乎此,必致無謂之糾紛。資治通鑑壹柒壹陳宣帝太建 有教無類」矣。

 \mathcal{F}_{1} 亦紀此事,胡注云:

源本出於鮮卑秃髮, 高氏生長於鮮卑,自命爲鮮卑,未嘗以爲諱,鮮卑遂自謂貴種,率

華人爲漢兒, 率侮詬之。 諸源世仕魏朝貴顯, 習知典禮, 遂有雩祭之請, 冀以 取重 乃

隋 政策」最主要之府兵制, 大抵 梅 治之變遷 及唐初將相舊家之政權尊位遂不得不為此 預關中團體之故, 雖創於隋代,然當日人民致身通顯之塗徑並不必由此。及武后柄政,大崇文章之選,破格用 磵之説 皇室者 以 於是進士之科為全國干進者競趨之鵠的。當時山東、 中央政權之後, 承 取 西 魏 固 詬 是, 實亦社會之革 唐代三百年統治之中 北周 通鑑詳書之,又一嘅也 又其言別有所感, 及隋以來之世業, 致遭屏 逐漸破壞傳統之「關中本位政策」,以遂其創業垂統之野 即於此時開始崩潰,而社會階級亦在此際起一升降之變動。 命。 抑者, 若依此義言, 心也, 亦因此 然於北朝漢胡 即宇文泰「關中本位政策」下所結集團體之後 自高 政治變革之際會, 祖、太宗創業至高宗統御之前期, 新興階級所攘奪替代。 則武周之代李唐較李 種族文化之問題似猶不免未達 江左人民之中, 得以上 唐之代楊隋其關係 升朝 故武周之代 列, 有雖工於為文, 而西 心 李 其將 間也。 唐 魏 裔也。 故關 相文 蓋進 人羣 不僅 北 中 自 武 周 為政 但以 士之 本位 武 大臣

宗之世,遂完全破壞無遺。而天寶安史亂後又別產生一新世局,與前此迥異矣。夫「關中本位 統治時 期不久,旋復為唐,然其開始改變「關中本位政策」之趨勢,仍繼續進行。 迄至 唐玄

武

周

尤為重

大也。

成為互不關涉之集團,其統治階級氏族之不同類更無待言矣。蓋安史之霸業雖俱失敗,而其部 與一部分之地方藩鎮, 政策」既不能維持,則統治之社會階級亦必有變遷。此變遷可分中央及藩鎮 將及所統之民衆依舊保持其勢力, 與中央政府相抗, 須有此空間之區別者, 已截然劃為二不同之區域,非僅政治軍事不能統一,即社會文化 因唐代自安史亂後, 名義上雖或保持其一統之外貌 , 以迄於唐室之滅亡, 約經一百五十年之 實際上則中 兩方叙述。 其所以 -央政府 亦完全

又舊唐書壹肆 雖號 稱 朝, 憲宗紀上(參考通鑑貳叁柒元和二年此條胡注及唐會要陸叁修撰條 實成為二國。 史家述此,不得不分之為二, 其理由甚明也。

十五,縣一千四百五十三,户二百四十四萬二百五十四,其鳳翔、鄜坊、邠寧、振武、 元 又在常役之外。 和二年十二月己卯, 銀夏、靈鹽、河東、易定、魏博、鎮冀、 合四十九州, 不申户口。每歲賦入倚辦止於浙江東西、 萬餘人 比量 吉甫都纂其事, 天寶士馬, 百四十四萬户。 史官李吉甫撰元和國計簿, 成書十卷。 則三分加一, 比量天寶供税之户則四分有 率以兩户資一 宣歙、 范陽、 總計天下方鎮凡四十八,管州府二百九 淮南、 滄景、 兵,其他水旱所損, 江西、 淮西、淄青十五道凡七十一 一, 天下兵戎仰給縣官者 鄂岳、福建、湖南等八 徵科發斂 涇

问書壹玖下僖宗紀略云:·

陽、洛陽, [光啓元年三月] 丁卯車駕[自蜀]至京師, 十而已。 皆自擅 朱瑄 據 孟方立據邢洛,李克用據太原、 國命所能制者, 兵 賦, 郭齊、 迭相吞噬, 曹濮, 河西、山南、 王敬武據淄青, 朝廷不能制。 劍南、 上黨,朱全忠據汴滑,秦宗權據許蔡 時李昌符據鳳翔, 江淮轉運 高駢 嶺南四道數十州。 據淮南八州,秦彦據宜歙, 路絶, 兩河、 王重榮據蒲陝, 大約郡將自擅 江淮賦 不上供, 劉 諸葛爽據 漢 常 但歲 宏 時 據浙 賦 溥

帝國之形式 寅恪案:李吉甫所撰 河之交通 僅特 院賦取辦之地域大致無甚殊異。唐代自安史亂後,長安政權之得以繼續維持,除文化勢力 東南 及實質 而奉長安文化為中 八道財賦之供給。至黃巢之亂既將此東南區域之經濟幾全加破壞, 均於是告終矣。 元和國計總簿雖在元和初年, 心 仰東南財賦以存立之政治集團,遂不得不土崩瓦解。 然自安史亂後起,迄於唐亡,其所列中央政 復斷 絶汴路

藩侯廢置

,不自朝廷,

王業於是蕩然。

區域。凡自玄宗朝迄唐亡,一百五十年間身居內廷,實握政治及禁軍之權者皆屬此族,即閹寺 夫,大抵以文詞科舉進身者也;一為受漢化不深之蠻夷,或蠻夷化之漢人,故其人多出自邊荒 種人: 一為受高 在此奉長安文化為中心、恃東南財賦以存立集團之中,其統治階級為此集團所占據地域內之二 深文化之漢族,且多為武則天專政以後所提拔之新興階級,所謂 外廷之士大

進用。 議柒請許臺省長官舉薦狀及李相國論事集等)。及代宗大曆時常袞當國,非以辭賦登科者莫得 世,其名臣大抵為武后所獎用者(參考舊唐書壹叁玖陸贄傳、新唐書壹伍貳李絳傳、陸宣公奏 (則天專政破格用人後, 外廷之顯貴多為以文學特見拔擢之人。而玄宗御字, 自德宗以後,其宰相大抵皆由當日文章之士由翰林學士升任者也。 請舉史實以證之。 開元為極盛之

通典壹伍選舉典叁載沈既濟之言略云:

桀姦無良者或有焉, 射策,以取禄位,此行己立身之美者也。父教其子,兄教其弟,無所易業,大者登臺閣 觀聽希其風采, 小者任郡縣,資身奉家,各得其足,五尺童子耻不言文墨焉。其以進士爲士林華選,四方 史, 好雕蟲之藝, 辟無不以文章達, 初國家自顯慶以來, 或鈎摭隱匿, 嘲爲篇詠, 每歲得第之人不浹辰而周聞天下,故忠賢雋彦、韞才毓行者咸出於是。而 永隆中始以文章選士。及永淳之後太后君臨天下二十餘年, 因循日久寖以成風。至於開元、天寶之中,太平君子唯門調户選, 故是非相陵, 高宗聖躬多不康, 以列於道路,迭爲談訾, 毀稱相騰, 而武太后任事, 參決大政, 或扇結鈎黨, 無所不至焉。 私爲盟歃, 與天子並。 以取科第, 當時 太后頗涉文 而聲名 公卿百

據此,

可知進士之科雖設於隋代,而其特見尊重,以為全國人民出仕之唯一正途,

實始於唐高

進士條), 則稽之史實, 有所未合。其言不及沈氏之可信, 無待論也。 為進士之科「甲於貞觀」(唐摭言壹述進士上篇),及「進士科盛於貞觀永徽之際」(同書同卷散序 重與府兵制之破壞俱起於武后,成於玄宗。其時代之符合,決非偶然也。 宗之代,即武曌專政之時。及至玄宗,其局勢遂成凝定,迄於後代,因而不改。 茲不具論(見拙著隋唐制度淵源略論稿兵制章及玉海壹叁捌兵制叁所引鄴侯家傳)。 但以 事關府兵制度 故科舉制之崇 至王定保以

舊唐書壹壹玖常袞傳云:

尤排擯非辭賦登科者。

同書同卷崔祐甫傳云:

常衮當國,非以辭賦登科者莫得進用。

書肆叁職官志翰林院條略云:

F

用兵, 玄宗即位,張説、張九齡等召入禁中,謂之翰林待韶。四方進奏,中外表疏批答,或韶從 中書舍人例置學士六人, 宸翰所揮, 軍國多務, 深謀密韶皆從中出,尤擇名士爲翰林學士,得充選者,文士爲榮。亦如 亦資其檢討,謂之視草。故嘗簡當代士人,以備顧問。至德已後,天下 内擇年深德重者 一人爲承旨,所以獨承密命故也。德宗好文,尤

難其選,貞元已後爲學士承旨者,多至宰相焉。

憲宗章武皇帝以永貞元年即大位,始命鄭公(鄭絪)爲承旨學士,位在諸學士上。十七年間

由 鄭 至杜 (杜元穎)十一人,而九參大政。

(長慶集伍玖李留守相公(李絳)見過池上汎舟舉酒話及翰林舊事因成四韻以獻之詩 貢 元和六學士條

同時 六學士, 五相一漁翁。

據此 廢興轉移之大勢尤易明瞭也。 表及宰相世系表與列傳所載其 七八十年間逐漸轉移消滅宇文泰以來胡漢六鎮民族舊統治階級之結果。若取 可知唐代自安史亂後,其宰相大抵為以文學進身之人。此新興階級之崛起,乃武則天至 至此 人之家世籍貫及出身等互相參證 由文學科舉進身之新興階級與魏晉 一,於此三百年間 北朝以來傳統舊士族 外廷 士 新唐書宰相 大夫階

弱 則於論黨派時詳述之, 茲不涉及焉。

之宰相,俱供其指揮,由之進退, 唐代自玄宗後,政柄及君權漸轉入閹寺之手,終至皇位之繼承權歸其決定,而內朝之禁軍外廷 更無論矣。其詳當於中篇論政治革命及黨派分野時述之,茲

僅 略言其氏族 書貳拾下哀帝紀云: 所從出之一端於下:

二年六月丙申勃:福建每年進橄欖子, 雖嘉忠蓋,伏恐煩勞。今後只供進蠟面茶,其進橄欖子宜停! 此因屬豎出自閩中, 牽於嗜好之間, 逐成貢奉

新唐書貳佰柒宦者傳吐突承璀傳云:

顧況古詩(據全唐詩第拾函)云: 是時諸道歲進閹兒,號私白,閩嶺最多,後皆任事,當時謂閩爲中官區藪。咸通中杜宣猷 每歲時遣吏致祭其先,時號「敕使墓户」。宣猷卒用羣宦力,徙宣歙觀察使。

团一章。

团哀閩也。(原注: 囝音蹇。閩俗呼子爲囝,父爲郎罷。)

知,我罹其毒。神道無知,彼受其福。郎罷别囝,吾悔生汝。及汝既生,人勸不舉。不從 囝生閩方。閩吏得之,乃絶其陽。爲臧爲獲,致金滿屋。爲髠爲鉗,視如草木。天道無

宦寺多冒養父之姓,其籍貫史籍往往不載,然即就兩唐書宦官及宦者傳中涉及其出生地域或姓 人言,果獲是苦。囝别郎罷,心摧血下。隔地及天,及至黄泉,不得在郎罷前

氏稀異者觀之, 亦可知其梗概也。

舊唐書壹捌肆宦官傳

云

楊思勗本姓蘇,羅州石城人,爲內官楊氏所養,以閹從事內侍省。

高力士,潘州人,本姓馮,少閹,與同類金剛二人聖曆元年嶺南討擊使李千里進入宮。則 天嘉其點慧,令給事左右。後因小過, 撻而逐之。

内官高延福收爲假子, 延福出自武三思

家,力士遂往來三思第, 歲餘則天復召入禁中。

新 唐書貳佰柒宦者傳上云:

魚朝恩,瀘州瀘川人也,天寶末以品官給事黄門。

劉貞亮本俱氏,名文珍,冒所養宦父姓,故改焉。

吐突承璀, 閩人也, 以黄門值東宫。

循州興寧人,順宗時得侍東宫。

楊復光 閩人也,本喬氏,少養於內侍楊玄价家。

同書貳佰捌宦者傳下云:

田令孜,蜀人也,本陳氏,咸通時歷小馬坊使。

受漢化自甚淺薄,而宦官之姓氏又有不類漢姓者,故唐代閹寺中疑多是蠻族或蠻夷化之漢人也。 據此,可知唐代閹寺多出自今之四川、廣東、福建等省,在當時皆邊徼蠻夷區域。其地下級人民所

為中心之集團外,尚別有一河北藩鎮獨立之團體,其政治、軍事、財政等與長安中央政府實際 唐代中國疆土之內,自安史亂後,除擁護李氏皇室之區域,即以東南財富及漢化文化維持長安

上篇

舉仕 所在也。 古 一無隷 進為其安身立命之歸宿。 茲先舉二三顯著之例 屬之關係, 其民間社會亦未深受漢族文化之影響, 故論唐代河北藩鎮問題必於民族及文化二端 以見當時大唐帝國版圖以 内實有截然不同之二分域 即不以長安、 注意, 洛陽之周 方能 孔 然後 得其 名教 再推 及科 真 相

論其種族與統治階級之關係焉。

杜牧樊川集陸唐故范陽盧秀才墓誌云:

秀才

盧生名霈

字子中,

自天寶後

三代或仕

燕,

或

仕趙,

兩地

皆多良

田

畜

馬,

生年二十

未

涌 知 古有 人 E 周 公、 孔夫子 者, 擊毬 飲 酒 馬射走兔 語言習尚無非攻守戰鬥之事

典 肆 今田悦之徒並是庸璅,繁刑暴賦,唯恤軍戎,衣冠仕(士)人遇如奴虜。 [拾職官典末載杜佑建中時 所上省用議 (参新 唐書壹陸陸杜佑傳) 略

所習 時 此 内 漢化之中心在長安, 可 誦 以代表河北社會通常情態 野 以佐證 而 鄙 不得意之人 說 茲為闡 至 韓 明 長安集 以詩賦 退之不以董召南 至不得已時惟有北走河朔之 團與 舉 進士 其尚攻戰而不崇文教。質言之,即漸染胡化深而漢化淺也 河 北 一致身卿相為社會心理羣趨之鵠的。 集團 河北之行為然之意固 政治 文化對立之形勢起 途。 極明 昌黎集貳拾 顯 不 見, -待解 仍多 送董 故當日在長安文化區 説 寫 召 也。 南 之於下 遊河 文云 北 序乃 並 略 詮 域

,趙古稱多感慨悲歌之士。董生舉進士,

連不得志於有司,

懷抱

利器,

鬱鬱

適茲上,

吾知

其必有合也。董生勉乎哉!

外,則不易覓其他之途徑也。 據此 ,可知在長安文化統治下之士人,若舉進士不中,而欲致身功名之會者,舍北走河朔之

其文又云:

夫以子之不遇時, 苟慕義强仁者皆愛惜焉, 矧燕趙之士出乎其性者哉! 然吾嘗聞風俗與化

移易,吾惡知其今不異於古所云邪?聊以吾子之行卜之也,董生勉乎哉!

當日河北社會全是胡化,非復東漢、魏晉、北朝之舊。若究其所以然之故,恐不於民族遷移 據前引杜牧之范陽盧秀才墓誌「語言習尚無非攻守戰鬥」之句及此序「風俗與化移易」之語, 可知

其文又云:

事求之不得也,請俟後論之。

吾因子有所感矣,爲我弔望諸君之墓! 而觀於其市,復有昔時屠狗者乎? 爲我謝曰:「明 天子在上,可以出而仕矣!」

然則長安天子與河北鎮將為對立不同之二集團首領,觀此數語,即可知矣。

唐詩話貳、辛文房唐才子傳李益傳等)云: 又全唐詩第伍函李益小傳(參舊唐書壹叁柒新唐書貳佰叁文藝傳下李益傳、 唐詩紀事叁拾、 全

上篇 統治階級之氏族及其升降

濟辟 字君虞 爲從事。 姑臧人, 大曆四年登進士第, 嘗與濟詩, 有怨望語。 憲宗時召爲秘書少監集賢殿學士, 授鄭縣尉, 久不調, 益不得意。 自負 北 游 才 河 朔, 幽

考益之獻劉濟詩云:

草緑

燕州,

鶯聲引

獨

遊。

雁歸

天北畔,

春盡海

西

頭。

向

日花偏

落,

馳年

水自流。

所凌忽, 爲衆不容。 諫官舉幽州詩句, 降居散秩。

有地,不上望京樓。

此 是當日社會之常情,而非變態。然於此益 據 此 團體之統治階級, 又可 知雖已登進士第之李益以不得意之故猶去京洛, 其種族文化亦宜有不同之點在也。 見大唐帝國之後半 期其中 而北走范陽;則董召南之遊 含有兩 獨立 一敵視 之團 河北

ifij

染胡化 及其 固 他 檢新唐書之藩鎮傳 二點 為文 藩 鎮 與 化 與 胡 為其人之氏族本是胡 甚 中 人不異。 高 央政 區 轉變為一胡化地域?其故殊不易解。 府之問 域, 前者屬 雖經 並取 題 胡 於種族 其他有關諸傳之人其活動範 其核心 族之亂, 類, 實屬種 後者屬 而非漢族 然北 魏至隋其地之漢化仍未見甚衰減之相 族文化 於文化。 ; 為其人之氏族雖為漢族 之關 質言之, 茲就安史叛亂發源之地域及其時代先後 係也。 圍在 河朔或河朔以外者以相參 唐代安史亂後之世 夫河 北 之地 東漢 而 久 居 局 何以 曹 加 考, 凡河 魏 朔 西 朔 漸 則

、後果即 係綜合推計,設一假説,以俟更詳確之證明。即使此假説一時難以確定成立,但安史叛亂 河朔藩鎮之本質, 至少亦可因此明瞭也

割據 當玄宗文治 為敵者也。 廷之腐敗 河朔 考安禄山之種族在其同時人之著述及專紀其事之書中, 是固然矣;獨未注意安史之徒乃自成 與中央政府抗 :武功極盛之世,漁陽鼙鼓一鳴,) 演 唐室亦從此 不振, 而兩京不守。安禄山之霸業雖不成, 然其部將始終 以至覆亡。古今論此役者止歸咎於天寶政治宫 一系統最善戰之民族, 均稱為柘羯或羯胡 在當日軍 事上 末 來無與

舊唐書拾肅宗紀云:

Ш 壹貳拾郭子儀傳載建中二年德宗褒卹之韶有「羯胡作禍」,新唐書壹玖貳忠義傳張巡傳 是日(天寶十五載七月甲子)御靈武南門,下制曰:「乃者羯胡亂常, 拓羯千騎」之語, 但亦可爲旁證參考也。 至杜甫喜官軍已臨賊境二十韻詩所謂「拓羯渡臨洮」之拓羯, 京闕失守。」(舊唐書 雖非指安禄 亦有

又同書壹佰肆封常清傳略云:

古蹟之詩其「羯胡事主終無賴」之句,則不僅用梁侯景之古典(如梁書伍伍武陵王紀傳云:「羯胡 又顏魯公集陸康金吾碑目安禄山為羯胡,姚汝能安禄山事跡一書亦多羯胡之語,若杜 至葵園 常清使驍騎與柘羯逆戰, 殺賊數十百人。臨終時表曰:「昨者與羯胡接戰。 工部詠

叛渙」,即是一例),實兼取今事入之於詩也。

考玄奘西域記壹颯秣建國(即康國)條云:

兵馬强盛,多是赭羯之人,其性勇烈,視死如歸。

新 唐書貳貳壹下西域傳康國傳云:

本月氏人,始居祁連北昭武城, 爲突厥(寅恪案:突厥應作匈奴,唐會要玖玖康國條

誤也)所破,稍南依葱嶺,即有其地,枝庶分王: 曰安,曰曹,曰石,曰米, 其人土著役屬於突厥,先居祁連之北昭武城,爲匈奴所破。」宋子京蓋涉上文突厥之語致 曰何, 日火

又同書同卷安國傳云

尋, 曰戊地, 曰史,

世謂九姓,皆氏昭武。

募勇健者爲柘羯,柘羯猶中國言戰士也(寅恪案:上引西域記之文有「赭羯之人」一語,然 則赭羯乃種族之名,此云「猶中國言戰士」,若非宋景文誤會,即後來由專名引申爲公名

耳)。

又同 書同 卷石國傳云:

石或日柘支,

日柘折,

日赭時。

據此, 可知赭羯即柘羯之異譯,凡康安石等中亞月氏種人,皆以勇健善戰著聞者也。舊唐書貳

佰上安禄山傳云:

安禄山,營州柳城雜種胡人也。

舊書所謂 解種胡之確切界説尚待詳考, 但新唐書貳貳伍上逆臣傳安禄山傳云:

安禄山, 爲互市郎 營州柳城胡也, 本姓康, 母阿史德, 少孤,隨母嫁安延偃,乃冒姓安,通六蕃

卷天寶四載丁籍),故安禄山父系之為羯胡, 安、石等姓以羯為稱者(見歷史與地理雜誌第叁叁編第肆卷天寶十載丁籍及同書第肆壹編第肆 書貳貳伍上逆臣傳史思明傳云: 寅恪案:安禄山事跡上引郭子儀雪安思順疏,謂安禄山本姓康。今敦煌寫本天寶丁籍亦有康, 即中亞月氏種可無疑矣。至史思明之種族則新唐

史思明, 寧夷州突厥種, 與安禄山共鄉里, 通六蕃譯, 亦爲互市郎。

疑史思明非出中亞胡種者。然舊唐書貳佰安禄山傳云:

Ħ 書同卷史思明傳云 安禄山, 管州柳城雜種胡人也。(前已引, 兹爲論述便利起見, 特重及之。) 史思明,寧夷州突厥雜種胡人也。

又舊唐書壹佰肆哥舒翰傳(新唐書壹叁伍哥舒翰傳同)略云:

上篇

統治階級之氏族及其升降

父是胡, 母是突厥,公父是突厥,母是胡,與公族類同,何不相親乎?」 突騎施首領哥舒部落之裔也。 翰母尉遲氏, 于闐之族也。 [安禄山]謂翰曰:

史傳, 據此類史料 則知當時雜種胡人之稱實逕指昭武九姓月支種而言, 初視之,似當時所謂雜種胡人者即指混合血統胡族, 如新唐書貳壹柒上回鶻傳(參通 如哥舒翰等之例。 但更詳考

貳貳陸建中元年八月甲午張光晟殺突董條)云:

始回紇至中國, 常參以九姓胡, 往往留京師, 至千人, 居貲殖産甚厚。 酋長突董翳蜜施

所言與舊唐書壹貳柒張光晟傳云:

大小

梅録等還

國

裝橐係道。

者同是一事,而舊傳之所謂雜種胡即九姓胡, 建中元年迴紇突董、梅録領衆並雜種胡等自京師還國,輿載金帛相屬於道。 可為確證。 然則舊唐書之稱安禄山為雜種胡人

胡, 血 統之特徵。 故曰 實指其九姓胡而言, 「突厥雜種胡人」也。 至其以史為姓者, 又其目史思明為突厥雜種胡人者, 觀於史思明與安禄山俱以通六蕃語為互市郎 蓋從父系突厥姓阿史德或阿史那之渻稱, 殆以其父系為突厥 不必為母系昭武九姓 IE 是 具有中 而母 系為羯 亞胡 種

又考安史生長之地即營州,在開元之初已多中亞賈胡, 如舊唐書壹捌伍下良吏傳宋慶禮傳(新

之史也

唐書壹叁拾宋慶禮傳同)略云:

城,其後移於幽州東二百里漁陽城安置。開元五年奚、契丹各款塞歸附,玄宗欲復營州於 初營州都督府置在柳城,控帶奚、契丹,則天時都督趙文翽政理乖方,兩蕃反叛,攻陷州 乃韶慶禮等更於柳城築營州城,俄拜慶禮御史中丞兼檢校營州都督,開屯田八十餘

此 必其時營州區域之內或其近傍頗有西域賈胡,慶禮始能招輯之也。故營州 所, 追拔幽州及漁陽、淄青等户, 招輯商胡, 爲立店肆。 一地在開元以前已

多中亞胡人, 可知之矣。

更試 潛遣賈胡行諸道,歲輸百萬。 檢新唐書安禄山傳(參考安禄山事跡),如言:

及

凡降蕃夷皆接以恩,禄山通夷語,躬自尉撫,皆釋俘囚爲戰士,故其下樂輸死,所戰無

等,則安禄山利用其中亞胡種商業語言特長之例證也。

又如言:

前。

養同羅降契丹曳落河八千人爲假子。

及

禄山已得[阿]布思之衆,則兵雄天下。

則安禄山利用其混合血統胡人之資格, 籠絡諸不同之善戰胡族, 以增強其武力之例證也。

故據新唐書壹壹捌韋湊傳附見素傳云:

禄山反狀暴天下, 今又以蕃代漢, 難將作矣。」未幾,禄山反。

明年(天寶十四載),禄山表請蕃將三十二人代漢將,帝許之。見素不悦,

謂

傳李林甫傳同,又大唐新語壹壹懲戒篇及諛佞篇尤可參校)云:: 可知禄山之舉兵與胡漢種族武力問題有關也。至舊唐書壹佰陸李林甫傳(新唐書貳貳叁上姦臣

戰有勇, 以重臣領使以制之。 國家武德、貞觀已來,蕃將如阿史那社爾、契苾何力忠孝有才略,亦不專委大將之任,多 之任故也 仙芝、哥舒翰皆專任大將,林甫利其不識文字,無入相由。然而禄山竟爲亂階, 甫固位, 寒族即無黨援。」帝(玄宗)以爲然,乃用[安]思順代林甫領[朔方節度]使。 志欲杜出將入相之源, 嘗奏曰:「文士爲將怯當矢石, 不如用寒族蕃人。 開元中, 張嘉貞、 王晙、張説、蕭嵩、 杜暹皆以節度使入知政事。林 由專得大將 蕃人善 自是高

其寒族蕃人一語涉及唐代統治階級全部,俟後論之。然安史叛亂之關鍵,實在將領之種族,則

/ (楊)國忠曰: (楊)國忠曰: (楊)國忠曰: (楊)國忠曰: 本人與政事。林 大將之任,多 大將之任,多 大將之任,多

又舊唐書壹玖玖上東夷傳高麗傳 (新唐書壹佰拾泉男生傳 附獻誠 傳同)云:

恐自此已後,無漢官工射之名。伏望停寢此射。」則天嘉而從之。 薛土摩支,摩支又讓獻誠。既而獻誠奏曰:「陛下令簡能射者五人,所得者多非漢官。 衙文武官内擇善射者五人共賭之。內史張光輔先讓獻誠爲第一,獻誠復讓右玉鈴 [泉]獻誠授右衛大將軍,兼令羽林衛上下。天授中, 則天嘗内出金銀寶物, 令宰 衛大將軍 相及南 臣

東隅 武曌時 家傳言府兵制之破壞實始於則天時,此亦一 寅恪案:泉獻誠、薛土摩支皆蕃將也。武則天時,蕃將之武藝已遠勝於漢人,於此可見。鄴侯 至泉獻誠為蓋蘇文之孫,男生之子,亡國敗降之餘裔,其武伎精妙猶稱當時第 小國能 已開始崩潰, 屢抗隋唐全盛之日傾國之師,豈無故哉! 豈無故哉 不待玄宗朝,而漢將即此混合集團之首領,其不如蕃將之善戰已如此矣。 旁證。蓋宇文泰所鳩合之六鎮關隴胡漢混合集團 則高麗之以

、新唐書壹貳柒張嘉貞傳附弘靖傳(舊唐書壹貳玖張延賞傳附弘靖傳同,但無「俗謂禄山、

思明為二聖」之語)略云:

充盧龍節度使, 衆滋不悦。 幽薊初效順,不能因俗制變,故范陽復亂。 始入幽州, 俗謂禄山、思明爲二聖。 弘靖懲始亂, 欲變其俗, 乃發墓毀

上篇

寅恪案:聖人者唐俗稱天子之語。 如通鑑貳貳貳上元二年三月條(舊唐書貳佰上、 新唐 書 「頂頂

伍上史思明傳附朝義傳略同)略云:

[史]朝義泣曰:「諸君善爲之,勿驚聖人!」(寅恪案:此聖人指思明言。

當時臣子謂其君父爲聖人。

胡注云:

其他藩鎮胡化事跡於下, 其種族、文化二者之關係不待解釋, 雖各有不同,但非此篇所論範圍,故不置言也。 史稱帝時代已六七十年,河朔之地,禄山、思明猶存此尊號, 而致變叛 蓋安史俱稱帝,故在其統治之下者率以聖人稱之,自無足異。所可注意者,穆宗長慶初上距安 則安史勢力在河朔之深且久,於此可見。茲節録兩唐書所載安史同時並後來河朔及 自然明瞭。至其人前後逆順賢否 中央政府官吏以不能遵循舊俗

其血統確有胡族分子者,如

舊唐書貳佰上安禄山傳附孫孝哲傳(新唐書貳貳伍上逆臣傳同)云:

孫孝哲,契丹人也。

史憲誠,其先奚也,内徙靈武,爲建康人,三世署魏博將。新唐書貳佰拾藩鎮魏博史憲誠傳(舊唐書壹捌壹史憲誠傳同)云:

司 書貳壹壹藩鎮鎮冀李寶臣傳(舊唐書壹肆貳李寶臣傳同)云:

李寶臣本范陽內屬奚也,善騎射,范陽將張鎖高畜爲假子,故冒其姓,名忠志,爲盧龍府

果毅

同書同卷王武俊傳(舊唐書壹肆貳王武俊傳同)云:

年十五,善騎射,與張孝忠齊名, 王武俊本出契丹怒皆部, 父路俱, 隷李寶臣帳下爲裨將。 開元中與饒樂府都督李詩等五千帳求襲冠帶。

同書同卷王廷湊傳(舊唐書壹肆捌王廷湊傳同)云:

王廷凑本迴紇阿布思之族,隸安東都護府,曾祖五哥之,爲李寶臣帳下,驍果善門,王武

俊養爲子,故冒姓王,世爲裨將。

.害貳壹貳藩鎮盧龍李懷仙傳(舊唐書壹肆叁李懷仙傳同)云:

同

李懷仙,柳城胡也,

司 .書同卷李茂勳傳(舊唐書壹捌拾李可舉傳同)云:

世事契丹,守營州,善騎射,智數敏給,禄山之反,以爲裨將。

兵, 常乘邊, 積功賜姓及名。 李茂勳本迴紇阿布思之裔,張仲武時與其侯王皆降,資沈勇善馳射,仲武器之,任以將

同書貳壹叁藩鎮淄青李正己傳(舊唐書壹貳肆李正己傳同)云:

李正已, 高麗人, 爲營州副將, 從侯希逸入青州, 希逸母即其姑。

同 書壹肆肆侯希逸傳(舊唐書壹貳肆侯希逸傳同)云:

侯希逸,營州人,天寶末爲州裨將,守保定城。禄山反,以徐歸道爲節度使,希逸率兵與

安東都護王玄志斬之,韶拜玄志平盧節度使。玄志卒,共推希逸,有韶就拜節度使。 确,數有功,然孤軍無援,又爲奚侵略,乃拔其軍二萬,浮海入青州,據之,平盧遂陷

唐代中央政府之鉅患。推求其故,實由其統治者本從河朔胡化集團中分出者也。 人血脈,其部下兵衆亦是胡化集團。是以自李正己襲奪其業後,淄青一鎮亦與河朔同 據上引李正己傳,知侯希逸至少其母系出自高麗,雖其初不從安禄 肅宗因以希逸爲平盧、淄青節度使。 自是淄青常以平盧冠使。 山之命, 然其種族固含有胡 風

新唐書壹肆捌張孝忠傳(舊唐書壹肆壹張孝忠傳同)云:

張孝忠本奚種, 間共推張阿勞、王没諾干二人齊名。没諾干, 奏爲偏將。禄山、 世爲乙失活酋長。父謐,開元中提衆納款。孝忠始名阿勞, 史思明陷河洛, 常爲賊前鋒; 王武俊也。 朝義敗, 天寶末以善射供奉仗内, 安禄山 乃自歸。 以勇聞。

日 書貳貳肆上叛臣傳李懷光傳(舊唐書壹貳壹李懷光傳同)云: 李懷光,渤海靺鞨人,本姓茹,父常,徙幽州,爲朔方部將,以戰多賜姓,

更名嘉慶。

光在軍以積勞爲都虞候,節度使郭子儀以紀綱委懷光。

寅恪案:李懷光乃朔方軍將, 屬於別一系統 不在河朔範圍, 然以其先嘗居幽州, 故亦附及之。

至唐室中興元勛李光弼,則新唐書壹叁陸其本傳(舊唐書壹壹拾李光弼傳略同)云:

是亦出於東北胡族,且與安禄山同鄉里,不過政治上適立於相反之地位耳。

李光弼,管州柳城人,父楷洛以武后時入朝。

故亦與胡人無異者也。如新唐書貳壹拾藩鎮魏博傳田 列之於下。其要點在無論實為漢人或有胡族之嫌疑,其人必家世或本身居住河朔,久已胡化 以上諸人皆確為胡族無復疑義。又有實為漢人,或雖號漢族,而帶胡種嫌疑未能決定者,茲並 承嗣傳(舊唐書壹肆壹田承嗣傳同)云:

舊唐書壹肆壹田弘正傳(新唐書壹肆捌田弘正傳同)略云:

平州盧龍人也,世事盧龍軍,以豪俠聞,

隷安禄山麾下。

田

承嗣,

田弘正祖延惲,魏博節度使承嗣之季父也。弘正善騎射,爲衙内兵馬使,既受節鉞,上表 :「臣家本邊塞,累代唐人,驅馳戎馬之鄉,不睹朝廷之禮, 伏自天寶已還,幽陵肇亂

東奥壤,悉化戎墟,官封代襲,刑賞自專。

新唐書貳壹拾藩鎮魏博何進滔傳(舊唐書壹捌壹何進滔傳同)云: 何進滔, 靈武人, 世爲本軍校, 少客魏,委質軍中。

胡,其本身又居魏,而當時魏地亦胡化區 寅恪案:前引新唐書西域傳,昭武九姓中有何姓, 域也。 何進滔又從靈武徙居於魏,故疑其先世是羯

舊唐書壹捌壹韓允忠傳(新唐書貳壹拾藩鎮魏博韓君雄傳同)云:

同書同卷樂彦禎傳(新唐書貳壹拾藩鎮魏博樂彦禎傳同)云:

魏州人也,父國昌,歷本州右職。

韓允忠,

百 書同卷羅弘信傳(新唐書貳壹拾藩鎮魏博羅弘信傳同)云: 樂彦禎, 魏州人也,父少寂, 歷澶、 博、 貝三州刺史。

羅弘信, 魏州貴鄉人,曾祖秀,祖珍,父讓,皆爲本州軍校。

夢瑣言伍中書蕃人事條,羅亦胡姓,然則羅弘信不獨世居胡化之地,且有本出胡族之嫌疑

新唐書貳貳伍中逆臣傳朱泚傳(舊唐書貳佰下朱泚傳同)云:

朱泚 幽州昌平人,父懷珪事安史二賊。

舊唐書壹肆叁朱滔傳(新唐書貳壹貳藩鎮盧龍朱滔傳 同)云

新唐書貳壹貳藩鎮盧龍朱克融傳(舊唐書壹捌拾朱克融傳同)云:

朱滔

賊

泚之弟也。

舊唐書壹肆叁劉怦傳(新唐書貳壹貳藩鎮盧龍劉怦傳同)云:

幽州昌平人也,父貢嘗爲廣邊大斗軍使, 怦即朱滔姑之子。

新唐書貳壹貳藩鎮盧龍李載義傳(舊唐書壹捌拾李載義傳同)云:

李載義自稱恒山愍王之後,性矜蕩,好與豪傑遊,力挽强搏鬥,

劉濟在幽州高其能,

寅恪案:李載義之稱承乾後裔,固出依託,即使其真出自承乾,亦與河朔諸漢將同為胡化之漢

新唐書貳壹貳藩鎮盧龍楊志誠傳(舊唐書壹捌拾楊志誠傳同)云:

[楊]志誠者事[李]載義爲牙將,載義走,因自爲都兵馬使,[大和]八年爲下所逐,

唐書史憲誠傳),故史元忠殊有源出胡族之嫌疑也。 史那氏、阿史德氏皆消作史氏,中亞昭武九姓中有史氏,史憲誠本奚族,亦姓史氏(見前引兩 寅恪案:楊志誠、史元忠之氏族史傳不詳,無以確言,但俱為胡化之人,則無可疑者。 突厥阿

新唐書貳壹貳藩鎮盧龍張仲武傳(舊唐書壹捌拾張仲武傳同)云:

統治階級之氏族及其升降

吴仲舒入朝,請以本軍擊回鶻。[李]德裕因問北方事,仲舒曰:「行泰(及殺行泰之張)絳 張仲武,范陽人,通左氏春秋,會昌初爲雄武軍使。[陳]行泰殺[史]元忠,而仲武遣其屬

皆遊客,人心不附;仲武舊將張光朝子,年五十餘,通書習戎事,性忠義,願歸款朝廷舊

矣。」德裕入白帝,擢兵馬留後,絳爲軍中所逐。

以得軍心者,以本為范陽土著,且家世舊將, 寅恪案:陳行泰、張絳始末不詳,可不置論。 李文饒之策略,仲武亦未必遽得為鎮將也。 張仲武受漢化較深, 在河朔頗為例外, 而陳行泰、張絳俱是遊客, 故不能與之爭, 然跡其所 然非

新唐書貳壹貳藩鎮盧龍張允伸傳(舊唐書壹捌拾張公素傳同)云: 張允伸,范陽人,世爲軍校。

同書同卷張公素傳(舊唐書壹捌拾張公素傳同)云:

公素,范陽人,以列將事[張]允伸。

同書同卷李全忠傳(舊唐書壹捌拾李全忠傳同)云:

同 書同卷劉仁恭傳云: 李全忠,范陽人, 仕爲棣州司馬, 罷歸, 事[李] 可舉爲牙將, 可舉死, 衆推爲留後。

劉仁恭,深州人,父晟客范陽,爲李可舉新興鎮將,故仁恭事軍中。

舊唐書壹捌拾朱克融等傳末略云:

史臣曰:彼幽州者,其民剛强,近則染禄山、思明之風,二(?)百餘年自相崇樹,雖朝廷

有時命帥,而士人多務逐君,習苦忘非,尾大不掉,非一朝一夕之故也。

新唐書貳壹叁藩鎮横海程日華傳(舊唐書壹肆叁程日華傳同)云:

程日華,定州安喜人,父元皓爲安禄山帳下,僞署定州刺史,故日華籍本軍,爲張孝忠牙

同書同卷李全略傳(舊唐書壹肆叁李全略傳同)云:

李全略事[鎮州]王武俊爲偏裨。

吴少誠,幽州潞人(父爲魏博節度都虞候

同書貳壹肆藩鎮彰義吳少誠傳(舊唐書壹肆伍吳少誠傳同)云:

同書同卷吳少陽傳(舊唐書壹肆伍吳少陽傳同)云: 少陽者,與[吴]少誠同在魏博軍,相友善,少誠得淮西,多出金帛邀之,養以爲弟,署右

·書同卷藩鎮澤潞劉悟傳(舊唐書壹陸壹劉悟傳同)云: 親近無間。

劉悟其祖正臣,平盧軍節度使,襲范陽,不克,死。

上篇

百

使,仍賜名正臣,襲范陽,爲逆賊將史思明等大敗之,正臣奔歸,爲王玄志所鴆而卒。 父客奴由征行家於幽州之昌平,少有武藝,從平盧軍, [天寶]十五載四月授客奴平盧軍

據此,知劉氏亦家於幽州昌平,漸染胡化者也。

舊唐書壹貳貳張獻誠傳(新唐書壹叁叁張守珪傳附獻誠傳同)云:

張獻誠, 陝州平陸人,幽州大都督府長史守珪之子也,天寶末陷逆賊安禄山,受傷官,連

陷史思明,爲思明守汴州,統逆兵數萬。

同書壹貳肆薛嵩傳(新唐書壹壹壹薛仁貴傳附嵩傳同)云:

有膂力,善騎射,不知書,自天下兵起,東身戎伍,委質逆徒。 絳州萬泉人,祖仁貴,高宗朝名將,封平陽郡公,父楚玉,爲范陽平盧節度使。

胡化, 寅恪案:張獻誠、薜嵩雖俱大臣子孫,又非河朔土著,然以其父官范陽之故,少居其地,漸染 竟與田承嗣之徒無別。甚哉風俗之移人若是, 而河朔當日社會文化情狀, 亦可想見矣。

舊唐書壹貳肆令狐彰傳(新唐書壹肆捌令狐彰傳同)云:

彰遂少長范陽,善弓矢,乃策名從軍。事安禄山 京兆富平人也, 父濞, 初任范陽縣尉, 通幽州人女,生彰,及秩滿,留彰於母

同書同卷田神功傳(新唐書壹肆捌田神功傳同)云:

田神功 冀州人也,家本微賤,天寶末爲縣里胥,會河朔兵興,從事幽薊

新唐書壹肆捌康日知傳云:

寅恪案:以康日知姓氏及籍貫言之,當亦中亞胡種也。 康日知,靈州人,祖植,當開元時縛康待賓,平六胡州, 日知少事李惟岳,累擢趙州刺史。

新唐書壹肆捌牛元翼傳云:

牛元翼,趙州人,王承宗時,與傅良弼冠諸將。

良弼清河人,以射冠軍中。

舊唐書壹肆伍李忠臣傳(新唐書貳貳肆下叛臣傳李忠臣傳同)云:

李忠臣本姓董,名秦,平盧人也,世家於幽州薊縣。忠臣少從軍,事幽州節度使薛楚玉、

張守珪、安禄山等。

李希烈,遼西人,少從平盧軍,後從李忠臣浮海至河南。同書同卷李希烈傳(新唐書貳貳伍中逆臣傳李希烈傳同)云:

政府或忠或叛,復有先後順逆等之互異。要而言之,家世或本身曾留居河朔及長於騎射二事則 綜上所引諸人氏族或確是漢人,或有胡種嫌疑,或為唐室大臣子孫,或出微賤之族,其於中央

上篇 統治階級之氏族及其升降

大抵相類 斯實河朔地域之胡化演變所致者也。 新唐書壹肆捌史孝章傳載其諫父憲誠之言曰:

同

天下指河朔若夷狄然。

書貳壹拾藩鎮傳序云:

遂使其

人由羌狄然,

乾唐亡百餘年率不爲王土。

故不待五代之亂 自昔史家勘有解釋, 于唐最⁶ 盛 之時即玄宗之世, 神州 茲試作 東北 假説 隅如 東漢 田 魏晉 以待將來之確證, 弘 正所謂「悉化戎墟」矣(見上引田 北朝文化最高之河朔 然私心殊未敢自信也 地域, 弘正傳)。尤可 其胡化 亦已 開 異者, 此 即

地必有胡族之遷徙無疑。凡居東北與河朔有關之胡族如高麗、 北突厥 依據上列史料, 蓋舊稱 如此)、 知神州東北 迴紇、 隅河朔地域之内, 其人民血統屬於漢種者, 奚、 契丹之類移居於與其部落鄰近之地, 東突厥(唐會要、舊唐書俱 如河朔區 既若是之胡化 域 自有可 い謂之 則 其

能 因 西北萬里之外短期之内忽然遷移 而於事理亦易可通者也。 其 遠因為隋季之喪 亂 獨中 其中因為東突厥之敗亡, 國東北隅河朔之地而有多數之中亞胡人, 至東北端濱海之區 其近 恐不可能。 天 或主 姑就 因為東突厥之復興。 舊史所載者考之, 甚為難解。 若彼輩 所謂 似

隋季之喪 即舊唐書玖叁唐休璟傳(新唐書壹壹壹唐休璟傳略 同)略云:

授營州户曹。 調露中單于突厥背叛, 誘扇奚、 契丹侵略州縣 後奚、羯胡又與桑乾突厥同

反, 都督周道務遣休璟將兵擊破之,超拜豐州司馬。永淳中朝議欲罷豐州, 休璟上 疏 日:

豐州自秦漢已來, 乃以靈夏爲邊界。 列爲郡縣, 貞觀之末始募人以實之, 隋季喪亂, 不能堅守, 西北 ,乃遷徙百姓就寧慶二州, 隅方得寧謐。 致使戎羯

隋季侵入西北, 太子注),然於此恐不免疏誤也。 佰叁弘道元年五月條改「戎羯」為「胡虜」,固以「戎羯」為泛稱(見後漢書肆捌吳蓋陳臧傳論章懷 十月條俱無「奚、 之良機會,兩唐書唐休璟傳或可於此事略露消息也。惟新唐書唐休璟傳及通鑑貳 寅恪案:中亞羯胡必經由中國西北, 略云 輾轉移來,此於事實頗為合理者也。所謂東突厥之敗亡者, 羯胡與桑乾突厥同反」之語, 又新唐書唐休璟傳雖亦作「戎羯交侵」, 而通 然則調露前後中國東北部已有不少羯胡, 而漸至東北。 在隋 末中國擾亂之世最為中亞胡人逐 即戈本貞觀政要玖 而羯胡之遷徙實由 佰貳 調露 漸 鑑貳 轉徙 元年

朝士相半。唯拓拔不至,又遣使招慰之,使者相望於道。涼州都督李大亮以爲於事無益 自突厥頡利破後,諸部落首領來降者皆拜將軍中郎將,布列朝廷, 五品已上百餘 人,

寅恪案:通 徒費中國,上疏云云,太宗不納。

是杜 氏略去。又「拓拔」作「柘羯」,尚未經後人誤改。 典壹玖柒邊防典突厥傳上與此同, 蓋皆源出太宗實録也。惟無「太宗不納」之句,當 舊唐書陸貳及新唐書玖玖李大亮傳紀此

事 非此所能詳及, 敗亡, 必有 括之,蓋柘 國之領部置於其管制下之事實也。 或歸降中國之時代大抵在武則天及唐玄宗開元之世。 唐 關大局 鄙意吳書似得其實,而兩唐書大亮傳乃後來修飾之詞, 俱只舉酋長之名, 書壹玖肆 少數柘羯因之東徙者矣。 羯 上北 莫過於東突厥之復興, 茲惟就 種原在 突厥傳(新唐書貳壹伍上突厥傳同)略云 而通鑑壹玖叁貞觀四年秋九月條則不著酋長之名, 兩唐書所載東突厥復興與西突厥關係之史料略引一一, 西突厥範圍內也。又兩唐書大亮傳俱言太宗從大亮之請 關於東 所謂東突厥之復興者, 即綜考上引史料, 諸胡人入居河 即骨 咄禄 突厥自 頡利 默啜兄弟武力之開 而此三十年間中國東北 於貞觀時破 故君卿於此闕疑耶?然則東突厥之 滅後 拓遠及中亞 至 一骨咄 而以 方胡族之活動其 禄 以供推證焉 西突厥」 而復興之始末 竟取 與貞 西突厥 觀 政要 語概 帝 朔 最

骨咄禄, 禄死時其子尚幼, 頡利之疏屬, 自立爲可汗,以其弟默啜爲殺, 默啜遂篡其位, 自立爲可汗。 骨咄禄天授中病卒。

部仍令一人統之, 默啜立其弟咄悉匐爲左 五咄陸,其右厢號爲五弩失畢。 小可汗, 仍主處木昆等十姓(寅恪案: 號爲十設, 一厢察, 骨咄禄子默矩爲 每設賜以 五咄陸部落居於碎葉已東 一箭 舊唐書壹玖肆 故稱十箭焉。 右厢察, 下西突厥傳云:「其國 各主兵馬二萬餘人, 又分十箭爲左 五弩失畢部落居於碎葉已 右 分爲 又立其子匐 厢 其左 厢號 每

西,自是都號爲十姓部落。其咄陸有五啜,一曰處木昆啜云云。」)兵馬四萬餘人,又號爲

拓西可汗。

初默啜景雲中率兵西擊娑葛,破滅之。契丹及奚自神功之後常受其徵役,其地東西萬餘 控弦四十萬,自頡利之後最爲强盛,自恃兵威,虐用其衆,默啜既老,部落漸多逃

備, 元]四年默啜又北討九姓拔曳固,戰於獨樂河,拔曳固大敗, 默啜負勝輕歸, 而 不設

同書同卷下西突厥阿史那彌射傳附孫獻傳 (新唐書貳壹伍下西突厥傳略同)云: 遇拔曳固迸卒頡質略於柳林中, 突出擊默啜, 斬之。

長安元年充安撫招慰十姓大使,獻本蕃漸爲默啜及烏質勒所侵,遂不敢還國。

百 書同卷阿史那步真傳(新唐書貳壹伍下西突厥傳略同)云:

自垂拱已後十姓部落頻被突厥默啜侵掠,死散殆盡。及隨斛瑟羅纔六七萬人,徙居內地, 西突厥阿史那氏遂絶。 (寅恪案:通鑑貳佰肆紀此事删去「默啜」二字,蓋與上文「垂拱」二

字衝突之故,於此足徵温公讀書之精密。)

.書同卷突騎施烏質勒傳(新唐書貳壹伍下突騎施烏質勒傳同)云::

百

突騎施烏質勒者,西突厥之别種也。烏質勒卒,其長子娑葛代統其衆,景龍三年娑葛弟遮

其左右來討娑葛,擒之而還。 弩恨所分部落少於其兄,遂叛入突厥, 請爲鄉導以討娑葛。 默啜乃留遮弩, 遣兵二萬人與

此 複 又包括東北及西北之諸胡種,唐代中央政府若欲羈縻統治而求一武力與權術兼具之人才, 東北 載 雜胡 史言一默啜 遂與往日之河朔迥然不同, 即 在 諸鎮付之禄 族方隅之主將 出於李林 其殘敗衰微之後亦仍吸收其 死老, 可知 甫固 Ш 東突厥復興後之帝國其勢力實遠及中 部落漸多逃散」, 則柘羯與突厥合種之安禄山者,實為適應當時環境之唯一上選也。玄 位之 雖尚 私謀 有他故, 而成為一混雜之胡化區域矣。 而 已 然則中國河朔之地不獨當東突厥復興盛強之時 耶? 而禄山之種性與河朔之情勢要必為其主因, 逃亡離散之諸胡部落, 亞, 夫此區域之民族既 故民族受其 此時 必有中亞胡 八影響, 族 已脱離漢化 豈得僅如 風 向 俗 遭 東北遷徙 為之轉 其侵軼 為

位 之系統及階級, 更總括以上所述者論之, 政 大柱國家 策 ,而隋唐繼其遺産, 」所鳩合集團之興 即其代表也。 故李氏據帝位, 衰及其分化。 又擴充之。其皇室及佐命功臣大都西魏以來 當李唐初期此集團之力量猶未衰損, 則知有唐一 主其軸心, 代三百年間 蓋字文泰當日融冶關 其他諸族入則為相, 出則為將, 自無文武分途之 其 統治階級之變遷升降, 隴胡漢民族之有武力才智者 皇室與 此 其將相 關隴 即 大臣 集團 是宇文泰「關 幾全出 中 於同 所謂 以 中 創

即在 復合 既破 李氏 隅 故文武 介所以 統治 則其 而將 此 其 壞 進士文詞之科破格用人及漸毀府兵之制等皆是也。 翰林學士中選出 年之久, 事 舉 後 時之徵象。 至玄宗尤稱李唐盛 西魏以來關隴 傎 凡 間 階 相大臣與皇室亦為同類之人,其間更不容別 不殊途 皇室始與外朝之將相大臣即士大夫及將帥 成於玄宗之世。 進士 古 級 無閹 自身本已逐漸衰腐 擁蔽 一科舉之崇重, 是以論唐史者必以玄宗之朝為時代畫分界綫 則非好學深思通識古今之君子, 寺階級統 而將相 皇 集團之内 室, 邊鎮大帥之職捨蕃將莫能勝任,而將相文武蕃漢進用之途, 世, 斯實宇文泰所創建之關 而與外朝之將相大臣相對抗。 可兼任; 治國 然其 府兵之廢除, 因欲消滅唐室之勢力 政之餘地也。 祖 武 今既別産生一以科舉文詞進用之士大夫階級, 母開 (氏更加以破壞, 遂致分崩墮落不可救止 始破 以及宦官之專擅朝政, 壞關隴集團之工事竟及其 抑 更可注意者, 不能詳切言之也 隴集團完全崩 屬於不 此關 遂開 統治 假使皇室與 始施 隴 同 階級之存在也。 之階 集團自西魏迄武 關 潰 行破 其 隴 級。 事 蕃將即胡化武 集團 外廷將相 壞此 及唐代統 ,雖為治國史者所得略知 身而 同 本融 傳統 時 告完 至 閹 合胡 、嬰歷 治階 寺 其 集團 於 大 成矣。 臣 黨 後 武 遂分歧 漢文武 超級轉 則宰相 皇位 人之割 之工 嬰, 類 時 百 屬 亦 既 移 此 雖 經 其 於 因 作 升降 據方 集團 復歸 不 不能 為 是變 氏 百 階 如 口 族

P篇 政治革命及黨派分野

壹論關中事宜狀(參新唐書壹伍柒陸贄傳、 黨派若牛李等黨究如何發生?其分野之界綫何在? 斯皆前人所未顯言而今此篇所欲討 唐代皇位之繼承常不固定,當新舊君主接續之交往往有宫廷革命,其原因為何?及外廷士 史之亂以前地方政治革命均不能成功,且無多影響?而中央政治革命亦何以有成功與失敗 唐代政治革命依其發源根據地之性質為區別,則有中央政治革命與地方政治革命二 上篇言字文泰以「關中本位政策」創建霸業, 通鑑貳貳捌建中四年八月條 隋唐因之,遂混一中國,為極盛之世。陸宣公奏議 類。 論者也。 何以安 大夫

餘所,而在關中者殆五百焉,舉天下不敵關中,則居重馭輕之意明矣。承平既久,武備寖微 太宗文皇帝既定大業, 萬方底义, 猶務戎備, 不忘慮危, 列置府兵, 分置禁衛, 大凡諸府八百

雖府衛具存,而卒乘罕習,故禄山竊倒持之柄,乘外重之資,一舉滔天,兩京不守。

制之美,此不獨臣下立言之體宜然,實亦由於府兵制度之起原及其發展頗有誤會所致。蓋府兵 寅恪案 陸敬興所言唐代內外輕重之形勢與政治之關係固甚確切,但唐人論事多追頌其祖宗創 中篇 政治革命及黨派分野

方革命 革命之安、史、龐勛、 則天所以 破 制 如李繁之鄴侯家傳為唐人論府兵制主要之書,其間多所未諦,他更無論矣,此事已於拙 制 宗之世「關中本位政策」完全改變,所以地方政治革命始能成功,而唐室之衰亡實由於地方政治 度淵 壞 為宇文泰當日「關中本位政策」中最要之一端,此政策之實情自唐初以降已不復為世人所知, 以前凡 則 源 (成功, 略論稿兵制章詳言之,茲可不論。然可由宣公之言推定其在「關中本位政策」猶未完全 無論如何名正 操持 與夫隋煬帝遠遊江 關 中主權之政府即可以宰制全國, 黄巢等之叛亂, 及黄巢部將朱溫之篡奪也。 言順, 終歸失敗 左, 所以卒喪邦家 此點 可以解 故政治革命只有中央政治革命可以成功 釋尉遲 唐高 祖 迥、徐敬 速 據關 中 業 所以失敗, 所以 獨 成 帝業。 隋文帝 迨玄 武 地

以成 禁軍 心功, :: 唐代在「關中本位政策」即內重外輕之情形未變易以前, 附論 但中央政治革命有成功, 亦有失敗, 其故又安在? 都 城建 而北 築 門之重要則由於唐代都城建置之形勢使然, 節。 茲僅略述大意, 附載唐代歷次中央政治革命與宫城北門有關 應之曰:其關 其詳 其政治革命惟有在中央發動者可 見 拙 著隋 鍵實繫於守衛宫 唐制 度淵 源 略 之史 城北 論

史商 権捌玖南衙北司條)云: 書壹貳陸李揆傳(參新唐書伍拾兵志及壹伍拾李揆傳、通鑑貳貳壹乾元二年三月條、

時京師多盗賊, 有通衢殺人寘溝中者。李輔國方恣横, 上請選羽林騎士五百人以備巡檢。

揆上疏曰:「昔西漢以南北軍相統攝,故周勃因南軍入北軍(寅恪案:新傳亦與舊傳同作 因南軍入北軍」,其實應作「因北軍入南軍」,此揆元疏之誤,非傳寫之譌也。 通鑑此

以相伺察。今以羽林代金吾警夜,忽有非常之變,將何以制之?」遂制罷羽林之請。

注明知其誤,猶只云:「恐不如此」,亦太謙慎矣),遂安劉氏。皇朝置南北衙,文武區分,

又同書壹陸捌馮宿傳附弟定傳(新唐書壹柒柒馮宿傳附弟定傳同)云:

改元[開成],御[宣政]殿,中尉仇士良請用神策仗衛右殿,定抗疏論罷。

通鑑貳肆伍開成元年正月載此事, 胡注云: 紀綱,又增宦官之勢焰,故馮定言其不可。 南衙十六衛之兵至此雖名存實亡。然以北軍衛南衙,則外朝亦將聽命於北司,既紊太宗之

適相 據 城建置, 此 反。 可知唐代之北軍即衛宮之軍,權力遠在南軍即衛城之軍之上。其情勢與西漢南北軍所處者 與中央政治革命之關係一端而已。 關於西漢南 北軍制, 自宋迄今,論者多矣,可以不贅。茲所欲論者,即唐代北軍及都

面朝背市。

成 記之文適相符合 敗 通 軍 其 似 常 其宫近城之北 唐代之長安, 悉決於玄武門 君主所居之處 未 無 與西漢之南 央宫 疑 解 義。 也。 南之司 然則 考工 王宫 其宫 北軍 豈與此書作成之時代有關耶? 至隋代所營建之大興城, 端 乃政治 馬門直 即 記 所言匠 居 中, 其名 宫城北門 在城北 而市則在城之南方, 作 成之時 其 雖同, 抵城垣, 人營國 劇變時成敗之所繫。 南 軍 故北軍為衛宫之武 為 代 事之勝負, 而實際之輕重則相殊異也。 朝 雖 其宫 並無坊市, 晚 其 市之位置必有當日真實之背景者。 北 但必為 其宫市位置適與以 為市。 而北 而未央宫長樂宫之北則有六街 西漢之長安, 儒家 故止 力。 軍統制之權實即中 依據 苟明乎 就 官與 其所得之資料, 其宫在 此 夫中 前之西漢長安城相反,故唐代之 市之位置言, 則唐代 央政府之命令出於君主一人 -央政 城 南 柄 歷 加以 故南 即後來唐代之長安 今知 則宫在 次中央政 之所寄託 三市 理 西 軍 為衛宫之武 想 漢首都 市 治革 之南 是 化 也 與 編 茲略 考

武 與太宗各領一 往往以成敗論人, 德九年六月四日玄武門事變為唐代中央政治革命之第一次,而太宗一生最艱危之苦鬥也。 亦為才智之人。 至於元吉者, 軍。 及為太子, 而國史復經勝利者之修改,故不易見當時 其所用官僚如 尤以勇武 著聞 王 珪、 魏徵之流即後來佐成貞觀之治之名臣, 故太宗當日相與競爭之人決非庸懦無能 真 相。然高 祖起兵太原, 建成 可知 即

引有關

史事於下:

敗亡,似此二人曾絕無計慮及準備者,頗為不近情理,疑其間必有未發之覆,而相傳之史料復 又況建成以嫡長之名位,而內得高祖宮闈之助乎?太宗終能於玄武門一擊,而建成、元吉倉卒

多隱諱之處也

舊唐書陸捌尉遲敬德傳(新唐書捌玖尉遲敬德傳略同 隱太子、巢刺王元吉將謀害太宗,密致書以招敬德,)略云: 仍贈以金銀器物一車,

略)。敬德曰:「在外勇士八百餘人今悉入宫,控弦被甲,事勢已就,

王何得辭?」(中略)。

敬德辭。

建成、元吉首以示之,宫府兵遂散。 [東]宫[齊王]府諸將薛萬澈、謝叔方、馮立等率兵大至, 屯玄武門,殺屯營將軍。 敬德持

上書同卷張公謹傳(新唐書捌玖張公謹傳同)云:

H

來攻玄武門,兵鋒甚盛。 [武德九年]六月四日,公謹與長孫無忌等九人伏於玄武門以俟變。及斬建成、 公謹有勇力,獨閉關以拒之。 元吉,

書壹捌柒上忠義傳上敬君弘傳(新唐書壹玖壹忠義傳敬君弘傳同)略云:

立、謝叔方率兵犯玄武門,君弘挺身出戰,與中郎將吕世衡並遇害。 武德中爲驃騎將軍,掌屯營兵於玄武門,加授雲麾將軍。 隱太子建成之誅也, 太宗甚嗟賞之, 其餘 黨馮

弘左屯衛大將軍,世衡右驍衛將軍。

君弘,解兵遁於野,俄而來請罪。太宗數之曰:「昨日出兵來戰, 隱太子建成引爲翊衛車騎將軍, 建成被誅, [立]率兵犯玄武門, 苦戰久之, 殺傷我將, 殺屯營將軍敬 何以逃死?

同書同卷謝叔方傳略云

日世 太宗誅隱太子及元吉於玄武門, 太宗兵不振, 秦府護軍尉遲敬德傳元吉首以示之,叔方下馬號哭而遁。 叔方率[齊王]府兵與馮立合軍拒戰於北闕下, 殺敬君弘 明日出

宗既殺其兄弟之後,常何遂總率北門之屯軍矣。此亦新史料之發見,足資補釋舊史所不能解之 得以兵入玄武門故也。然則玄武門為武德九年六月四日事變成敗之關鍵,至為明顯。但此 黨得先隱伏奪據此要害之地乎? 今得見巴黎圖書館藏敦煌寫本伯希和號貳陸肆 有未發之覆,即玄武門地勢之重要,建成、元吉豈有不知,必應早有所防衛 當武 太宗之所以得勝, 至於敬君弘、 德九年六月四 然後知太宗與建成、 吕世衡則觀太宗數馮立罪所言, 日常何實任屯守玄武門之職, 建成、元吉之所以致敗,俱由一得以兵據玄武門即宫城之北門,一不 元吉兩方皆誘致對敵之勇將。 故建成 殆與常何同為太宗之黨敷? 常何舊曾隸屬建成, 不以致疑, 而太宗因之 ,何能令太宗之死 拾李義府撰常何 而為太宗 竊 史料缺乏, 迨太 所利

未敢遽定,俟更詳考之。

舊唐書玖壹桓彦範傳(新唐書壹貳拾桓彦範傳同,並参舊唐書壹捌柒上新唐書壹玖壹忠義傳王

同皎傳)略云:

而入。時則天在迎仙宮之集仙殿,斬易之、昌宗於廊下,明日太子即位。 [張]易之、昌宗於宫中。令李湛、李多祚就東宫迎太子。兵至玄武門,彦範等奉太子 、張]東之遽引彦範及〔敬〕暉並爲左右羽林將軍,委以禁兵,共圖其事。時皇太子每於北門 彦範與暉因得謁見,密陳其計,太子從之。神龍元年正月彦範與敬暉及左羽林將軍 李多祚,右羽林將軍楊元琰,左威衛將軍薛思行等率左右羽林兵及千騎五百餘

同書壹佰玖李多祚傳(新唐書壹壹拾李多祚傳同)略云:

武臣,豈非大帝之恩乎?」曰:「然。」又曰:「既感大帝殊澤,能有報乎?大帝之子見在東 少以軍功歷位右羽林大將軍,前後掌禁兵北門宿衛二十餘年。 張易之兄弟擅權,朝夕危逼,誠能報恩,正屬今日。」多祚曰:「苟緣王室,唯相 」遂與柬之等定謀誅易之兄弟。 引多祚籌其事,謂曰:「將軍在北門幾年?」曰:「三十年矣。」東之曰:「將軍位極 神龍初,張柬之將誅張易之

寅恪案:武則天雖居洛陽,然東都宮城之玄武門亦與長安宮城之玄武門同一位置,俱為形勢要

害之地。 中宗復辟之成功,實在溝通北門禁軍之故。張柬之既得羽林軍統將李多祚之同意,大

雖以武曌之梟傑, 亦無抵禦之能力矣。

局

即定,

舊唐書捌陸節愍太子重俊傳 (新唐書捌壹節愍太子重俊傳同)略云:

武門樓, 樓,召左羽林將軍劉仁景等令率留軍飛騎及百餘人於樓下列守。俄而多祚等兵至,欲突玄 [武]三思及[武]崇訓於其第,又令左金吾大將軍成王千里分兵守宫城諸門, [神龍]三年七月[重俊]率左羽林大將軍李多祚等矯制發左右羽林兵及千騎三百餘人, 斬關而入,求韋庶人及安樂公主所在。韋庶人及[安樂]公主遽擁帝(中宗)馳赴玄武門 宿衛者拒之,不得進。帝據檻呼多祚等所將千騎,謂曰:「汝等並是我爪牙,何 若能歸順, 斬多祚等, 與汝富貴。」於是千騎王歡喜等倒戈斬多祚等,餘黨遂潰 自率 兵趨

故能據守玄武門樓之要地,及中宗親行宣諭,而多祚等所率之禁軍遂倒戈自殺,一敗塗地矣。 然則中央政治革命之成敗與玄武門之地勢及守衛北門禁軍之關係如是重大,治唐史者誠不宜忽 寅恪案:李多祚以一人之身,二次躬率禁軍預聞中央政治革命之役,然而前後成敗互異者,以 視之也。舊唐書捌玄宗紀上(新唐書伍玄宗紀及通鑑貳佰玖景龍四年六月條同)略云: 三年七月辛丑之役韋后、安樂公主等猶得擁護中宗,及保有劉仁景等一部分之北門衛兵、

德等門,斬關而進。左萬騎自左入,右萬騎自右入,合於凌煙閣前。時太極殿前有宿衛梓 從,分遣萬騎往玄武門,殺羽林將軍韋播、高嵩,持首而至,衆皆歡叫大集。 官萬騎, [唐隆元年六月] 庚子夜[上] 率[劉] 幽求等數十人自苑南入,總監鍾紹京又率丁匠百餘以 聞譟聲,皆披甲應之,韋庶人惶惑走入飛騎管,爲亂兵所害。 攻白

口 書伍壹后妃傳上中宗韋庶人傳(新唐書柒陸后妃傳中宗韋庶人傳同,並參考舊唐書壹捌叁新

唐書貳佰陸外戚傳韋溫傳)略云:

守援宫掖。駙馬章捷、章濯分掌左右屯營。武延秀及温從子播、族弟璿、外甥高嵩典左右 城,分爲左右營,然後發喪。少帝即位,尊后爲皇太后,臨朝攝政。章温總知內外兵馬, 帝(中宗)遇毒暴崩, 羽林軍及飛騎。播、璿欲先樹威嚴,拜官日先鞭萬騎數人,衆皆怨,不爲之用。臨淄王率 高嵩於寢帳 鍾紹京、劉幽求等領萬騎入自玄武門,至左羽林軍,斬將軍韋璿、韋播及中郎將 遂斬關而入,至太極殿,后惶駭遁入殿前飛騎營, ,后懼, 秘不發喪。定策立温王重茂爲皇太子, 召諸府兵五萬人屯京 爲亂兵所殺。

同書壹佰陸王毛仲傳(新唐書壹貳壹王毛仲傳同)云:

文韉,著畫獸文衫,謂之百騎。至則天時漸加其人,謂之千騎,分隸左右羽林營。 初太宗貞觀中擇官户蕃口中少年驍勇者百人,每出遊獵,令持弓矢於御馬前射生。 孝和謂

千騎爲萬騎矣, 玄宗舉火視之。又召鍾紹京領總監丁匠刀鋸百人至,因斬關而入,后及安樂公主等皆爲亂 各取富貴, 宗訴冤。 毛仲亦悟玄宗之旨,待之甚謹,玄宗益憐其敏慧。及[景龍]四年六月中宗遇弑 亦置使以領之。玄宗在藩邸時,常接其豪俊者,或賜飲食財帛,以此盡歸 會玄宗已與劉幽求 在於俄頃,何以取信?」福順等請號而行,斯須斯韋播、 及二十日夜玄宗入苑中, 高嵩爲羽林將軍,令押千騎營(寅恪案:通鑑「千」作「萬」,是,蓋中宗已改 温公之精密有如是者),榜箠以取威。其營長葛福順、 麻嗣宗、 乙夜福順等至, 薛崇簡等謀舉大計, 玄宗曰:「與公等除大逆, 相顧益歡, 韋璿、 陳玄禮等相與見玄 令幽求諷 高嵩等頭 安社稷 幸后稱 皆願

又以 禁軍之向背為成敗之關鍵。然此皆訴諸武力,公開決戰者。至於武曌之改唐為周,韋氏之潜移 之玄武門事變正 寅恪案:玄宗景龍四年六月二十日夜之舉兵, 與三年前即神龍 上所述自高祖、太宗至中宗、玄宗,中央政治革命凡四次,俱以玄武門之得失及屯衛 死黨守衛玄武門之羽林禁軍諸統將如章播、章璿、高嵩等, 其轉變不出聞闥之間,兵不血刃,而全國莫之能抗,則以「關中本位政策」施行以來, 復相似 而成敗不同者,以玄宗能預結羽林萬 騎諸營長葛福 三年七月六日節愍太子 皆為其部下所殺故 順 陳玄 一禮等 重俊發動 内 Th

構 極少破例及極小限制外,大抵不決之於公開戰爭(唐末強藩與中央政府權臣及屬寺離合之關 推之可知也), 成 |外輕之勢所致也。然自玄宗末年安史叛亂之後, 内外輕重之形勢既與以前不同, 中央政變除 亂 其事應列入統治階級之升降及黨派分野範圍論之,故凡本書所未能詳述者,以義 而在宫廷之内以爭取皇位繼承之形式出之。於是皇位繼承之無固定性及新 係 類

被 孫皇后之長子,既居長嫡之位,其他諸子又無太宗之功業聲望可以啟其窺伺之心者,然承乾終 六月四日玄武門之事變,已詳前述,且其事為世所習知者也。太宗立承乾為皇太子,承乾乃長 唐自開國 廢棄,而諸子爭立,太宗心中之苦悶及其舉止之失態, [時建成即號為皇太子,太宗以功業聲望卓越之故,實有奪嫡之圖謀, 觀兩唐書長孫無忌傳所載可知矣。 卒釀成武德九年

輒有政變發生,遂為唐代政治史之一大問題也

B唐書陸伍長孫無忌傳(新唐書壹佰伍長孫無忌傳同)云:

抽佩刀欲自刺。 太子承乾得罪, 我欲立晉王。」無忌曰:「謹奉韶, 兵部尚書李勣, 太宗欲立晉王, 無忌等驚懼, 争前扶抱, 而限以非次, 謂曰:「我三子一弟所爲如此, 有異議者, 取佩刀以授晉王。無忌等請太宗所欲, 迴惑不決。 臣請斬之。」太宗謂晉王曰:「汝舅許汝, 御兩儀殿, 我心無憀。 羣官盡出 因自投於床 獨留無忌

宜拜謝。」因下拜。太宗謂無忌等曰:「公等既符我意,未知物論何如?」無忌曰:「晉王仁

天下屬心久矣, 伏乞召問百寮, 必無異辭, 若不舞蹈同音, 臣負陛下萬死。

因此, 御前會議 定,則朝臣黨派之活動必不能止息,太宗之苦悶不堪,實職此之由也。又觀於其經此戲劇式之 從得居擁立之功耶? 為失態, 太子之嗣位亦不得不別有擁戴扶立之元勛。若皇儲之繼承權本極固定者,則此輩元勛何 藉以籠制諸腹心大臣,然其内心之煩惱迴惑已臻極點, ,建立晉王為太子之後,復欲改立吳王恪,可知當日皇位繼承終是摇動不固定之事 太宗蓋世英雄,果於決斷, 因加授無忌太子太師。 而至皇位繼承問題乃作如此可笑之狀, 尋而太宗又欲立吴王恪, 無忌密争之, 則無可疑。 其事 蓋皇位繼 雖或 施 用 承 權 既 不 故

乃屬於別一範圍, 殺其親生之子孫, 至於高宗本庸懦之主, 茲不討論, 僅略引有關高宗武曌廢立其子之史文於下: 何況區區廢立之事?故其皇位繼承之不定乃更意中事也。 受制於武后, 其皇儲之不固定夫何足怪?而武曌則為曠世 若立子立姪之問題 怪傑, 既

舊唐書捌陸燕王忠傳(新唐書捌壹燕王忠傳同)云:

忠,高宗長子也, [永徽]三年立忠爲皇太子,顯慶元年廢忠爲梁王。

同書柒中宗紀略云

政治革命及黨派分野

永隆元年章懷太子廢,其年立爲皇太子。弘道元年高宗崩, 即帝位,嗣聖元年二月皇太后

元年正月張柬之等率羽林兵誅[張]易之、昌宗,迎皇太子監國。乙巳則天傳位於皇太子, 廢帝爲廬陵王,其年五月遷於均州,尋徙居房陵。聖曆元年召還東都,立爲皇太子。

丙午即皇帝位。

同書同卷睿宗紀略云:

温等。甲辰少帝遜於别宫,是日即皇帝位。 宗爲皇太子,封帝爲相王。景龍四年夏六月中宗崩,臨淄王諱[隆基]等率兵入北軍, 嗣聖元年則天臨朝,廢中宗爲廬陵王,立[帝]爲皇帝。及革命,改國號爲周,降帝爲皇 徙居東宫,其具儀一比皇太子。聖曆元年中宗自房陵還,請讓位於中宗。 則天遂立中 誅韋

口 [書壹壹陸承天皇帝倓傳(新唐書捌貳承天皇帝倓傳同,又參舊唐書捌陸新唐書捌壹孝敬皇帝 章懷太子傳)云:

最幼,〔與〕天后所生三子自爲行第,故睿宗第四。長曰孝敬皇帝(弘),爲太子監國, 明孝悌,天后方圖臨朝,乃鴆殺孝敬,立雍王賢爲太子。賢每日憂惕, [李] 泌因奏[肅宗] 曰:「臣幼稚時念黄臺瓜辭,陛下嘗聞其說乎?高宗大帝有八子, 愍,辭云: 『種瓜黄臺下。瓜熟子離離。一摘使瓜好。再摘令瓜稀。三摘猶尚可。四摘抱 弟同侍於父母之側,無由敢言,乃作黄臺瓜辭,令樂工歌之,冀天后聞之省悟, 知必不保全, 即 而仁

證鄙説 為必能終繼武曌之位,無有可疑者,則五王等更將何所依藉,以為號召之口實耶?茲録通 其本末今不能詳述, 所欲論者, 即中宗雖復立為皇太子, 其皇位繼承權實非固定, 唐為中興復辟;自武則天方面言之,則不過貪功之徒擁立既已指定而未甚牢固之繼承儲 (凡唐代之太子實皆是已指定而不牢固之皇位繼承者, 完年五月甲午以侍中齊公敬暉為平陽王條考異所引,而為司馬君實所不取之統紀原文,以佐 可注意者, 焉, 其文云 實神龍元年正月癸卯(二十日)玄武門之事變,其事自唐室諸臣言之,則易周為 故有待於擁立之功臣也)。此役之是非及 若全國 君而已 鑑神 俱認

櫛類, 太后善自粉飾, 形容羸悴。 雖子孫在側,不覺衰老(其實此語通鑑上文已採用之矣)。及在上陽宮不復 上(中宗)入見,大驚。太后泣曰:「我自房陵迎汝來,固以天下授汝矣.

此節史料實可解釋中宗朝武氏權勢不因則天失位而消滅之故, 而五賊貪功,驚我至此。」上悲泣不自勝,伏地拜謝死罪。 溫公轉不之信, 由是[武]三思等得入其謀 無乃過於審慎

層唐書捌陸殤皇帝重茂傳云:

景龍四年中宗崩,韋庶人立重茂爲帝,而自臨朝稱制。 及韋氏敗, 重茂遂遜位, 讓叔父相

Ŧ

同書同卷節愍太子重俊傳(新唐書捌壹節愍太子重俊傳同)云:

公主陵忽重俊,以其非韋氏所生,常呼之爲奴。或勸公主請廢重俊爲王,自立爲皇太女, [神龍]二年秋立爲皇太子,時武三思得幸中官,深忌重俊。三思子崇訓尚安樂公主,常教

重俊不勝忿恨。

成器 其皇位繼承之不固定,無待言矣。至玄宗雖非長嫡,然以誅滅韋氏戴立睿宗之大功得越其嫡兄 睿宗嫡長子成器雖曾居皇太子之位,終以其庶弟隆基(玄宗)功業顯著之故,而讓皇儲之位。是 實以既受武三思父子及安樂公主等之陵忌,明知其皇位繼承權至不固定,遂出此冒險之舉耳。 立,何況其非韋氏所生者乎?重俊起兵失敗,已於前言之,茲不復論,但究其所以舉兵之由 寅恪案 : 殤帝重茂以韋氏敗見廢,假使韋氏不敗,而做武曌之前例行事,則重茂亦未必能久 立為皇太子,此蓋有懲於建成太宗之故事,宜其皇位繼承權之固定,及考諸

舊唐書玖伍讓皇帝憲傳(新唐書捌壹讓皇帝憲傳同)云:

茲略引史文以證明之。

讓皇帝憲本名成器,睿宗長子也。文明元年立爲皇太子,及睿宗降爲皇嗣, 爲皇孫,唐隆元年進封宋王。睿宗踐阼,將建儲貳,以成器嫡長,而玄宗有討平韋氏之 則天 册授成器

功, 意久不定, 成器固讓, 睿宗乃許之。

· 書捌玄宗紀上(新唐書伍玄宗紀略同)略云:

百

矣。」睿宗曰:「傳德避災,吾意決矣。」七月壬午制曰:「皇太子可令即皇帝位!」上(玄 事已上並取皇帝處分! 羽林將軍李慈等與太平公主同謀,期以其月四日以羽林軍作亂,上密知之,因出武德殿, 武德殿視事,三品以下除授及徒罪皆自決之。先天二年七月三日左羽林大將軍常元楷、右 宗)叩頭請所以傳位之旨。睿宗曰:「吾因汝功業得宗社,易位於汝,吾知晚矣。」上始居 月兇黨因術人聞睿宗曰:「據玄象,帝座及前星有災,皇太子合作天子,不合更居東宫 入虔化門,梟常元楷、李慈於北闕。睿宗明日下韶曰:「朕將高居無爲,自今軍國政刑 曰:「皇太子[隆]基宜令監國!其六品以下除授及徒罪以下並取[隆]基處分!」延和元年六 [唐隆元年]七月丙午[睿宗]制曰:「第三子[隆]基可立爲皇太子!][景雲]二年二月又制

(寅恪案:通鑑貳壹拾開元元年七月乙丑上皇徙居百福殿。)

書玖陸姚崇傳(新唐書壹貳肆姚崇傳同)云:

以爲不便,元之(崇本名元崇,因惡與突厥叛人同名,改爲元之)同侍中宋璟密奏,請令公 時玄宗在東宫,太平公主干預朝政,宋王成器爲閑廐使,岐王範、薛王業皆掌禁兵,

之、璟等離間兄弟,請加罪,乃貶元之爲申州刺史。 主往東都,出成器等諸王爲刺史以息人心。睿宗以告公主,公主大怒。玄宗乃上疏以元

同書同卷宋璟傳(新唐書壹貳肆宋璟傳同)云:

時太平公主謀不利於玄宗, 嘗於光範門內乘輦, 伺執政以諷之, 衆皆失色。璟昌言曰:

「東宫有大功於天下,真宗廟社稷之主,安得有異議?」乃與姚崇同奏請令公主就東都。玄 抗表請加罪於璟等,乃貶璟爲楚州刺史。

同書玖柒張説傳(新唐書壹貳伍張説傳同)云:

即帝位。俄而太平公主引蕭至忠、崔湜爲宰相。以説爲不附已,轉爲尚書左丞,罷知政 臣分定,自然窺観路絶,災難不生。」睿宗大悦,即日下制皇太子監國。明年又制皇太子 左右相顧,莫能對。說進曰:「此是讒人設計,擬揺動東宫耳,陛下若使太子監國,則君 是歲(景雲二年)二月睿宗謂侍臣曰:「有術者上言:五日内有急兵入宫,卿等爲朕備之!」 仍令往東都留司。説既知太平陰懷異計,乃使獻佩刀於玄宗,請先事討之,玄宗嘉納

寅恪案:玄宗既以有大功故得立為皇太子,而其皇位繼承權仍不固定,其後雖已監國,並受內 即皇帝位矣,而其皇位之不安定也如故,必至誅夷太平公主黨徒之後,睿宗迫不得已,放

棄全部政權, 幸玄宗早知其謀,先發制人,得斬禁軍統將常元楷、李慈等,唐代中央政治革命之成敗繫 退居百福殿,於是其皇位始能安定,此誠可注意者也。至太平公主欲以羽 林 軍作

於北門衛兵之手,斯又一例證矣。

舊唐書壹佰柒廢太子瑛傳(新唐書捌貳太子瑛傳同)略云:

至尊。 廢太子瑛,玄宗第二子也,開元三年正月立爲皇太子。及武惠妃寵幸, [瑛母趙]麗妃恩乃 太子妃兄薛鏞搆異謀。玄宗遽召宰相籌之。林甫曰:「此蓋陛下家事,臣不合參知。」玄宗 開元]二十五年[惠妃女咸宜公主夫]楊洄又搆於惠妃,言瑛兄弟(鄂王瑶、光王琚)三人與 , 惠妃之子壽王瑁鍾愛, [惠] 妃泣訴於玄宗, 以太子結黨, 將害於妾母子, 亦指斥於 事且寢。李林甫代張九齡爲中書令,希惠妃之旨,託意於中貴人,揚壽王瑁之美。 玄宗震怒,謀於宰相,意將廢黜。中書令張九齡奏曰:「今太子既長,無過。」玄宗

意乃決矣。使中官宣韶於官中,並廢爲庶人,鏽配流,俄賜死於城東驛。

與否 寅恪案:瑛乃玄宗初立之太子,其皇位繼承既已不能固定矣,至於此後所立之太子即後來繼位 殊未可知也。 其皇位繼承權亦屢經動摇,若非乘安禄山叛亂之際擁兵自立為帝,則其果能終嗣皇位

新唐書貳佰柒宦者傳上高力士傳(參考通鑑貳壹肆開元二十六年條考異)云:

忽不食。力士曰:「大家不食,亦膳羞不具耶?」帝曰:「爾我家老,揣我何爲而然?」力士 曰:「嗣君未定耶?推長而立,孰敢争?」帝曰:「爾言是也。」儲位遂定。 初,太子瑛廢,武惠妃方嬖,李林甫等皆屬壽王[瑁],帝(玄宗)以肅宗長,意未決,居忽

舊唐書拾肅宗紀略云:

已,乃從,是月甲子即皇帝位於靈武。 軍[欲收復長安]。七月辛酉上至靈武,[裴]冕[杜鴻漸]等凡六上牋[請即皇帝位]。上不獲 行。明年六月關門不守,國忠諷玄宗幸蜀,車駕將發[馬嵬頓],留上在後宣諭百姓,上迴 仍遣上親總諸軍進討。時禄山以誅楊國忠爲名,國忠懼,乃與[楊]貴妃謀間其事,上遂不 潜謀不利,爲患久之。[天寶]十四載十一月[安]禄山稱兵詣闕,十二月辛丑制太子監國 立儲貳,時壽王瑁母武惠妃方承恩寵,林甫希旨,以瑁對,及立上(肅宗)爲太子,林甫懼 不利己,乃起章堅、柳勣之獄,上幾危者數四。後楊國忠依妃家,恣爲褻穢,懼上英武, 玄宗第三子,開元二十六年六月庚子立爲皇太子。初太子瑛得罪,上召李林甫,議

百 ."書壹捌肆宦官傳李輔國傳(新唐書貳佰捌宦者傳下李輔國傳同)云:"

請分玄宗麾下兵,北趨朔方,以圖興復,輔國從至靈武,勸肅宗即帝位,以繫人心。 [安]禄山之亂,玄宗幸蜀,輔國侍太子(肅宗),扈從至馬嵬, 誅楊國忠, 輔國獻計太子,

取帝位,不僅別開唐代內禪之又一新局,而李輔國因是為擁戴之元勛,遂特創後來閹寺擁戴 立為皇太子之後 寅恪案:玄宗何以捨壽王瑁而立肅宗為皇太子,此為別一問題,非茲篇所能論及也。惟肅宗既 ,其皇位繼承權甚不固定,故乘安禄山叛亂玄宗倉卒幸蜀之際, 分兵北走 自

舊唐書壹壹代宗紀略云: 廢黜儲君之先例,此甚可注意也。

等始迎上於九仙門,見羣臣,行監國之禮,己巳即皇帝位於柩前 三殿,收捕越王係及内官朱光輝、馬英俊等, 宫李輔國、程元振素知之,乃勒兵於凌霄門,俟太子至,即衛太子至飛龍廐。是夕勒兵於 無子,后懼上(代宗)功高難制,陰引越王係於宮中,將圖廢立。乙丑皇后矯韶召太子,中 代宗,肅宗長子,[乾元元年]四月庚寅立爲皇太子。寶應元年四月肅宗大漸,所幸張皇后 禁錮之,幽皇后於别殿。丁卯肅宗崩,

百 書伍貳后妃傳下肅宗張皇后傳(新唐書柒柒后妃傳下肅宗張皇后傳同)略云::

甫等謀立越王係,矯韶召太子入侍疾。中官程元振、李輔國知其謀,及太子入,二人以難 先在靈武時,太子(代宗)弟建寧王俊爲后誣譖而死,自是太子憂懼,常恐后之搆禍。 建寧之隙,常欲危之。寶應元年四月肅宗大漸,后與內官朱輝光、馬英俊、啖庭瑶、陳仙 請太子在飛龍廐。元振率禁軍收越王係、 朱輝光等。俄而肅宗崩,太子監國,遂移后 后以

於别殿,幽崩,誅馬英俊[等]。

同書壹壹陸承天皇帝倓傳(新唐書捌貳承天皇帝倓傳同)略云:

時廣平王(代宗)立大功,亦爲張皇后所忌,譖搆流言。

司 ·書壹捌肆宦官傳李輔國傳(新唐書貳佰捌宦者傳下李輔國傳同)云:

輔國判元帥行軍司馬,專掌禁軍,代宗即位,輔國與程元振有定策功。

可 ·書同卷宦官傳程元振傳(新唐書貳佰柒宦者傳上程元振傳同)云:

寶應末肅宗晏駕,張皇后與太子(代宗)有隙, 知其謀 密告李輔國, 乃挾太子誅越王並其黨與。 恐不附已,引越王係入宫,欲令監國。

爭,即是其例。至於李氏子孫無論其得或不得繼承帝位如代宗與越王係之流,則皆閹寺之傀儡 承之决定,乃歸於閹寺之手矣。但閹寺之中又分黨派,互有勝敗,如程元振等與朱輝光等之 四月乙丑(十六日)事變張皇后失敗後,唐代宮禁中武曌以降女后之政柄,遂告終結。而皇位繼 寅恪案:代宗雖有收復兩京之功,而其皇位繼承權不固定如此。最可注意者,則為自實應 元

舊唐書壹壹捌楊炎傳 (新唐書壹肆 伍楊炎傳同)略 云:

而已。

李正己上表請殺[劉]晏之罪。炎懼,乃遣腹心分往諸道,言晏之得罪以昔年附會姦邪,

立獨孤妃爲皇后,上自惡之,非他過也。

書同卷黎幹傳(新唐書壹肆伍黎幹傳同)云:

同

大曆中德宗居東宫, 幹及[宦官劉]清潭嘗有姦謀動摇。

同書壹貳叁劉晏傳(新唐書壹肆玖劉晏傳同)略云:

凶謀果矣。」 「賴祖宗福佑,先皇(代宗)與陛下(德宗)不爲賊臣所間,不然,劉晏、黎幹之輩揺動社稷,

時人風言:代宗寵獨孤妃,而又愛其子韓王迥,晏密啓請立獨孤爲皇后。[楊]炎奏言:

書壹叁柒趙涓傳(新唐書壹陸壹趙涓傳同)云:

情,既奏,代宗稱賞焉。德宗時在東宫,常感涓之究理詳細。 爲巡使,俾令即訊。涓周歷壖囿,按據跡狀,乃上直中官遺火所致也。推鞫明審,頗盡事 永泰初,涓爲監察御史。時禁中失火燒屋室數十間,火發處與東宮稍近,代宗深疑之。涓

寅恪案:此德宗為太子時,其皇位繼承權亦不固定之證也。

新唐書柒順宗紀略云:

廢者屢矣,賴李泌保護,乃免。 大曆十四年十二月乙卯立爲皇太子,郜國公主以蠱事得罪,太子妃其女也。德宗疑之,幾

政治革命及黨派分野

舊唐書壹叁拾李泌傳(新唐書壹叁玖李泌傳同)云:

順宗在春宫, 妃蕭氏母郜國公主交通外人,上(德宗)疑其有他, 連坐貶黜者數人,

危, 泌百端奏説, 上意方解。

同 ·書壹伍玖衛次公傳(新唐書壹陸肆衛次公傳同,並參考舊唐書壹伍玖鄭絪傳)云: 人或云:「内中商量所立未定。」衆人未對,次公遽言曰:「皇太子(順宗)雖有疾, [貞元]二十一年正月德宗昇遐,時東宫(順宗)疾恙方甚,倉卒召學士鄭絪等至金鑾殿。中 地居冢

嫡, 内外繫心, 必不得已, 當立廣陵王(憲宗), 若有異圖, 禍難未已。」 網等隨而唱之,

衆議方定。

摇則為事實也。

詳,蓋與新唐書李泌傳同採自鄴侯家傳,李繁述其父事雖多溢美,然順宗當日皇位繼承權之動 寅恪案:通鑑貳叁貳貞元三年六月條及貳叁叁貞元三年八月條載順宗為皇太子時幾被廢黜事甚

係與皇位繼承二端合併論證,而在論證此二端之前,先一言唐代士大夫黨派分野之界綫焉。 歸 依時代之次序,此下當論述憲宗之事蹟。但永貞內禪尤為唐代內廷閹寺黨派競爭與外朝士大夫 本篇中專論唐代皇位繼承不固定之事實, 係之一最著事 例,且唐代外廷士大夫之牛李黨爭即起於憲宗元和之世。 則至德宗順宗之交為止。 此後以内廷及外朝之黨派關 茲為叙述便利之故

其先代 即 東士族中第 承用伯起元文)云: 統治 則 之高官厚禄為其唯一之表徵, 為 階級 北 朝傳統 一等門第也, 在 武 之山 嬰未 東 破 然魏收著魏書, 土族 壞 弱 中 凡外 本位 而實以家學及禮法等標異於其 廷士大夫大抵為此類之人也。 政 其第肆柒卷盧玄傳論(李延壽於北史叁拾盧玄等傳 策 以 前, 除宇文泰所創 建之胡 他諸 所謂 姓。 漢 族 關 如范 者 隴 集團 陽 其 初 盧 並 胡 氏 者 漢 不 專 諸 用 Ш 族

高 盧玄緒 冠 業著聞 蓋德業儒素有過 首應旌命, 子孫繼 跡 爲世盛門。 其文武功業殆無足紀, 而見重於時, 聲

江左 北 其 是。 其實 高 人之政治及社會地位 朝 門通婚 魏晉之際雖 伯起此言 族問 事 題之全部, 非若後來士族之婚宦二事專以祖宗官職高下為惟一之標準者也。 以為例證, 不獨限於北魏時之范陽盧氏, 般社 其餘 茲篇殊難詳悉考辨。 即與鉅族之子弟無所區別, 會有鉅族、 不能多及, 小族之分, 但可 N 故除上引魏書盧玄傳論之關於河 凡 苟小族之男子以 類 兩 推 晉、 也 小族之女子苟能以禮法特見尊 南北朝之士 才器 族 語者聞 盛門, 考其 得 北 此 稱 者外, 點關 為名 原 重 始, 係 上 者 更舉關 兩 則 幾 亦 無 可 不 南 與 則 如 於

舊 政拾 上文苑傳 F 袁朗傳 (新唐 唇質 佰壹文藝傳 F 袁 朗 傳 同 略 云

其先自陳郡仕江 左 世爲冠族。 朗自以中外人物爲海内冠族, 雖琅邪王氏繼有臺

司馬清河張沛通謁, 而歷朝首爲佐命,鄙之不以爲伍。 沛即侍中文瓘之子。 誼揖之曰: 「司馬何事?」沛曰: 「此 朗孫誼又虞世南外孫, 神功中爲蘇州刺史, 州 當因視 得

是隴西李亶,天下甲門。」誼曰:「司馬何言之失?門戶須歷代人賢名節風教爲衣冠 始可稱舉,老夫是也。夫山東人尚於婚媾,求於利禄,作時柱石, 見危致命,

何可說之, 以爲門户?」沛懷慚而退, 時人以爲口實。

隋唐時代門第演化通義, 其分別如是而已, 然於此亦可觀古今世變矣。 寅恪案:袁誼、張沛之言皆是也,不過袁説代表六朝初期門第原始本義, 可取與新唐書壹玖玖儒學傳中柳沖傳附載柳芳論氏族文中 又袁誼「山 張説 代表六 東人尚於婚 朝後期及

山東之人尚婚姪,江左之人尚人物,關中之人尚冠冕,代北之人尚貴戚。

語參證。其實袁張之異同亦涉及地域及種族問題,匪僅古今時間之關係,但此非本篇所能具

相傳之學 夫士族之特點既 勵名行為仕宦之途徑,而致身通顯也。自東漢末年中原喪亂以後,學術重心自京師之太學 茲不復贅。 業乃與當時之政治社會有極重要之影響, 在 其門風之優美,不同於凡庶,而優美之門風實基 但東漢學術之重心在京師之太學, 此事寅恪嘗於拙 學術 與政治 之關 著隋 一於學 鎖則 唐 業之因襲。 制 為經 度 淵 源 故 略論 蓋以 士族家世 稿 禮儀 通

士科 染混 浮華 主張 史實 以 黨之如 薰習之事 移轉於 致從 身, 經 猶 同 放浪著 何構 以證 政之 地 學為正 以文詞 不能改易 而 Ifu 方之豪 放浪 稱者, 論之。 成 但 新 貫軌 宗、 興 兩者分野之界畫要必於其 為清流仕 以及其 也 階 族 才華之人或為公卿高門之子弟者 薄進士: 多為高宗、 級 轍 總之, 難已 學術 進之唯 此 與内廷閹寺之黨派互 取 一為浮冶者, 本身雖 點 得統 在 兩 武后以來君主所提拔之新 種新 河 亦有 治 途徑者大有 北 舊 地位 即 大抵 所謂 變遷, 不 社會歷史背景求之, 同 之士大夫 仍未具 出 Ш 相鈎結利用之隱微本 於北 不同 東地 然其 舊 朝以 也。 域 與 階 日 則因舊日 尤 政 治 級 來 由 Ш 為 空間 東舊 之關 Ш 此 顯 興統治階 東 可 著 然後唐代士大 之士族 設 時 族 士族之舊家也。 鎖 之禮 間 實 仍 一假定之説: 級也。 末, 既 與 循 非 法門 既已淪 唐 其 始可 絶 東 高 其間 風, 對 宗 漢 以 夫 隔 替 以 豁 最 其 離 其子弟逞 Ш 即 武 來 唐代 則天 乃與 東舊 然 大黨 由 通 自 淮 通 經 解 示 新 族 派 1 義 能 才放 興階 亦有 如 出 大 請略 牛 夫中 無 身 車 勵 李 傳 浪 而 尚 級 由 名 諸 染 進 以 其 准

類李 舊唐 不 書壹 太尉德裕 可信)云 捌上 武 宗 出 學院 紀會昌 條 兀 年 謂德裕父吉甫勸 末 載宰 相李德裕之言(參 勉德裕應舉及玉泉子李德裕以己非科第 考新 唐書肆 肆 選舉志, 又唐 語 條所言 林壹言 恐 語

臣無名第, 不合言進士之非。 然臣 祖 (李栖筠)天寶末 以仕進 無他歧 勉强 隨 計 舉登

者?自小便習舉業, 第,自後不於私家置文選,蓋惡其祖尚浮華,不根藝實。然朝廷顯官須是公卿子弟, 目熟朝廷間事,臺閣儀範班行準則不教而自成,寒士縱有出人之才, 何

登第之後始得一班一級,固不能熟習也。

新 唐書肆肆選舉志(參考舊唐書壹柒叁鄭覃傳、王定保摭言壹散序進士條等)略云:

初舉人既及第,綴行通名,詣主司第謝,又有曲江會題名席。 色有之。進士科取人二百年矣,不可遽廢。」因得不罷。武宗即位,宰相李德裕尤惡進士。 鄭覃以經術位宰相,深嫉進士浮薄,屢請罷之。文宗曰:「敦厚浮薄, 至是德裕奏:「國家設科取

士,而附黨背公,自爲門生,自今一見有司而止,其期集參謁曲江題名皆罷。」

舊唐書壹柒肆李德裕傳(新唐書壹捌拾李德裕傳同,又參考玉泉子李衛公以己非科第條

漢書、左氏春秋,耻與諸生同鄉賦, 李德裕,趙郡人,祖栖筠御史大夫,父吉甫趙國公。元和初宰相,德裕苦心力學,尤精西 不喜科試。

新唐書壹陸叁柳公綽傳附仲郢傳云:

知吏部銓, [李]德裕頗抑進士科, 仲郢無所徇, 是時 以進士選, 無受惡官者。

唐書壹柒叁鄭覃傳(新唐書壹陸伍鄭珣瑜傳附覃傳同)。 略云:

鄭覃(滎陽人),故相珣瑜之子,以父蔭補弘文校理。覃長於經學,稽古守正,帝(文宗)尤

相 之失。 延英論古今詩句工拙。覃曰:「近代陳後主、隋煬帝皆能章句,不知王者大端,終有季年 之,未必獨在進士。此科置已二百年,亦不可遽改。」覃曰:「亦不可過有崇樹。 奏署,即可之,餘即否。」覃曰:「此科率多輕薄,不必盡用。」帝曰:「輕薄敦厚, 文華,所以不治。士以才堪即用,何必文辭?」帝曰:「進士及第人已曾爲州縣官者, 李紳。二人貶黜,覃亦左授秘書監。九年六月楊虞卿、李宗閔得罪長流,復以覃爲刑部尚 嫉人朋黨,爲宗閔所薄故也。」八年德裕罷相,宗閔復知政,與李訓、 侑通經學,頗似鄭覃。」宗閔曰:「覃侑誠有經學,於議論不足聽覽。」李德裕對曰:「覃嘗 月復召爲侍講學士。七年春李德裕作相,以覃爲御史大夫。文宗嘗於延英謂宰相曰:「殷 宗閔以覃與李德裕相善,薄之,奏罷[覃翰林]侍講學士。文宗好經義,心頗思之,六年二 重之。覃從容奏曰:「經籍訛謬,博士相沿,難爲改正,請召宿儒奧學,校定六籍,準後 固以足疾不任朝謁[辭]。會昌二年致仕,卒。覃位至相國,所居纔庇風雨, 開成初奏:禮部貢院宜罷進士科。初紫宸對上(文宗)語及選士,覃曰:「南北朝多用 遷尚書右僕射。 章句小道,願陛下不取也。」[開成]四年罷相。武宗即位,李德裕用事,欲援爲宰 , 勒石於太學, 永代作則, 以正其闕。」從之。 [大和] 五年李宗閔、牛僧孺輔政 訓、注伏誅,以本官同平章事。覃雖精經義,不能爲文,嫉進士浮 鄭注同排斥李德裕、 」上當於 色色有 方鎮

家無媵

人皆仰其素風。 女孫適 崔皋, 官纔九品衛佐, 帝重其不婚權家。 (此十八字新傳之文)

唐語林貳文學類云:

文宗皇帝曾製詩以示鄭覃。覃奏曰:「乞留聖慮於萬幾,天下仰望。」文宗不悦。 示李宗閔。嘆伏不已,一句一拜,受而出之。上笑謂之曰:「勿令適來阿父子見之!」 覃出, 復

其故 族以經術禮法為其家學門風者逈然殊異,不能相容耶?南北朝社會以 高下, 唐代猶承其風習而不改, 此治史者所共知。 寅恪案: 士之科也。 人之偶然好 豈不以 而德裕及覃父子又世為宰相,其社會歷史之背景既 趙郡李氏、滎陽鄭氏俱是北朝數百年來顯著之士族,實可以代表唐代士大夫中主 惡為解釋。 文選為李氏所鄙視 「熟精文選理」乃進士詞科之人即高宗、 否則李文饒固有唐 石經為鄭覃所建刊, 一代不屬於復古派 茲更舉關於鄭覃之一事, 以補證新唐書所紀 武后以後新興階級之所致力, 其學術 趣向 無不相同, 之文雄, 始有關 何以亦薄文選之書 婚宦二端判 家世遺傳, 宜其共結一黨, 深惡 別 人物流 實與 不可 僅 ? Ш 東舊 一要之 品之 以 推 進

其不婚當世權門而重舊日士族之一節如下:

及崔盧耶?韶宗正卿取世家子以聞!」寅恪案:中立固出名家, 廣記壹 降土 捌肆 族 氏族 謂宰 類莊恪太子妃條(新唐 相曰:「民 間修婚姻, 書壹柒 不計官品, 貳 杜 兼 傳附中 而尚 但尚主 閥関。 -立傳 云 我 與納妃微有不同, 家 開 二百年天子, 成 初文宗以 故附

記於此,以供參證)云:

也?朕是數百年衣冠, 文宗爲莊恪太子選妃, :「朕欲爲太子婚娶, 無何神堯打家何羅去。 朝臣家□子女者, 本求汝鄭門衣冠子女爲新婚。 悉被進名, 」因罷其選。 士庶爲之不安。帝知之, 聞在外朝臣皆不願共朕作情親 (原注: 出盧氏雜説。 謂宰臣者 何

林肆企羡類亦引盧氏雜說此條,

但作「打朕家事羅訶去」。

四年五月之時間任宰相之職, 陸叁宰相表(舊唐書壹叁新唐書捌文宗紀及兩唐書鄭覃傳俱同),鄭覃以大和九年十一月至開 貳莊恪太子永傳同),魯王永以文宗大和六年十月册為皇太子,開成三年十月薨 ,又據新唐 程度極深之後,與舊日士族比較,自覺相形見絀,益動企羨攀仰之念。然貴為天子,終不能競 失禮之事不以為異」者(上篇之首已引),固應與山東士族之以禮法為門風者大有不同。及漢化 矣。又唐代皇室本出自宇文泰所創建之關隴胡漢集團,即朱元晦 之家尚不及山東舊門九品衛佐之崔氏,然則唐代山東士族心目中社會價值之高下估計 中覃之外, 《恪案:此條所載文宗語末句頗不易解,姑從闕疑。 山東舊族之九品衛佐, 別無鄭姓者。故知文宗「汝鄭門」之語專對覃而言者也。依覃之意, 於此可見當日山東舊族之高自標置,並非無因也。 而自大和六年十月至開成三年十月即魯王永為皇太子 據舊唐書壹柒伍莊恪太子永傳(新唐書捌 所謂「源流出於夷 李唐 狄, 期 數 亦 百 間 故閨 可 年天子 想見 宰相 成 書

年謂房玄齡條 至李唐皇室與山東士族之關係亦有可略言者。考唐室累代其初對於山東舊族本持壓抑政策,如 唐書玖伍高儉傳(參考舊唐書陸伍高士廉傳、唐會要叁陸氏族條、貞觀政要柒禮樂篇貞觀六 、舊唐書柒捌新唐書壹佰肆張行成傳、舊唐書捌貳新唐書貳貳叁姦臣傳上李義府

通鑑壹玖伍貞觀十二年正月條、

太平廣記壹捌肆氏族類七姓條等)略云:

之,凡九等,改爲姓氏録。當時軍功入五品者,皆升譜限,縉紳耻焉,目爲「勳格」。義府 武后世,李義府耻其家無名,更刊定之,裁廣類例。帝(高宗)自叙所以然,各以品位叙 冕爲等級高下。」遂以崔幹爲第三姓(姓舊傳作等),班其書天下。高宗時,許敬宗以 帝曰:「我於崔、盧、李、鄭無嫌, 初太宗嘗以山東士人尚閥閱,後雖衰, 奏。悉索氏族志, 故氏族志一切降之。 檢正真傷, 後來不如是也)。 合二百九十三姓千六百五十一家爲九等, 號曰氏族志, 燒之。 王妃主婿皆取當世勳貴名臣家, 先是, 後房玄齡、 後魏太和中定四海望族, 顧其世衰,猶恃舊,不解人間何爲貴之?朕以今日冠 魏徵、 子孫猶負世望, 李勣復與昏,故望不减。 由是韶士廉責天下譜牒, 未嘗尚山東舊族(寅恪案: 以[李]寶等爲冠。 而崔幹仍居第 其後矜 參考史 此爲 尚門 不叙

又國史補上(參考太平廣記壹捌肆氏族類)略云:

李積,酒泉公義倓姪孫,門户第一,而有清名,官至司封郎中懷州刺史。嘗以爲爵位不如

又通鑑貳肆捌大中二年十一月萬壽公主適鄭顥條云:

顯弟顗嘗得危疾,上遣使視之。還,問[萬壽]公主何在?曰在慈思寺戲場。上(宣宗)怒嘆 曰:「我怪士大夫家不欲與我爲昏,良有以也。」亟命召公主入宫,立之階下,不之視,公 涕泣謝罪。上責之曰:「豈有小郎病,不往省視,乃觀戲乎?」遣歸鄭氏。由是終上

又東觀奏記上(參唐語林柴補遺萬壽公主宣宗之女條、新唐書壹壹玖白居易傳附敏中傳)略云: 萬壽公主,上(宣宗)之女,將嫁,命擇良婿,鄭顥相門子(寅恪案: 顥之祖絪憲宗朝宰

之世,貴戚皆兢兢守禮法,如山東衣冠之族。

相爲邠寧行營都統,行有日,奏曰:「顯不樂國姻,衡臣入骨,臣在中書,顯無如臣何,

相),首科及第,聲名籍甚,待昏盧氏。宰臣白敏中奏選尚,顥深衡之。大中五年敏中免

去玉階, 必媒蘖臣短, 死無日矣。」

淮安王神通傳),而開成皇帝不能禁其宰相之寧以女孫適九品衛佐之崔皋(皋之家世未及詳考, 寅恪案:前言山東士族之所以興起,實用儒素德業以自矜異,而不因官禄高厚見重於人。 氏第二房鬱後之崔幹為第三等(見新唐書柴貳下宰相世系表崔氏條及舊唐書陸拾、 歷年雖久,而其家風禮法尚有未盡淪替者。故貞觀天子欽定氏族志,雖 可以降抑博陵崔 新唐書柒捌

氏, 其後君臣翁婿卒皆以此為深恨, 為「七姓」之一, 則無可疑也), 而不願其家人為皇太子妃 又何足怪哉 帝王之大權 不及社會之潜力, 此 至大中朝藉皇室之勢, 類之事 奪 即 婚 其 盧

一例,然非求之數百年往日背景,不易解釋也。

既 明 乎此 則牛李(德裕)黨派分野界畫之所在, 終可得而言。

唐語林叁識鑑類(參考南部新書丁)云:

卒無成效, 覃請經術孤立者進 但寄之頰舌而 已。 用, 李珏 與楊嗣復論 地胄詞彩者居先, 每延英議 政多異

之新 政治 如楊 虞卿傳及南部新書己大和中人指楊虞卿宅南亭子為行中書條等),轉成世家名族, 唐 於陵 興階 鄭為李(德裕)黨, 1 社會之地 武后之後崛興階級之新 族 陸 級 無異。 即 叁楊於陵傳、舊唐書壹柒陸新 嗣復及楊 使俱 位 逐漸 迨其拔起 非 虞卿、 依 擴大, 託, 李楊為牛黨, 汝士等, 但 馴致舊日 寒微之後, 工具。至孤立地胄之分別,乃因唐代自進士科新興階 舊習門風 Ш 經術乃兩晉、北朝以來山東士族傳統之舊家學,詞彩 流替始 門父子兄弟俱以 東士族如崔皋之家, 用 唐書壹柒肆楊嗣復傳、 科學 盡 座主 論其實質, 門生及同 進士起家, 轉 門等關係, 亦與高宗、 成孤寒之族。 舊 唐書壹柒陸 致 身 通 勾 武后 結 顯 若李(珏)楊之流 見見 朋黨 新唐 由 舊 進士 級 遂不得不崇 書壹 唐 成 4 詞 7 相援 柒 科 伍楊 陸肆 則 進身 助 其

中篇 政治革命及黨派分野

尚地胄,以鞏固其新貴黨類之門閥,而拔引孤寒之美德高名翻讓與山東舊族之李德裕矣(見摭 言染好放孤寒門李太尉德裕頗為寒畯開路條及唐語林柒補遺李衛公頗升寒素條等), 斯亦數百

年間之一大世變也,請略徵舊籍,證明於下:

摭言叁慈恩寺題名遊賞賦詠雜記條(略見上引新唐書選舉志)略云:

勅"「宜依!」 司,向後不得聚集參謁,及於有司宅置宴。其曲江大會,朝官及題名局席並望勒停。」奉 相,其年十二月中書覆奏:「奉宣旨,不欲令及第進士呼有司爲座主,趨附其門,兼題 風寖薄,臣節何施,樹黨背公,靡不由此。臣等商量今日已後,進士及第,任一度參見有 局席等條疏進來者。伏以國家設文學之科,求貞正之士,所宜行敦風俗, 進士題名,自神龍之後,過關宴後皆集會於慈恩塔下題名。會昌三年贊皇公(李德裕)爲上 申於朝廷,必爲國器,豈可懷賞拔之私惠,忘教化之根源,自謂門生,遂成膠固。所以時 義本 君親 然後

於是向之題名各盡削去。蓋贊皇公不由科第,故設法以排之,泊公失意,悉復舊態。

玉泉子云:

李相德裕抑退浮薄,獎拔孤寒。於時朝貴朋黨,德裕破之,由是結怨,而絶於附會,

賓客

B唐書壹捌下宣宗紀大中三年九月貶李德裕為崖州司户參軍制云:

誣 貞良造朋黨之名。

黨也。 據 此 李德裕所謂朋黨, 即指新興階級浮薄之士藉進士科舉制度座主門生同門等關係締結之牛

或疑 為鄜坊觀察使事略 通鑑貳叁捌元和七年春正月辛未條(新唐書壹陸貳許孟容傳附季同傳同),載京兆尹元義方 云

則 《似科舉制度與結黨無關者。但詳考之,知通鑑此條及新唐書許孟容傳俱採自李相國論事集, 同年固有情乎?」對曰:「同年乃九州四海之人偶同科第,或登科然後相識,情於何有?」 方入謝,因言李絳私其同年許季同,除京兆少尹,出臣鄜坊。明日上以詰絳曰:「人於

唐代科舉制度下座主門生及同年或同門關係之密切原為顯著之事,可不詳論, 書專紙 李吉甫, 固出於牛黨之手, 其所言同年無情, 乃牛黨強自辯護之詞, 殊非實狀也。夫 茲僅舉三數例於

其

[唐書壹柒柒章保衡傳(新唐書壹捌肆路巖傳附章保衡傳同)云:

亦足以

為證

明也。

保衡恃恩權, 素所不悦者,必加排斥。王鐸貢舉之師,蕭遘同門生,以素薄其爲人,皆擯

寅恪案:史所書保衡之惡,依當時習慣言,乃一破例。此正可以反證當日座主門生以及同 門之間 互相援助之常態也

「氏長慶集壹陸重題[草堂東壁]七律四首之四云:

宦途自此心長别,世事從今口不言。豈止形骸同土木,兼將壽夭任乾坤。胸中壯氣猶須 身外浮榮何足論!還有一條遺恨事,高家門館未酬恩。

寅恪案:白樂天此詩自言已外形骸,了生死,而猶惓惓於座主高郢之深恩未報,斯不獨香山居

士一人之篤於恩舊者為然,凡苟非韋保衡之薄行寡情者,莫不如是。此實可為唐代門生對座

關係密切之一例證也。

獨異志(參唐語林肆賢媛類、南部新書己)云:

子孫之業。笑答曰:「余有三十所美莊良田,遍在天下,夫人何憂?」夫人曰:「不聞君有 崔羣爲相,清名甚重,元和[中]自中書舍人知貢舉,既罷,夫人李氏嘗勸其樹莊田,以爲 乎?然往年君掌文柄,使人約其子簡禮,不令就春闈之試。如以爲良田,則陸氏 此 業。」羣曰:「吾前年放春榜三十人,豈非美田耶?」夫人曰:「若然者,君非陸贄相門生 莊荒

羣慚而退, 累日不食。

寅恪案:座主以門生為莊田,則其施恩望報之意顯然可知。此唐代座主對於門生關係密切之一

例證也。

舊唐書壹柒陸楊嗣復傳 (新唐書壹柒肆楊嗣復傳不載同門結黨之由, 不及舊傳之得其實, 又舊

唐書壹柒陸李宗関傳可與參證)云:

寅恪案:史言牛派鉅子以同門之故,遂結為死黨。此唐代科舉同門關係之一例證 復與牛僧孺、 李宗閔皆權德與貢舉門生,情誼相得, 進退取捨多與之同。 也。

學也; 高宗、 復次,唐代貢舉名目雖多,大要可分為進士及明經二科。進士科主文詞,高宗、武后以後之新 武后以後朝廷及民間重進士而輕明經之記載, 明經科專經術, 兩晉、北朝以來之舊學也。究其所學之殊,實由門族之異。 則知代表此二科之不同社會階級在此三百 故觀唐代自

康駢劇談録(参唐語林陸補遺)云:

年間升沈轉變之概狀矣。其記載略録於下:

不合應[進士]舉,賀遂致轗軻。 賀?」稹慚恨而退。 什,常交結於賀, 李賀善爲歌篇, 其後[稹]以制策登科,及爲禮部郎中, 日執贄造門,賀覽刺, 爲韓愈深所知, 韓愈惜其才, 重於縉紳。時元稹年少, 不答遽入。僕者謂曰:「明經及第, 爲著諱辯明之,竟不成名。 因議賀祖(祖當作父)諱晉[肅], 以明經擢第, 何 事 亦攻篇

寅恪案:劇談録所紀多所疏誤,自不待論。但據此故事之造成,可推見當時社會重進士輕明經

之情狀,故以通性之真實言之,仍不失為珍貴之社會史料也。

東觀奏記上(參新唐書壹捌貳李珏傳及唐語林叁識鑑類)略云:

非常人也,當撥進士科。明經碌碌,非子發跡之路。」一舉不第, 李珏, 趙郡贊皇人, 早孤, 居淮陰, 舉明經。李絳爲華州刺史,一 應進士[舉],許孟容爲 見謂之曰:「日角珠庭、

宗伯,擢居進士。

新唐書壹捌叁崔彦昭傳云:

[彦昭]與王凝外昆弟也,凝大中初先顯,而彦昭未仕,嘗見凝, 凝倨不冠帶,慢言曰:

氏妹必與子皆逐, 吾將共行。 「不若從明經舉。」彦昭爲憾。至是凝爲兵部侍郎,母聞彦昭相,敕婢多製履襪,曰:「王 」」彦昭聞之,泣且拜,不敢爲怨,而凝竟免。(寅恪案:此採

自尉遲偓中朝故事。)

摭言散序進士門云:

其艱難謂之三十老明經,五十少進士。

據上諸條,進士、 又唐代社會於此二科之評價,有高下之殊,亦由當時政治之關係所致,蓋朝廷與民衆二者互相 、明經二科在唐代社會其價值之高下,可以推知,不待廣引也。

影響也。如唐語林肆企羨類略云:

中篇

政治革命及黨派分野

薛 元超謂所親曰:「吾不才, 富貴過人, 平生有三恨: 始不以進士擢第。

寅恪案:上篇引通典壹伍選舉典叁所載沈既濟之言,謂進士科之特見尊重,實始於高宗、 武后

時。薛元超為高宗朝晚年宰相,是與沈氏之語適合也。

新唐書肆 肆選舉志(摭言叁慈恩寺題名遊賞賦詠雜志條同, 又新志此條前已徵引, 今為解釋便

利之故,復節録數語於此)略云:

門生,自今一見有司而止,其期集參謁曲江題名皆罷。」 武宗即位,李德裕爲宰相,尤惡進士。至是德裕奏:「國家設科取士,而附黨背公,

舊唐書壹捌下宣宗紀大中元年二月丁酉禮部侍郎魏扶奏臣今年所放進士三十三人條略云:

今進士放榜後, 帝(宣宗)雅好儒士,留心貢舉,有時微行人間,採聽輿論,以觀選士之得失。又勅:「自 杏園任依舊宴集, 有司不得禁制

寅恪案:宣宗朝政事事與武宗朝相反,進士科之好惡崇抑乃其一端,而此點亦即牛李二黨進退 榮辱之表徵也。 請更取證於下列史料:

唐語林肆企羨類(參説郛柒叁引盧氏雜説)云:

宣宗愛羨進士,每對朝臣,問登第否?有以科名對者,必有喜,便問所試詩賦題並主司姓 或有人物優而不中者,必歎息久之。嘗於禁中題「鄉貢士李道龍」(寅恪案:可參同書

又同書同類(參東觀奏記上)略云:

宣宗尚文學,尤重科名。大中十年鄭顥知舉,宣宗索登科記,敕翰林:「今後放榜,

夫大中一朝為純粹牛黨當政李黨在野之時期,宣宗之愛羨進士科至於此極,必非偶然也。

及第人姓名及所試詩賦題目,仰所司逐年編次!」

爾田先生玉 唐時牛李兩黨以科第而分,牛黨重科舉, 溪生年譜會箋叁大中二年下引沈曾植先生之言曰: 李黨重門第。

等),然則牛黨鉅子俱是北朝以來之舊門及當代之宗室,而李黨之健者如陳夷行 鑒類及舊唐書壹柒叁新唐書壹捌貳李珏傳等),李宗閔則為唐宗室,而鄭王元懿之四世孫(見舊 問曰:「牛黨中以進士科出身者如李珏,則系出趙郡李氏(見前引東觀奏記上,並參唐語林叁識 寅恪案:乙盦先生近世通儒,宜有此卓識,其所謂「牛黨重科舉者」自指重進士科 李讓夷之流復皆以進士擢第(見舊唐書壹柒叁新唐書壹捌壹陳夷行傳、舊唐書壹柒叁新唐書壹 唐書壹柒陸新唐書壹柒肆李宗閔傳及新唐書柒拾下宗室世系表小鄭元王房條等), 更是隋代達官兼名儒牛弘之八世孫,且承其賜田賜書之遺業。並以進士擢第者 新唐書壹柒肆牛僧孺傳及唐文粹陸伍李珏撰牛僧孺神道碑、 杜牧樊川集柒牛僧孺 而言也。 李紳 (見舊唐書壹 至黨魁牛僧 墓誌銘 李回

是李黨亦 李 傳 重 進士之科, 舊唐書壹柒叁新唐書壹叁壹李回傳、 前所謂牛李黨派之分野 在科舉與門第者, 舊唐書壹柒陸新唐書壹捌壹 毋乃不能 成立耶?應之曰:牛 李 讓夷傳等),

舊族 非 本在 一兩黨既 原 與 兩 至於李 則之大概 新 興階 産 生於同 唐皇 北 級 朝以 世 室 生死競 故互 在 來 時 開 Ш 國初 一受影 間, 爭之際, 東士族 期以 響一事可以不 而 與唐 地 屬 域 遠支之宗室其政治社會之地位實已無 於關隴 又相 高宗、 錯 集團之故, 論, 雜 武 則天之後由進士詞 所可論者約有 則其互受影響, 雖與 Ш 東舊族 三端 自不 科進用之新 頗 能免, 日牛 大別 無好 於 感 李兩黨之對立 但此為少數之特例 興 階 及中 般 級 + 兩者 族。 葉以 如 後 4 其 不 新 Ш 根 相 唐 東

唐有天下三百年, 遂與異姓之臣 雜 子孫蕃衍, 而 仕宦, 至或流落於 可謂盛 矣。 民間 其初 皆有封爵, 甚可歎 也 至其世遠親盡, 則各隨其 人賢

故對 復可 李, 於此 茲更舉數例以為證明, 尚 此 新 李 而門風 能 舊 保持舊有 口 M 之所以 統 「廢替, 治 階 之特長, 為李黨也。 級之鬥爭, 家學衰落 而解 如前 疑惑焉 傳 一日: 則此 處於 所 言 中 破 FF 凡 落户 風 Ш V. 家學之類 東 地 之與新興階級 舊 位 族 挺 既 身而 自 若鄭 可 牛, 出 電者 不 獨無所 與 此 新 李 即 興 宗 分別 其 階 閔之所以 級 作 例 也 H 殊 更宜 死 為 亦 4 與之同 有 黨 雖 也 號 必

化為其

亦

崔損,博陵人,高祖行功已後名位卑替,大曆末進士擢第。户部尚書裴延齡素與損善,乃 薦之於德宗, [貞元]十二年以本官(右諫議大夫)同中書門下平章事。[損]身居宰相, 母野 殯,不言展墓,不議遷祔,姊爲尼,没於近寺,終喪不臨,士君子罪之。

同書同卷盧邁傳(新唐書壹伍拾盧邁傳同)略云:

之親或不過從弔臨,而邁獨振薄俗,請臨弟喪,士君子是之。 歸葬於洛陽,路由京師,邁奏請至城東,哭於其柩,許之。近代宰臣多自以爲崇重,五服 元]九年以本官同中書門下平章事。[邁]友愛恭儉,從父弟记爲劍南西川判官, 盧邁, 范陽人, 少以孝友謹厚稱, 深爲叔舅崔祐甫所親重, 兩經及第, 遷尚書右丞, [貞 卒於成都

.書壹捌捌孝友傳崔沔傳(新唐書壹貳玖崔沔傳同,參顏魯公文集壹肆博陵崔孝公宅陋室銘記)

崔沔, 詞,母卒,哀毀逾禮。沔善禮經, 京兆長安人,自博陵徙關中,世爲著姓。沔淳謹,口無二言,事親至孝,博學有文 朝廷每有疑義, 皆取決焉。

同書壹壹玖崔祐甫傳(新唐書壹肆貳崔祐甫傳同)略云:

崔祐甫,父沔黄門侍郎,諡曰孝公。家以清儉禮法爲士流之則。安禄山陷洛陽,士庶奔

用(此語前已引),及祐甫代衮, 祐甫獨崎危於矢石之間,潜入私廟,負木主以竄。 薦延推舉,無復疑滯, 常衮當國,非以辭賦登 日除十數人,作相未逾年凡除吏八 科者莫得進

王氏繒帛菽粟, 百人,多稱允當。 王氏受而緘封之。及德宗還京, 朱泚之亂,祐甫妻王氏陷賊中,泚以嘗與祐甫同列, 具陳其狀以獻, 士君子益重祐甫家法 雅重其爲人, 乃遺

其享令名也。

邁之流, 乃真 邁既是祐甫之甥,其以孝友恭儉著稱,必受其父母兩系門風之薰習無疑。 此 知崔 損 山東舊族之代表, 雖與沔、 祐甫同屬博陵崔氏, 可與新興階級對壘相抗者也。 而 為當世所鄙薄之「破落户」,一 又舊唐書壹壹玖常袞傳(新唐 然則 為禮 崔沔、 法名家。 祐甫 廬 盧

天寶末舉進士,[作相]尤排擯非辭科登第者。

壹伍拾常袞傳同)云:

門閥 唐文粹伍陸李珏撰牛僧孺神道碑、 祐甫代袞 多不可信也, 即後來牛李之爭執 用人不拘於進士, 豈其意旨與 如杜牧樊川集柒牛僧孺墓誌銘 讀史者不可不知其一貫之聯繫也。 新唐書伍柒上宰相世系表牛氏條等)云: 李德裕、 (參考舊唐書壹柒貳 鄭覃所持之説 三日: 凡牛黨或 亦有合歟?是前日常崔之異 新 唐書壹柒肆 新 興 階 牛僧孺 級 所自 傳及 稱之

八代祖弘以德行儒行相隋氏,

封奇章郡公,贈文安侯。文安後四世諱鳳及,

仕唐爲中書門

ーナノ

生太常博士贈太尉紹。太尉生華州鄭縣尉贈太保諱幼聞。 下侍郎監修國史,於公爲高祖。 文安後五世集州刺史贈給事中諱休克,於公爲曾祖。 太保生公, 孤始七歲, 長安下杜 集州

寅恪案:新唐書柒伍上宰相世系表牛氏條與牧之文微有出入。牛弘仕隋,官至吏部尚書,迄未

樊鄉東文安有隋氏賜田數頃,書千卷尚存。

隋 嘗一為宰相(見隋書肆玖北史柒貳牛弘傳,但兩唐書牛僧孺傳皆謂弘為僕射,似因此可稱「相 宰之誤。然此等俱無關宏旨,可不深論。獨家有牛弘隋代賜田一事,似僧孺與弘之血統關 碑雖亦言賜田等事, 蓋承昔人之誤也。 考舊史弘傳止載弘卒後贈開府儀同三司光禄大夫,並未言贈僕射。 但無牛弘相隋之語, 可詳考通典貳壹職官典叁宰相條, 通鑑貳叁柒元和三年夏四月條胡注 茲不備論), 殆以吏部尚書當天官 又李珏撰牛僧孺 則云:「牛弘相 神道 係確 家

白氏長慶集貳玖襄州別駕 府君事狀 Z

不使人致疑於新興階級之多所依託也。

鑿可信,但一取與此相類之事即僧孺同黨白居易、敏中兄弟家所謂前代先祖賜田者考之,

則又

此 初高 謂有功於北齊之司空即白建也。 白建字彦舉,武平七年卒,贈司空。 祖贈司空有功於北齊, 韶賜莊宅各 據北齊書肆拾白建傳(北史伍伍白建傳略同 一區, 在同州韓城縣, 至今存焉。

略 Z.

臣 其所 建卒於北齊未亡以前。其生存 賜莊宅 何得越在 同 州韓城 時期, 即仇讎敵國之内乎?其為依託,不待辨説也。 周齊二國東西並峙, 互相爭競。 建為齊朝主兵之大 又新唐書柒

白建字彦舉,後周弘農郡守邵陵縣男。

伍下

宰相世系表

白

氏條列白

居易、

敏中之先世云:

源不 也。 則為北周弘農郡守,與北齊贈司空之事絕不能相容,其間必有竄改附會, 其所賜莊宅能在後周境內,後來子孫遠攀異國之貴顯,遂致前代祖宗橫遭「李樹代桃」之阨耶? 此 今雖難確 敏中之先世 白 無關 東舊族所鄙薄。 建既字彦舉, 定 氏親舅甥之婚配 此 1賜田本屬於一後周姓白名某字某之弘農郡守, 而其人卻是樂天兄弟真正之祖宗, 故 但非茲篇所能旁及者矣。 一重公案, 與北齊主兵大臣之姓氏名字俱無差異, 又白香山之違犯當時名教, 而新興階級所謂前代賜田之不能作絕對可信之物證,亦由是得以 (見近刊羅貞松先生遺稿), 坐不孝貶官 乃新興階級之陋習 是即白香山所自 雖有政治性質, 宜其 承之祖先也。 自無可疑。 終亦與其門族淵 為尊尚禮法 豈居 但其官 門 推 風 知

舊唐書壹柒貳令狐楚傳(新唐書壹陸陸令狐楚傳略同)云:

令狐楚自言國初十八學士德棻之後。

新唐書令狐楚傳雖删去「自言」二字,據其書柒伍下宰相世系表令狐氏條, 楚實非出自德棻。然

則舊傳「自言」之語固不應删也。夫楚綯父子繼世宰相, 亦與白敏中 相同。是牛黨或新興階級所自稱之門閥不足信賴 尤為牛黨之中堅,而其家世 觀此 可 知 也 譜牒之有所

舊族 進無 又就牛李黨派之分畫以進士科及舊門族為標識一點尚有須注意者, 如楊收 而翰 他塗 所以多由 門者 林學士復出自進士詞科之高選, 不得不舉進士(見前引舊唐書武宗紀中李德裕語),則貞元以 進 可謂唐末五代間之世家也, 士出 身, 與新 興階級同 化 山東舊族苟欲致身通顯, 觀舊唐書壹柒柒楊收傳所云。 而新 興階級復已累代貴仕, 自宜 即李 趨赴進士之科 後宰相多以翰林學士為 栖筠在天寶末年已以仕 轉成喬木世臣之家矣。 此 山東

楊收自言隋越公素之後。

論日

門非世胄,位以藝升。」

口 又唐代新 為舊族或新門, 拾哀帝紀天祐 、倡伎文學有密切關 為一例。 淫艷之詞 興之進士 然唐末黄巢失敗後,朱全忠遂執統治之大權。凡藉進士詞科仕進之士大夫,不論 二年四月癸巳勅文、壹壹叁裴遵慶傳附 亦大抵應進士舉時所作(寅恪案:此集冬郎自序中「大盗入關」之語實指 俱目為清流 詞 係, 科階級異於山 孫棨北里志所載即是一 而使同罹白 東之禮法舊門者,尤在其 馬之禍, 證。 斯又中 又如韓 樞傳及新唐書壹肆拾裴遵慶傳附樞傳等)。 -古政治社會之一大變也(見舊唐書貳 放浪 偓以忠節著聞, 不羈之風習。 其平 故唐之進士 生 著 述中 黄巢陷 香盒 一科

長安而言。震鈞即唐晏作韓承旨年譜乃誤以大盗屬之朱全忠,遂解釋詩旨,多所附會,殊不可 ,以不在此篇範圍 一,故不詳辨)。然則進士之科其中固多浮薄之士,李德裕、鄭覃之言殊

未可厚非, 而數百年社會階級之背景實與有關涉,抑又可知矣。

佑墓誌銘), 其家世風習, 例。或疑其祖佑既為宰相, 才名頗縱酒色條,及其樊川集中遣懷七絕「十年一覺揚州夢,贏得青樓薄倖名」之句等皆是 如牛黨之才人杜牧, 同)云 雖亦號為舊家,並非士大夫之勝流門族。舊唐書壹肆柒杜佑傳(新唐書壹陸陸杜佑 則知佑之父希望實以邊將進用(見新唐書壹陸陸杜佑傳及唐文粹陸捌權德興撰 實以放浪著稱。 唐語林柒補遺所載杜牧少登第恃才喜酒色條, 而兼通儒,是其人乃名家之子弟,似不可列之新興階級中。 杜舍人牧恃 但詳 其 杜 證 考

論非之。 佑]在淮南時, (寅恪案:權文公銘佑之墓,而不載李氏者, 妻梁氏亡後, 昇嬖妾李氏爲正室, 封密國夫人, 親族子弟言之, 不從, 殆爲之諱耶?)

又同書壹貳肆李正己傳附師古傳(新唐書貳壹叁藩鎮淄青李正己傳附師古傳同

又同書壹叁伍李齊運傳(新唐書壹陸柒李齊運傳同)云: [貞元]十五年正月,師古、杜佑、李樂妾媵並爲國夫人。

末以妾衛氏爲正室,身爲禮部尚書冕服以行其禮,人士嗤誚。

[日知]卒後,少子伊衡以妾爲妻,家風替矣。

亦好 興階 其 氏既 色事 級中 世 論 古 風 區 以 互 習 至少亦有如李伊衡之「以妾為妻,家風替矣」之歎。 號 也(可取 別矣。 相參證 與新興階級符合所致, 稱舊門 兩唐書杜佑傳附牧傳與唐語林柒補遺杜牧少登第恃才喜酒色條附 然則牧之以進士 (見新唐書柒貳上宰相世系表杜氏 知其家風固習於浮薄,不同山 」擢第, 實可與前述博陵崔 浮華放浪, 東禮法舊門也)。 條 損事 投身牛 並論, 而 黨, 若取 君 卿 蓋雖俱 不獨其本 較 所為 山東 乃與 稱 士族仍 人性 舊 胡 詞, 族 保持 質 武 仍 近 人同 載牧 不 似 其 妨 使 閨 科, 子 列之新 門 在當 晦

復經 加 李商 數百 以 出 圖 隱之出自 仕 入李牛 年社會之壓迫 進。 不僅 之黨 新興階級 牛 黨目 氣流尤為可畏者也(參舊唐書壹玖拾下文苑傳、 而終於錦 以放利背恩, 本應始終屬於牛黨, 悉年華惘然夢覺者敷?此五十載詞 恐李黨亦鄙其 方合當時社會階級之道德, 乃忽結 輕 薄 無 、操。 斯 人之凄凉 義 新唐書貳佰 Ш 所以 身世 雖 秉 一叁下 古 負 婚 絕代 李 可 哀

若 公綽傳附仲 和柳仲郢 處牛李二黨之間 郢傳同)略云: 則與義山不同, 舊唐書壹陸伍柳公綽傳附仲郢傳(新唐書壹陸叁柳

官。 期太尉恩獎及此!仰報厚德,敢不如奇章門館。」德裕不以爲嫌。仲郢嚴禮法, 法。僧孺歎曰:「非積習名教,安能及此?」[後李]德裕奏爲京兆尹,謝日言曰:「下官不 令以禄利贍南宅。 嘗感李德裕之知。 [公綽]子仲郢,元和十三年進士擢第,牛僧孺鎮江夏,辟爲從事。 退公布卷,不捨晝夜。子玭嘗著書誡其子弟。初公綽理家甚嚴,子弟克禀誡訓 仲郢以禮法自持, 大中朝,李氏無禄仕者,仲郢領鹽鐵時,取德裕兄子從質知蘇州院事, 令狐綯爲宰相,頗不悦。 私居未嘗不拱手,内齊未嘗不束帶。 仲郢與綯書自明, 三爲大鎮, 綯深感歎, 仲郢有父風, 廐無名馬, 尋與從質正員 重氣義 衣不薰 動 修禮 言家

尚門 自處 直 考柳氏雖是舊門, 然非 唐書柒叁上宰相世系表柳氏條), 維 風家學之山東舊族李德裕, 極諫科), 雖外來之世變縱極紛歧,而內 誠相懸遠矣。 受牛僧孺之知獎, :山東冠族七姓之一,公綽、仲郢父子所出,亦非柳氏顯著之房望(見新 君子讀史見玉溪生與其東川府主升沈榮悴之所由判,深有感於士之 故能置身牛李恩怨之外, 致位通顯, 獨家風修整,行誼敦篤,雖以進士詞科仕進(公綽舉賢良方正 自可謂之牛黨,然終用家門及本身之儒素德業, 行之修謹益 不可或闕 也。 較李商隱之見棄於兩黨 得見諒於尊

法者世稱柳氏云。

-李黨派之社會背景及其分野界畫既略闡明,其朝政競爭勝敗進退之史實始易於解釋。前論唐

代中央政變皇位繼承不固定之事跡至德順之間而止, 茲請續述順憲間永貞内禪隱秘之内容。但 因永貞內禪為內廷閹寺與外朝士大夫黨派勾結之一顯著事例,而牛李黨派實又起於憲宗元和時 此後即取內外朝之黨派與皇位繼承二事合併言之。所以然者,不僅為紀述便利計 亦因

此二事原有內在之關聯性,不得分隔論之也。

文甲編)。 關 韓書之後,以供參證焉 於永貞內禪之隱秘, 故茲於順宗實録避免繁冗, 寅恪已於拙著順宗實録與續玄怪録專論之(載北京大學四十週年 僅録其條目, 而略其原文, 別更節寫其他關於此 事者於 紀念論

韓愈順宗實録壹之

[王] 伾以[王] 叔文意入言於宦者李忠言,稱韶宣下條。

同書叁之

叔文欲帶翰林學士, 宦者俱文珍等惡其專權, 削去翰林之職條。

问書肆之

文珍、薛盈珍、尚解玉者皆先朝任使舊人同心猜怨條 天下事皆專斷於叔文,而王伾、李忠言爲之内主,[章]執誼執行於外,而中官劉光琦、 俱

同書伍シ

叔文入至翰林,伾入至柿林院,見李忠言、牛昭容條。

新 唐 書貳佰柒宦者傳上劉貞亮即俱文珍傳(舊唐書壹捌肆宦官傳俱文珍傳略同

論事, 貞 玉、吕如全等同勤帝立廣陵王爲太子監國, 神策兵以自强,即用范希朝爲京西北禁軍都將,收宦者權。而忠言素儒謹,每見叔文, 人以帝旨付忠言,忠言授王叔文,叔文與柳宗元等裁定,然後下中書,然未得縱,欲遂奪 元末宦人領兵, 附順者益衆。會順宗立, 淹痼弗能朝, 無敢異同。 唯貞亮乃與之争, 又惡朋黨熾結, 帝納其奏。元和八年卒, 因與中人劉光琦、 惟[宦者]李忠言、牛美人侍。美 憲宗思其翊戴之功 薛文珍 尚行、 與與

贈開府儀同三司。(此十五字舊傳之文。)

舊唐書壹伍玖路隨傳(新唐書壹肆貳路隨傳同)略云:

之修定。」韶曰:「其實録中所書德宗、順宗朝禁中事, 隨進憲宗實録,文宗復令改正永貞時事。隨奏曰:「伏望條示舊記最錯誤者,宣付史官,委 宜令史官詳正刊去, 其他不要更

初韓愈撰順宗實録,說禁中事頗切直,內官惡之,往往於上前言其不實,累朝有韶改修。及

修

黨競勝,王伾、王叔文固不待論,而外廷之士大夫韋執誼、劉禹錫、柳宗元等遂亦不得不退敗 寅恪案:憲宗之得立為帝,實由宦者俱文珍等之力。文珍與其同類李忠言異趣,故内 廷文珍之

文珍等。其公允之程度雖有可議,而其紀內廷宦官之非屬一黨及壓迫順宗擁立憲宗之隱秘 韓退之本與文珍有連(見昌黎外集叁送俱文珍序及王鳴盛蛾術編伍柒), 其述永貞内禪事, 惟其如此, 後來閹寺深不欲外人窺知,所以屢圖毀滅此禁中政變之史料也。 劉禹 陽夢得 頗袒 轉可

外集玖子劉子自傳述永貞內禪事云: -

夢得在當時政治上與退之處於反對地位者(觀昌黎集壹赴江陵途中詩「同官盡才俊, 太上(順宗)久寢疾,宰臣用事者都不得召對,官掖事秘,而建桓立順,功歸貴臣。

當時俱文珍一黨把持官掖脅迫病君擁立皇子之實録,而永貞內禪乃唐代皇位繼承之不固定及內 猜」之句,可以為證,其詳不能於此言之也),而所言禁中事亦與退之相同。然則韓劉之述作皆 劉,或慮言語洩,傳之落冤讎」等語。又叁永貞行及憶昨行詩「伾文未揃崖州 熾, 雖得赦 偏 恆愁 柳與

又舊唐書壹伍玖崔羣傳(新唐書壹陸伍崔羣傳同)云:廷閹寺黨派影響於外朝士大夫之顯著事例也。

憲宗不樂, 上尊號 出爲湖南觀察都團練使。 皇甫鎛欲加「孝德」二字。羣曰:有「睿聖」,則「孝德」在其中矣。 竟爲鎛所

寅恪案:皇甫鎛以斬惜「孝德」二字搆崔羣,憲宗竟信其語,因之不樂而出羣。據此,憲宗之於

牛李黨派之爭起於憲宗之世,憲宗為唐室中興英主,其為政宗旨在矯正大曆、 牛僧孺神道碑、杜牧樊川集柒牛僧孺墓誌銘, 得以維持不改。 · 擁立而即帝位,於是「銷兵」之議行,而朝局大變矣(後來牛李二黨魁維州之異 朝之李黨互相呼應,自不待言。 ,不僅由僧孺之嫉功也。 反對用兵之士大夫則多為李吉甫之政敵, 即用 似内有慚德也。 武力削平藩鎮, 及內廷閹寺黨派競爭既烈, 然則永貞內禪一役必有隱秘不能昌言者,從可知矣。 重振中央政府之威望。當時主張用兵之士大夫大抵屬於後來所謂李 可参考舊唐書壹柒貳新唐書壹柒肆牛僧孺傳及唐文粹伍陸 是以元和 憲宗為別一反對派之閹寺所弑, 而通鑑貳肆柴會昌三年三月條司馬光之論及胡三 即後來所謂牛黨。 朝此主用兵派之閹寺始終柄權, 而主持用兵之内廷閹寺一 穆宗 貞元姑息苟安之 因 用兵之政策因 此輩 同

派

與

李 此 斌 逆徒

珏 點

撰 亦

舊唐 書壹捌肆 宦官傳 吐突承璀傳 (新唐書貳佰柒宦者傳 上吐 突承 璀傳 同 略

注尤可注意也

0

古無中貴人爲兵馬統帥者」, 年王承宗叛, 吐突承璀幼以黄門直東宫, 韶以承璀爲河中等道赴鎮州行營兵馬招討等使。 憲宗即位, 憲宗不獲已,改爲充鎮州已東招撫處置等使。 授内常侍, 知内侍省事 諫官上疏相屬, 俄授左軍中 尉。 皆言 (元和) 自 四

承璀班師,

仍爲禁軍中尉。

段平仲抗疏,

極論承璀輕謀弊賦,

請斬之以謝天下。憲宗不獲

復爲神策中尉。惠昭太子薨,承璀建議請立澧王寬爲太子,憲宗不納,立遂王宥。 而宰相李絳在翰林時數論承璀之過,故出之。八年欲召承璀還,乃罷絳相位, 降爲軍器使,俄復爲左衛上將軍知內侍省事,出爲淮南節度監軍使,上待承璀之意未 承璀 還

n | 書壹陸肆李絳傳(新唐書壹伍貳李絳傳多採李相國論事集, 可參讀)| 云:

位, 銜承璀不佑已, 誅之。

故與吉甫不協,時議者以吉甫通於承璀,故絳尤惡之。 吐突承璀恩寵莫二,是歲(元和六年)將用絳爲宰相, 以絳爲中書侍郎同中書門下平章事。 同列李吉甫便僻善逢迎上意, 前 一日出承璀爲淮南監軍, 絳梗直多所規諫

翌日降

同書壹肆捌李吉甫傳(新唐書壹肆陸李栖筠傳附吉甫傳同)云:

劉闢反,帝(憲宗)命誅討之,計未決,吉甫密贊其謀,兼請廣徵江淮之師,由三峽路入, 頗叶上旨,始爲經度淮西之謀。 甫以淮西内地, 以分蜀寇之力,事皆允從,由是甚見親信。 不同河朔, 且四境無黨援, 國家常宿數十萬兵以爲守禦, 淮西節度使吴少陽卒,其子元濟請襲父位, 宜因時而取之,

新 唐書貳佰壹文藝傳上元萬頃傳附義方傳(通鑑貳叁捌元和七年正月辛未條同)云:

歷號商二州刺史福建觀察使,中官吐突承璀閩人也,義方用其親屬爲右職, 李吉甫再當

二九〇

璀所主持,而在外朝贊成用兵之宰相李吉甫其與承璀有連,殊不足異也。至舊唐書壹叁柒吕渭 寅恪案:憲宗與吐突承璀之關係可謂密切矣。故元和朝用兵之政策必為在内廷神策中尉吐突承 陰欲承璀奥助,即召義方爲京兆尹。(寅恪案:新唐書及通鑑俱採自李相國論事集。

[元和]三年吉甫爲中官所惡,將出鎮揚州, 温欲乘其有間, 傾之。

傳附溫傳(新唐書壹陸拾吕渭傳附溫傳同)云:

其所謂中官疑是宦官中之別一黨派, 與吐突承璀處於反對之地位者也。

舊唐書壹陸柒李逢吉傳(新唐書壹柒肆李逢吉傳同,並參舊唐書壹柒貳新唐書壹陸陸令狐楚傳)

令狐楚爲度制辭,言不合旨。楚與逢吉相善,帝皆黜之,罷楚學士,罷逢吉政事。 時用兵討淮蔡,憲宗以兵機委裴度。逢吉慮其成功,密沮之,繇是相惡。及度親征,

舊唐書壹陸捌新唐書壹柒柒錢徽傳等)云: 同書壹柒拾裴度傳(新唐書壹柒叁裴度傳同, 並参舊唐書壹柒貳新唐書壹佰壹蕭瑀傳附俛傳、

唯度言: 賊不可赦。 先是韶羣臣各獻誅吴元濟可否之狀, 朝臣多言罷兵赦罪爲便,翰林學士錢徽蕭俛語尤切。

寅恪案:元和廷議用兵淮蔡之時,憲宗總持於上,吐突承瓘之流主張於内,而外朝士大夫持論

晚, 東舊 雖有 位之競爭 壹玖拾下 4 身於局 李未能 異 恐亦難倖免也), 夫兩 同 外之中 文苑傳 始終 遂因 延宰 然其 派 既 F 立 「此表面形式化矣。 勢不並立, 相李 初未 屬 李 於 心遽有 商 亦幾不可能。 吉 柳仲郢之以 黨之李 隱傳語)。 甫 自然各就 其 社會階級之背景存 商 個人適為新 隱, 行誼 此點為研究唐代中 及其後鬥爭之程度隨時間之久長逐 如牛黨白 其氣類所近招 則卒為兩黨所俱 見諒, 興階 居易之以消 可謂例外。 乎其 級之急進 求 間 晚之際士大夫身世之最要關 同 也。 不收 黨 派 極被容(樂天幸生世較早 其餘之人若 不意與 4 於是 僧孺 而 名宦 等所 兩 吐 種 突承璀交結 無 不 漸增 不同 痛 進, 古 紙 一定顯 劇 社 坎壞終身」(舊 會階 竟 當日 贊 明之表 釀 耳 鍵 級 助 成 1 爭 用 4 若升 甚 取 大夫縱欲 示 相 兵 不 出 政 報 朝 如出 可 唐 復之 自山 治 忽 書 更 地

肆 舊 貢 於陵 捌新 幺 唐書壹柒陸 一柒元 唐書壹 傳 和 舊 年 唐 陸 李宗閔傳(新唐書壹柒肆李宗閔傳同, 玖裴垍 四 書壹陸玖新 月 條等)云: 傳、 舊唐 唐 書壹柒玖王 書壹 五位捌新 涯傳 唐 書壹 舊唐書壹肆憲宗紀下元和三年 陸玖章 並參考新唐書 貫之傳 「壹柒肆牛僧孺傳、 舊 唐 書壹 陸 夏 肆 兀 新唐書壹陸 月 舊唐 條 書 通

賢良 宗室鄭 方 正科。 王元懿之後, 初宗関與牛僧孺同年登 貞元二十一 年 進士擢第, 進 士第, 元和四年(寅恪案: 又與 僧 孺同年登制 科。 四年當作三年 應制之歲

之再貶巴州刺史。僧孺、宗閔亦久之不調,隨牒諸侯府,七年吉甫卒,方入朝爲監察御 吉甫泣訴於上前, 部尚書楊於陵出爲嶺南節度使, 翰林學士王涯甥皇甫湜中選,考覈之際不先上言,裴垍時爲學士,居中覆視,無所異同。 李吉甫爲宰相當國,宗閔、僧孺對策指切時政之失,言甚鯁直,無所迴避。考策官楊於 韋貫之、 李益等又第其策,爲中等,又爲不中第者注解牛李策語,同爲唱誹。又言: 憲宗不獲已, 罷王涯、裴垍學士。 吏部員外郎章貫之出爲果州刺史, 王涯再貶號州司馬, 垍守户部侍郎, 涯守都官員外郎, 貫

舊唐書壹柒壹張仲方傳(新唐書壹貳陸張九齡傳附仲方傳同,並參考白氏長慶集陸壹張仲方墓

張仲方,

胎之肇實始其謀。請俟蔡寇將平,天下無事,然後都堂聚議,諡亦未遲。」憲宗方用兵, 徒暴野,戎馬生郊,僵尸血流,胔骼成岳,酷毒之痛號訴無辜。 生,出爲金州刺史(寅恪案:此亦座主門生關係密切之例證)。吉甫卒, 太常定吉甫諡爲恭懿,博士尉遲汾請爲敬憲。仲方駮議曰:「兵者凶器,不可從我始。 侍御史倉部員外郎。會吕温、羊士諤誣告宰相李吉甫陰事, 韶州始興人,伯祖文獻公九齡開元朝名相。仲方貞元中進士擢第, 二人俱貶。 勦絶羣生, 迨今四載, 仲方坐吕温 入爲度支郎中。 宏辭登科, 貢舉門 時

惡仲方深言其事,怒甚,貶爲遂州司馬。

同書壹柒貳蕭俛傳(新唐書壹佰壹蕭瑀傳附俛傳同)略云:

蕭俛曾祖太師徐國公嵩開元中宰相,俛貞元七年進士擢第,元和六年召充翰林學士,九年 吉甫而 改駕部郎中, 生。 憲宗怒,貶仲方,俛亦罷學士,左授太僕少卿。 知制誥,内職如故,坐與張仲方善。仲方駁李吉甫諡議, 言用兵征發之弊由

回書壹柒玖蕭遘傳(新唐書壹佰壹蕭俛傳附遘傳同)略云:

蕭遘,蘭陵人,開元朝宰相太師徐國公嵩之四代孫(寅恪案:「四」字誤)。遘以咸通五年登

進士第,志操不羣,自比李德裕,同年皆戲呼「太尉」。

過酷 之進士出身新興階級。據大唐新語柒識量篇(參考舊唐書壹佰陸李林甫傳、新唐書貳壹陸張九 寅恪案:新興階級黨派之構成,進士詞科同門之關係乃一重要之點,前論李絳及楊嗣復事已涉 今觀李宗閔傳, 益為明顯。至李吉甫為人固有可議之處, 而牛李詆斥太甚, 此所以釀成士大夫黨派競爭數十年不止也。 張仲方乃九齡之姪孫, 九齡本為武后 吉甫亦報復 所拔擢

齡傳、通鑑貳壹肆開元二十四年冬十月條)云:

牛仙客爲涼州都督, 「不可。」玄宗怒曰:「卿以仙客寒士嫌之耶?若是,如卿豈有門籍?」九齡頓首曰:「[臣] 節財省費,軍儲所積萬計。玄宗大悦,將拜爲尚書,張九齡諫曰:

荒陬賤類, 陛下過聽,以文學用臣;仙客起自胥吏,目不知書, 韓信淮陰一壯士耳,

絳灌同列,陛下必用仙客,臣亦恥之。」

又國史補上(參考太平廣記壹捌肆氏族類)云:

張燕公好求山東婚姻,當時皆惡之,及後與張氏爲親者乃爲甲門。

及新唐書壹玖玖儒學傳中孔若思傳附至傳云:

H 何因 成,示章述,述謂可傳,及聞垍語,懼,欲更增損。述曰:「止!丈夫奮筆成一家書, 説子垍方有寵, 怒曰:「天下族姓何豫若事, 明氏族學,與韋述、 人動摇, ,有死,不可改!」遂罷。時述及穎士、沖皆譔類例,而至書稱工。 蕭穎士、 柳沖齊名, 誤百家類例, 而妄紛紛邪?」垍弟素善至,以實告。 以張説等爲「近世新 族

慕李文饒之為人,乃取以自況也。 級之爭得處於中立地位者相似。故蕭俛由進士出身,成為牛氏之黨, 亦成為反對之黨。 '知始興張氏實為以文學進用之寒族,即孔至之所謂「近世新族」之列。宜乎張説與九齡共通譜 密切結合,由二人之氣類本同也。因是,九齡姪孫仲方與山東舊門李吉甫氣類絕不相近 若蘭陵蕭氏 元是後梁蕭詧之裔, 而加入關隴集團, 而蕭遘雖用進士擢第 與李唐皇室對於新舊兩階

元和朝雖號稱中興,然外朝士大夫之黨派既起,內廷閹寺黨派之競爭亦劇,遂至牽涉皇位繼承

問題,而憲宗因以被弑矣。

舊唐書壹柒伍澧王惲傳(新唐書捌貳澧王惲傳同)云:

衆議屬遭王,欲以威權自樹。賴憲宗明斷不惑,及憲宗晏駕承璀賜死,王亦薨於其夕。 澧王惲,憲宗第二子也,本名寬。吐突承璀恩寵特異,惠昭太子薨,議立儲貳,承璀獨排

可 書壹伍玖崔羣傳(新唐書壹陸伍崔羣傳同)云:

澧王作讓表。羣上言曰:「大凡己合當之,則有陳讓之儀;已不合當, 元和七年, 惠昭太子薨, 穆宗時爲遂王,憲宗以澧王居長,且多内助,將建儲貳,

因何遽有讓表? 今

遂王嫡長,所宜正位青宫。」竟從其奏。

書壹捌肆宦官傳吐突承璀傳(新唐書貳佰柒宦者傳上吐突承璀傳同)云:

,承璀建議請立澧王寬爲太子,憲宗不納,立遂王宥,穆宗即位,銜承璀不佑

日

惠昭太子薨,

已, 誅之。(前文已引, 茲爲論述之便利, 特重録之。

同書同卷王守澄傳(新唐書貳佰捌宦者傳下王守澄傳同,並參考舊唐書壹肆新唐書柒憲宗紀及

[唐書壹伍玖新唐書壹肆貳韋處厚傳中「不諱内惡」之語)云:

憲宗疾大漸,內官陳弘慶等弑逆。憲宗英武,威德在人,內官秘之,不敢除討, 但云:藥

發暴崩。時守澄與中尉馬進潭、梁守謙、劉承偕、韋元素等定册立穆宗皇帝。

通鑑貳肆壹元和十五年正月條(參考舊唐書壹貳拾新唐書壹叁柒郭子儀傳附釗傳)云:

(穆宗)聞而憂之, 初左軍中尉吐突承璀謀立澧王惲爲太子,上(憲宗)不許,及上寢疾,承璀謀尚未息, 密遣人問計於司農卿郭釗,到曰:「殿下但孝謹以俟之,勿恤其他!」

到,太子之舅也。

新唐書捌宣宗紀云

大中十二年二月廢穆宗忌日,停[穆宗]光陵朝拜及守陵官人。

以陳弘志弑逆之罪歸穆宗也。通鑑貳肆玖大中十二年二月甲子朔條紀此事,胡注云:

裴廷裕東觀奏記上云:

漏網者。郭太后以上英察孝果,且懷慚懼。 憲宗皇帝晏駕之夕,上(宣宗)雖幼,頗記其事,追恨光陵商臣之酷,即位後, 便欲殞於樓下,欲成上過,左右急持之。即聞於上,上大怒,其夕太后暴崩, 時居興慶宫,與一二侍兒同升勤政樓, 誅组惡黨無 倚衡而

也

通鑑考異大中二年條引[宣宗]實録,並附按語云:

[大中二年]五月戊寅以太皇太后寢疾,權不聽政,宰臣率百寮問太后起居。己卯復問起

帝之志也。六月貶禮院檢討官王皡爲潤州句容令,以皡抗疏請郭后合葬景陵 下遺令。是日太后崩。初上(宣宗)篡位,以憲宗遇弑,頗疑太后在黨中, 至是暴得疾

名)配饗憲宗廟室故也

日先下韶云 以太后寢疾,

司馬光]按, 實録所言暴崩事, 皆出東觀奏記,若實有此事,則既云「是夕暴崩」, 何得前

以病終, 而宣宗以平日疑忿之心,欲黜其禮, 權不聽政」? 若無此事, 廷裕豈敢輒誣宣宗? 或者, 故皡争之, 疑以傳疑, 今參取之。

郭后

也。 兩端 乃穆宗之生母,其預知弑逆之謀,似甚可能。司馬君實所論雖不失史家審慎忠厚之旨,但參取 穆宗,競爭至劇。吐突承璀之黨失敗,憲宗遇弒,穆宗因得王守澄黨之擁戴 寅恪案:元和末年内廷閹寺吐突承璀一派欲以澧王惲繼皇位, 派之競爭二端, 為宣宗幽崩事, 鄙意郭后之暴崩儻果出於宣宗之志,則崩前一日何不可預作伏筆? 或者, 遂促成次日暴崩之事乎? 頗近模稜 與此 難以信從。蓋裴廷裕比穆宗於商臣,若非確有所據,必不敢為此誣妄之説 又日本僧圓仁入唐求法記肆所載郭太后被藥殺事, (唐室中興英王憲宗之結局有關 總之,宮掖事秘,雖不宜遽斷, 則無可疑也 王守澄一 然皇位繼承之不固定及閹 (鍾輅前定録李生 派欲立遂王宥即 則年月名號俱有為 而繼位矣。 即因有前日寢疾 條 亦 至郭后 紀懿安 後來之

相即此 内廷閹寺中吐突承璀之黨即主張用兵之黨既失敗, 其反對黨得勝, 擁立穆宗, 反對黨之附屬品,自然亦不主張用兵,而「銷兵」之議遂成長慶一朝之國策矣。 故外朝宰

舊唐書壹陸穆宗紀云:

圖,乃獻「銷兵」之議, 長慶元年二月乙酉天平軍節度使馬總奏:當道見管軍士三萬三千五百人,從去年正月已 情願居農者放,逃亡者不捕。先是平定河南, 請密韶天下軍鎮, 每年限百人内八人逃死,故總有是奏。 及王承元去鎮州, 宰臣蕭俛等不顧 遠

同書壹柒貳蕭俛傳(新唐書壹佰壹蕭瑀傳附俛傳略同)云:

策,以爲兵以静亂,時已治矣,不宜黷武,勸穆宗休兵偃武,又以兵不可頓去,請密詔 穆宗乘章武(憲宗)恢復之餘,即位之始兩河廓定,四鄙無虞,而俛與段文昌屢獻太平之 如其策而行之。而藩籍之卒合而爲盗,伏於山林。明年朱克融、王廷凑復亂河朔,一呼而 下軍鎮有兵處每年百人之中限八人逃死,謂之「消兵」。帝既荒縱,不能深料,遂韶天下, 遺卒皆至。 朝廷方徵兵諸藩,籍既不充,尋行招募,烏合之徒動爲賊敗, 由此復失河朔

朔為胡化區域,其兵卒皆善戰之人,既被裁遣,「合而為盗」,遂為朱克融、王廷湊所利用 寅恪案:「銷兵」之數每年僅限百分之八,且歷時甚短,其所以發生如是之大影響者,蓋當時 Thi

又舊唐書壹陸陸元稹傳(新唐書壹柒肆元稹傳略同)云:

昌官詞等百餘篇奏御, 荆南監軍崔潭峻甚禮接稹, 穆宗大悦。 不以掾吏遇之,常徵其詩什諷誦之。長慶初潭峻歸朝,

出稹連

新 唐書壹柒玖李訓傳(參考新唐書貳佰捌宦者傳下王守澄傳)云:

守澄觀軍容使, 宦人陳弘志時監襄陽軍, 賜鴆死。 又逐西川監軍楊承和、 訓啓帝(文宗)召還,至青泥驛, 淮南韋元素、 遣使者杖殺之。 河東王踐 言於嶺外, 復以計白罷

賜

而崔

潭峻前物故,

韶剖棺鞭屍, 元和逆黨幾盡。

稹傳「長慶初潭峻歸朝」之語微有未妥,故新唐書元稹傳改作「長慶初潭峻方親幸」也。 結句「努力廟謨休用兵」一語, 為擁立穆宗之元和逆黨中 八月丙申詔書以李德裕與之連結者, 九三三年六月清華學報拙著讀連昌宮詞質疑。 新 唐書李訓傳明言崔潭峻為元和逆黨,但憲宗於元和十五年正月二十七日被弒, 鄭注遂藉之以為説耳。詳見新唐書壹柒肆李宗閔傳、 人, 其主張「銷兵」自不待言, 實關 涉當時政局 蓋踐言曾言送還吐蕃悉怛謀之非計, 國策, 又宦官王踐言為元和逆黨之一, 而文宗大和九年 世之治史讀詩者幸勿等閒放過也(參考一 ,於是知元才子連昌宮詞全篇主旨所在之 舊唐書壹柒肆新唐書壹捌拾李德裕傳 與德裕 主 一張相 則舊唐書元 夫 潭 峻 既 李

等,茲不能悉論也)。

新唐書捌敬宗紀(参考舊唐書壹柒上敬宗紀)略云:

逢吉請立景王爲皇太子(癸巳韶以景王爲皇太子)。四年正月穆宗崩,丙子皇太子即皇帝位。 日,左僕射裴度三上疏請立皇太子,而翰林學士兩省官相次皆以爲言。穆宗疾少間,宰相李 敬宗諱湛,穆宗長子也,始封鄂王,徙封景王。長慶二年穆宗因擊毬暴得疾,不見羣臣者三

舊唐書壹柒叁李紳傳(新唐書壹捌壹李紳傳同)略云:

王守澄每從容謂敬宗曰:「陛下登九五, [李]逢吉之助也。先朝初定儲貳, 唯臣備知。 是讒言稍息,紳黨得保全。 度、杜元穎與紳三人所獻疏, 大臣,不能自執,乃貶紳端州司馬。會禁中檢尋舊事,得穆宗時封書一篋,發之,得裴 年,亦疑其事。會逢吉言:「李紳在内署時,嘗不利於陛下,請行貶逐。」帝初即位,方倚 翰林學士杜元穎、李紳勸立深王,而逢吉固請立陛下,李續之、李虞繼獻章疏。」帝雖沖 請立敬宗爲太子。帝感悟興嘆,悉命焚逢吉黨所上謗書。由 時

李德裕黨劉軻牛羊日曆云:

「梁守謙、王守澄將不利於上」,又使楊虞卿漢公輩言於外曰:「王守澄欲謀廢立」,又於街 穆宗不豫,宰臣議立敬宗爲皇太子,時牛僧孺獨懷異志,欲立諸子。僧孺乃昌言於朝曰:

衢門墙上施榜,每於穆宗行幸處路傍或苑內草間削白而書之 (寅恪案:牛黨所爲殊似今日 通衢廣張之效顰外國政黨宣傳標語, 豈知吾中國人早已發明此方法耶?可笑, ,可歎!),

冀謀大亂。其兇險如此。

寅恪案:敬宗為穆宗長子,故外朝諸臣請立為皇儲,又值穆宗初即位,元和逆黨方盛之時,其 及內廷屬寺黨派與外朝士大夫黨派互相關係, 黨魁王守澄既贊成其事,而穆宗不久即崩,其皇位繼承權所以幸未動搖也。然觀外廷士大夫如 李逢吉、劉軻之流俱藉皇儲問題互詆其政敵, 並牽涉禁中閹寺黨魁,則唐代皇位繼承之不固定 於此復得一例證矣。

舊唐書壹柒上敬宗紀(新唐書捌敬宗紀同)云:

克明等同謀害帝, 毬,軍將蘇佐明、王嘉憲、石定克等二十八人飲酒。帝方酣,入室更衣,殿上燭忽滅, [寶曆二年十二月] 辛丑帝夜獵還宫,與中官劉克明、田務成(成,通鑑作澄)、許文端打 即時殂於室内。

新 唐書捌文宗紀(舊唐書壹柒上文宗紀同

王而立之,率神策六軍飛龍兵誅克明,殺絳王。 以絳王悟勾當軍國事。壬寅内樞密使王守澄、楊承和、 文宗諱昂(初名涵),穆宗第二子也, 始封 江王。寶曆二年十二月敬宗崩,劉克明等矯詔 神策護軍中尉魏從簡、梁守謙奉江

舊唐書壹伍玖韋處厚傳(新唐書壹肆貳韋處厚傳同)云:

寶曆季年急變中起,文宗底綏內難,韶命將降,未有所定。處厚聞難奔赴,昌言曰:「春 大義滅親, 内惡必書, 以明逆順,正名討罪,於義何嫌?安可依違,有所避

諱?」遂奉藩教行焉。

通鑑貳肆叁寶曆二年十二月條云:

楊承和、 (宦官)劉克明等矯稱上(敬宗)旨,命翰林學士路隋草遺制, 中尉魏從簡、 克明赴井,出而斬之,絳王爲亂兵所害。 絳王見宰相百官於紫宸殿外廡。克明欲易置内侍之執權者,於是樞密使王守澄 梁守謙定議,以衛兵迎江王涵入宫,發左右神策飛龍兵進討賊黨, 以絳王悟權勾當軍國事。

均 弑 寅恪案 討其族 當時 不得比數於憲宗,遂以為無足諱言也。至敬宗及絳王悟之被弑害,與夫文宗之得繼帝位 内廷閹寺劉克明黨與王守澄黨競爭下之附屬犧牲品及傀儡子耳,亦可憐哉 類, 憲宗為宦官所弑, 閹人初亦應有所顧 故諱 莫如 深。 前論順宗實録事引舊唐書路隋傳, 閹人以其為英武之主, 威望在人, 若發表實情, 慮,然其所以卒從韋處厚之説, 公開宣布者, 可以為證。 則由 及敬宗又為宦 恐外間 敬宗 斯又唐代皇位 反對者藉此 乃童 昏之 官所

繼

承不固定與閹寺黨爭關係之一例證也。

文宗以二李(寅恪案:二李謂宗閔及德裕也, 曰:「去河北賊非難,去此朋黨實難。」 宗閔代表牛黨)朋黨,繩之不能去,嘗謂侍臣

級自文宗以後,在政治上盛衰分合互相關涉之要點,則不得不述其概略也。 殘之酷,唐之皇室亦隨以覆亡,其間是非成敗詳悉之史實雖於此不欲置論,而士大夫階級與閹寺階 夫唐代河朔藩鎮有長久之民族社會文化背景,是以去之不易,而牛李黨之政治社會文化背景尤長久 之黨誠甚難, 於河朔藩鎮 閹寺既不能去,士大夫之黨又何能去耶? 及至唐之末世,士大夫階級暫時聯合, 乃假借別一社會階級即黃巢餘黨朱全忠之武力,終能除去閹寺之黨。但士大夫階級本身旋罹摧 且此 而欲去内廷閹寺之黨則尤難, 「兩黨所連結之宫禁閹寺, 其社會文化背景之外更有種族問題, 所以卒受「甘露之禍」也。 況士大夫之黨乃閹寺黨之附屬 故文宗欲去士大夫 與閹寺全體敵

則在憲宗之世。 對立、 生死搏鬥之跡象, 時 期 此後紛亂鬥爭, 愈久愈烈。 宣宗朝為牛黨全盛時期, 此讀史者所習知也。然試一求問此兩黨競爭之歷程何以呈如是之情狀 宣宗以後士大夫朋黨似已漸次消 至文宗朝為兩黨參錯並進, 競逐 泯 最 劇之時。 無復前 武宗 此 兩 朝

就牛李黨人在唐代政治史之進退歷程言之,

兩黨雖俱有悠久之歷史社會背景,

但其表面

形式化

甲派 黨退。 與外廷士大夫成為生死不兩立之仇敵集團, 程於下,或可少補前人之所未備言者歟? , 外朝士大夫為被動。 閹寺為兩派同時並進, 或某 則自來史家勘有解答。鄙意外朝士大夫朋黨之動態即內廷閹寺黨派之反影。內廷閹寺 退 迄至後來內廷之閹寺「合為一片」(此唐宣宗語,見下文所引)全體對外之時 則外朝之士大夫亦為兩黨同時並進,或某一時甲黨進而乙黨退,或某一時 茲略引舊史,稍附論釋, 藉以闡明唐代內廷閹寺與外朝士大夫黨派關 終於事勢既窮,乞援外力, 一時甲派進而乙派退, 或某一 遂同受別 武裝社 則内 時乙派 聯變遷 乙黨進而 廷 之歷 會階 為主 閹 進

舊唐書壹陸玖李訓傳(新唐書壹柒玖李訓傳同)略云::

容使,罷其禁旅之權,尋賜鴆殺。訓愈承恩顧,黄門禁軍迎拜戢斂。 殺。王守澄自長慶已來知樞密, 典禁軍, 作威作福。 欲 英落本根, 文宗以宦者權寵太過, [王]守澄,俾之援訓 以雪讎恥。 事見舊唐書壹陸捌新唐書壹 忠義之士無不扼腕。 繼爲禍胎。元和末弑逆之徒尚在左右,雖外示優假,心不堪之。思 冀黄門不疑也。 九重深處,難與將相明言,前與侍講宋申錫謀,謀之不臧,幾成 時爲襄陽監軍, 訓既秉權衡, 伍貳宋申錫傳), 訓既作相,以守澄爲六軍十二衛觀 乃召自漢南, 即謀誅内豎。 自是巷伯尤横。 至青泥驛, 中官陳弘慶者 因鄭 注 封杖決 自 元

同書同卷鄭注傳(新唐書壹柒玖鄭注傳同)略云:

痿弱重腱之疾。 柒陸李宗閔傳, 事可參考舊唐書壹柒下文宗紀下大和九年八月九月有關諸條,及同書壹柒肆李德裕傳、 李宗閔、李德裕。心所惡者,目爲二人之黨,朝士相繼斥逐,班列爲之一空(寅恪案:此 [鄭]注之權赫於天下,既得行其志,生平思讎絲毫必報。 , 新唐書壹柒肆李宗閔傳、壹捌拾李德裕傳等)。注自言有金丹之術, 可去 始李愬自云得效,乃移之[王]守澄,亦神其事,繇是中官視注皆憐之。 因楊虞卿之獄挾忌 卒

以是售其狂謀,而守澄自貽其患。

百 書壹捌肆宦官傳王守澄傳(新唐書貳佰捌宦者傳下王守澄傳同)略云:

澄,秘而不發。守澄死,仍贈揚州大都督。其弟守涓爲徐州監軍,召還,至中牟,誅之。 左軍中尉。守澄不悦,兩相矛盾。訓因其惡,大和九年帝(文宗)令内養李好古齎鴆賜守 仇士良有翊上之功,爲守澄所抑,位未通顯。〔李〕訓奏用士良分守澄之權,乃以士良爲

新唐書壹柒肆李宗関傳(舊唐書壹柒陸李宗関傳略同)略云:

守澄豢養訓、〔鄭〕注,反罹其禍。人皆快其受佞,而惡訓、注之陰狡。

相,而踐言監軍劍南,受[李]德裕財,復與宗閔家私,乃貶宗閔潮州司户參軍事, [鄭]注劾宗閔異時陰結駙馬都尉沈礒、内人宋若憲、 宦者韋元素、 王践言等求宰 蟻逐柳

去之,人人駭栗。帝乃韶宗閔、德裕姻家門生故吏自今一切不問。 州,元素等悉流嶺南,親信並斥。時訓、注欲以權市天下,凡不附已者,皆指以二人黨逐

通鑑 (貳肆伍大和九年六月條(參考新唐書貳佰捌宦者傳下王守澄傳)云: 神策左軍中尉韋元素、 樞密使楊承和、王踐言居中用事,與王守澄争權不叶,

因之,

出承和於西川, 元素於淮南,

践言於河東,

皆爲監軍。

寺之黨派既是同時並進, 互相爭鬥, 達於劇烈之高點, 故士大夫之黨派各承其反影, 皆由於閹寺,故能悉其隱秘,遂欲同時一舉將閹寺及士大夫諸黨派俱排斥而盡去之也。 寅恪案:李訓、鄭注所以能異於宋申錫, 如王守澄與仇士良、韋元素等之例是也。又當時牛李黨人各有其鈎結之中官,訓、 斯為文宗一朝政治上最要之關鍵,前人論此,似少涉及者,特為標出之如此 幾成掃除閹寺之全功者, 實在利用閹寺 中自分黨派 注之進用本 亦復如 當日閹

唐書壹柒玖李訓傳(舊唐書壹陸玖李訓傳 同)略云:

奏:「甘露降金吾左仗樹。」〔帝〕輦如含元殿,韶宰相羣臣往視,還,訓奏:「非甘露。」帝 募士,及金吾臺府卒劫以爲用。〔大和九年〕十一月壬戌(二十一日)帝(文宗)御紫宸殿, 行餘爲邠寧節度使, [鄭]注,使鎮鳳翔,外爲助援, 羅立言權京兆尹, 韓約金吾將軍,李孝本御史中丞。 擢所厚善, 分總兵柄。 於是王璠爲太原節 陰許璠 度使 郭

顧中尉仇士良、魚弘志等驗之。 下殿趨。訓攀輦曰:「陛下不可去!」士良曰:「李訓反。」帝曰:「訓不反。」士良手搏訓 兵曰:「衛乘輿者,人賜錢百千!」於是有隨訓入者。宦人曰:「事急矣!」即扶輦,決罘思 動廡幕,見執兵者,士良等驚走出。關者將闔扉,爲宦侍叱争,不及閉。訓急,連呼金吾 列丹鳳門外。訓傳呼曰:「兩鎮軍入受韶旨!」聞者趨入, 邠寧軍不至。宦人至仗所, 史六七百人,復分兵屯諸宫門,捕訓黨千餘人,斬四方館,流血成渠。 官中呼萬歲。會士良遣神策副使劉泰倫、陳君奕等率衛士五百挺兵出, 擊,宦官死數十人。訓持輦愈急,至宣政門, 訓壓之,將引刀鞾中,救至,士良免。立言、孝本領衆四百東西來上殿,與金吾士縱 訓因欲閉止諸宦人, 使無逸者。時璠、 宦人郗志榮揕訓, 仆之, 所值輒殺, 行餘皆辭赴鎮, 兵 輦入東上閣即閉 會風

贊曰:李德裕嘗言:「天下有常勢,北軍是也。」訓因王守澄以進,此時出入北軍,若以上 下奇才。德裕曰:「訓曾不得齒徒隸,尚何才之云?」世以德裕言爲然。(寅恪案:李德裕 意說諸將,易如靡風,而反以臺府抱關游徽抗中人,以搏精兵,其死宜哉!文宗嘗稱訓天

故政權之爭,其成敗關鍵在能否劫持皇帝一人而判定。夫皇帝之身既在北軍宦官掌握之内,若 寅恪案:此甘露事變之一幕悲劇也。 當時中央政權寄託於皇帝之一身,發號施令必用其名義,

語見其所著窮愁志奇才論。)

之永貞行(昌黎集叁)所云: 壹叁伍新唐書壹陸捌王叔文傳), 況文宗朝宦官盤踞把持之牢固更有甚於順宗時者乎? 後所以僅餘以藩鎮武力對抗閹寺北軍之唯一途徑,是即崔淄郎之所取用而奏效,但為當世及後 貞之時, 世所詬 不以南衙臺府抱關游徼敵抗神策禁旅,則當日長安城中,將用何等兵卒與之角逐乎?此甘露變 病者也。 王叔文嘗謀奪閹寺兵柄, 至謂「以上意説〔北軍〕諸將,易如靡風」,則天下事談何容易! 在大和之前即永 舉用范希朝韓泰, 卒無所成(事見韓愈順宗實録伍及舊唐 而韓退

君不見太皇(順宗)諒陰未出令,小人乘時偷國柄。北軍百萬虎與貔, (寅恪案:神策軍實宦官所將耳,非天子自將也,退之此語無乃欺人之甚耶?)一朝奪印付 天子自將非他師。

私黨

懔懔朝士何能爲?

之史家何可據之, 而以成敗論人也! 日外朝士大夫牛李黨人之甘心作閹寺附屬品者, 固有不同矣。李文饒挾私嫌, 不過俱文珍私黨之誣詞,非公允之論也。然則李訓實為「天下奇才」,文宗之語殊非過譽,較當 其言不足信,

選紀貳肆伍大和九年十一月壬戌即二十一日甘露事變,其結論有云:

自是天下事皆決於北司,宰相行文書而已。

誠道其實也。至文宗幾為閹寺所廢,如皮光業見聞録之所言者(見通鑑考異大和九年十一月條

但自此以後,唐代皇位之繼承完全决於宦官之手,而外朝宰相惟有服從一點,若取下列史料證 及唐語林叁方正類,新唐書貳佰柒宦者傳下仇士良傳末),固有末諦,已為司馬君實所指出。

之, 則更無可疑也。

唐語林柒補遺云:

十年前外大臣得與禁中事,三十年以來外大臣固不得知。但是李氏子孫,内大臣定,外大 臣即北面事之,安有是非之説?」 宣宗崩,内官定策立懿宗,入中書商議,命宰臣署狀,宰相將有不同者。夏侯孜曰:「三

又新唐書壹捌貳李珏傳云:

奉所言,安與禁中事?」 始莊恪太子薨,帝(文宗)屬意陳王(成美),已而武宗即位,人皆爲危之。珏曰:「臣下知

證知自開成後所謂「建桓立順,功歸貴臣」(劉夢得語,見前引),而外朝宰相固絕難與聞也。 孜所謂三十年者,乃約略舉成數言之。又季珏之事與夏侯孜不同,其語之意旨亦異。然可據以 蓋甘露事變在文宗大和九年,即公元八三五年。宣宗崩於大中十三年,即公元八五九年,夏侯

[大和]六年十月甲子韶:魯王永宜册爲皇太子。

舊唐書壹柒下文宗紀(參舊唐書壹柒伍新唐書捌貳陳王成美傳)云:

太子於少陽院,殺太子宫人左右數十人。十月庚子皇太子薨於少陽院,諡莊恪。 [開成]三年九月壬戌上(文宗)以皇太子慢遊敗度,欲廢之。中丞狄兼謨垂涕切諫。是夜移

[開成]五年春正月戊寅朔上不康,不受朝賀。己卯韶立親弟穎王瀍爲皇太弟,權勾當軍國 [開成]四年十月丙寅制:以敬宗第六男成美爲皇太子。

事,皇太子復爲陳王。辛巳上崩於大明宫之太和殿。

.書壹捌上武宗紀(新唐書捌武宗紀同,並參考舊唐書壹柒伍新唐書捌貳陳王成美傳)略云:: 王。至是, 仇士良欲歸功於己, 乃發安王舊事, 故二王與賢妃皆死。以開府右軍中尉仇士 文宗暴疾,宰相李珏、知樞密劉弘逸奉密旨:以皇太子監國。兩軍中尉仇士良、魚弘志矯 武宗諱炎,穆宗第五子,本名瀍。文宗以敬宗子陳王成美爲皇太子。[開成]五年正月二日 良封楚國公,左軍中尉魚弘志爲韓國公。 廢。及開成末年,帝多疾,無嗣,賢妃請以安王溶嗣,帝謀於宰臣李珏,珏非之,乃立陳 邸第。初,楊賢妃有寵於文宗,而莊恪太子母王妃失寵怨望,爲楊妃所譖,王妃死, 韶迎潁王於十六宅,立爲皇太弟。四日文宗崩,皇太弟即皇帝位。陳王成美、安王溶殂於

新唐書捌貳莊恪太子永傳(舊唐書壹柒伍莊恪太子永傳同)略云:

[大和]六年立爲皇太子,母(王德妃)愛弛,楊賢妃方幸,數譖之,帝(文宗)震怒,羣臣連

章論救,[帝]意少釋,然太子終不能自白其讒,是年(開成三年)暴薨。(寅恪案:日本僧

圓仁入唐求法記亦有殺皇太子之記述, 可供參考。

通鑑貳肆陸會昌元年三月條(參新唐書壹佰柒宦者傳上仇士良傳)云:

嗣復出爲湖南觀察使, 初知樞密劉弘逸、薛季稜有寵於文宗, 仇士良惡之。上(武宗)之立非二人及宰相意, 故楊 李珏出爲桂管觀察使。士良屢譖弘逸等於上,勸上誅之,乙未賜弘

張固幽閒鼓吹 云

季稜死。

朱崖

(李德裕) 在維揚, 監軍楊欽義追入, 必爲樞近, 而朱崖

(德裕) 致禮皆不越尋

所獲歸之。朱崖(德裕)曰:「此無所直,奈何相拒?」悉却與之。欽義感悦數倍,後竟作樞 情禮。宴罷,皆以贈之,欽義大喜過望。行至汴州,有韶令監淮南軍。欽義至,即具前時 欽義心銜之。一日邀中堂飲,更無餘賓,而陳設寶器圖書數牀皆殊絕,一席祗奉亦竭

通鑑貳肆陸開成五年九月紀李德裕入相事, 即採用張書, 胡注云:

密使,武皇一朝之柄用皆欽義所致也。

史言李德裕亦不免由宦官以入相。

寅恪案:上引文宗、武宗兩朝間史料,亦皆唐代皇位繼承不固定及一時期宫掖閹寺黨派競爭決

承旨崔鉉為中書侍郎 例證也。又幽閒鼓吹載李德裕入相實由楊欽義, 未敢確 李氏子孫充傀儡,供犧牲,而士大夫黨派作閹寺黨派之附屬品,隨其勝敗以為進 定, 即使可信,亦非贊皇入相之主因。 同平章事條 據通鑑貳肆柒會昌三年五月壬寅以翰林學士 鄙意小説家記衛公事多誣詞, 究 其可信與 退 之明

上(武宗)夜召學士 義皆願慤, 不敢預事, 章琮, 老宦者尤之曰:「此由劉楊儒怯, 以鉉名授之, 令草制, 宰相樞密皆不之知。 墮敗舊風故也。 時樞 密使劉

其 魚弘志一派自必排去牛黨之宰相, 、時宦官劉弘逸一派與牛黨之宰相李珏等翊戴皇太子成美, 既遭失敗, 則得勝之閹寺仇士良 楊欽義以 因也。然則官掖閹寺競爭之勝敗影響於外朝士大夫之進退, 願慤著聞,不敢依慣例以干預命相,則文饒之入相似非全由欽義之力,可以推 而以其有連之李黨代之,楊欽義殆屬於仇士良派者, 於此益得證明而無疑矣。 此德裕

新唐書捌宣宗紀略云:

翰林學士承旨兵部侍郎白敏中同中書門下平章事 馬元贄立光王爲皇太叔。 憲宗第十三子也。 三月甲子即皇帝位。 始封光王, 本名怡。 四月乙亥始聽政。 會昌六年武宗疾大漸, 丙子李德裕罷。 左神策 五月乙巳 護軍中尉

通

鑑貳肆捌會昌六年三月條云:

胡注

以武宗之英達,李德裕之得君,而不能定後嗣,卒制命於宦豎,北司掌兵,且專宫禁之權

其各 翊戴 唐 屬 由 唐代皇位繼 寅恪案: [憲宗朝至文宗朝, 牛李爭鬥 別之内 後 武宗 林貳政事 外朝士大夫黨派乃內廷閹寺黨派之應聲蟲 , 外朝李黨全盛之局因以告終, 相位政權自然轉入其敵黨牛黨之手也。 會昌 即 助 但宣宗以後不復聞劇烈之黨爭。究其所以然之故,自來未有言之者, 承之不固定, 與李黨有連之一派失敗 季年 類 而能團 其競爭遂亦不得不終歸消歇也。 下(參新唐書壹陸玖章貫之傳附澳傳)云: 内廷閹寺黨派競爭之史實無從詳知, 結一致以對外者 觀此益可知矣。胡氏之語甚諦, 雖劇,而互有進退。武宗朝為始終李黨當國時期, 則可 決言。 則與 外朝諸 茲略舉 於是宣宗遂以皇太叔之名義嗣 或附屬品, 臣 無分別連結之必要, 但就武宗諸子不得繼位之事 一例, 自會昌六年三月宦官馬元贄等於宫中 儻閹寺起族類之自覺 以為證 明。 而士大夫之黨既失 其 若依 宣宗朝宰相則 姪 推之, 之帝位 , 其 寅恪 間 必是 前 不 所 而

身, 於外廷, 目摇手曰:「總未, 」上曰:「此乃末策,朕行之, 有小黄門置茶牀訖,亟屏之。乃問:「朕於敕使如何?」澳曰:「威制前朝無比。」上閉 即合爲一片矣。」澳慚汗而退。 暇日召翰林學士韋澳入。上曰:「要與卿款曲,少間出外, 即恐有大和事(寅恪案:大和事指甘露事變), 依前怕他。在卿如何?計將安出?」澳既不爲之備, 初擢其小者, 至黄 不若就其中揀拔有才者, 至緑, 至緋,皆感恩,若紫衣掛 但言論詩!」上乃出詩 率意對曰:「謀之 委以計

北夢瑣言伍令狐公密狀條云:

填, 授旨於宰相令狐公[綯],欲盡誅之。[綯]慮其冤,乃密奏膀子曰:「但有罪莫舍, 唐大和中屬官恣横, 自然無遺類矣。 」後爲宦者所見, 因甘露事王涯等皆罹其禍,竟未昭雪。宣宗即位,深抑其權,末年嘗 於是南[衙]北[司]益相水火, 泊昭宗末崔侍中 有闕莫

得行其志, 然而玉石俱焚也

間之術不能復施,此宣宗以後宮禁閹寺一致對外之新形勢,不獨在內廷無派別,亦使在外朝無 資利用也。迨其起族類之自覺 寅恪案:章澳意欲利用閹人,以制閹人,即李訓、鄭注之故技。在文宗大和之世用之雖不能成 然其初頗亦收效者,以當時閹寺中王守澄與仇士良之徒尚分黨派,未「合為一片」, ,團結一致,以抗外敵,如唐語林北夢瑣言所載大中時事, 則

統制中央全局,不可動摇分裂,故激成崔胤借助藩鎮外來兵力,盡取此輩族類而殲滅之

又讀史者或見僖宗時宦官田令孜惡其同類楊復恭、復光兄弟事,因以致疑於宣宗以後閹寺「合

為一片」之説者,如舊唐書壹玖下僖宗紀所言:

薄。及聞復光死,甚悦,復擯復恭, 各以其衆散去。時復光兄復恭知内樞密, [中和]三年六月甲子楊復光卒於河中,其部下忠武八都都頭鹿晏弘 罷樞密爲飛龍使。 田令孜以復光立破賊功, 晉暉、 憚而惡之, 王建、 故賊平賞 韓建等

定也。但檢同書同卷中和三年五月王鐸罷行營都統條云:·

時中尉田令孜用事,自負帷幄之功,以鐸用兵無功, 效,欲權歸北司,乃黜鐸而悦復光也。 而由楊復光建策召沙陀,成破賊之

無從造成士大夫之黨派 時閹寺南衙北司之界限即階級族類之意識甚為堅強明顯,不欲連結外朝士大夫自相攻擊, 然則田令孜雖與楊復恭、復光兄弟不相得,對於外朝士大夫則仍能自相團結, 如以前牛李兩黨者也。 致敵視。

新唐書玖懿宗紀(參考通鑑貳肆玖大中十三年六月條通鑑考異咸通二年二月條, 及容齋隨筆陸

中篇 政治革命及黨派分野

決。大中十三年八月宣宗疾大漸,以夔王屬内樞密使王歸長、馬公儒、宣徽南院使王居方 王宗實殺王歸長、 懿宗諱漼 而左神策護軍中尉王宗實、副使丌元實矯韶立鄆王爲皇太子。癸巳即皇帝位於柩前。 宣宗長子也, 馬公儒、王居方。 始封鄲王。 宣宗愛夔王滋,欲立爲皇太子, 而鄭王長, 故久不

通鑑貳伍拾咸通二年二月條云:

其不相悦如此。 面 是時士大夫深疾宦官, 珍亦宣武軍監軍也,而退之與葉京之遭遇乃逈不相似,據是可知貞元及咸通時,士大夫與 寺關係之異同矣。 ,既而及第,在長安與同年出遊, (寅恪案: 昌黎外集叁有送汴州監軍俱文珍序並詩, 備極諂諛之詞。夫文 事小有相涉, 則衆共棄之。建州進士葉京嘗預宣武軍宴, 遇之於塗,馬上相揖, 因之謗議諠然, 遂沈廢終身,

權最 及全體之通則也。且其時閹寺已起族類之自覺,一致對外,與文宗時不同,是以無須亦不欲連 長與王宗實二派因實力大相懸殊之故,其競爭必無足道,讀史者幸勿誤會以此 並無實力之樞密使等,使與執持兵柄之神策中尉對抗,實計出無聊,故終於同 依新紀所載 大 宣宗牽於所愛, 似宣宗末年内廷閹寺仍有黨派競爭者, 雖明知彼輩已「合為一片」, 而其末年仍仿文宗之舊事 然考唐代閹寺中 神策軍中尉掌 個別之例外, 一無成。 勉強 握 兵柄, 試 而 利用 疑 其

於唐代帝位繼 結外朝士大夫,以興黨爭, 載懿宗初年士大夫亦倣閹寺「合為一片」,與相對敵。後來崔胤以士大夫代表之資格, 承之不固定, 茲又得一例證, 蓋非復宣宗以前由內廷黨派勝敗,而致外朝黨派進退之先例矣。 自無待言。 觀通鑑咸通二年所紀葉京事, 可知宣宗 盡誅宦 至

通鑑貳伍貳咸通十四年七月戊寅條(參考舊唐書壹玖下新唐書玖僖宗紀)略云:

官

蓋非一朝一夕之所致也。

政事。辛巳上崩於咸寧殿,僖宗即位。八月劉行深、韓文約皆封國公。 上(懿宗)疾大漸 左軍中尉劉行深、 右軍中尉韓文約立少子普王儼爲皇太子, 權勾當軍國

同條考異曰:

不載長幼,

又不言所終,不言所殺者果何王也。

范質五代通録:梁李振謂陝州護軍韓彝範曰:「懿宗初升遐,韓中尉殺長立少,以利其權, 遂亂天下。 今將軍復欲爾耶?」舞範即文約孫也。按:懿宗八子,僖宗第五,餘子新舊書

與前此 據此 ,唐代內廷閹寺決定帝位繼承之經過及李氏子孫作傀儡犧牲之悲劇,史乘殊多闕漏, 相似,乃一種公式化之行動,其概況亦可推知也。

·唐書貳拾上昭宗紀(參考新唐書拾昭宗紀通鑑貳伍柒文德元年三月條)略云:

昭宗諱曄,懿宗第七子,封壽王。文德元年二月僖宗暴不豫,及大漸之夕,而未知所立,

太弟,八日即位。 羣臣以吉王最賢,又在壽王之上,將立之,唯軍容楊復恭請以壽王監國。三月六日立爲皇

書壹捌肆宦官傳楊復恭傳(新唐書貳佰捌宦者傳下楊復恭傳同)略云:

李茂貞收興元,進復恭前後與[楊]守亮私書六十紙,内訴致仕之由云:「吾於荆榛中援立

,有如此負心門生天子,既得尊位,乃廢定策國老。」

雖擬譬稍有不倫,然止就宦官專決皇位繼承一事言之,則其語實與當時政治之情狀符合也。 之所以終競勝李黨者,亦與此點有關。楊復恭「門生天子」之喻,乃宦官受士大夫積習之傳染、 寅恪案:唐代科舉制度,門生為座主所獎拔,故最感恩,兩者之間情誼既深,團結自固。 牛黨

唐書拾昭宗紀(舊唐書貳拾上昭宗紀同)云:

新

於少陽院。辛卯季述以皇太子裕爲皇帝。 光化三年十一月己丑神策軍中尉劉季述、王仲先、内樞密使王彦範、薛齊偓作亂,皇帝居

薛齊偓伏誅,降封皇太子裕爲德王。 天復元年正月乙酉左神策軍將孫德昭、 董彦弼、 周承誨以兵討亂, 皇帝復於位。

同書捌貳德王裕傳(舊唐書壹柒伍德王裕傳同)略云:

德王裕,昭宗長子也,大順二年六月二十八日封,韓建殺諸王,因請裕爲皇太子。劉季述

舊唐書壹柒伍憲宗以下諸子傳論云:

自天寶已降, 内官握禁旅, 中鬧纂繼皆出其心,故手纔攬於萬機,目已睨於六宅(寅恪

案:諸王居於十六宅)。

哀帝(柷)之立及其遜位一段經過, 不過執行故事之擴大化及表面化耳。唐代皇位繼承之不固定,此役乃三百年間最後之結局。 寅恪案:唐代皇帝廢立之權既歸閹寺, 則屬於朱全忠創業之裝飾物及犧牲品(詳見舊唐書貳拾下哀 皇帝居宫中亦是廣義之模範監獄罪囚。 劉季述等之廢立

帝紀、新唐書拾昭宣光烈孝皇帝紀),不足特為論述也。

舊唐書壹捌肆宦官傳楊復恭傳末(參考新唐書貳佰捌宦者傳下韓全誨張彦弘傳、舊唐書貳拾上 唐書拾昭宗紀)略云

是月(光化三年正月),[朱]全忠迎駕還長安,韶以崔胤爲宰相兼判六軍諸衛。

胤奏曰:

高祖太宗時無内官典軍旅, 内諸司使務宦官主者,望一切罷之,諸道監軍使並追赴闕廷。」韶曰:「其第五可範已 令宦官主之, 自是參掌樞密, 自天寶已後, 由是内務百司皆歸宦者。 宦官寝盛,貞元、元和分羽林衛爲左右神策軍, 不翦其本根, 終爲國之發

其在畿甸同華河中並盡底處置訖,諸道監軍使已下及管內經過並居停內使勅

到並仰隨處誅夷訖聞奏,其左右神策軍並令停廢!」

寅恪案:舊傳所載崔胤之奏及答詔,乃中古政治史畫時代之大文字,故節録之,以結此篇焉。

能補正唐代有關諸外族之史事者頗多,固非此篇之所能詳, 一代為吾國與外族接觸繁多,而甚有光榮之時期。近數十年來考古及異國文籍之發見 亦非此篇之所欲論也。 茲所欲論者

多譯

:一曰外族盛衰之連環性,二曰外患與内政之關係,茲分別言之於下:

傳總序: 衰興廢, 甲外族之 關 所謂外族盛衰之連環性者,即某甲外族不獨與唐室統治之中國接觸,同時亦與其他之外族有 夷更疊盛 唐室統治之中國遂受其 其他外族之崛起或強大可致某甲外族之滅亡或衰弱, 其間相互之因果雖不易詳確分析 略 關 常為多數外族間之連環性, 衰之故始得明瞭,時當唐室對外之措施亦可略知其意。 云 係 其範 圍 興亡強弱之影響,及利用其機緣,或坐承其弊害, 不可限於某甲外族 而非中國與某甲外族間之單獨性也。新唐書貳壹伍上四夷 必通覽諸外族相互之關係, 蓋中國與其 然後 故觀察唐代 所接觸 三百年 諸外 間 中國 中 族之盛 或 與某 與 ifij 兀

蠻夷更盛衰, 嘗與中國抗衡者有四: 突厥、 吐蕃、回鶻、 雲南是也。 凡突厥、吐

回 鶻以盛衰先後爲次; 東夷、 西域又次之, 迹用兵之輕重也; 終之以南蠻, 記唐所繇

宋子京作唐書四夷傳,其叙述次第一以盛衰先後,二迹用兵之輕重,三記唐所由亡。 患與内政關係之範圍,俟於篇末論之,茲先不涉及也。 依其所以更互盛衰之跡,列為次序,欲藉以闡發其間之連環性。至唐亡由於南韶, 乃屬 於外

本末,必特為標出之,以期近真實而供鑑誡,兼見其有以異乎誇誣之宣傳文字也。 之先導者也。國人治史者於發揚讚美先民之功業時, 又唐代武功可稱為吾民族空前盛業,然詳究其所以與某甲外族競爭,卒致勝利之原因,實不僅 與壹玖柒邊防典突厥條上(參新唐書貳壹伍上突厥傳、唐會要玖肆北突厥條)云: 於吾民族自具之精神及物力,亦某甲外族本身之腐朽衰弱有以招致中國武 且非史家陳述覆轍,以供鑑誡之意,故本篇於某外族因其本身先已衰弱, 往往忽略此點,是既有違學術探求真實之 力攻取 遂成中國 之道 勝利之 而

中國人歸之者甚衆, 劉武 又更强盛,勢陵中夏。迎蕭皇后,置於定襄。

高昌諸國皆臣之, 周 梁師都、 控弦百萬, 戎狄之盛近代未有也。 李軌、 高開道之徒雖僭尊號, 俱北面稱臣。 大唐起義太原,劉文静 東自契丹,

西

舊唐書陸柒李靖傳(参考新唐書貳壹伍上突厥傳、貞觀政要貳任賢篇、大唐新語柒容恕篇)云:

上皇(高祖)以百姓之故,稱臣於突厥,朕未嘗不痛心疾首, 太宗初聞靖破頡利 今者暫動偏師, 大悦,謂侍臣曰:「朕聞『主憂臣辱, 無往不捷,單于款塞,恥其雪乎?」 主辱臣死』。 志滅匈奴, 坐不安席, 往者國家草創,太

以致之也。 覆滅突厥者, 利敗亡已後,太宗失喜之餘,史臣傳錄當時語言,始洩露此役之真相。然則隋末唐初之際,亞 注所載唐初事最為實録,而其紀劉文靜往突厥求援之本末,尚於高祖稱臣一節隱諱不書。 寅恪案:隋末中國北部群雄並起,悉奉突厥為大君,李淵一人豈能例外? 溫大雅大唐創業起居 洲大部民族之主人是突厥,而非華夏也。 茲略引史文, 固由唐室君臣之發奮自強, 以證明之於下: 遂得臻此, 但唐太宗僅於十年之後, 實亦突厥本身之腐敗及迴紇之興起 能以屈辱破殘之中國一舉而 一端有 逮頡

通典壹玖柒邊防典突厥上條(参考舊唐書壹玖肆上新唐書貳壹伍上突厥傳、唐會要玖肆北突厥 條等)云

使奏言與頡利有隙, 利討之,師又敗績, 貞觀元年陰山以北薛延陀、迴紇、拔也古等十餘部皆相率叛之,擊走其欲谷設。頡利遣突 奔還, 奏請擊之。 頡利怒, 拘之十餘日, 突利由是怨憾, 韶秦武通以并州兵馬隨便接應。三年薛延陀自稱可汗於漠 内欲背之。二年突利

遣使來貢方物。 國人患之,諸部攜貳。 頡利每委任諸胡, 頻年大雪, 疏遠族類, 六畜多死, 胡人貪冒, 國中 大餒。 性多 翻覆, 頡利用度不給,復重 以故法令滋章,

舊唐書壹玖伍迴紇傳(新唐書貳壹柒上回鶻傳同, 薛延陀傳、 唐會要玖陸薛延陀傳、 通典壹玖玖邊防典薛延陀條等)云: 又参舊唐書壹玖玖下鐵勒傳、新唐書壹壹柒

部,由是下不堪命,内外叛之。

其地 僕骨同羅思結阿跌等部, 突厥頡利等可汗之後,北虜唯菩薩、薛延陀爲盛。太宗册北突厥莫賀咄爲可汗, 務,其母烏羅渾主知争訟之事,平反嚴明,部內齊肅, 進擊大破之,俘其部衆, 利可汗遣子欲谷設率萬騎討之。 初有特健俟斤死, 菩薩勁勇有膽氣, 有子曰菩薩, 迴紇酋帥吐迷度與諸部大破薛延陀多彌可汗, 迴紇由是大振, 善籌策,每對敵臨陣,必身先士卒,以少制衆, 菩薩領騎五千與戰, 部落以爲賢而立之。 因率其衆附於薛延陀, 破之於馬鬛山 初菩薩與薛延陀侵突厥北邊, 迴紇之盛由菩薩之興焉。貞觀 號菩薩 因 爲活頡 遂併其部曲 逐北至於天 常以射獵 利 遣統迴統 發 Ш 突厥頡 擒降 仍遣 奄有 爲

部族迴紇薛延陀之興起兩端, 北突厥或東突厥之敗亡除與唐為敵外,其主因一為境內之天災及亂 故授中國以可乘之隙。否則雖以唐太宗之英武, 政, 二為其 亦未必能致如是 他鄰

舊唐書壹玖伍迴紇傳(新唐書貳壹柒下回鶻傳同)云:

汗覺 殺屋駁,斬掘羅勿,燒蕩殆盡,迴鶻散奔諸蕃。有迴鶻相駁職者,擁外甥龐特勒及男鹿并 可汗,以虛駁特勒爲可汗。有將軍句録末賀恨掘羅勿,走引點憂斯, 開成初,其相有安允合者,與特勒(寅恪案:勒當作勤, 遏粉等兄弟五人一十五部,西奔葛邏禄,一支投吐蕃,一支投安西,又有近可汗牙十三部 後唐獻祖紀年録之語及唐會要玖捌迴紇條俱可參考。) 以特勒烏介爲可汗,南來附漢。(寅恪案:通鑑貳肆陸開成四年末條柴草作柴革。考異駮 殺柴草及安允合。又有迴紇相掘羅勿者,擁兵在外,怨誅柴草、 下同)柴草欲篡薩特可汗。 領十萬騎破迴 安允合, 又殺薩特

唐會要玖捌迴紇條 云

新唐書貳壹柒下黠戛斯傳略云: 連年饑疫,羊馬死者被地,又大雪爲災。

拏門二十年不解。 勒(寅恪案:勒亦當作勤)皆潰。 回鶻授其君長阿熱爲毗伽頓頡斤。 阿熱恃勝肆詈, 回鶻不能討,其將句録莫賀導阿熱破殺回鶻可汗, 回鶻稍衰,阿熱即自稱可汗。回鶻遣宰相伐之,不勝,

外族盛衰之連環性及外患與内政之關係

寅恪 斯又外族盛衰連環性之一例證也。 起侵其外, 雖以李文饒之才智, 案 迴紇自唐肅宗以後最為雄大, 於是崩 潰不 , 恐不易致此, 振矣。 然考之史籍, 其主因所在,無乃由堅昆之興起, 中國受其害甚鉅, 當日中國亦非盛強之時, 至文宗之世天災黨亂 而能 遂致 迴紇之滅亡歟? 成 擾 此 其 攘夷之偉業 内, 點 夏 斯

新 唐書貳壹陸下吐蕃傳論 云

國患最久。

贊普遂盡盗

河湟,

薄王畿

犯京師,

掠近輔,

馘華人,

謀夫虓帥環

爲

四夷有弗率者, 皆利兵移之, 蹶其牙, 爲東境, 犁其庭而後已。 唯吐 回 鶻 號强 雄

其概 稍得安謐。計其終始,約二百年,唐代中國所受外族之患未有若斯之久且劇者也。 寅恪案:吐蕃之盛起於貞觀之世,至大中時,其部族瓦解衰弱,中國於是收復河湟,西北 之連環性, 族之興廢關 其役屬之党項別部復興起焉。此党項部後裔西夏又為中國邊患,與北宋相終始。然則吐 惜未有闡發解釋者, 卒不得要領。 及唐代中央政府肆 係吾國中古史者如是, 晚節二姓自亡, 故不得不於此一論 應之對策即結合鄰接吐 其事蹟茲篇固不能詳言, 而唐亦衰焉。 述之也 蕃諸 外族, 以行包圍之秘計, 而其盛 衰之樞機即 與其 迨吐 舊史雖 八他外族 蕃衰 亦 載 敗

李唐承襲宇文泰「關中本位政策」,全國重心本在西北一隅,而吐蕃盛強延及二百年之久。

故當

與唐之競爭影響甚鉅,更不能不為一論述之也。 極政策不獨有關李唐一代之大局,即五代、 以致之(亦見下文論高麗事節), 力財力積 中 高宗兩朝全盛之勢, 極盛之時, 已不能 極進取 以開 歷經艱困, 不於東北方面採維持現狀之消極政略(見下論高麗事節),而竭 拓西方邊境, 而吐蕃之盛強使唐無餘力顧及東北, 始克高 統治中央亞 趙宋數朝之國勢亦因以構成。 麗, 既克之後, 細亞 藉保關隴之安全為國策也。 復不能守, 要為最 由是言之, 雖天時 大 原因。 地勢之艱阻有 吐蕃 此 又唐資 東 北消 全國 族

貢 新唐書捌宣宗紀(參考舊唐書壹捌下宣宗紀、壹玖陸下吐蕃傳、壹玖捌西戎傳党項傳, 壹陸下吐 蕃傳、 貳貳壹上西域傳党項傳, 及唐會要玖柒吐蕃條玖捌党項羌條等)云: 新 唐

[大中] 三年二月吐蕃以秦 原、 安樂三州, 石門、 驛藏 木峽、 制勝、 六盤、石峽、

關歸於有司。 [大中]四年十一月党項寇邠寧。 十月吐蕃以維州歸於有司。 十二月鳳翔節度使李安業、 十二月吐蕃以扶州歸於有司 河東節度使李拭

爲招

討党項

大中]五年三月白敏中爲司空, 招討南山平夏党項行營兵馬都統。 四月赦平夏党項羌。八 岷

月乙巳赦南 州歸於有司 山党項羌。 十月沙州人張義潮以瓜、沙、伊、肅、鄯、甘、河、西、蘭、

同書貳壹陸下吐蕃傳(參考通鑑貳肆柒會昌二年、 貳肆捌會昌三年、貳肆玖大中三年諸 [條)略

歸唐 大中三年, 婢婢引衆趨甘州西境, 是,皆叛去。 逆流三日,鼠食稼,人饑疫,死者相枕藉,斟廓間夜聞鼙鼓聲,人相驚。會昌二年贊普 達磨嗜酒好畋獵,喜內,且凶愎少恩,政益亂。自是國中地震裂,水泉湧, 彝泰] 贊普立幾三十年病不事,委任大臣,故不能抗中國,邊候晏然。死, 曰:「贊普支屬尚多, 以妃綝兄尚延力子乞離胡爲贊普,始三歲,妃共治其國。 [尚]恐熱自號宰相, 何至立綝氏子邪?」用事者共殺之。 恐熱大略都、廓、瓜、肅、伊、西等州,保渭州,奉表 以兵二十萬擊[鄯州節度使尚]婢婢。 三年, 國人以贊普立非 大相結都那見乞離胡 恐熱敗, 岷山崩, 洮水 以弟達 單騎而逃。

中國自身武 新唐書貳壹陸上吐蕃傳略云 定党項, 部族逐漸離邏逊之管制 寅恪案:吐蕃之破敗由於天災及内亂, 而終不得不遣白敏中施招撫之策,含混了之。則河湟之恢復實因吐蕃内部之衰亂 力所能致, 而獨立,党項之興起,張義潮之來歸,皆其例也。宣宗初雖欲以兵力平 抑又可見矣。 觀此可知也。 吐蕃中央政權統治之力既弱,故其境內諸 書貳貳貳上南蠻傳南韶傳略云:

憺南羌,南羌連衡,河西必危。且莫賀延磧袤二千里,無水草,若北接虜,唐兵不可度而 是歲(長壽元年)又詔王孝傑[等]擊吐蕃,大破其衆,更置安西都護府於龜茲,以兵鎮守, 先帝舊封, 若又棄之, 是自毀成功而破完策也。夫四鎮無守, 長鼓右驅, 煙火相望, 庭節度使張孝嵩曰:「勃律唐西門,失之,則西方諸國皆墮吐蕃。」始勃律王來朝,父事帝 (玄宗),還國,置綏遠軍以捍吐蕃,故歲常戰。吐蕃每曰:「我非利若國,我假道攻四鎮 者請廢四鎮勿有也。崔融獻議曰:「太宗文皇帝踐漢舊跡,竝南山,抵葱嶺, ,則伊西北庭安西諸蕃悉亡。」議者乃格。[開元]十年攻小勃律國,其王没謹忙詒書北 踰高昌,歷車師, 吐蕃不敢内侮。 高宗時有司無狀,棄四鎮不能有,而吐蕃遂張,入焉耆之西, 鈔常樂, 絶莫賀延磧, 以臨敦煌。 胡兵必臨西域, 今孝傑一舉而取四鎮,還 西域 剖裂府鎮 震則威

書壹叁伍高仙芝傳(参舊唐書壹佰肆高仙芝傳、新唐書貳貳壹下西域傳小勃律傳 萬出討。八月仙芝以小勃律王及妻自赤佛道還連雲堡,與[監軍邊]令誠俱班師,於是蔣林 小勃律其王爲吐蕃所誘,妻以女,故西北二十餘國皆羈屬吐蕃。天寶六載韶仙芝以步騎 大食諸胡七十二國皆震攝降附。 略

吐蕃苦唐韶掎角,亦不敢圖南韶。[韋]皋令[部將武]免按兵萬州,節級鎮守, 時(貞元時)唐兵屯京西朔方,大峙糧,欲南北並攻取故地,然南方轉饟稽期, 虜保鹿危山, 毘羅伏以待。又戰, 虜大奔。於時康、黑衣大食等兵及吐蕃大酋皆降, 亦所在屯戍。吐蕃懲野戰數北,乃屯三瀘水,遣論妄熱誘瀕瀘諸蠻復城悉攝, 一萬首 蠻酋潜導南韶與皋部將杜毗羅狙擊。[貞元]十七年春夜絶瀘,破虜屯,斬五百級。 悉攝吐蕃險 雖南 兵不悉集。

精鎧多置南屯, 時虜兵三萬攻鹽州,帝(德宗)以虜多詐,疑繼以大軍,詔皋深鈔賊鄙,分虜勢。皋表:賊 原、邠寧、涇原軍獵其北,劍南、東川、山南兵震其東,鳳翔軍當其西,蜀南韶深入, 或自西山,或由平夷,或下隴陀和石門,或徑神川、納川,與南詔會。 靈武兵破虜二萬, 焚堡百五十, 所斬首萬級, 獲鎧械十五萬, 圍昆明、維州, 今向鹽夏,非全軍,欲掠河曲党項畜産耳。俄聞虜破麟州, 涇原、 鳳翔軍敗虜原州,惟南韶攻其腹心,俘獲最多。 不能克, 是時 皋督諸將分道 乃班師。 回鶻、 克

當有衍誤。)與吐蕃爲勁敵,蕃兵大半西禦大食,故鮮爲邊患,其力不足也。 又案賈躭四夷述云,貞元二年(寅恪案:舊傳作「貞元中」,新傳作「貞元時」,此「二年」兩字

(參舊唐書壹玖捌西戎傳大食傳、新唐書貳貳壹下西域傳大食傳

唐會要壹佰大食條

吐蕃施 此 為證明於下: 亞及大食之關係, 夫中國與 固守四鎮 則唐代之所以開拓西北 據上引新書南詔傳,可知貞元十七年之大破吐蕃,乃略收包圍環攻之效者。 行之策略亦即利用此諸族相互之關係。易言之,即結合鄰接吐蕃諸外族 八吐蕃 華夏、 唐關中乃王畿,故安西四鎮為防護國家重心之要地,而小勃律所以成唐之西門也。 又不能 既處於外族交互之複雜環境 吐蕃、 又章南康以南詔制吐蕃之得策, 不扼據小勃律 大食三大民族皆稱盛強, 遠征葱嶺, 以 制 吐蕃, 實亦有其不得已之故, 而非中國與 而斷絕 中國欲保其腹心之關隴 均可於此傳窺見一二也。茲復別引史籍 其與大食通援之道。當時國際之大勢如 八吐蕃 一族單純之關 未可專咎時主之黷 ,不能不固守四鎮。欲 係, 故唐室君臣對於 以 而吐 為環 武開邊也。 攻包 蕃與中 以 玄

舊唐書壹肆拾章皋傳(新唐書壹伍捌章皋傳同)云:

皋以雲南蠻衆數十萬與吐蕃和好,蕃人入寇必以蠻爲前鋒, [貞元]四年, 入南韶蠻,說令向化,以離吐蕃之助。 皋遣判官崔佐時

新唐書貳貳貳上南蠻傳南詔傳略云:

安西鎮守揚兵四臨, [貞元] 五年,[異牟尋]遺[韋]皋書曰:願竭誠日新, 委回鶻諸國所在侵掠, 使吐蕃勢分力散, 歸款天子,請加戍劍南、 不能爲强, 此西南隅不煩天

兵可以立功云。

舊唐書壹貳玖韓滉傳(新唐書壹貳陸韓休傳附滉傳同)云:

宗)甚納其言。滉之入朝也(寅恪案:舊唐書壹貳德宗紀上貞元二年十一月兩浙節度使韓滉 來朝),路由汴州,厚結劉玄佐,將薦其可任邊事。玄佐納其賂,因許之。及來覲,上訪 以充三年之費,然後營田積粟,且耕且戰,收復河隴二十餘州,可翹足而待也。」上(德 元元年七月丙午,兩浙節度使韓滉檢校尚書左僕射江淮轉運使)所貯蓄財賦 渭並修堅城,各置二萬人,足當守禦之要,臣請以當道(寅恪案:舊唐書壹貳德宗紀上貞 計其分鎮之外,戰兵在河隴五六萬而已。 以 時兩河罷兵,中土寧义。滉上言:「吐蕃盗有河湟,爲日已久。大曆已前,中國多難,所 肆其侵軼。 臣聞近歲已來,兵衆寝弱,西迫大食之强,北病迴紇之衆, 國家第令三數良將長驅十萬衆, 於涼、 東有南韶之防, 爲饋運之資 鄯、

元三年二月以疾薨,遂寢其事。

問焉,

初頗禀命,

及滉以疾歸第,玄佐意怠,遂辭邊任,盛陳犬戎未衰,不可輕進。

滉貞

百 書同卷張延賞傳(新唐書壹貳柒張嘉貞傳附延賞傳同)云:

延賞]請減官員, 初韓滉入朝,至汴州,厚結劉玄佐,將薦其可委邊任,玄佐亦欲自効,初禀命,及滉 收其俸禄,資幕職戰士,俾劉玄佐收復河湟,軍用不乏矣。上(德宗)然

玄佐以疾辭,上遣中官勞問, 卧以受命。延賞知不可用, 奏用李抱真, 抱真亦辭不

時抱真判官陳曇奏事京師,延賞俾曇勸抱真,竟拒絶之。蓋以延賞挾怨罷李晟兵柄,由是

通鑑貳叁貳貞元三年七月條略云:

武臣

不附。

知上素恨迴紇,故不肯言。 敢言之。」上固問,不對。泌意欲結迴統、大食、雲南,與共圖吐蕃,令吐蕃所備者多。 [李] 泌曰:「臣能不用中國之兵,使吐蕃自困。」上(德宗)曰:「計將安出?」對曰:「臣未

同書貳叁叁貞元三年九月條略云:

今之計,當以迴紇爲先,三國差緩耳。」上曰:「所以招雲南、 (德宗)曰:「三國當如卿言,至於迴紇,則不可。」 泌曰:「臣固知此, 大食、 天竺奈何?」對曰: 所以不敢早言。爲

[李泌]對曰:「願陛下北和迴紇,南通雲南,西結大食、天竺,如此,則吐蕃自困。」上

自葱嶺盡西海,地幾半天下,與天竺皆慕中國,代與吐蕃爲仇,臣故知其可招也。」 迴紇和, 則吐蕃已不敢輕犯塞矣。次招雲南,則是斷吐蕃之右臂也。 大食在西域爲最强,

寅恪案:德宗、章皋、韓滉、李泌等皆欲施用或略已實行包圍環攻吐蕃之政策,若非當日唐室

下篇

君主 侯 家 及將 傳。 相 大臣深知諸外族相互之關係,不能致此, 李繁著書 雖多誇大溢美之語 (如劉玄佐之入朝, 實出 而李長源之論尤為明暢。 韓滉之勸促, 通鑑所 而 鄴 侯 家 載當 傳 則 採自 歸

史料 知其 見通鑑考異貞元二年十一月條), 然校以同

功於李

H

馬

君實謂之掠美,

即是

其例也。

時

所述包環吐蕃之策 要為有所依據, 不盡屬浮詞 也

盛 前言唐太宗、 唐室 而二者間之連環關 為西北之強敵所牽制,不得已乃在東北方取消極 高宗二朝全盛之世, 係, 實影響於中夏數百年國運之隆替。 竭中國之力以取 高麗, 退守之策略。 僅得之後, 今述吐蕃 旋即 然則 事竟, 退 吐 出 蕃 雖 即 實 與 續 高 由 麗 吐

不接

熾

隋煬帝 承文帝統 一富盛之後, 唐太宗藉内安外攘之威, 傾中夏全國之力, 以攻高麗之小邦,

亦為此連

環

之關係,

,不獨叙述次第之便利也

東北 於退 之所以暫得旋失之故復無 了,不能涉及。因僅就唐代用兵高麗之本末 敗。 地理、 煬帝 竟 人事三 坐是覆其宗社, 因素 貫可 與其他外族更有 ·通之解釋。 而太宗亦遺恨無窮。 鄙意高 不同。 推論此 麗問 其關 自來史家於此既鮮卓 三因 題 除 於唐以前及以 素之關係, 前 所謂外族盛 以明 後之史事 識 衰之連 中 之議 國 論 在 者 環 唐以 性 以 外 而 前 非 唐高宗 經 尚 本 別

「承宇文氏「關中本位政策」,其武力重心即府兵偏置於西北一 隅, 去東北方之高麗甚遠。中國 東

成

敗

利

鈍

所以然之故,

治史之君子儻亦有取於是歟?

取高 功或覆敗之禍。 療泥濘冰雪寒凍皆於軍隊士馬之進攻餱糧之輸運已甚感困 轉以為新羅強大之資, 麗 唐代之中國連結新羅 經 則其鄰 一略高 麗。 唐以前中國對遼東、 國百濟 而百濟又與新羅關係密切, 新羅為形勢所關之地 此實當日所不及料,因成為後來數百年世局轉捩之樞紐者 制服百濟,藉以攻克高麗,而國力分於西北 高麗進攻之策略為速戰速決者, 故百濟、 於不善長海戰之華夏民族尤非先得百濟 新羅之盛衰直接影響於中國與 難, 苟遇一堅持久守之勁敵 其主因實在此。 吐蕃之勁敵, 也。 終亦 若由 高 必致 不能 麗之爭 以 海 道以 為根

東北 近, 長短 於高 獲 問 高 讀者若取 題 麗 麗之役於下, 問題,茲引史籍以供釋證, 亦 明 可具 確 時 印 象。 一正確 日 與道 藉作 並 略增 之概念也。 里綜合推計, 一例。其以干支記日者悉注明數字及月建大小盡, 刪 胡注 之文, 則不 而此事於時日先後之記載最為重要, 僅此 附載陸路 役行 軍 行 運糧之困 軍出入遼東所經重要城 難得知實狀, 故節 庶幾 邑 而於國史上 録 距 讀者於 長 通 鑑 安洛陽 所紀唐 時 唐 之遠 前之 間

太

鑑壹玖柒紀唐太宗伐高麗事略云:

涌

上(太宗)將征高麗 [貞觀十八年]秋七月(大盡)辛卯(二十日) 勑將作大監閣立德等詣

子(三十日 當怨,何憂不克?布告元元,勿爲疑懼!十二月(小盡)甲寅(十四日)韶諸軍 率李世勣爲遼東道行軍大總管,帥步騎六萬人及蘭河二州降胡趣遼東,兩軍合勢並進。庚 淮嶺峽兵四萬、長安洛陽募士三千、戰艦五百艘,自萊州泛海趨平壤。又以太子詹事左衛 冬十月(大盡)甲寅(十四日)車駕行幸洛陽(寅恪案:在今河南洛陽縣。通典壹柒柒州郡典 督兵及契丹、奚、靺鞨,先擊遼東,以觀其勢。以太常卿韋挺爲饋運使,以民部侍郎 五:一曰:以大擊小,二曰:以順討逆,三曰:以治乘亂, 濟,上以爲畏懦, 善守城,攻之不可猝下。」上曰:「今日非隋之比, 河南府洛州去西京八百五十里)。十一月(大盡)壬申(初二日)至洛陽。 師副之。自河北諸州皆受挺節度,聽以便宜從事。又命太僕少卿蕭銳運河南諸州糧入海。 已致仕 江三州,造船四百艘,以載軍糧。甲午(二十三日)下詔遣營州都督張儉等帥 去西京二千五百二十三里,去東京一千六百八十里)。手韶諭天下,言:昔隋煬帝 上以其嘗從隋煬帝伐高麗,召詣行在問之。對曰:「遼東道遠,)諸軍大集於幽州(寅恪案:在今河北薊縣。通典壹柒捌州郡典范陽郡幽州今理 高麗王仁愛其民, 召詣洛陽。甲午(二十四日)以刑部尚書張亮爲平壤道行軍大總管, 以思亂之軍擊安和之衆,故不能成功。今略言必勝之道 公但聽之!」張儉等值遼水漲,久不得 四曰:以逸待勞, 前宜州刺史鄭 糧運艱阻 五 日: 以悦 帥 東夷 江

張形勢, 朕今東征,欲爲中國報子弟之讐,高麗雪君父之恥耳。且方隅大定,惟此未平,故及朕之 案:在今河北定縣。通典壹柒捌州郡典博陵郡定州今理安喜縣,去西京二千一百里,去東 趣甬道,出高麗不意。夏四月(大盡)戊戌朔(初一日)世動自通定濟遼水(胡注云:通定鎮 通典壹柒捌州郡典柳城郡營州今理柳城縣,去西京五千里,去東京四千一百一十里)。多 俊,悲泣何爲?」壬辰(二十四日)車駕發定州。李世勣軍發柳城(寅恪案:在今熱河朝陽縣。 京一千二百十里)。丁亥(十九日)上謂侍臣曰:「遼東本中國之地,隋氏四出師而不能得, 丁酉(二十八日)除名,以將作少監李道裕代之,崔仁師亦坐免官。二月(大盡)庚戌(十二 營州至遼河四百八十里),至玄菟(寅恪案:三國志魏志叁拾東夷傳東沃沮傳云:[漢武帝] 在遼水西,隋大業八年伐遼所置,甬道隋起浮橋渡遼水所築。寅恪案:通典壹柒捌柳城郡 盧思臺去幽州八百里,此漕渠蓋即曹操伐烏丸所開泉州渠也),淺塞不能進, 日)上自將諸軍發洛陽。是月李世勣軍至幽州。三月(小盡)丁丑(十九日)車駕至定州(寅恪 [貞觀]十九年春正月(小盡),韋挺坐不先行視漕渠,運米六百餘艘至盧思臺側 用士大夫餘力以取之。」上將發,太子(高宗)悲泣數日,上曰:「今留汝鎮守, , 若出懷遠鎮者(寅恪案:新唐書叁玖地理志營州柳城郡有懷遠守捉城)。而潛師北 械送洛陽。

濟、

契丹分道擊高麗。

縣)。丁巳(二十日)東駕至北平(胡注云:此古北平也,舊志平州隋爲北平郡。寅恪案:在 勣、江夏王道宗攻高麗蓋牟城(胡注云:蓋牟城在遼東城東北。寅恪案:在今遼寧蓋 將兵數千至新城(寅恪案:在今遼寧瀋陽縣西北),城中無敢出者。營州都督張儉將胡兵爲 兒旋師。」卑奢城即卑沙城也,可以參證),程名振引兵夜至,副總管王大度先登,五月(小 今河北盧龍縣。通典壹柒捌州郡典北平郡平州今理盧龍縣,東北到柳城郡七百里,去西京 肆叁下地理志引賈躭所記入四夷道里也)。丁未(初十日)車駕發幽州。壬子(十五日)李世 以沃沮城爲玄菟郡,後爲夷貊所侵,徙郡勾麗西北,今所謂玄菟故府是也。胡注云:有遼 傳云:馬訾水一名鴨緑水,在平壤城西北四百五十里,遼水東南四百八十里。胡注云:漢書 盡)已已(初二日)拔之。分遣總管丘孝忠等曜兵於鴨緑水(寅恪案:通典壹捌陸邊防典高句麗 壤,高元震懼,遣使執叛臣斛斯政,詣遼東城下,上表請降。[煬]帝許之,遣人持節召護 [大業]十年又帥師渡海,至卑奢城,高麗舉國來戰,護兒大破之,斬首千餘級,將趨平 1千三百二十里,去東京三千五百二十里)。癸亥(二十六日)李世勣等拔蓋牟城,獲二萬 , 遼水所出), 高麗大駭, 城邑皆閉門自守。壬寅(初五日)遼東道副大總管江夏王道宗 糧十餘萬石。 進渡遼水, 趨建安城(胡注云:自遼東城西行三百里至建安城。 張亮率舟師自東萊渡海,襲卑沙城(寅恪案:隋書陸肆來護兒傳云: 胡注蓋依據新唐

謂之馬訾水,今謂之混同江)。李世勣進至遼東城下(寅恪案:在今遼寧遼陽縣北)。庚午(初三日) 十里。江夏王道宗曰:「高麗傾國以拒王師,平壤之守必弱,假臣精卒五千覆其本根,則 高麗有對盧, 年老習事, 謂延壽曰:「爲吾計者, 莫若頓兵不戰, 曠日持久, 遣奇兵斷其 歸則泥潦爲阻,坐困吾軍,上策也。拔城中之衆,與之宵遁,中策也。來與吾戰,下策也。 五萬救安市。 案:在今遼寧蓋平縣東北),進兵攻之。丁巳(二十一日)北部耨薩延壽、惠真帥高麗、靺鞨兵十 州。己亥(初三日)以蓋牟城爲蓋州。丁未(十一日)車駕發遼東。丙辰(二十日)至安市城(寅恪 在今遼寧遼陽縣東北)。六月(大盡)丁酉朔(初一日)城主孫代音請降,上受其降,以白巖城爲巖 殺萬餘人,得勝兵萬餘人,男女四萬口,以其城爲遼州。乙未(二十八日)進軍白巖城(寅恪案: 士卒之心。李世勣攻遼東城,晝夜不息,旬有二日。上引精兵會之,甲申(十七日)遂克之。 驍騎數十衝之,左右出入,李世勣引兵助之,高麗大敗。丁丑(初十日)車駕渡遼水,撤橋以堅 車駕至遼澤, 泥淖二百餘里, 人馬不可通, 將作大監閻立德布土作橋, 軍不留行。壬申(初五 運道,糧食既盡,求戰不得,欲歸無路,乃可勝也。」延壽不從,引軍直進,去安市城 數十萬衆可不戰而降。」上不應。戊午(二十二日)諸軍並進,高麗兵大潰,斬首二萬餘 乙亥(初八日)高麗步騎四萬救遼東,既合戰,唐兵不利。[江夏王]道宗收散卒,與 上謂侍臣曰:「今爲延壽策有三:引兵直前,連安市城爲壘,攻之不可猝下,欲

八日 骨,皆躡吾後,不如先破安市,取建安,然後長驅而進,此萬全之策也。上乃止。諸軍急 緑水,直取平壤,在此舉矣。上將從之,獨長孫無忌以爲建安城之虜衆猶十萬,若向烏 羣臣亦曰:張亮在沙城(胡注云:沙城即卑沙城),召之,信宿可至。併力拔烏骨城, 於上曰:「安市人自爲戰,未易猝拔,烏骨城(寅恪案:在今遼寧蓋平縣東境地)耨薩老耄, 級。己未(二十三日)延壽、惠真帥其衆三萬六千八百人[來]降。獲馬五萬匹,牛五 寒,草枯泉凍, 鐵甲萬領,佗器械稱是。高麗舉國大駭, 攻安市,江夏王道宗督衆築土山逼其城,晝夜不息,凡六旬,用功五十萬。上以遼左早 不能堅守,移兵臨之,朝至夕克,其餘當道小城望風奔潰,鼓行而前,平壤必不守矣。」 安耳。」上曰:「以公爲將,安得不用公策。」世勣遂攻安市,攻久不下。高延壽、惠真請 安市在北,吾軍糧皆在遼東,若賊斷吾糧道,將若之何?不如先攻安市,安市下,則取建 兵精,建安兵弱而糧少,公可先攻建安,建安下,則安市在吾腹中。」對曰:「建安在南, 一日)渡遼水。遼澤泥潦,車馬不通,命長孫無忌將萬人剪草填道,以車爲梁,上自繫薪 (大盡)辛未(初五日)上徙營安市城東嶺。 命李世勣、江夏王道宗將步騎四萬爲殿。乙酉(二十日)至遼東。丙戌(二十 士馬難久留,且糧食將盡,九月(大盡。寅恪案:是年八月小盡)癸未(十 上之克白巖也,謂李世勣曰:「吾聞安市城險而 上驛書報太子, 更名所幸 Ú, 日日駐 蹕 山。秋七月

寅恪案:唐代州治在今山西太原省會西南三十里)。 柒玖州郡典太原府并州今理太原、晉陽二縣,去西京一千三百里,去東京八百八十五里。 指所御褐袍謂太子曰:「俟見汝,乃易此袍耳。」在遼左雖盛暑流汗弗之易,及秋穿敗,左 州盧龍縣臨榆關在縣城東一百八十里據此當即今山海關地),道逢太子。上之發定州也 馳驛祀徵以少牢,復立所製碑,召其妻子詣行在勞之。丙午(十一日)至營州,丙辰(二十 注云: 蒲溝勃錯水皆在遼澤中)。暴風雪, 士卒沾濕, 多死者。凡征高麗戰士死者幾二千 於馬鞘以助役。冬十月(小盡)丙申朔(初一日)上至蒲溝駐馬,督填道諸軍,渡勃錯水(胡 日)車駕至定州。壬辰(二十八日)車駕發定州。十二月(小盡)戊申(十四日)至并州(通典壹 柒捌上谷郡易州,去西京二千一百九十七里,去東京一千四百六十二里),丙戌(二十二 (大盡)辛未(初七日)車駕至幽州。庚辰(十六日)過易州境(寅恪案:今河北易縣。通典壹 右請易之,上曰:「軍士衣多弊,吾獨御新衣可乎?」至是太子進新衣,乃易之。十一月 一日)上聞太子奉迎將至,從飛騎三千人馳入臨榆關(寅恪案:通典壹柒捌州郡典北平郡平 人, 戰馬死者什七八, 上以不能成功, 深悔之。歎曰:「魏徵若在, 不使我有是行也。」命

案:即今西安市)。上謂李靖曰:「吾以天下之衆困於小夷,何也?」靖曰:「此道宗所解。」

[貞觀]二十年二月(大盡)乙未(初二日)上發并州。三月(小盡)已已(初七日)車駕還京師(寅恪

江夏王道宗, 具陳在駐蹕時乘虚取平壤之言。 上悵然日 當時匆匆, 吾不憶也。

其城 從海 載 於東北行 故不妨先作豪 太宗伐 延 速戰速决 一時 .阻滯 發洛陽, 李世勣會集陸軍即戰鬥主力於幽州, 於是開始出動, 道 長孫無忌等之言可知也。至太宗雖經寒暑不肯易弊褐一事傳為美談, 遼左 攻 能 高 五 高 滅 至一星期之久, 始與世勣會兵, 軍也。又歷二月之久至五月初,李世勣軍進至遼東城下, 唐太宗之伐高麗, 惠真攻烏骨之策及太宗越安市先取建安之議實皆不可施行, 一秋晚氣候轉變, 麗, 月中旬將盡之際矣。 其 麗之功績多是官書諱飾其失敗之詞 、國者 語 若至秋季不能復衣褐袍之時 與百濟之關係甚大, 以收人心, 固由 敵 糧道 於貞觀十八年秋冬間著手準備, 人 有 斯亦英雄權譎之一端歟?又張亮等雖克卑沙,竟無大效者,殆以 不通, 又頓兵安市,由六月二十日至九月十八日三月之久而不能 内亂 觀於同 可乘, 若不急速班師 其軍行已嫌遲緩, 而百 一李世勣之人在太宗貞觀時 無論成敗如何, 斷不能不班 既 濟先已取得, 不足信 則將全軍 故亦可不辨。 及攻圍 至半歲之後, 要為其主因之一 一覆没。 太宗亦於此 遼東城, 蓋非俟至氣候稍暖之時 祇為快意之談耳, 不能克高 師歸來, 與太子相見。 江夏王道宗出奇之計 即貞 實則太宗明知此 經十有二日方能 也。 觀十九年一 時渡遼澤 麗, 其他史籍 而 觀 在 李世 克取 但為 月間 高宗 能

唐書貳貳拾東夷傳高麗傳(参舊唐書壹玖玖上東夷傳高麗傳、

唐會要玖伍高句麗條

舊唐書壹玖玖上東夷傳新羅傳(參新唐書貳貳拾東夷傳新羅傳、 六城户六十九萬, 剖其地爲都督府者九, 州四十二, 縣百。後復置安東都護府, 辱夷城,悉師圍平壤。九月勣縱兵譟而入[城],執[高麗王高]藏男建等, 克。」男建以兵五萬襲扶餘,勣破之薩賀水上,進拔大行城,契苾何力會動軍於鴨緑, 所以不得志者,虜未有豐也。今男生兄弟閱很,爲我鄉導,虜之情僞我盡知之,故曰必 納款。侍御史賈言忠計事還,帝(高宗)問:「軍中云何?」對曰:「必克。先帝(太宗)問罪 六。郭待封以舟師濟海趨平壤。三年(是歲改元總章)勣率[薛]仁貴拔扶餘城,它城三十皆 爲遼東道行軍大總管,轉燕趙食廥遼東。明年勣次新城,城人縛戍酋出降,勣進拔城十有 民。徙安東都護府於新城。藏以永淳初死,舊城往往入新羅,遺人散奔突厥靺鞨。 功者,授都督刺史令,與華官參治,仁貴爲都護,總兵鎮之。總章二年大長鉗(鉗 走新羅。偘徙都護府治遼東州。儀鳳二年授藏遼東都督,封朝鮮郡王,還遼東,以安餘 佰壹咸亨元年條作劍) 牟岑率衆反,立藏外孫安舜爲王。韶高偘[等]討之,舜殺鉗牟岑, 泉]蓋蘇文死,子男生代爲莫離支,與弟男建、男産相怨。男生據國內城, 蓋蘇文弟亦請割地降。 韶新羅纂集士馬,應接大軍。新羅遣五萬人入高麗南界,攻水口城,降之。 [乾封元年]九月[龐]同善破高麗兵,男生率師來會。 唐會要玖伍新羅條 收凡五部百七十 遣子獻誠入朝 擢酋豪有 以李勣

唐會要玖伍百濟條(參考舊唐書壹玖玖上、新唐書貳貳拾百濟傳)略云:

地及高句麗南境,東西約九百里,南北約一千八百里」,語較明悉)。

虜皆北,法敏遣使入朝謝罪,仁問乃還(自「龍朔元年」至「仁問乃還」一節爲新傳之文)。自

百濟之地, 其界益大, 西至於海 (寅恪案: 唐會要云: 「既盡有百濟之

是新羅漸有高麗、

渡海至倭國, 王義慈及太子崇將校五十八人送於京師。其國分爲五部,統郡三十七,城二百,户七十六 百濟者乃扶餘之别種,當馬韓之故地,大海之北,小海之南,東北至新羅,西至越州, 萬。至是以其地置熊津、馬韓、東明、金漣、德安等五都督府,各統州縣,立其酋長爲都 ,百濟懷二,數年之間朝貢遂絶。顯慶五年八月十三日左衛大將軍蘇定方討平之, 虜其 與新羅爲仇讎。貞觀十六年與高麗通和,以絕新羅入朝之道。太宗親征高

下篇 外族盛衰之連環性及外患與内政之關係

子扶餘豐於倭,立爲王。龍朔元年[劉]仁軌發新羅兵往救,二年[劉]仁願遣劉仁軌破[其 督刺史縣令,命左衛郎將王文度爲都統,總兵以鎮之。[舊將]福信與浮屠道琛反, 迎故王

招還遺人。 衆], 豐走, 不知所在, 麟德二年與新羅王會熊津, 諸城皆復。 帝(高宗)以扶餘隆爲熊津都督,俾歸國,平新羅故憾, 刑白馬以盟, 仁願等還, 隆畏衆攜散, 亦歸京師。

自一福信與浮屠道琛反」至「亦歸京師」一節爲新傳之文。)

新 唐書貳壹陸上吐蕃傳(參舊唐書壹玖陸上吐蕃傳及舊唐書捌叁新唐書壹壹壹薛仁貴傳)略云: 吐谷 蕃之入,召宰相等議先擊吐蕃,議不決,亦不克徙。咸亨元年入殘羈縻十八州,率于 龜茲撥換城,於是安西四鎮並廢。 自是歲入邊,破有諸羌羈縻十二州。總章中,議徙吐谷渾於涼州,傍南山。 出討吐蕃, 渾 而 有其 地 並護吐谷渾還國, 師凡十餘萬,至大非川,爲欽陵所拒, 韶薛仁貴爲邏娑道行軍大總管, 阿史那道真、 王師敗績 帝(高宗)刘 郭待封副 翼取

叶 寅恪案 終不能有,則以吐蕃熾盛,西北危急, ,現狀之政策。惟大同江以南之地實際雖不能有,而名義尚欲保留,及至玄宗開元全盛之 而致大敗之事可知也。自此以後,高麗廢而新羅、渤海興, 高 麗時代高宗獲勝之重要原因在 更無餘力經營東北。 乘 高麗之内亂及據 新羅、 觀其從新克高麗勝 唐室對於東北遂消極採 百濟之形勢。 將薛 然既得其國 仁貴以討 退守

古史者讀之,不能不為之驚心怵目,感歎不已也。 即此虚名亦予放棄,斯誠可謂唐代對外之一大事。兹特逐錄關係史料全文於下, 治吾國中

册府元龜玖柒壹外臣部朝貢門云:

[開元二十四年]六月,新羅王金興光遣使賀獻表曰:「伏奉恩勅; 浿江以南宜令新羅安

雖丹素爲心, 而功無可效, 以忠正爲事,

而勞不足賞。

臣奉絲綸之

旨荷榮寵之深,粉骨糜身,無繇上答。」

降雨露之思,發日月之韶,

錫臣土境,

廣臣邑居,遂使墾闢有期,農桑得所,

!臣生居海裔, 沫化聖朝,

中國未能增強,大和三年南韶遂陷邛、戎、嶲三州,入掠成都(見舊唐書壹玖柒新唐書貳貳 開始衰弱,文宗以後愈見不振,中國自韋皋帥蜀,定與南詔合攻吐蕃之策,南詔 中 南蠻傳南詔傳,及舊唐書壹玖叁杜元穎傳、新唐書玖陸杜如晦傳附元穎傳),西川大困。 韶與其他外族盛衰之連環性, 觀前引關於吐蕃諸條,其概略已可推知。吐蕃之國勢自貞元時 屢 得 勝 通 貢 而

初安南都護李琢爲 政 貪暴, 群蠻怨怒,導南韶侵盗邊境,自是安南始有蠻患。

同書同卷大中十三年末條略云:

鑑貳肆玖大中十二年六月條略

云

初 章皋在西川開青溪道以通群蠻,使由蜀入貢。又選群蠻子弟,聚之成都教以書數,欲慰悦

時,頗擾邊境。會宣宗崩,中使告哀,豐祐亦卒,子酋龍立,禮遇[使者]甚薄。 龍不遣使來告喪,又名近玄宗諱,遂不行册禮。酋龍乃自稱皇帝,遣兵陷播州。 賜與,所從傔人寖多,杜悰爲西川節度使,奏請節減其數,韶從之。南韶豐祐怒,自是入貢不 羈縻之。如是五十年, 羣蠻子弟學於成都者, 殆以千數, 軍府頗厭於廪給。 又蠻使入貢, 上(懿宗)以酋 , 利於

胡注云:

爲南韶攻蜀攻交趾張本。

患而已, 為敵之故, 然則,宣宗末世南詔始大為邊患。其強盛之原因則緣吐蕃及中國既衰, 當別於後述之,茲暫不涉及。又凡唐代中國與外族之關係今已論其重要者, 此所謂外族盛衰之連環性也。 至中國内政所受之影響直關唐室之覆亡,不僅邊境之 其鄰接諸國俱無力足與 其餘雖從

然可以前所言之義例推之也。

未遑詳盡論述之也。 於宗教文化者, 和平及戰爭互相接觸之頻煩,尤甚於以前諸朝,故其所受外族影響之深且鉅,自不待言。 中國無論何代 固非今所論之範圍 即當堅持閉關政策之時,而實際終難免不與其他民族接觸,李唐一代其與外族 ,即直接有關內部政治者,亦只能舉一二大事,以為例證, 但關

鄴侯家傳論府兵廢止之原因,其一為長期兵役,取劉仁軌任洮河鎮守使為例證(見玉海壹叁捌

以 代府兵為兵農合一制一點,恐讀者尚持葉水心兵農分離説而不之信,請略舉一二例證,以袪其 故可據以 仍免庸調 番衛士所得勝任。然則鄴侯家傳所述誠可謂一語破的,此吐蕃之強盛所給予唐代中國內政上 大之影響也。(關於府兵制前期問題,詳見拙著隋唐制度淵源略論稿兵制章,茲可不論, (直諫類貞觀三年韶關中租稅免二年條(參唐會要捌伍團貌雜録條及魏鄭公諫録 制 周之時期者, 豪户者不同, 叁所引, 一為通典陸食貨典賦稅下載唐高宗龍朔三年七月制「衛士八等已下每年放還,令出軍 其疆土又延包中國西北之邊境, 推定龍朔三年七月制中「八等」之「等」乃指户籍等第 此制之前載[高祖武德]九年三月韶「天下户立三等,未盡升降,宜為九等」之文。 通鑑貳叁貳貞元二年八月條亦採自鄴侯家傳也)。蓋唐代府兵之制其特異於西魏 實在設置軍府地域内兵農之合 即此 .制已推廣普及於設置軍府地域内全部人民之確證也。 二為戈本貞觀政 故不能不有長期久戍之「長征健兒」, 0 吐蕃強盛之長久, 為與唐代接觸諸外族之所 而言, 然則此 制與其初期僅籍六等 而非從事農業之更 最

國家衛士不堪攻戰豈爲其少?若精簡壯健,人百其勇,何必在多?」 右僕射封德彝等並欲中男十八已上簡點入軍, 勑三四出。[魏]徵奏以爲不可。太宗怒, · 勒:「中男已上雖未十八,身形壯大,亦取!」徵又不從。太宗曰:「中男若實小,自不 亦可簡取。 」徵曰:「若次男已上盡點入軍,租賦雜徭將何取給?且比年

唐制民年十六爲中男,十八始成丁,二十一爲丁,充力役。

人之身兼充兵務農之二業也,豈非唐代府兵制兵農合一之明證乎?斯事今不能詳論, 據魏徵「租賦雜徭將何取給」之語推之,則當日人民未充衛士時亦須擔負租賦雜徭之義務, 僅略述大

意,附注於此。)

響及戰時之財政經濟者,亦非所欲論, 新唐書伍拾兵志云: 迴紇與中國摩尼教之關係,論者頗衆,又不屬本書範圍,自可不言。其族類與中國接觸, 茲僅略述迴紇與中國在和平時期財政經濟之關係於下: 而影

乾元後迴紇恃功,歲入馬取繒,馬皆病弱不可用。

同書伍壹食貨志云:

迴紇有助收西京功,代宗厚遇之,與中國婚姻,歲送馬十萬匹,酬以縑帛百餘萬匹,

國財力屈竭,歲負馬價。

舊唐書壹貳柒源休傳略云:

同 ·書壹玖伍迴紇傳(參新唐書貳壹柒上回鶻傳)略云: [迴紇]可汗使謂休曰:「所欠吾馬直絹一百八十萬匹,當速歸之!」

苦之。 領馬一萬匹來求市,代宗以馬價出於租賦,不欲重困於民,命有司量入計,許市六千匹。 迴紇恃功, (貞元)八年七月,以迴紇藥羅葛靈檢校右僕射,仍給市馬絹七萬匹。回鶻請和親,憲宗使 動至數萬馬 是時特韶厚賜遣之,示以廣恩,且俾知愧也。是月(大曆八年十一月)迴紇使使赤心 自乾元之後屢遣使以馬和市繒帛,仍歲來市,以馬一匹易絹四十匹(新傳絹作 , 其使候遣, 繼留於鴻臚寺者非一。蕃得帛無厭, 我得馬無用 朝廷 甚

「可鳴」遣尹維朱再青季,未报,可干以三千奇至的新唐書貳壹柒上回鶻傳(參考李相國論事集)略云:

有司計之,禮費約五百萬貫,方內有誅討,未任其親。

非損寡得大乎?今惜昏費不與,假如王師北征,兵非三萬,騎五千,不能扞且馳也。又如 多,臣謂不然。我三分天下賦,以一事邊,今東南大縣賦歲二十萬緡,以一縣賦爲昏貲, 蕃結約解讎,則將臣閉壁憚戰,邊人拱手受禍,臣謂宜聽其昏,使守藩禮。 利哉?殆欲風高馬肥,而肆侵軼。北狄西戎素相攻討,故邊無虞。 回鶻]遣伊難珠再請昏,未報,可汗以三千騎至鸊鵜泉。於是振武以兵屯黑山, 十全之勝,一歲輒罷,其饋餉供擬豈止一縣賦哉?」帝(憲宗)不聽。 禮部尚書李絳奏言:「北狄貪没,唯利是視, 比進馬規直,再歲不至,豈厭繒帛之 今回鶻不市馬, 或曰:降主費 治天德城 若與吐

白氏長慶集肆新樂府云:

陰山道。疾貪虜也。

號可敦 好,馬漸多。陰山虜,奈爾何 令疏短織。合羅將軍呼萬歲,捧受金銀與繒綵。誰知點虜啓貪心,明年馬來多一倍。 道, 飛龍但印骨與皮。五十匹練易一匹,練去馬來無了日。養無所用去非宜,每歲死 嫌絲不足女工苦, 遠爲可汗頻奏論。元和二年下新敕,内出金帛酬馬直。 陰山道,紇邏敦肥水泉好。每至戎人送馬時,道旁千里無纖草。草盡泉枯馬病 疏織短截充匹數。藕絲蛛網三丈餘,迴紇訴稱無用處。咸安 仍韶江淮馬 價練,從此 公主

寅恪案:唐與迴紇在和平時之關係中,馬價為國家財政之一大問題,深可注意。李絳所言許昏 迴紇之利, 不來侵邊境也。 憲宗豈是不知?而終不聽者, 白香山 高新樂府之陰山道一詩即寫當日之實狀者,據舊唐書肆捌食貨志(通典陸 實以中國財力有所不及, 故寧可吝惜昏費,而僥倖其

食貨典租稅下同)云:

尺,至有五丈爲匹者,理甚不然。闊一尺八寸,長四丈,同文共軌,其事久行,立樣之 惡不得至濫,任土作貢,防源斯在。而諸州送物,作巧生端,苟欲副於斤兩,遂則加其丈 元八年正月勑:「頃者以庸調無憑,好惡須準,故遣作樣,以頒諸州, 亦載此數,若求兩而加尺,甚暮四而朝三,宜令有司簡閱,有踰於比年常例,丈尺過 令其好不得過精,

多奏聞

然則唐代定制 1,絲織品以四丈為一疋,而迴紇馬價縑一疋長止三丈餘,且疏織, 宜召迴紇之怨

訴。唐室之應付此項財政困難問題,計出於無聊,抑又可知矣。

又迴紇在和平時期,與唐代中國政府財政關係既如上述之例,其與中國人民經濟關係亦有可略

册府元龜玖柒玖外臣部和親門(參考舊唐書壹叁叁李晟傳附基傳)云:

宣州别駕。 大和五年六月有龍武大將軍李慧之子某借迴紇錢一萬一千二百貫不償, 外,不得輒與蕃客交關,委御史臺及京兆府切加捉搦,仍即作件聞奏, 歲月稍深,徵索不得,致蕃客停滯,市易不合及時。自今已後, 下韶戒飭曰:「如聞頃來京城内衣冠子弟及諸軍使並商人百姓等多有舉諸 其今日已前所欠負 諸色人宜准粉互市 爲迴紇所訴, 貶慧 蕃客

委府縣速與懲理處分!」

唐書貳壹柒上回鶻傳(参考舊唐書壹貳柒張光晟傳及通鑑貳貳陸建中元年八月甲午條)云: 完 然 至 中 國 , 常 參 以 九 姓 胡 , 往 往 留 京 師 , 至 千 人 , 居 貲 殖 産 甚 厚 。 (上 篇 已 引 。)

其假 唐書 耶?斯亦唐代中國在和平時期人民所受外族影響之一例也。 「順演壹 借 迴紇 勢力僑 下西域傳康國傳(上篇已引),九姓胡即中亞昭武九姓族類 居中國, 居貲殖産, 殆如今日猶太商 人假借歐美列強勢力來華通商致富 所謂 西域賈胡

新唐 書壹壹 『書壹 肆 肆捌康日知傳附承訓傳(參考舊唐書壹玖上懿宗紀咸通四年五年九年十年諸條, 崔融傳附彥曾傳等)略 Z

咸 級, 破, 射義成軍節度使徐泗行營都招討使, 使崔彦曾慰安之, 入徐州 通中南韶復盜邊, 武寧兵七百戍桂州(寅恪案: 勛以[其父]舉直守徐州(承訓使降將張玄稔破徐州),勛聞徐已拔, 餘皆溺 將南趨毫。 六歲不得代。 承訓悉兵八萬逐北,沙陀將朱邪赤衷急追。 據之。 劫戰械, 死 帝遣中人康道隱宣慰徐州 閱三日, 承訓兵循涣而東, 次潭 推糧料判官龐勛爲長, 列校許信、 州 得勛屍 監軍詭奪其兵 趙可立因衆怒, 賊走蘄縣, 率魏博、 勒衆 道隱還, 勋畏必誅, 官兵斷橋, 上道。 鄜延、義武、 殺都將, 新唐書陸伍方鎮表武寧軍節度使治徐 至宋州, 懿宗遣中人張敬思部 固求節度。 篡舟循 詣監軍使丐糧鎧北還 不及濟, 鳳翔、 勛焚南城, 江 帝乃拜承訓 下, 承訓乃縱擊之, 沙陀吐渾兵二十 益泉 自石山 爲刺史鄭處 送, 兵, 檢校尚 而西, 招亡 韶 不許 本 斬首萬 書 道 沖所 所在 右僕 觀 遂 即

傳 [唐書壹玖下僖宗紀 貳壹肆藩鎮澤潞劉悟傳, 傳附式 傳、 壹柒壹李光顏傳、壹捌捌楊行密傳、 (參考舊唐書壹陸壹李光顏傳, 又同書肆叁下地理志羈縻州 新唐書壹陸 壹捌. 迴紇州鷄田州條、 玖高仁厚傳、貳 伍鄭餘慶傳 佰捌宦者傳 陸 附從讜傳、 肆方鎮表興鳳隴 下田令孜 陸

欄大中五年條等)略云:

度使李福悉其師援之。時沙陀軍五百騎在襄陽,軍次荆門,騎軍擊賊,敗之,賊盡焚荆南 [乾符四年] 十二月賊(黄巢)陷江陵之郛,[荆南節度使楊]知温求援於襄陽, 山南東道節

師, 陀,成破賊之効,欲權歸北司,乃黜王鐸,而悦復光也。(中和三年五月條中篇已引。) 用殺賊無非手刃, 入陣率以身先, 郛郭而去。 [中和三年] 四月庚辰收復京城, 行營都統。時中尉田令孜用事,自負帷幄之功,以鐸用兵無功,而由楊復光建策召沙 力摧兇逆。伏自收平京國,三面皆立大功,若破敵摧鋒,雁門實居其首。 天下行營兵馬都監楊復光上章告捷曰:「雁門節度使李克 忠武黃頭軍使龐從等三十二都隨李克用自光泰門入京 」五月王鐸

史料關少, 寅恪案:唐中央政府戰勝龐勛、黃巢,實賴沙陀部落之助,蓋府兵制度破壞已久之後, 殆不易得其他可用之武力也。至黃頭軍疑出自 迴紇,與沙陀同為胡族。 未能 於此詳論。 總之, 觀於唐季朝廷之忍恥曲宥沙陀,終收破滅黃巢之效, 茲以其問題複雜 捨胡兵 則外族

與内政關係之密切可以推知也。

又新 唐書貳貳貳中南蠻傳南韶傳(參通鑑貳伍叁廣明元年條及胡注)云:

會西川節度使陳敬瑄重申和議,時盧携復輔政,與豆盧瑑皆厚[主和之高]駢,乃譎説帝

(僖宗)曰:「宣宗皇帝收三州七關,平江嶺以南,至大中十四年内庫貲積如山,户部延資 故宰相[白]敏中領西川,庫錢至三百萬緡,諸道亦然。咸通以來,蠻始叛命,再入 一破黔州, 四盗西川,遂圍盧躭,召兵東方,戍海門,天下騷動,十有五年,

賦輸不内京師者過半, 中藏空虚, 士死瘴癘, 燎骨傳灰, 人不念家, 亡命爲盜, 可爲痛

耕集及拙著秦婦吟校箋),藉東南經濟力量及科舉文化以維持之李唐皇室, 相關係之顯著例證也。夫黃巢既破壞東南諸道財富之區(見上篇所引舊唐書壹肆憲宗紀上 亡於黄巢 史家推迹龐勛之作亂, 二年十二月己卯史官李吉甫撰元和國計簿條),時溥復斷絕南北運輸之汴路 自咸通以後,南韶侵邊,影響唐財政及內亂頗與明季之「遼餉」及流寇相類, 而禍基於桂林。 由於南詔之侵邊, 而勛之根據所在適為汴路之咽喉, 」(新唐書南韶傳論)。 嗚呼 "!世之讀史者儻亦有感於斯言歟? (詳見崔致遠桂苑筆 此誠 遂不得不傾覆矣。 故宋子京曰:「唐 外患 與 内亂互 元和

陳寅恪集後記

我們從小就知道全家最寶貴的東西是父親的文稿。 好的箱子裝載, 家人呼之為「文稿箱」。 避日軍空襲時, 從抗戰逃難直至「文化大革命」, 首先要帶的就是「文稿箱」。 父親文稿都是用全 出 版父親文

集自然是父母

也是我們姐妹最大心願。

在 嘗侮食自 道變換 則 生坎坷 為我們 病殘齊 矜, 姐妹辛勞的最高報償 曲學 至, 抗日烽火中, 呵 始終未曾間斷學 世。 如今父親全集出版, 顛沛流離, 術創作。 生活窘迫, 雙目失明, 而父親為學一貫堅持 學界儻能於研究父親著述時, 暮年骨折卧床, 一獨立之精 神, 更知父親此 更經痛苦。 自由之思想」 種精 然而無論世 神之所

中 稿 棺尚遠。 一九六二 竟被洗劫一空, 由上海古籍出版社刊行, 送交蔣天樞先 終未能見到陳集出版。 」父親聽了很高興, 一年胡喬 木同志來訪, 生。 片紙不留。 蔣先生沒有辜員父親囑託 這只是父親文字的一部分。一九八八年六月,蔣天樞先生不幸突然病逝 父親生前已將出版文稿重任託付於弟子蔣天樞先生, 以為有望見到文集面世。 談及文稿, 「文革」 結束後, 父親直言: 一 我們姐妹將歷經曲折於一九七八年五 付出 「蓋棺有期, 豈知 艱巨勞動, 「文化大革命」 開始, 出版無日。」胡答: 於一九八〇年主持出版了陳寅恪文 不料文稿在 父母備受摧殘, 一月追 出 版有期 回的父親文 「文革」 蒼涼 蓋

我們姐妹繼續收集整理父親的文字。

内容 代為出版文集過程中已親自審定文集編目及有關事宜, 夢未定稿據一九八七年六月收回的殘稿作了校補外, 筆記等)。一九八〇年出版的寒柳堂集 集(高僧傳之部), 唐篔詩存), 出 則是期望從不同角度反映父親的學術生涯。 元白詩箋證稿, 版 的 陳寅恪集 書信集, 並講義及雜稿(讀書札記一集(舊新唐書之部 是在上海古籍出版社所刊印之陳寅恪文集基礎上進行的, 柳如是別傳諸集, (兩晉南北朝史講 金明 此次出 館 叢稿 版時 義、)、二集(史記 初編 其餘編排均不作變動 作了校對, 唐史講義、 故仍按父親原意進行。而此次刊行全 一編, 除寒柳堂集中 隋唐制 備課筆記、 漢書、晉書、 度淵 因父親生前 論文、 詩存併 源略論稿 唐人小說等之部 增加了陳寅恪詩 講 X 託付 詩 話 集, 唐代政治史述 評語 蔣 集所增 天 寒 福先 柳 E)、三 補之 堂記 聽課 附 4

利文長老尼詩偈集中文舊譯並補譯及解釋其 而未成之稿」, 父親的文稿墨跡命運亦如其人, 八七年六月兩次收回詩文稿,但仍未全部歸還。 有的 一就緒 在運輸途中被盜, 準 如蒙古源流注、 備出版的文稿, 世說新 或存放親友處丢失,現下落不明, 頻遭劫難, 於「文革」中全被查抄, 語注、 面世困難。抗戰時已遺失了多箱撰有眉識的書籍, 、詩等等(見一九四二年九月廿三日父親致劉 五代史記注、 即便抗 文革 佛教經典之存於梵文者與藏譯及中譯合校、 戰勝利後在清華大學授課 」過去撥亂 難覓其蹤。這些皆為父親「廿年來所擬著述 反正後, 雖於一九七八年五月及 (永濟信)。而父親 研 其中有的被 究之講義 円

其

為

海

内

資料 述。 枚舉 及參 此 生 外學者弟子, 目 前 版 歷 於上海古籍 經十 的 前 陳集為中 次父親 夫人錢 所收 的 留 而今陳集 與 等 這 輯 一二痕 年 難 以 錄 遺 些文字, 的 集之最全者 亦 澄 出 未 外 艱 並 作付梓, 難曲 我們 跡以自作紀念」, 業已付印, 學者深望, 女士, 版 曾 審 一得見。 敬 閱 社 作為祖 折 列 主 姐 讀 持 妹 書 華忱之先生 而 陳寅恪集終於面 札記 出版 的 一聯書 拟名 總之, 在 國文化 我們希望以此 此 此 友人以及相 店非 書之所以遲至今日方能面 謹 等多位先 T 散落在各處的文字, 向 陳寅恪文集, 陳寅恪全 他於 遺 一等將 常重 產 切參 生亦於 珍 視, 識或不相 獻給後世 賸有文章供笑駡」 集告慰逝去的父母, 世, 與 藏 「集」,轉又考 投入很大力量以 當此之時, 推 多年 此 黄萱先 動 識的各界人士支持幫 相知。 併 迄今尚 文革 生協助 幫助 致 慮到 世, 謝。 我們百感交集, 其 之時, 其 支持出 保證質 實並 劫 在 蔣先生做 有部分未能 父親自謂 後幸 我們 間 有許多我們始料未及的 不 尚望 版陳 存的 收 量 能 集父母 助。 T 全,故 一文字結習與生 寅恪 父親 獲見。 不少 同 後世 真不知何以 首先 時我 集的 ·詩文書: I 書 相知 作。 這次刊印 感 們 稱 函 人士 贈 謝 得 儻 陳寅 到父母 送, 校補 表述其 信 蔣 破 天樞 表 資 俱來, 顏 一示衷 恪 木 各 料 寒 父親文集 過 先 0 擾 種 柳 集 經過 親 1 支 程 堂 4 朋 我們 必欲於未死之 於此 持 故 於萬 感 中 記 更希望 夢 九八〇 幫 未 助 無 劉 因

0

細 出 不

節 定

先

陳 美延謹述 九九九年七月三日父親誕生一 百零九週年

陳寅恪集再版説明

斯年、 再版 手寫本唐代政治史略稿 聯 書店出 重印的機會我們做了少量校勘修訂工作, 致胡適 版的陳寅恪集十三種十四册, 致聞宥少數函件的 個别詞句作了變動; 時間認定, 自 00 如: 編排順序也相應有所變動。 略增改書信集、 糾正個别誤字、 年一月至二〇〇二年五月面世後, 詩集中的某些注釋; 圖片説明; 但未及增補近年 唐代政治史述論稿對 更正 時 書信 來 逾八載。 新 發 集中 現的 現藉 致 傅 照

仍一如既往得到大家的支持和幫助。在此,特向熱心提供資料及指出陳寅恪集中訛誤的讀者朋友,些陳寅恪信札、詩作,亦屬憾事。

致以衷心謝忱!

並希望此次再版重印後

陳流求 二〇〇九年四月

